

14261/A.

congl.
2W.



ACCESSION NUMBER

306313

PRESS MARK

1719

Card 15 June

APHORISMI
DE
COGNOSCENDIS
ET
CURANDIS
MORBIS

IN USUM DOCTRINÆ DOMESTICÆ
DIGESTI
AB

HERMANNO BOERHAAVE.



Mrij.

S. Trudgus

LUGDUNI BATAVORUM
Apud JOHANNEM VANDER LINDEN.
MDCCIX.

AT HORT 1 M 1

De

OGNOSCENDIS

ET

OGNOSCENDIS

OGNOSCENDIS

OGNOSCENDIS

GM 2199

OGNOSCENDIS



OGNOSCENDIS

OGNOSCENDIS

OGNOSCENDIS

VIRIS ILLUSTRIBUS.

PATRICIIS LUGDUNENSIBUS.

DANIELI VAN ALPHEN
SIM. FIL. J.Cto.

IN REPUBLICA LUGDUNO-
BATAVA

MUNERE SENATORIO PER
ANNOS TRIGINTA ET
NOVEM,

CONSULATU TER ET DECIES,

PRÆTURA URBANA TER,

HONESTE, SAPIENTER,
FELICITER,

FUNCTO.

PATRICK LUCAS
DANIEL M. ALLEN
SMITH, JAMES

IN REVEREND LUCAS
BATAVA

MINISTER SENATORIO THE
ANNOS TRIGINTA ET
NOVUM

CONJUGIO THE ET DUCIS

RECTORA URBANA THE

MONAST, SAPIENTIA
RECTOR

Teneto.

JOHANNI vanden BERG. J. C^{to}.

TERTIUM JAM CONSULI,

IN CONSILIUM SENATUS SUPREMI FOEDERATÆ REIP.

NUPER A SENATU BATAVO ADSCRIPTO.

NUNC AB IP SO SENATU SUPREMO PROVINCIIIS BRABANTIÆ, ET FLANDRIÆ,
MODERANDIS LEGATO,

VIRO

MERITIS ET HONORIBUS

INSIGNI.

STANLEY BERG J.C.

STANLEY BERG J.C.

STANLEY BERG J.C.

STANLEY BERG J.C.

STANLEY BERG J.C.

STANLEY BERG J.C.

STANLEY BERG J.C.

STANLEY BERG J.C.

STANLEY BERG J.C.

STANLEY BERG J.C.

STANLEY BERG J.C.

STANLEY BERG J.C.

STANLEY BERG J.C.

Quoties vitæ meæ, qualiacunque demum ea sint, decora cogito; toties ego Vos, Eximios horum AUCTORES, gratâ veneror memoriâ. Te scilicet, Amplissime ALPHENI, quem ætas, usus, sapientia, perfecit, quem Honesti, rarus ille, semper decoravit amor, primum fortunæ Fabrum colo.

Quum enim tribus & viginti abhinc annis ipse puer, & Patre orbus, majori hercle animo, quam facultatibus, Academiam ingrederer, Tua mihi amicitia profuit quam plurimum.

Conciliaverat quidem eam Vir Clarus, amplisque mihi beneficiorum officiis cognitus, JACOBUS TRIGLANDIUS. At-

Atque Ejus certê sancta mihi
semper memoria habebitur ! cœ-
terum Tu constanti adeo bene-
factorum impensâ me deinceps
devinxisti, ut postremi magnitu-
dine prioris pretium superare
semper studueris, eoque me re-
degeris denique, ut, quantum
possim, tantum TIBI debeam !
Tu verô, Amplissime BERGI, qui
meritorum in Remp. & Acade-
miam gloriâ invidiam ita vicisti,
ut BONI honorum nullam, vir-
tutum summam, æmulationem
accendas, ante septem annos ex-
citasti me, ut ex charâ mihi soli-
tudine in celebritatem prodirem.

Postquam tanti consilii fidu-
cia ad audendum me animaverat,
statim re ipsâ adesse quoque pla-
cuit.

Extem-

Exemplô enim accuratê adeo
PROCERIBUS commendasti , ut
Tuo notum indicio , Tui maxi-
mê testimonii fide , cathedræ ad-
movendum me curaverint.

Geminato deinde manentis
benevolentiaë effectû id egisti, ut,
suscepti muneris successus si quis
fuerit, ea Tibi primum debeat
gratia.

Hæc ego agnosco ! quâ verô a-
nimi alacritate, quo obsequio,
eloqui impos sum !

Hæc ut testari possem publi-
cê , speculatus diu , hanc oportu-
nitatem capto.

Ut enim Illi , qui scholam me-
am suâ frequentia exornant , vel
qui chartas has non inutiles ex-
perientur, sciant , se hoc nomine
plus VOBIS , quam mihi debere ,
jussi

jussi, ut , VESTRA in scriptus NOMINA libellus exiret.

Nec ut petam plura, sed ut data agnoscam, VOBIS eum offero !

Si levis hic, quo reverentiæ, obsequii, & gratitudinis, officia in Vos vertere conor, impetus placet, erit unde animo meo gratari velim.

Gratitudine enim aliud antiquius ipse, quod rependam, non habeo !

Valete OPTIMI PATRES!
V E S T R Æ mandatam curæ
R E M P. Capeffite feliciter !

Lugd. Batav. 18. Septemb. 1708.

LEC-

LECTORI AUCTOR.

En libellum , mole parvum ,
gravem materie, nec sine la-
bore natum. Regulas pro-
mittit , quæ causas morbo-
rum expedire , atque eventus secun-
dare, possint. Experimenta huic qui-
dem necessaria operæ Græcorum in-
dustria , diligentia Arabum , & Pau-
corum inter Recentes accuratio ,
suppeditavit. Anatome verò , & Me-
chanice, Nostris cultior , ratiocinio
filum & fundamenta dedit. Utraque
fida ! quidquid ignari clament , aut
invidiosi obstrepant. Oderunt quip-
pe & calumniantur isti , quæ nec at-
tingere valent : non ergò , nisi sibi-
met , vocali ignorantia nocent. Ubi
autem , dum affectibus indulgent ,
inania Paradoxorum & damnosæ
novitatis crimina obtentui sumunt ,
risum mehercle rerum gnaris exci-
tant ! Qui antiqua scrutati nova non
ignorant videbunt quid præstitum
sit.

LECTORI AUCTOR.

sit. Et hos ego solos idoneos operis iudices agnosco. Sciant autem Hi, quos equidem veneror, in privatos hæc exarata usus; assequentur ita & ordinis simul, & brevitatis causas. Auctores non citavi, quum nimii, vel nulli, nominandi essent. Nec speciosos Medicamentorum titulos morbis addidi. Cur? nihil Arti exitiale magis novi; neque verò ipse ullum cognosco, quin solo tempestivo usu tale fiat; hunc verò ubique indicare annisus sum non perfunctoriè. Postremò omnia hæc stylo scripta in Arte recepto magis, quam ad puritatem Augustæi seculi expolito; facilius enim ille capitur, huic forte Interprete foret opus; saltem plus exegisset, quam quo fruor, otii. Vale!


HER-

HERMANNI BOERHAAVE APHORISMI

DE

COGNOSCENDIS ET CURANDIS MORBIS.

PROLEGOMENA.

1. mnis humani corporis conditio, quæ actiones vitales, naturales, vel & animales lædit, Morbus vocatur.

2. Quæ verò disciplina Medicæ pars docet Morbum in ipso ægroto præsentem detegere, & curare, Praxis appellatur Medica.

3. Qui ergo actionum vitalium, naturalium, atque animalium exercendarum requisita ignorat, adeoque Vitæ causas nescit, & sanitatis, ille defectum illarum, id est morbos, cognoscere non poterit.

4. Sanatio porro est morbi (1) in sanitatem (2) mutatio: ponit ergo & hæc eadem

A

dem

2 P R O L E G O M E N A .

dem cognita (3) : quare cognitio & curatio morborum Scientiam Dogmatum, quæ explicant quid Vita, Sanitasque sit hominis, id est Instituta Medica, requirunt.

5. Illa mutatio (4) motum excitat, vel dirigit, per applicationem instrumentorum, quæ Artifex nosse debet, & regere: hinc ponitur perspecta victus, medicamentorum, & Chirurgiæ materia, præparatio, usus.

6. Dirigitur illa applicatio (5) à mente præsciâ futuri effectus: quo exigitur Scientia generalis legum, juxtâ quas actiones illæ exercentur; unde itaque doctrina Signorum, & Methodi Medendi necessaria est. Adeoque tradituro Praxin (2) omnes partes Institutionum Medicarum Scitu necessariæ prius sunt: Eas ideò ponemus notas, & demonstratas alibi.

7. Morbus (1), quum corpori inhæreat, erit effectus corporeus singularis determinatæ causæ.

8. Cujus accurata ablatio sanat.

9. Aufertur correcto malo singulari, vel per remedium in illud solummodò agens; vel auxilio in omnia simul æquâ vi agente. Hanc universalem, illam propriam Medelam vocabimus.

10. Utra-

10. Utraque (9) reperitur observatio-
ne, similitudine, vel ratiocinio ex hisce
binis.

11. Observatio habetur: 1. ex accura-
tâ historiâ morbi, enarrante causas, natu-
ram, effectusque mali. 2. ex enumera-
tione exquisitâ eorum, quæ profunt vel
nocent, dum casu, vel arte, morbo sub-
ministrata sunt. 3. ex introspectis cada-
veribus incisis eorum, quorum morbi
observati fuerant prius.

12. Ex similitudine concludit, qui ob-
servatis jam (11), adeoque cognitis, ca-
sum præsentem, hætenus ignotum, com-
parans de indole & curatione mali incog-
niti argumentatur.

13. Qui denique omnia, quæ ægro
accidunt, observando cognita (11), ada-
mum ponderat seorsum singula, com-
parat deinde inter se universa, confert iis,
quæ in sanitate contingunt, hincque tan-
dem severitate ratiocinii subacti aflurgit in
intellectum causæ proximæ, & auxilio-
rum ei tollendæ aptorum, verum Medi-
ci nomen meretur.

14. Ordo itaque optimus describendæ
historiæ & curationi morborum erit, qui
1. uniuscujusque mali phænomena indi-
vidua, propria, communia considera-

4 PROLEGOMENA.

- tè cognita, justo ordine, verâ fide, proponit.
2. Cuncta, quæ acciderunt ægro ab iis, quæ gessit, ingessit, retinuit, excrevit, vel sibi applicuit, dum morbus adfuit, enarrat.
 3. Auxilia victus, manus, medicamentorum, una cum verâ methodo applicandi, prout casus, vel ars obtulit, exponit.
 4. Ea, quæ ex hisce tribus, ut ex datis, juxtâ (13) dictam legem effectû rationis verissimè deduci queunt itâ, ut pro regulis Praxios accipi tutô possint, concludendo elicit.

15. Multitudo quidem morborum his ordinandis officit.

16. Sed ordinem dictat : 1. clarior morbi notitia. 2. simplicior ejus natura. 3. facillima sanatio. 4. ejus requisita ad alium intelligendum cognitio.

17. Ex quo fundamento (16) omnes sequenti serie tractabimus.

18. *Morborum itaque simplicissimorum species, & curatio præmittenda reliquis.*

19. *Solidarum ergo partium morbi explicandi & sanandi primum locum possulant.*

20. Fi-

20. *Fibræ simplicissima solida morbi explicati, sanati, inter hos (19) denique primi sunt.*

MORBI FIBRÆ SOLIDÆ SIMPLICIS.

21. **I**llæ partes, quæ ex fluido vasis contento secretæ, sibi mutuo vi vitæ applicatæ, Fibram minimam faciunt, sunt minimæ, simplicissimæ, terrestres, vixque mutabiles per eas causas, quæ in nobis viventibus deprehenduntur.

22. Quare in his (21), separatim spectatis, nullus occurrit morbus, qui Medicis observatus, sanatusque describitur.

23. Sed in fibrâ minimâ, ex adunatis his (21) concretâ, morbi simplicissimi sequentes considerari merentur: sunt enim frequentes, & fundamenta jaciunt intellectui aliorum, licet prætervisi, vel non bene cogniti.

MORBI FIBRÆ DEBILIS ET LAXÆ.

24. **F**ibræ (23) debilitas vocatur adunatio partium minimarum (21) cum nisu in cohæsiōem tam parvo, ut vel il-

lo levi motu solvi queat, qui Sanitatis effectu fit, vel non multum majori.

25. Hanc (24) antecedunt : 1. impedita ingestorum assimilatio in naturam liquidi vitalis sani; quæ debetur jacturæ nimiae humoris boni, & inertiae virium solidorum in liquida; vel alimentis magis tenacibus sua indole, quam virium permutantium in corpore virtus est. 2. debilis nimium applicatio partis unius (21) ad aliam, quæ oritur à nimis debili motu liquorum,isque ut plurimum à defectu motus musculorum. 3. nimia distractio fibræ rupturæ proxima.

26. Producit autem facilem vasculorum ex his (24) conflatorum extensionem, rupturam, in sua liquida contenta inertiam; unde Tumores ab distendentibus, Putrefactiones ab stagnantibus vel extravasatis liquidis; tum ea, quæ ex binis hisce sequuntur, infinita.

27. Ex hisce (24. 25. 26.) præsens, futura, præteritave noscitur; effectus prævidetur; & Curationis requisita perspiciuntur.

28. Hæc enim obtinebitur : 1. nutrimento, in quo materies (21.) abundet, quodque jam fere ita præparatum sit, ac in corpore sano & forti fit. Lac, Ova,
Jura

Jura carniū, decocta panis bene fermentati, vina aultera, primaria sunt. Quæ parvâ copiâ sæpe repetitâ sumenda. 2. aucto motu solidi & fluidi per frictiones; vectiones in equo, rhedâ, navi; ambulationes, cursus, exercitia corporis. 3. leni compressione vasorum, liquidorumque repulso. 4. medicamentis acido-austeris prudenter, leniterque usurpatis. 5. omni modô, quo nimia distractio tollitur.

29. *Laxitas Fibre* vocatur ea cohæsiō partium (21) inter se, quæ parvâ vi potest mutari itâ, ut fiat se ipsâ longior; unde patet, hanc esse debilitatis (24) speciem, & *flexilitatem* inde pendere; adeoque hæc omnia clare ex dictis (21. 22. 23. 24. 25. 26. 27. 28.) intelligi, ut & *diminutam Elasticitatem*.

30. Quin ex iisdem etiam respondetur ad hæc quæsitâ: Cur aquosa, & pingua alimenta dant fibras debiles? Cur frigidis, junioribus, quiescentibus, crescentibusque debiles? Cur terrestria, austeraque dant fibras fortes? Cur calidis, exercitatisque fortes? Cur Elasticitas robur concomitatur?

MORBI FIBRÆ RIGIDÆ, ET ELASTICÆ.

31. **R**igiditas fibræ nimia est illa adunatio partium minimarum (21), quæ tam validè faciat eas cohærere, ut non cedant illi actioni fluidorum, quæ superare debet hanc resistantiam, ut maneat Sanitas.

32. Hæc (31) sequitur eas causas, quas requirit sanatio fibræ debilis (28), si diu, & nimis perseverant.

33. Nata (31) verò facit vasa, quæ ex his fiunt, minus flexibilia, angustiora, breviora, liquidorum motui nimis resistantia, & quæ hinc sequuntur; vid. (50. 51. 52. 53.)

34. Ex quibus (31. 32. 33.) ipsis internoscitur id malum (31), simulque prævidentur inde secuturi effectus (33), neque latet Curatio.

35. Hæc enim efficitur 1. cibo & potu aquosis, lenibusque, sero lactis imprimis, oleribus mollissimis, farinosis dilutis, nec fermentatis. 2. quiete in aëre humido frigidiusculo, cum somno pleniore. 3. remediis aquosis externis, internisque, tepidè applicatis vel assumptis,

in-

MORBI FIBRÆ , RIG. ET ELAST. 9

insulsis, levissimis & blandissimis oleosis, similiter adhibitis.

36. Hinc elasticitas nimia intelligitur, curaturque ; quippe rigiditatis (31) ut plurimum comes, & effectus.

37. Cur pueris, fœminis, otiosis laxitas; contrâ verò adultis, viris, exercitatis, fibrarum, adeòque omnium solidarum partium rigiditas? & solutarum valida contractio?

MORBI VASORUM MINIMORUM, ET MAJORUM.

38. **V**asorum minimorum, ex fibris simplicibus (21.23.), applicatu vel intortu adunatis, factorum morbi ex iisdem causis eandem indolem, effectum, & curationem habent; ergò ex dictis (ab 21. ad 38.) intelliguntur.

39. Vasa majora ex minimis (38), applicatu, vel intortu, unitis, conflata habent duo diversa morborum genera. Horum prius pendet ex morbis minimi canalis (38), majorem hunc componentis, adeòque origo, natura, efficacia, curatio ejus inde (38) peti debet. Posterius verò pendet 1. à vi, quâ fluidum per majorem hunc canalem fluens ejus latera ex-

10 MORBI VAS. MINIM. ET MAJOR.

tendendo premit : quæ latera , ex aliis minoribus canalibus constantia , hâc pressione orbantur suo liquido , uniuntur quoad latera , concrescunt in fibræ (21. 23.) solidæ , sed crassioris , speciem : potestque idem & vicinis communicari vasculis. 2. à liquido cum vasculo proprio concrecente.

40. Inde vasorum debilitas , laxitas , robur , rigiditas , elasticitas , de quibus multa imperitis memorantur , clare intelligi possunt. Et meretur dignitas horum pertractationem.

MORBI VISCERUM DEBILIUM ET LAXORUM.

41. **V**asorum , & viscerum debilitas vocatur illa partium (23. 38. 39.) , hæc constituentium , cohæsiō , quæ tam levi motu tolli potest , ut imparia sint iis efficiendis , quæ Sanitatis & Vitæ ratio ab his postulat.

42. Quæ aliâ ætate , atque sexu , alia sunt.

43. Hæc debilitas oritur. 1. ab debilitate fibræ (24) , ejusque causis. (25) 2. à debilitate canalium minimorum (38) , atque causis hujus (38) . 3. ab inertia liquidi
per

per vasa majora (39) fluentis, quæ pendet à minutâ copiâ, fluiditate aquosâ auctâ, motu musculari torpescente.

44. Ab hâc debilitate (41), per suas causas (43) productâ, oriuntur multi morbi, qui falsô Temperiei, vel Congeniti habentur; primarii sunt: 1. facilis vasorum dilatatio, tumor; facilis horum compressio, inanitas; liquidi stagnatio; Cordi aucta resistentia; liquidorum cruditas; spontanea corruptio; ad actiones vitales, animales, naturales exercendas ineptitudo; & illa omnia, quæ ex his sequi solent, quæ ut infinita numero, itâ difficillima curatu, & fœcundissima novis morbis producendis sunt; maximè *καχεξία*, & *κασοχυρία*. 2. Facilis vasorum dissolutio ab internis, externisve causis, acribus, vel motis; effusio, stagnatio, corruptio, evacuatio liquidi ad vitam sanitatemque necessarii; interceptio motus fluidi per vasa rupta; corruptio eorum, quæ hoc motu vigeant; qui rursus varii sunt, maximè *φθίσις*, *ἐμπνύμα*, *ὑδρωψ*, *ἀνδροφία*.

45. Quæ (41. 42. 43. 44.) si quis accuratè observat, ille, non hujus modô (41), sed infinitorum & obscurissimorum morborum originem, præsentiam, eventum

12 MORBI VISCER. DEB. & LAXOR.

internoscet, & solus auxilia impetrandæ sanationi valida & tuta inveniet.

46. In applicatione verô horum, præsens debilitas tarditatem jubet; nec enim alibi perniciosior mutatio subita..

47. Ergô remedia (28) lentê, cautê, à primo in ultimum gradum, adhibenda sunt. Quorum usu roboratis vasis motus validus musculorum adhibeatur, donec omni effectu constet, satis compacta, solidata, & callosa evasisse Vasa & Viscera.

48. Hinc patet, omnia, quæ de facultate nutrimentorum traduntur, aliàs vera, aliàs falsa esse; Exercitia musculorum roborare fibras; Exercitia vectionis resolvere coacta, roborare laxa, nec dispergere vires; ipsum cruorem in robustissimis esse maximè densum, lentum, blandum; in tenerrimis dissolutum, levem, acrem; infinitos morbos, facie diversissimos, unâ sæpe radice hæerere posse, eâque succisâ tolli.

49. Ex iisdem cognitio & curatio laxitatis Vasorum & Viscerum habetur.

MORBI VISCERUM FORTIUM ET RIGIDORUM.

50. **R**igiditas nimia Vasorum & Viscerum nominatur illa partium (22

38. 39.) hæc componentium cohæſio, quæ non cedat illi motui, qui illa mutare & movere debebat, ut fierent ea, quæ Sanitatis & Vitæ tempore ab hâc mutabilitate fluebant.

51. Oritur 1. ab omni cauſâ fibræ nimis rigidæ (32.) 2. maximè à fibris, validâ vi propulſi liquidi vitalis admodum compaſtis ad ſe mutuô. 3. ab adunatione canalium minorum orbatorum ſuo liquido per violentam preſſionem, quâ vitale liquidum arterioſum canalium majorum latera premit, cujus maxima effectrix eſt valde exercitatus muſcularis motus. 4. ab concreto vaſe in unum ſolidum cum proprio liquido ſtagnante, exſiccato, coagulato.

52. Ubi obtinet in vaſis, producit effectus 1. ſimiles, vel eoſdem iis, qui à fibrâ nimis rigidâ (33) 2. facit in vaſis validum nixum, quo fibræ conantur ſe applicare ad axin ſui canalis; arctare cava ſua; premere, comprimere, repellere, expellere ſua liquida; hinc eorum motui à corde, adeoque & cordi reſiſtere; vix dilatari, hinc interrumpere æquabilem cruoris motum, adeoque omnium ſecretionum; minuere copiam cruoris aliter uno ictu ex corde expellendi; impedire

cordis evacuationem perfectam; polypos cruoris producere; fluidum comprimendo, & à fluidissimis spoliando, id condensare, suffocationes, mortem creare. 3. vulneratis vasis magnos hiatus creat per vim magnam, quâ trahuntur in sua sustentacula partes vasorum; discissis integrê cavitates minuit extremas, vel claudit.

53. Ex his (31. 32. 33. 34. 35. 36. 37. 50. 51. 52.) accuratê perspectis clara habetur doctrina, quâ noscitur præterita, præsens, futura, agens & actura vasorum rigiditas, elasticitas, vis, curatio.

54. Eam enim efficiunt 1. remedia curandæ rigiditati fibræ propria (35). 2. illa maximè, quæ liquidi vitalis copiam, densitatem, pressionem minuunt. 3. quæ motum muscularem suspendunt. 4. ea, quæ humectant, leniunt, emolliunt, diluunt, resolvunt, abstergunt.

55. Ex hisce omnibus (ab 21 ad 55.) morbi Partium Solidarum proprii intelliguntur, curantur; & ex iisdem clarescit, quid respondendum his quæstionibus: Quæ diversitas structuræ partium solidarum in ætate diversâ? Cur homo crescit, perstat, decrescit? Cur laxus, fortis, rigidus fit? Cur humidus, plenus, siccus? Cur morte naturali, vel fato senili moritur?

tur? & quo tum morbo? quinam morbi plerumque singulæ ætati proprii? quis victus, quæ vita, quæ medicamenta cuique tempori vitæ commoda? quænam fides, quæ utilitas doctrinæ de stricto & laxo in solidis? &c.

56. Vulnus hinc (16) jam primò pertractandum, post morbos solidi simplicissimos. Sed, quum vitia liquorum spontanea semper trahat secum, de hisce ante vulnera agendum erit, quæ nosci debent ante historiam vulnerum absolvendam.

57. Unde agetur primò de his Humorum morbis, qui in illis nascuntur sponte, dum vel sibi ipsis permittuntur, nullâ habitâ ratione vasorum, vel vitio incitati, torpentisve nimium vitalis motus.

DE SIMPLICISSIMIS HUMORUM VITIIS, ET SPONTANEIS.

58. **H**umores in homine vivo reperiundi, vel crudi assumptorum naturam retinent hætenus, vel vi actionum naturalium & miscelâ fluidorum humanorum indolem acquisiverunt nostris liquoribus similem.

59. Priores (58) vel ex plantis, vel ex aliis sunt hausta animalibus.

MOR.

MORBI SPONTANEI EX ACIDO HUMORE.

60. **L**iquida nostra confecta ex plantis farinosis, vel ex horæis fructibus, crudis, fermentatisve, si vires vitæ nostræ vincunt, eam in nobis indolem acquirunt, quam suæ naturæ per calorem humidum fotæ debent. Acrimonia acida, & glutinosum pingue hinc oriuntur maximè. Prior ex fermentatis inprimis & non fermentatis, posterius ex farinosis non fermentatis, coctisve nascitur.

61. Acida hæc acrimonia (60.) causas habet antecedentes 1. alimenta ex farinosis, succulentis acidis, recentibus, crudis, fermentibus jam, vel & fermentatis vegetabilium partibus. 2. Inopiam boni sanguinis in corpore hæc alimenta assumente. 3. debilitatem fibrosæ compagis (24. 29. 41.) vasorum & viscerum. 4. defectum animalis motus.

62. Sedem habet jam nata maximè primæ digestionis officinas, inde tardius cruorem, denique omnes humores inficit.

63. Producit ructus acidos, famem, morsum ventriculi, dolores iliacos, flatus, spasmos, inertiam bilis, mutationem ejus

ejus variam, chylum acidum, fœces alvi acidum spirantes. Hæc ejus effecta in stomacho, & intestinis.

64. In sanguine pallorem, serum chylorum acidum; hinc fœminis lac acidum, sudorem acidum, salivam acidam producit; inde pruritus, obstructions, pustulæ, ulcera, cruoris coagula, & ad circuitum ineptitudo exsurgunt; tum irritamenta cerebri, nervorumque; unde convulsio, turbata circulatio, mors.

65. Ex his (60. 61. 62. 63. 64. 65.) recitatis præsens, futura, præterita cognoscitur acida temperies; hinc prænoscentur ejus effecta; hinc curatio scitur.

66. Quæ perficitur: 1. alimentis antacidis ex animalibus, vegetabilibusque. 2. succis bono cruori similibus ex avibus rapacibus. 3. roborantibus. 4. motu valido. 5. medicamentis acidum absorbentibus, diluentibus, obtundentibus, immutantibus.

67. Quorum electio, præparatio, dos, applicatio tempestiva, innotescunt Medico ex cognito malo, ejus sede, ægrotante, &c.

68. Hinc patet cur pueris, pigris, virginibus, pauperibus, & certis artificibus hic morbus familiaris sit?

MORBI A GLUTINOSO SPONTANEO.

69. **G**lutinosum pingue ex vegetabilibus, habet causas antecedentes, 1. farinosa cruda, austera immatura. 2. inopiam boni cruoris. 3. debilitatem vasorum, viscerum, bilis. 4. imminutum motum animale. 5. dissipationem liquidioris per laxata vasa fecernentia. 6. retentionem crassioris debilitate instrumentorum excernentium.

70. Nascitur primò in primâ officinâ digestionis, hinc in cruore, dein in reliquis, inde derivandis, liquidis.

71. In primis viis facit prostratum appetitum; repletionis sensum; nauseam, vomitum; ingesti cruditatem; bilis inertiam; ejus inviscationem & consumptionem; pituitæ stomachicæ & intestinalis ortum; alvum tardam & tumentem; impedimenta chyli parandi, perficiendi, fecernendi.

72. In sanguine visciditatem, pallorem, immeabilitatem; in vasis obstructions, concretiones, tumorem album; impeditas secretiones; defectum subtiliorum; hinc minimorum canalium coalitum facit.

73. Hinc

MORBI A GLUTINOSO SPONTANEO. 19

73. Hinc coctiones , circuitus , secretiones , excretiones , motus vitales , naturales , animales omnes perturbantur , unde suffocatio , mors.

74. Ex his (69. 70. 71. 72. 73.) diagnosi , prognosis , anamnesis mali hujus patet ; nec verò , sanatio quid indicet , obscurum est.

75. Quæ obtinebitur : 1. usu cibi potusque bene fermentati , sale , & aromatæ conditi. 2. Jusculis volatilium animalium. 3. roboratione vasorum & viscerum 4. aucto motu. 5. medicamentis diluentibus , resolventibus , stimulantibus , biliosis , saponaceis. 6. frictu , calore , balneo , vesicatoriis.

MORBI EX ALCALINO SPONTANEO.

76. **N**onnullæ plantæ scatent materiâ , quæ sponte corrupta non acescit , nec coit , sed resolvitur in foetidum pingue Alkali : tales omnes fere Aromaticæ valde acres. Has verò rarò assument tantâ copiâ , ut morbum creent ex suo ingenio. Sin autem id contigerit , pertinebit ad acre alcali oleosum.

77. Ex animalium partibus confecta
no-

nostra liquida varia sunt : 1. pro varietate alimenti , quo se sustinent. 2. pro varietate partis, quæ assumitur.

78. Animalia enim , quæ herbis & aquâ aluntur, chylum acidum, vel facile acefcenrem , adeoque & tale lac , habent ; quod in nobis suam fequens indolem vegetabili nutrimento fimillima patrat. Vid. (61. ad 76.)

79. Quæ aliis nutriuntur animalibus , omnes succos facile alcalcfcentes habent.

80. Si alimenta , vi nostri corporis , (58) eô sunt redacta , ut jam liquores fecerint , quales in fano & robusto corpore inveniuntur post abftinentiam à cibo potuque per viginti horas, tum fi fibi relinquuntur in quiete, & calore, vel etiam fi moventur validè , naturam adipifcuntur ubique eandem putredinis incipientis.

81. In alimentis verò ex aliis animalibus , jam ftatim , ante mutationem corpori nostro adfcribendam , illa in putredinem vergens indoles fponte adefl.

82. Putredo hæc (80. 81.) fignificat eam conditionem humorum , cujus præfentiâ aqua exhalat ; Salina materies attenuata , acido orbata , vel & mutata , fit acris , volatilis , alcalina ; Oleofa pariter una

na parte tenuior , terrâ orba , fali illi acri permista , acris , volatilis , foetens evadit ; altera autem olei pars , terræ aquâ , fale , & oleo priori orbæ permista tenacissimè , abit in atram , densam , immeabilem fœcem.

83. Insecta , pisces , amphibia , animalia volatilia , repentia , gradientia , natantia , homines denique , ex propriâ suâ naturâ , in hanc putredinem (82) sponte vergunt.

84. Hujus putredinis (82) antecedentes causæ sunt : 1. cibi ex aliis animalibus comestis , excepto lacte herbaceo (78) , maximè ex infectis , piscibus , avibus rapacibus , ex vegetabilibus alcalescentibus. 2. abundantia boni cruoris , vel ejus jam putredini proximi. 3. virtus magna vasorum , viscerum , bilis. 4. Stagnatio , vel nimia agitatio , torpente , vel incitato animali motu. 5. Calor ingens diu & multum conciliatus corpori.

85. In primis viis facit sitim , prostratum appetitum , ructus nidorosos , sordes ori , linguæ , palato , faucibus amarescentes putridas , nauseam , vomitum putrefactæ biliosæ materiæ , cruditatem putridam , diarrhoeam biliosam , dolores I-

lia

liacos inflammatorios, caloris moleſti ſenſum.

86. In ſanguine producit diſſolutionem ejus putridam; acrimoniam alcalinam oleoſam volatilem; ineptitudinem ad nutriendum; aptitudinem ad conſumendum; minimorum vaſculorum deſtructionem; hinc omnes actiones ſolidarum & liquidarum partium turbat, depravat, deſtruit; unde circulatio, ſecretio, excretio variat; tum febres ardentes, urinæ & omnia ſecreta putrida, inflammationes, ſuppurationes, gangrænæ, ſphaceli, mors.

87. Ex his (76. 79. 80. 81. 82. 83. 84. 85. 86.) denuô diagnoſis & prognôſis æque, ac Curatio morbi liquidô conſpicitur.

88. Quæ perficitur 1. alimentis, potibusque, citô aceſcentibus, vel jam acidis, quô farinoſa in aquâ cocta, vel ad initium corruptionis digeſta, lac ejusque producta herbacea, fructus horæi, horum acidi crudi, vel fermentati vinoſi, acetofive, fucci. 2. acidis medicamentis ex vegetabilibus crudis, vel fermentatis, aut ſalibus & ſulphure vi ignis in acida converſis. 3. Salinis alcali abſorbentibus, ut eſt ſal gemmæ, marinus, & nitroſus. 4. Aquoſis diluentibus. 5. lenibus ob-

tun-

tudentibus , qualia farinosa vegetabilia emulsa , vel decocta , sunt. 6. Saponaceis abstergentibus acidis suboleosis , oxymelle , sapis acetosis. 7. quiete , somno , balneo vaporis , fomentisve.

89. Unde patet ubi , & cur acidus ructus nidorosum sequens bonus ? cur , & quibus convalescentibus salis ammoniaci sapor molestus ? cur sudor acidum spirans acutis salutaris ? quæ acrimonia acida , alcalina , biliosa , oleosa sit ?

90. Hinc tandem scitur , quid mali faciat nimius vel minor liquorum circulantium motus , & quantum ejus effectus variet pro varietate loci , ubi hærent , & humorum , in quos agit ? quæ à stagnante , vel ab extravasato , nocumenta ?

91. Pertractatis morbis Solidi , & Fluidi simplicissimis seorsum , agendum sequitur de iis , qui in Solido & Fluido conjunctim occurrunt simplices quam maximè.

DE MORBIS ORIUNDIS AB EXCESSU MOTUS CIRCULATORII SOLO.

92. **O**mnia fluida , quæ in ullo vase , ab arteriâ magnâ orto , continentur ,

tur , ex solo sanguine sunt secreta , qui paulô ante in corde dextro & sinistro mixtus erat , & referebat speciem unius liquidi.

93. Habet tamen & ibi, & tunc, globos majores, determinatæ molis, figuræ mutabilis, coloris rubri, & aquam pellucidam, leviolem, tenuiolem, partibus minoribus, sed ob pelluciditatem non cerrendis, constantem. Priorum congeries Cruor, posterior Serum appellatur. Microscopia utrumque demonstrant.

94. Rubrum concretum, & à fero ferorûm collectum, solâ quiete, & laxitate suarum partium citô resolvitur in serum ita, ut in id omnis fere cruor abeat.

95. Serum diu retentum in aëre moderatè calido & humido solâ quiete & laxitate partium resolvitur in tenuius, pellucidius, levius liquidum. Quæ crescunt pro ratione temporis.

96. Sanguis omnis (92) levi calore, parum superante salubrem, & cum paucò exhalantis dispendio, coit in massam solidam, scissilem, non solubilem per aquam, falem, oleum, spiritus. Atque idem fit calore per humida conciliato, singulari concretionis, & simili prioris, genere.

97. Ori-

97. Origo rubedinis (93.94.), & feri concrefcentis (95.96.) debetur vasorum actioni, & circulationis efficacix; ut chyli, lactis, & cruoris mutata indoles docet.

98. Auctus cruoris per vasa motus oritur Corde sæpius, & fortius contracto.

99. Cor sæpius & fortius contrahitur: 1. Cerebro in nimiam expressionem liquidi nervosi agente, ut in affectibus animi, & dolore: 2. irritato Corde per accelerationem motus cruoris venosi, frictione, vel musculis agentibus, pulsi; aut per acre sanguini inhærens aromaticum, salinum, acidum, alcalinum, purulentum, ichorosum, putrefactum.

100. Auctus motus cruoris per vasa efficit majorem vim pulsi cruoris in vasa expipientia; majorem renixum vasorum in cruorem; cruoris fortem compressionem; vasorum cruorisque attritum validum ad se mutuo; partium Sanguinis attritum validum inter se; calorem majorem totius; sanguinis exsiccationem diffuso aquoso; ejusdem viscositatem inflammatoriam facilem concrefcentem; sanguinis resolutionem in sales, oleaque volatilia & acrida; vasorum auctam ad initia amplitudinem; liquidorum crassiorum in tenuiora

26 DE MORB. OR. AB EXC. MOT. &c.

vasa impulsum; horum obstructiones, destructionesque, inflammationes, suppurations, gangrænas, sphacelos, scirrhus; & quæ ex his infinita sequi possunt.

101. Cognoscitur ergo aucta circulatio notis ejus causis (99), & effectis (100); sed imprimis pulsu celeri, duroque; respiratione veloce & laboriosa; calore ingenti.

102. Remedia ergo nimio motui compescendo valida sunt, quæ frequentiam, & vim contractionis Cordis imminuunt.

103. Quorum illa Mentem, hæc Corpus spectant.

104. Priora sunt, quæ magnos affectus, ratiocinio, excitamento contrarii affectus, vel divertendo, sopiunt.

105. Posteriora agunt quiete musculorum, laxatione venarum (54), mitigatione acris cujuscunque, diluendo, vel obtundendo (66. 67. 88.), doloris causas tollendo.

DE MORBIS, EX DEFECTU CIRCULATIONIS, ET PLETHORA.

106. **D**efectu motus circulatorii morbi fiunt in humoribus illi, qui pro-

proximè accedunt ad hos , qui quiescentibus spontanei nascuntur. (58. ad 80.) adeòque intellectus, & curatio horum inde peti debent. Atque ex his omnibus plethoræ indoles, causa, effectus, signa, remedia intelliguntur; si ad sequentia animus advertitur.

α. Plethora est copia boni cruoris major, quam quæ ferre possit eas mutationes, quæ vitæ inevitabiles accidunt, nisi inducantur morbi.

β. Hanc generat omnis causa, quæ multum laudabilis Chyli, & Sanguinis Conficit, simulque horum attenuationem, consumptionem, perspirationem impedit.

γ. Quo spectat vis contractilis viscerum Chylopoëorum magna, ut & in Corde & arteriis; simulque laxior venarum, & cæterorum vasculorum compages; cibi blandi facilè in chylum resolvendi; somnus multus; animus sedatus; quies musculosa; consuetudo mittendi sanguinis naturalis, artificialis.

δ. Effectus Plethoræ omnes pendent à rarefactione, quæ majori velocitati, atque inde nato calori, adscribenda: hinc arteriarum dilatatio tam Sanguiferarum, quam Lymphaticarum; mutata secretio;

28 DE MORB. EX DEF. CIRC. &c.

compressio generis venosi Sanguiferi & Lymphatici; suffocatio circulaturi; inflammatio; vasorum ruptura; suppuratio; gangræna; mors.

ε. Itaque facile cognoscitur præsens; prævidentur futuri effectus.

ζ. Curatio absolvitur missu sanguinis; labore; vigiliis; cibo acriori post evacuationes; omissione evacuationum sensim introductâ.

MORBI COMPOSITI SIMPLICISSIMI, OBSTRUCTIO, ET VULNUS.

OBSTRUCTIO.

107. **O**bstructio est obthuratio canalis, transitum tollens liquido, per eum transjiciundo, vitali, sano, vel morbofo, orta ex excessu molis transicuræ suprâ capacitatem vasis transmissuri.

108. Quæ oritur ex angustia vasis; magnitudine molis fluxuræ, vel utrisque concurrentibus.

109. Angustia vasis fit compressu externo, contractione propria, vel augmento crassitiæ in ipsis canalium membranis.

110. Ma-

110. Molecularum moles augetur viscositate fluidi, vel errore loci.

111. Ex utrisque verò à concursu causarum utriusque mali. (109. 110.)

112. Vasa externè comprimuntur.

1. à tumore vicino plethorico, inflammato, purulento, scirrhuso, œdematoso, ampuloso, aneurismatico, varicoso, tophoso, pituitoso, calculoso, calloso.
2. à fractis, luxatis, distortis, distractivè partibus duris, comprimimentibus vasa flexilia.
3. Ab omni causâ, quæ vasa nimis trahit, & elongat sive tumore, sive pressione partis extra debitum locum positæ, sive vi externâ trahente.
4. Ab externis comprimimentibus, quo vestes arctæ, fasciæ, pondus incumben-
tis corporis quieti in unam partem, ligaturæ &c. pertinent, motus, attritus, amplexus partis ad alia corpora.

113. Contractio vasi propria aucta, maximè spiraliū fibrarum, tum quoque longarum, cavitatem arcet, oriturque 1. ab omni causâ augente vim elasticam fibræ, canalīs, visceris. (31. 36. 40. 50. 51.)

2. ab tumore vasculorum minorum, quorum contextu majorum latera & cava fiunt, nimis impletorum. 3. ab imminutâ

causâ vasa extendente , sive inanitio , sive inertia fuerit : unde dissecti canales liquida propria coërcent brevi.

114. Augetur crassities in ipsâ membranâ valis 1. ab omni tumore (112. N. 1.) orto in iis vasis , quæ unita & contexta membranam efficiunt. 2. ab callis ibidem factis , cartilagineis , membranosis , ossibus (51).

115. Partium fluentium moles augetur , ut immeabilis fiat , vel 1. mutatione figuræ sphæricæ in aliam majori superficie incumbentem in aperturam vasculi ; vel 2. adunatis pluribus prius sejunctis in unam massulam.

116. Mutatur figura in primis , desinente æquabili , & undique simul , atque æqualiter , premente pressione molecularæ , proprio elateri jam commissæ , hoc est , languente motu , vel laxato vase , vel minutâ copiâ liquidi.

117. Adunantur molecularæ , quiete , frigore , gelu , exsiccatione , calore , motu circulari violento , & vase forti comprimente , coagulo acido , austero , spirituofo , absorbente , viscositate , oleositate.

118. Errore loci partes fluidi fiunt non meabiles , si in os dilatatum ad basin canalis conici ruit corpusculum finem tra-

nare

nare non potens. Plethora, motus auctus, rarefactio liquidi, laxatio vasis, dilatationem hanc præ cæteris creant; maximè si his prægressis, statim contraria horum sequuntur.

119. Unde causæ, & natura obstructionis cujuscunque patent.

120. Quæ nata in corpore vivo impedit transitum fluxuræ materiæ; reliqua impingentia sistit; horum actionem excipit; vas extendit, dilatat, attenuat, solvit; fluidum stagnans condensat; functionem integro fluore oriundam tollit; vasa inde irriganda deplet, ficit; capacitatem vasorum transmittendis liquidis minuit; copiam liquidi, velocitatemque per libera vasa auget; adcôque omnia, quæ inde pendere possunt, mala producit.

121. Inde pro diversitate vasis obstructi, & materiæ obstructantis, illi effectus (120.) variatis apparent phænomenis.

122. In vasis Sanguiferis arteriosis inflammatio primi generis fit, in Lymphaticis arteriosis dilatatis inflammatio secundi generis; in vasis Lymphaticis majoribus œdema; in minoribus dolores sine apparente tumore; in pinguiferis, ossibus, medullosis, nervosis, biliosis alia.

123. Qui verò sedem , naturam , materiem , causas , effectus obstructionum , hucusque (107. ad 123.) tradita novit ; illi signa , quibus futura , præsensque obstructio , ut & ejus effectâ , sciuntur , ignota non erunt.

124. Et cognitâ hac ejus diversitate , difficile non erit , propriam cuique curationem tradere.

125. Nam illa , quæ à compressu externo (112) , indicat ablationem causæ prementis , quæ , ubi possibilis , petenda ex secuturâ ejus descriptione.

126. Ea verò , quæ ab auctâ fibrarum contractione oritur , cognoscitur per signa , quibus visceris , vasis , fibræ nimia contractio scitur ; (34. 36. 40. 50. 53.) tum quoque illa , ubi hæc contractio à secundâ causâ (113. No. 2.) per suæ causæ signa clarâ ; ut & altera , quam inanitioni prægressæ adscripsimus (ibidem. N. 3).

127. Sanatur hæc obstructio (113. 126.) 1. per remedia contractionem nimiam fibræ , vasis , visceris emendantia. (35. 36. 38. 54. 55.) 2. maximè , si ipsi affecto loco applicari possit eorum virtus , quod halitus , fomenta , balnea , litus , fomenta efficiunt inprimis. 3. per auxilia ,
quæ

quæ vascula , membranas componentia , nimis impleta deplent. Quô evacuantia in genere , sed præprimis illis vasculis applicata , spectant , quæ sunt laxantia , diluentia , resolventia , attenuantia , deterfiva , evacuantia. 4. per illa , quæ callositatem factam resolvunt.

128. Verum illa obstructionis species , quæ ab hac causâ , rarò , si unquam , curari potest. Emollientia , & laxantia præcipua sunt. Unde mortis patet inevitabilis necessitas , & magna vitæ longæ per medicamenta parandæ difficultas.

129. Illa fluidi ineptitudo ad transeundum per vasa , quæ à figurâ sphericâ amissâ pendet , cognoscitur perspectis ejus causis (116) , quippe sensibiles plerumque sunt.

130. Sanatur verò remediis , quibus illa figura redditur. Qualia sunt , quæ motum augent per vasa & viscera. Ut stimulantia omnia , & roborantia ; tum motus animalis citior.

131. Liquidi spissior concreta moles , quum oriatur à tam variis & diversis causis (117) , etiam pro re natâ varia remedia , variam sanandi methodum requirit : quæ diversitas in singulis dein morbis indagata ipsa auxilia , & applicandi modum dabit.

132. At moles concreta in genere tollitur 1. motu vasis reciproco. 2. dilutione. 3. attenuante fluido advecto, permixto, moto. 4. Coagulante causâ eductâ.

133. Reciprocum vasi motum conciliant 1. quæ distendentes causas temperant. Ut est venæ sectio. 2. quæ vasa roborant. (28. 29. 45. 46. 47. 49.) 3. frictio, & muscularis motus. 4. stimulantia.

134. Diluit aqua calida inprimis si hausta, injecta, applicata; atque dein ad loca, ubi solvendum hæret, pulsa sit. Quo derivantia, attrahentia, propellentia spectant.

135. Attenuant 1. aqua, 2. sal mar. gemm. ammon. nitr. borax. fixus alcalinus, volatilis. 3. Sapones ex alcali & oleo nativi, compositi, fuliginosi, volatiles, fixi, bilis. 4. præparata Mercurialia. Quæ ipsa perducuntur ad loca debita per derivantia, attrahentia, propellentia.

136. Causa coagulans educitur attractione alterius fortius trahentis. Sic acida in alcalia, olea in alcalia, &c. trahuntur, quæ experimentis Chemicis inprimis inveniuntur.

137. Verum quum liquidum, in loca aliena pulsus, non penetrabile sit, hincque obstructions creat, producuntur
mult.

multi, malignique morbi, unde meretur id malum attente perpendi.

138. Scimus id factum, si novimus 1. causas ejus (118), quæ ut plurimum factis observabiles, prægressas fuisse. 2. His dein successisse contrarias. 3. ubi effectus ejus clarè cernimus (120. 121. 122.)

139. Facile quoque est prævidere, quid fiet ex hoc malo, posito per ea, quæ exposita sunt (120. 121. 122. 123.)

140. Curatio fit 1. impactum retropellendo motu retrogrado in vasa majora. 2. id resolvendo. 3. vasa laxando. 4. suppurando.

141. Impactum retrofertur 1. Evacuando liquorem, qui impactum urget, magnâ, subitâ S. M. unde nixu contracti vasis retro agitur. 2. frictione ab extremis vasis ad basin.

142. Impactum resolvitur remediis (133. 134. 135. 136. 137.) ante positis.

143. Vasa laxantur remediis (35. 36. 54.) propositis.

144. De Suppuratione dicetur in historiâ Inflammationis.

DE VULNERE IN GENERALE.

145. **V**ulnus est soluta unio partis mol-
lis, à corpore duro & acuto.

146. Causa ergò sensibilis ejus est du-
rities, acuties, motus instrumenti vulne-
rantis.

147. Subjectum pars mollis; adeòque
textura vasorum sanguiferorum, lymphaticorum, adiposorum, nervosorum, mem-
branosorum, tendinosorumque; tum ve-
sicularum, quæ ex his conflantur.

148. In quo subjecto (147) causa
(146) producit cohærentis separationem,
liquidi contenti effusionem.

149. Inde lædit actiones, quæ pendent
ab integritate partium, & ab determina-
to fluxu liquorum per vasa.

150. Quæ vulnera proinde occupant
cas partes, quarum integritas vitæ inse-
parabilis, Lethalia sunt.

151. Horum (150) autem alia inevita-
bili necessitate mortem ferunt.

152. Alia, sibi relicta, mortem infe-
runt, sed artis auxilio ita emendari pos-
sunt, ut mortis periculum absit.

153. Tandem ex non lethalibus, ne-
glectus, vel error, lethalia potest facere.

154. Pro

154. Pro varietate alterius cujusdam actionis, à parte integrâ prius exercitæ, etiam alia vulnerum effecta, atque inde variae appellationes oriuntur, vix ignotæ penito actionum Sanitatis.

155. Nec minor nominum, formarum, & effectuum varietas in vulneribus, à diversitate causæ vulnerantis (146) quoad figuram, modum adigendi, vim impingendi, ablationem ex vulnere, relictionem in eo, infectionem venenatam.

156. Tum etiam omnia eadem (155) variant pro differentiâ partis vulnus excipientis (147), quoad ejus duritiem, molitiem, nexum, situm, effectum, liquida contenta, facièm mutata.

157. Hujus multipliciter originem nosse ut opus, ita nomina subtiliter distinguere non juvat.

158. Si in corpore sano, robustoque factum vulnus in loco visibili, non irrigato magnâ quâdam arteriâ, nec nimis tendinoso, hæc oriuntur phænomena.

1. Partes, inter quas causa vulnerans adducta, sensim magis magisque à se mutuo recedunt, licet causa ablata sit, nisi punctura fuerit parva.
2. Cruor primò cum impetu effluit, dein sensim sponte sistitur.

B 7

3. Tum.

3. Tum crusta sanguinea cavo vulneris innascitur.
4. Et liquor dilutus, rubellus, tenuis effluit.
5. Tum verò labia vulneris incipiunt rubere, calere, dolere, tumere, retorqueri.
6. Atque eodem tempore febricula cum calore & siti adest.
7. Hinc tertio, quartove die, serius, vel ocyus, vulnere adest liquor tenax, albus, pinguis, æqualis, pus.
8. Simul rubor, calor, dolor, tumor, retorsio labiorum, febricula, cessant, vel minuuntur.
9. Et sensim cavum vulneris à fundo sursum, & ab ambitu versus centrum crescente carne impletur, cœunte margine albo, molli, æquali.
10. Postremò ficcatur vulnus, & obducitur cicatrice.

159. Si arteria non nimis magna, nec Cordi admodum propinqua, omninò transversim dissecatur, retrosiliens, atque inter solida vicina se recondens, sibimet obthuraculo est; & cætera ut (158) prius.

160. Si eadem (159) vulneratur transversim non tota dissecta, retrotractis fibris vulnus ampliatur; hinc Hæmorrhagia

gia

gia perpetua ; & , eâ sedatâ , à tenuitate cicatricis cedente Aneurisma.

161. Si arteria major tota dissecta , oritur perpetua , usque ad defectum animi vel vitæ , Hæmorrhagia ; inferius posita tabescunt , & putri exeduntur , sed lentâ , gangrænâ.

162. Nervi toti dissecti retrofiliunt , se recondunt , ramulos vulnere paulô superiores trahunt , tendunt , vicinis dolorem , obstructionemque creant , parti verô infra Vulnus positæ stuporem , immobilitatem , marcoremque.

163. Nervi puncti , vel dimidiatô discissi dolores , aliquando primò obtusos , nonnunquam vivos excitant , primò in loco vulneris , post per omnes nervos nexos , vicinosque ; hinc calores , tumores , rubores late sparsos , febres , deliria , spasmos , inflammationem , inflammati aperturam cum evacuatione acris , tenuis , & copiosissimi sæpe feri ; postea insensibilitatem , rigiditatem , exsiccationem , immobilitatem producant , vel gangrænam , & mortem.

164. Quæ eadem (162.163.) , parum mutata , etiam in Tendinibus diversimodè læsis obtinent.

165. Et Membranæ , tendinum , ner-

xorumque sæpe producta quum sint, iisdem afficiuntur morbis (162. 163.)

166. Quid lymphatica, adiposa, venosa vasa, & vesiculæ patiantur in vulneribus, quid efficiant, ex lege circulationis, & consideratione vicinorum facile intelligitur.

167. Si vulnus oculo patet, ejus præsentia, & natura scitur 1. Sensu ipso, absterfo impedimento conspectus, & suppressio cruoris fluxu. 2. Scientiâ anatomicâ vicinorum.

168. Vulneris autem absconditi præsentia, & natura noscitur. 1. ex Scientiâ anatomicâ, situ vulnerandi, modo & vi inflictus. 2. ex læsâ actione sequente vulnus. 3. ab excretis, intrâ vel extra corpus expulsi. 4. ab effectis supervenientibus, dolore, singultu, spasmo, tumore &c.

169. Ex cognitis (167 168.) determinatur prævisus vulnerum eventus.

1. Mors, vel Vita vulnerati.

2. Sanatio possibilis, impossibilis, integra, pro parte.

3. Curatio facilis, difficilis, brevis, longa.

4. Effectus à vulnere, peractâ sanatione, superstes futurus; ut tabes, insensibilitas, immobilitas, figura læsa. &c.

170. Mors

170. Mors inevitabilis à vulnere ex quinque effectis sequitur, adeoque necessariò Lethalia vulnera (151) Hæc sunt.

1. Quæ influxum nervosi liquidi à Cerebello in Cor intercipiunt. *α.* Cerebelli vulnera, & Cerebri profunda adeo, ut medullam oblongatam lædant multum. *β.* vasa sanguifera intrâ cranium soluta cum effuso cruore, qui pressione, vel conceptâ putredine vitam tollit, nec terebrâ levare potest ob conditionem loci, ut inferiora orbitæ Oculi, & ossis Temporum, ossis Ethmoidis, basios cranii. &c. *γ.* Medullæ Spinalis superioris profunda vulnera. *δ.* tum ea, quæ nervos cardiacos dissecant.
2. Quæ sanguinem Cordis effundunt ex ejus cavis vulneratis: unde vulnera Cordis profunda, in cava penetrantia, lethalia.
3. Quæ cruorem à corde, & à cerebro, cerebelloque derivant vel in cava corporis, vel extrâ illud, neque medellam capere possunt ob situm loci. Ut magna vulnera Pulmonis, Hepatis, Lienis, Renum, Pancreatis, Mesenterii, Stomachi, Intestinorum, Uteri in gravidis, Vesicæ circâ arterias ejus majores, Aortæ, Carotidum, Vertebraliū & simi-

similium arteriarum, venarumque.

4. Quæ Respirationem integrê tollunt; ut abscissio laryngis cum subductione fistulæ scissæ, vulnera magna bronchiorum, Vulnera lata, utramque cavitatem thoracis, cum admissu aëris, perforantia, vulnera diaphragma ab utrâque parte mediastini thoracis penetrantia, vel ejus nervosa dissècantia.
5. Quæ motum Chyli in cor tollunt; abscissio œsophagi, magna vulnera ventriculi, intestini tenuioris, superioris integra dissèctio, vulnus ductus thoracici, vel alvei chylosi.

171. Vulnera suâ naturâ lethalia, arte verò curabilia (152) sunt, & prædicuntur :

1. Vulnera Encephali terebrâ levanda.
2. Vulnera arteriæ, venæve majoris in loco, ad quem manus Chirurgi pervenire potest.
3. Viscerum, ad quæ manus & medicamenta cum effectû sanationis pervenire possunt.
4. Quæ mortem inferunt emissio suo liquido in cava illa, unde id educi sine discrimine vitæ potest; ut thoracis, abdominis, ureterum, vesicæ, intestinorum quædam vulnera.

172. Prædicitur lethale fore ex non lethali (153) per has causas:

1. Omissione purgationis effusi puris, unde tabes purulenta; veleffusi sanguinis, hinc putrefacti.
2. Commissio vitio in sex rebus non naturalibus.
3. Neglectu, vel errore Chirurghi.
4. Temperie naturali aut morbosa ægri.

173. Hinc renunciatio de Vulneribus; definitio temporis, intrâ quod lethalitas determinatur, peti possunt.

174. Ex historiâ pariter Vulnerum (ab 145. hucusque.) facilis erit prædictio eventuum aliorum, quæ (169) præfagienda habentur.

175. Phænomenôn autem (158. 159.) causa patet perito actionum vitalium, & animalium. Vid. Morb. Solid. & fluid. in genere præmissos.

176. Tunicæ arteriarum exteriores, illæsâ interiori, punctæ, sectæ, tusæ, distractæ, erosæ, impetu cruoris dilatantur, saccum formant, qui ad ovi sæpe magnitudinem crescit; callosos parietes accipit; pulsât; colore rubello splendet; compressus evanescit; laxatus redit; suam arteriam ampliat; vicina vasa comprimen-

do

do angustat. Aneurisma verum vocatur (160), cujus causa, signa, effectus sponte cernuntur.

177. Si ab iisdem causis, similiter vulnerata arteria, curata debilius firmatur, eadem fiunt. (176)

178. Ubi ab iisdem causis (176) omnes tunicæ simul ruptæ liquorem effuderint: in partes vicinas distentas, nec exeuntem, fit collectio extravasati cruoris, continenter aucta, & sine mensurâ, mollis, vix pulsans, livida, compressu vix evanescens, brevi putrescens, hinc gangrænam vicinorum creans. Aneurisma spurium est, (160) cujus causa, signa, effectus ex ipsâ hâc descriptione cognoscuntur.

179. Alii effectus arteriæ dissectæ majoris (161) ex physiologiâ sponte intelliguntur, ut & phænomena (162) primò nervi dissecti.

180. Ut verò clara causa habeatur mirabilium effectuum, qui in nervis punctis, vel partim dissectis apparent, juxta dicta (163. 164. 165.), sequentia consideranda ex Anatomicis, & Theoreticis.

181. Nervus omnis visibilis est fasciculus minorum nervorum, membranulis nexorum, arteriolarum, venularum, lymphaticis intertextis, unâ dein communi membrana vestitus.

Per

Per omnia hæc vascula , nervum componentia , perpetuô fluit liquor suis canalibus proprius à corde , cerebro , cerebello , & medullâ spinali. His omnibus vis contractilis fatis magna semper adest.

182. Ergô partes nervi integrê disseccti à loco vulneris versus firmas partes , quibus nectuntur , retrosiliunt , sub solidis ambientibus se recondunt , eorum vi comprimuntur , orificia claudunt sua , & suorum vasculorum , adeôque præter dicta (162) nihil damni.

183. Si sectus , vel punctus itâ sit , ut nonnulli nervulorum dissoluti sint , qui uniti majorem componunt , partes solutæ retrocedentes (182) trahent minimas fibrillas , quæ nectebant nervulos inter se & vascula (181) , unde fiet in his perpetua , lenta laceratio , adeôque dolor ingens , acutus , continuus. Partes verò adhuc cohærentes sustinebunt nunc solæ omnem vim , quam ante simul , ergô plus distrahentur , & lacerabuntur , adeôque acutissimè dolebunt ; & distractæ comprimuntur , ut transitus impediatur. Dum una pars soluta , altera cohærens , ita afficiuntur , vascula intermedia comprimuntur ; ergô cruor , lympa , spiritus sistuntur , urgentur , accumuluntur , unde

unde circâ partes inflammatio cruenta, lymphatica, & spirituoſa.

Inde nervi vicini, muſculi, vaſa, tenduntur, ſtringuntur, convelluntur, hinc cerebri, cerebelli, medullæ ſpinalis meningis trahuntur, vellicantur, cerebri actio turbatur.

Ex quibus ſequitur ſeries omnium phænomenon (163. 164. 165.) naturali neceſſitate.

184. Et intelligitur, quæ, & cur punctura, laceratio, vulnus nervi adeo funcſta? Item cur membranis, tendinibus, vaſiſque multis eadem fiant.

185. Ut vulnus Sanetur, opus erit:

1. Auferre ex eo illa, quæ, vel à liquidis & ſolidis corruptis, vel ab instrumento vulnerante, aut aliunde, ibi relicta unionem impedirent.
2. Supplere perdita novâ regeneratione ablata.
3. Unire ſeparata, & in unionem retinere.
4. Cicatricem naturali cuti ſimillimam obducere.

186. Fragmenta impacta metallorum, lapidum, ligni, vitri, globi tormentorum, thrombi cruenti, caro mortua, vel membranæ, oſſa fracta, primò tollenda, ſi proderit.

187. Consideratâ naturâ vulneris, partis vulneratæ, materiæ impactæ, roboris ægrotantis, symptomatum secuturorum, tolli, an relinqui debeant, judicatur.

188. Ex iisdem (187) definitur instrumentum, & modus, quibus tolli queant. (186)

189. Depurato sic (186. 187. 188.) vulnere, si ablatum quid fuerit de corpore, id repleri debet, generatâ iterum materiâ simili perditæ. Id fit, si 1. vascula arteriosa, lymphatica, nervosa, &c. ita se habeant, ut sua liquida bona excipiant, transmittant. 2. Si liquidum bonum naturale debitâ copiâ, & apto impetu fertur in illa vasa.

190. Hisenim (189) fiet canalium vulneratorum, retrotractorum, obthuratorum, compressorum, fere exsuccorum (158), impletio, humectatio, extensio, elongatio, applicatio ad alia, quæ ex reticularibus plexibus propinqua, & ope boni liquidi conglutinatio.

191. Et, dum hæc (190) ab omni puncto fundi & laterum æquâ vi simul fiunt, impletur ab omni parte ad centrum cavitas vulneris materie solidâ & liquidâ, amissis simili.

192. Ergô huc (189) requiritur 1. victus debitus, ut chylus, serum sanguinis, & materia nutritia blanda, glutinosa, nec facilè putrescens sit, sed facilis digestionis, & assimilationis. Decocta farinosa cruda, fermentata, Emulsiones, lac, Jura, fructus maturi cocti, olera lenissima, primaria sunt.

193. Cognita temperies ægri, tempestatis ratio, consuetudo, & natura comitantis morbi, docet quale, & quo modo præparatum ex his (192) cuilibet profit.

194. Acre, impetum nimis augens, vitandum. Salsum, Aromaticum, Acidum, olus acre, vinum, ergô vulneri mala.

195. Item quæ facilè putrescunt. Jura nimis spissâ, herbæ alcalæscences ergô obsunt; raphani, nasturtia, brassica, & similia.

196. Tum quæ difficulter in chylum, & sanguinem mutantur. Qualia sunt quæ sale, fumo, aëre induruerunt; vel quæ pingui multo scatent, ut lardum, pisces pingues, &c.; denique viscida, ut legumina crassâ, farinosa cruda.

197. Ad eundem scopum (189) conducunt medicamenta, quæ tollunt impedimenta nata consolidationi (190. 191.), & plerunque Decocti formâ exhibentur.

Illa

Illa ergo erunt varia pro varietate ejus impediementi, quod tollendum erit: nec ullum utile omnibus habetur.

198. Hinc pro re natâ fumuntur ex attenuantibus, inspissantibus, mitigantibus, excitantibus, specificê emendantibus, aperientibus, laxantibus, adstringentibus, adeoque sæpe ex oppositis.

199. Quorum quid eligendum, docet cognita natura vitii in ægro, & tituli horum Medicamentorum (197. 198.)

200. Aëris temperies sicca cum calore temperato optima.

201. Alvus fervetur laxa usu emollientium, laxantium, εκκοπρωτικῶν.

202. Somnus conciliandus anodynis, victu humido, narcoticis.

203. Animus sit hilaris. Venus vitanda. quies commendanda est.

204. Ut canales in debitâ conditione (199.) maneant, nec liquida in vulnere corrumpantur, sicque lædant actionem (189. 190. 191.) descriptam, aër arcendus, vulnus totum fovendum balsamicis vulnerariis lenibus, implendum carptis, ad æquabilem pressionem, nervisque amicis medicamentis.

205. Quibus (204.) in vulnere retinendis Emplastra profunt, vix aliud huic

scopo præstantia, quam tenacitatem.

206. Liquida ad vulnus allata, in vulnus effusa, fibræ semimortuæ, canales obstructi, tumefactique, creant in vulnere pus, ichorem, sordes, carnes spongiosas.

207. Quæ (206.) digerente, abstergente, corrodente, exsiccante auxilio tolli solent, sæpe & comprimendo.

208 Illa (207.) adhibenda, donec pus album, blandum, viscidum, læve, æquale adsit; sub quo sordes abstergentur, contusa & tumida consumuntur, corrupta ab aëre separantur, cava implentur, conglutinantur separata.

209. Tum ea, quæ carnem generare dicuntur, applicanda, quæ sunt digerentia leniora.

210. Si autem, peractis, quæ primo scopo (185.) satisfaciunt (186. 187. 188.), nihil ex substantiâ corporis ablatum deprehenditur, labia unienda ita sunt, ut partes naturaliter unitæ iterum sibi mutuò applicentur, atque itâ retineantur.

211. Horum prius absolvitur 1. situ conciliato parti illo, qui quiescenti aderat; 2. leni & æquabili partium ad se invicem compressu, ut in omni superficie contiguous sint, & quiescant.

212. Retinentur in unione 1. Empla-

stra

stris tenacibus, digitatis processibus, ad fines anstatis, utrimque a latere vulneris appositis, & per fila adducendis. Quæ locum habent in longis scissuris transversis cutis, vel partium laxarum.

213. 2. Circumductu Fasciarum, & appositu Spleniorum, ut partes dehiscentes (14. 1.) æquabiliter appressæ maneant, & coeant; quod determinato pressioni modo facilè fit. Convenit vulneribus inflatis juxtâ longitudinem partis vulneratæ.

214. 3. Suturis per acus chalybeas, rectas in minori, curvas in majori profunditate vulneris, acutâ acie, caudâ cavâ filum cerâ obductum abscondente, ad sufficientem à vulnere distantiam infixas, ad fundum usque adactas, sic pariter in altero labio eductas, quarum filo adstricto unita prius labia retineantur, dein levi splenio superductum filum colligetur: id repetitur à medio, vel ab angulo vulneris, ad fines ejus, pro necessitate. Hinc balsamo labia linienda, superpositisque levibus spleniis suprâ nodos, Emplastro tegendum est vulnus.

215. Conveniunt (214.) recenti, cruento, simplici, pleno, puro, transverso, obliquo, anguloso vulnere.

Nocent (214.) antiquo, sanioso, pu-

52 DE VULNERE IN GENERE.

rulento , sordido , contuso , substantiâ propriâ orbatō , crustis obducto , vasis magnis læsis periculoso , nimis profundo , valde inflammato , venenis infecto , in parte necessariō mobili hærenti vulneri.

216. 4. Acu manente vulnere per labia ejus transfixâ , filoque ei itâ circumducto , ut horum retroitum impediat , sed retineat unita. Convenit magnis , hiulcis , pendularum partium vulneribus.

217. Ultimus scopus (40.) attingitur , curando ut pars parti sic respondeat , quemadmodum olim in sanitate , sicque retineantur , ut nimis nec premantur , nec laxentur ; adurentia , stiptica , adstringentia vitando ; imprimis verō curando , ut in omni parte æquabiliter prematur vulnus. Quæ omnia obtinentur peractis , quæ descripta ab (41 ad 72.) , & dein imposito leni desiccante medicamento ; denique cicatricem spirituosus abluendo.

HÆMORRHAGIA.

218. Si cruor manat ex vulnere multus per suas (159. 160.) causas , sistitur 1. Causticis ignitis. 2. Corrosivis. 3. Adstringentibus. 4. circumstricto filo. 5. dis-

5. Dissectione integrâ. 6. Fasciis & splenio pyramidalis comprimimentibus.

219. Revulsio hic (218.) nihil juvat, nisi vascula læsa (159.) parva, & plethora adsit. Eadem de victu, potu, & internis medicamentis vera sunt.

DOLOR.

220. Si fibra nervosa, cerebro orta, ita extenditur, ut dissolutionem minuetur, fit Doloris idea.

221. Qui eô acrior, quô fibra rupturæ propior: eô autem mitior, quô naturali est tensioni propior.

222. Unde Dolor summus in eadem parte brevis, mitior diuturnus esse, & intendi potest, & remitti.

223. Causa Doloris ergô omne id est, quod talem extensionem (220.) facit.

224. Quo refertur 1. vis naturalis contractionis paucioribus fibris sustentata, dum quædam solutæ sunt (183.). 2. quod vas fibris nervosis contextum nimis replendo distendit; eô obstructio, plethora, cacochymia abundans, auctusque motus circularis, spectant. 3. quod vi distrahit, ut luxatio, tumor, vis externa. 4. omne vulnerans, & rodens.

225. Inde Doloris (220.) in vulnere (145.) causa multiplex (224.) cognoscitur.

226. Et effectus, inquires, jactatio, vigilia, febris, calor, sitis, siccitas, convulsio, gangræna, intelliguntur.

227. Et Anodynæ diversitas, pro varietate causæ, scitur.

228. Doloris causa tollitur ergo 1. laxatâ fibrâ. 2. resolutione concreti. 3. minuto motu & materiâ distendente. 4. ablata tractione inæquali, & violentâ. 5. lenito acri. 6. discussio eodem. 7. educto co., quod solvit fibras.

229. Doloris sensus tollitur, manente ejus causâ (224.) 1. nervo inepto ad sensum reddito compressu, dissectione, vel exustione. 2. Sensorio communi obtuso per vim narcoticam: atque his tolluntur nonnulli effectus (226.) ex Doloris sensu oriundi.

C O N V U L S I O.

230. **V**iolenta, invita, & alternê repetens contractio musculi Convulsio vocatur.

231. Cujus causa id, quod liquidum nervosum vi alternâ in musculos convulsos pellit.

232. Adeoque in ipso vulnere hæreret
po-

potest, five sit materies aliena irritans, five ipsa nervi læsi (163. 164. 165. 183. 184.) conditio, five evacuatio cruoris nimia prægressa.

233. Quin & effectus ejus, perturbatio omnium Actionum, cognoscitur.

234. Sanatur 1. Ablato irritante (186.) arte Chirurgi (187. 188.). 2. Acri lenito, vel dissipato. 3. sublatâ nervi conditione (232.) per remedia (228. 229.) descripta. 4. repletionem per lene, amicum, liquidum alimentum assiduô parcâ copiâ ingestum. 5. sedatâ simul hæmorrhagiâ (218. 219.).

235. Tumor, & Inflammatio levis vulneri bona; si augmentur, mala: balnea, fots, anodyna, antispastica, loco læso, & toti applicata ægro, profunt: de quibus in historiâ & curatione Inflammationis.

236. Sanguis in cava corporis per vulnus delapsus inde ocys educendus situ corporis, suctu per fistulam, si recens, vel dilutus primô, aperturâ vulneris dilatatâ, vel novâ.

237. Si vulnus inter firmas partes corporis descendit, via parandâ fordibus pressione, lotionem, ligaturâ, aperturâ vulneris novâ, vel dilatatâ.

238. Dilatio fit cultro, linteis carptis, spongia, radice Gentianæ, & similibus ficis immixtis, filo alligato, absorbtu humoris tumentibus, ficque dilatantibus.

VULNERA CAPITIS.

239. **V**ulnera Capitis lædunt vel sola externa communia; vel periofteum; vel cranium; vel duram Matrem; vel pia simul; vel Cerebri vasa, substantiam, corticem, medullam, ventriculos.

240. Sola externa læsa, scitur 1. ex causâ vulnerante, ejus figurâ lædente. 2. vi ejus parvâ. 3. loci vulnerati conditione, quoad figuram imprimis. 4. levitate symptomatum. 5. conspectu. 6. specillo.

241. Hæc (240.) licet levia videantur, sæpe ex propinquitate muscutorum, tendinum, futurarum, periostei, cranii, nervorum, vasorum, cerebri, periculosa fiunt; tum quoque à vi contractili partis læsæ.

242. Maximè, si contusio simul adest.

243. Aut, si sub parvâ aperturâ lata læsio fordes colligit.

244. Collecta enim materies (242. 243.) miros tumores, Erysipelas, œdema, dolores,

lores, convulsiones, ossis & periostei putredines, febres, mortem, creat.

245. Si sola ergo integumenta læsa sine dictis (241. 242. 243. 244.), facilis sanatio per ligaturam idoneam, & curationem descriptam ab (183 ad 239.), licet sæpe appareant maxima: inprimis verò juvat recens esse, dum incipit curari, ritè uniri, rarò deligari, & citissimè.

246. Si adsint verò descripta (241.), utendum remediis variis (183 ad 239.), pro varietate partis affectæ (241.), & mali.

247. Contusa hîc (242.) ritè digerenda his, quæ dissipare possint, vel suppurare, modò eligantur semper ea, quæ bona nervis membranisque (204. 207.), aut excindenda sunt.

248. Si adsit malum (243. 244.), dilatare cultro, & depurare opus (238. 207. 208.).

249. Pericranio læso, ut nudet diu os, vel ut putrefiat, os privatur vasis periostei, adeoque & suis, stagnat in his liquor, putrefactus squamam separat, unde os flavum, fuscum, nigrum, tandem foliolum deponit.

250. Cujus causâ (249.) interrupta vasorum continuïtas, frigusve aeris con-

stringens, & exsiccans fines vasculorum in osse, falso accusatâ ejus malignitate.

251. Effectus verò, augmentum malorum (249.).

252. Curatio fit 1. os leviter parvâ te-
rebrâ usque ad medium perforando, unde
exfoliatio cavetur, periossteum inde renas-
citur. 2. inde arcendo pus, faniem, pin-
guia, aquea, aërem, applicatis plumace-
olis sp. vin. Mastichino imbutis. 3. rarò, &
citissimè deligando.

253. Quâ arte ex punctis fodicatis
(252.), & undique, emergit nova sub-
stantia quasi carnea citò, tumque reliqua
(249.) sanantur, ut dictum (245. 246.
247. 248.).

254. Si Calvaria læsa est, pro varietate
causæ, fissâ, fractâ, contusâ, vel evul-
so fragmento spoliata erit, atque hæc vel
in unâ, vel in utrâque ejus tabulâ.

255. Sic affecta (254.) scitur 1. causâ
vulneris forti. 2. vulneris magnitudine
collatâ figuræ loci vulnerati. 3. specillo.
4. atramento affuso. 5. strepitu inter mor-
dendum. 6. visu fracti, contusi, vel
punctis pallidis colorati cranii. 7. tactu
ipso. 8. symptomatibus integumento-
rum; carne circâ septimam diem absce-
dente, dolore, naturâ puris tenui, &

gra-

graveolente , vulneris malignitate alienâ.

256. Effectus hujus mali (254.) 1. partis ossæ separatæ mors (249. 250. 251.). 2. infectio vicinorum. 3. hinc sæpe totius ossis infecti putrefactio. 4. Caries diploës. 5. Integumentorum cranii & cerebri corruptio. 6. inde mala affecti cerebri, convulsio, sopor, paralyfis, apoplexia, mors.

257. Ex quibus (254. 255. 256.) & cognitio, & prædictio hujus morbi noscuntur.

258. Et indicatur ad curationem 1. loci læsi detectio. 2. mundatio. 3. terebratio ossis. 4. Ejus periosteï regeneratio. 5. reliqui vulneris sanatio.

259 Locus detegitur 1. incidendo tegumenta læsa per scalpellum rectâ, angulosâ, perpendiculari, decussatâ sectione, in os usque impressâ, cautê in fractis & vacillantibus fragmentis, variâ electâ pro varietate loci, & mali. 2. separando secta à cranio exactê per scalprum. 3. infarctu carpti lintei.

260. Cruor, pus, sanies, sordes, spongiolis absorbentur; fragmenta, festucæ, squamæ ossis, si parva, libera ab omni membranâ, oculo mox patentia sunt,

eximuntur vossellâ; vel solvuntur forficibus; quæ mundatio artificialis.

261. Eadem nimis magna, hærentia vivis, abscondita, relinquuntur, nam vel sponte separantur, vel recrescunt ad viva. Hæc mundatio naturalis.

262. Si os contusum, album, fuscum, lividum, fissumve apparet, minutis hinc inde foraminulis perterebrandum, ut præscriptum (252.), ita enim viva exeunt, & mortua expellunt citò.

263. Quo ipso (262.) periostei regeneratio cita (252.).

264. Sanatio tum reliqui descripta est (245. 246. 247. 248. 253.).

265. Inde patet, cur angusta fissura periculiosior sæpe, quam ingens cranii contusio. (256.).

266. Et patet, hanc methodum (252. 262.) præferendam unctioni, scalpris, trepanis Veterum in his malis (249. 254. 256. 262.).

267. Cranium in junioribus intropressum, in adultioribus post fracturam intropulsum, Cerebrum premit; pro varietate loci pressi, pro variâ magnitudine, profunditate, acutie, puncturâ prementis, producit hebetudines, sopores,

res, vertigines, tinnitus, caligines, deliria, convulsiones, paralyfes, apoplexias, febres, mortem.

268. Quin & ipsum Cerebrum ita læsum, corruptum hinc inflammatione, suppuratione, gangrænâ, fungo, hæmorrhagiâ, similia mala (267.) parit.

269. Id vitii (267.) noscitur tactu, visu, ablatis integumentis (259.).

270. Ablatio pungentis, restitutio prementis in statum naturalem, conservatio hujus status, sufficiunt curationi.

271. Ergo detectum cranium (259.) molle in pueris, emplastro tenaci elevatur; in adultis, si firmum, elevatorio attollitur; si vacillans terebram non sustinet, perforanda juxta fracturam calvaria, ut vecti possit attolli impressum vacillans; juvat sternutatio, & animæ retentio.

272. In situ tenetur cavendo pressio- nem externam aptâ deligatione.

273. Fisso, fracto, contusove cranio, si arteriæ, venæ, Lymphatica vasa sub cranio rupta effuderint suos humores, hi premendo cerebrum producant mala (267.); tum putrescendo in pus, ichoremve inficiunt tenerrima vicina cerebri, unde rursum similia. Hæc vasa ex cranio in duram, ex hac in piam, inde in cerebrum,

finus, ventriculos decurrentia variis locis varia periculo & sanatione damna produ-
cunt.

274. Concussus validus capitis, integro sæpe cranio, eadem (273.) facit rum-
pendo, comprimendo.

275. Cognoscuntur mala hæc (273. 274.) ex notâ causâ; ejus impetu; loco excipiente; vomitu bilioso; visu, auditu, olfactu, gustu, tactu minutis, depravatis, sublati; vertigine, caligine, lapsu; sopore, stertore; resolutione; convulsione; delirio; lethargo; apoplexiâ; horripulatione; febre geminatâ; cruore per os, nares, aures effluente; rubore faciëi & oculorum.

276. Quis verô locus intrâ cranium sit læsus scitur 1. ex sensibilibus externis (249. 254. 255. 256. 262. 267. 269.), si adsunt. 2. invento loco cranii læso (255.) per artem. 3. ex tumore & rubore cutis capillis orbæ ad applicationem emplastri. 4. ex motu spontaneo manus ad certam capitis partem. 5. ex symptomatibus lateris unius paralytici, alterius convulsi.

277. Tum 1. cruor effusus ilicô tollendus. 2. loca infecta depuranda. 3. ossicula forte infixâ cerebro evellenda.

278. Extravasatus sanguis aufertur
1. resorbendo. 2. dissipando. 3. perforando cranium.

279. Resorbetur, si in venas, largomissu sanguinis, & succenturiatâ purgatione alvi, evacuatas, vi vitæ repellitur.

280. Hinc statim ad maximam copiam, ægro tolerabilem, utraque hæc evacuatio instituenda (279.), & si juvat, pro re natâ repetenda, iterumque, si post has administratas minuuntur symptomata. (273. 274.)

281. Dissipatio attenuati perficitur
1. resorbendo (279. 280.) partem dissipandi. 2. attenuando per diluentia aquosa, & resolventia calidè pota. 3. parti affectæ rasæ imponendo emplastra, cataplasinata, fomenta, ex discutientibus nervinis, cephalicisque. 4. auribus, naribusque eadem applicando.

282. Quæ (279. 280. 281.) si statim non tollunt, minuuntve valde symptomata (273. 274.), sed hæc vel persistunt, vel augentur, ilicô perforandum cranium, ut exitus detur humoribus (273. 277. 10.), & facultas depurationi (277. 20.), & evulsioni fragmentorum (277. 30.).

283. Locus, ubi terebra applicanda, cognoscitur 1. ex loco læsionis noto (276.)
ubi

ubi optimè fit , si nihil vetat.

184. Vetat 1. futura. 2. muscoli plurimi. 3. cavitates ossis frontis. 4. arteria major ossi inserta. 5. inferior situs loci. 6. vacillatio fracti, contusi, cariosi ossis. 7. Inæqualitas eminentis & excavati iterum cranii.

285. Tum, qui læso cognito (276.) proximus, applicandæ terebræ locus optimus est.

286. Quin, urgentibus symptomatibus (273. 275.), licet nullus locus certò inveniri queat (276.), tamen trepanum applicandum & ab unâ, & ab alterâ parte cranii in finem descriptum (277.).

287. Invento loco (276. 283. 284. 285. 286.), abrafo capillitio, inciduntur integumenta (259.), separantur à cranio, elevantur labia, ficcatur os, tegitur carpitis linteis, sistitur cruor (218.), lenitur dolor (227. 228. 229.), prohibetur inflammatio (235.), & si non urget valde malum, ritè factâ deligatione in diem sequentem relinquitur apparatus.

288. Tum capite firmato, auribus obturatis, aëre calefacto, deteriso ossi terebra cum stylo applicatur, æquabili, æqualiter & modicè actâ, fronti suppositâ, terebratione agitur, donec vestigium ritè sit impressum.

289. Exemto tunc stylo pergitur, terebrâ lentè adactâ, scobe assiduô crasâ, donec cruor erumpens, ossis mollities, mutatio soni diplôen attactam doceat; quæ sæpe non præsens frustrâ expectatur.

290. Eloto tum cruore, & per alcohol calidum compressio, exemptâ accuratè scobe, summâ cum cautelâ lentè, patienter, uno alterove gyro tantum agendus modiolus, assiduô everrenda scobs, perpetuô inspiciendum, an color in circulo exarato mutetur, tum variatâ pressione terebræ, pro vario colore apparente, os solvitur eo usque, ut parum adhærêscat, & æquabiliter.

291. Ubi color cærulescens, ejus per totum ambitum æqualitas, segmenti vacillatio docent, fere perforatum esse cranium, segmentum vecte, cochleâ, vel cochleari eximendum.

292. Dein asperitas lateralis ossis radenda lenticulari cultello, scobs demenda, via paranda cruori & sordibus exituris per sternutationem, animæ retentionem, & depressorium, foramen implendum, tegendumque tenui, molli linteo imbuto medelâ membranis amicâ, & aptâ lamellâ plumbi ansatâ.

293. Curatur dein ut vulnus membranæ (185. ad 239.)

294. Ita enim intra 40 & 50 dies separati sunt margines ossæ foraminis ; quotidie enascitur caro cavum replens , quæ sensim durior , tandem calli ossæ, cavati, vel eminentis formam adipiscitur: ubi debilitas & dolor aliquis remanent.

295. Inflammatio , suppuratio , gangræna , fungus excrescens membranarum , & ipsius etiam cerebri, tolluntur remediis, quæ his malis propria , tum applicatione antiphlogisticorum , detergentium , antisepticorum , filo , & lamellâ plumbeâ (292.).

296. Si cruor , pus , fordes sub membrâ latentesprehenduntur post perforatum cranium , audacter incidenda , pertundendave erit membrana cœercens.

VULNERA THORACIS.

297. **V**ulnera Thoraci inflicta , nec in cava penetrantia, cognoscuntur adspectu , stylo , aëre nullâ arte exilienter, corporis situ, ut in accepto vulnere, eodem.

298. Si obliqua descendunt illa (297.) suprâ , vel intrâ costas , sæpe dein pleurâ erosâ in cava Thoracis pus deponunt, maxime , si puri ad externa egressuro vi-

quâ

quâcunque arte impeditur. Tumque Empyema fit, & inde multa mala.

299. Quare in curatione abstinendum ab omni turundâ, emplasticis, compri-mentibus; contra depurantibus, balsami-
cis, plumaceolis, levi ligaturâ utendum,
& situ corporis apto.

300. In cava Pectoris adire scimus
1. consideratâ causâ cum amplitudine vul-
neris. 2. Specillo corpori, in situm vul-
nerandi reposito, applicato. 3. Aëris in
pulmonem inspiratu forti, dum clausum
vulnus, mox naribus & ore clausis nixu
expirantis edito, tumque detecto subitô
vulnere, expiratione. 4. Injectione.

301. Effectus talis vulneris sæpe 1. aë-
ris ingressi pressio in pulmonem, respira-
tioni hinc, & circulationi ineptum. 2. Ef-
fusus cruor in Thoracem, & accumula-
tus. 3. ejus extravasati, calefacti, moti,
clausi undique, putrefactio. 4. hinc pleu-
ræ, pulmonum, mediastini, diaphrag-
matis, pericardii maceratio, erosio, cor-
ruptio, foetor. 5. infiniti ex his oriundi
morbi.

302. Effusi hic cruoris signa 1. ortho-
pnœa. 2. decubitus in dorsum commo-
dior, in latus læsum difficilis, in sanum
impossibilis. 3. sequelæ descriptæ (301.).

4. pon-

68 VULNERA THORACIS.

4. pondus in Septo. 5. fluctuatio materiæ. 6. natura vulneris inflictæ.

303. Estque tum illicô educendus 1. situ, motu, nixuque corporis. 2. suctu per tubum flexilem, ad latera perforatum, obtusum ad finem. 3. injectu liquoris diluentis, resolventis, depurantis.. 4. dilatatione vulneris. 5. aliâ aperturâ inter secundam & tertiam costam veram inferiorem, ad quatuor à vertebra digitorum distantiam, factâ instrumento secante, sectione costis parallelâ, inter has mediâ.

304. Si nullis distenduntur turundis, rarô deteguntur, aër arcetur, suctu artificioso, & nixu respirationis debito expellitur aër admissus, brevi & optimê sanantur, si curabilia sunt.

305. Tumque præcaventur omnia illa & sæva symptomata. (301.).

VULNERA ABDOMINIS.

306. **A**bdominis vulnera non penetrantia in cavitatem noscuntur 1. stylo, & situ. 2. injectu. 3. causâ vulnerante cognitâ, & naturâ vulneris.

307. Si usque ad peritonæum penetraverint, debilitatis ibi tegumentis, herniæ occasionem præbent in corpore robusto.

308. Quare futurâ , ligaturâque his prospiciendum: in cæteris curatio communis vulnerum sufficit.

309. At eadem in cavitatem Abdominis ire liquet 1. Stylo, & situ. 2. Injectu. 3. Causâ vulnerante cognitâ, & naturâ vulneris.

310. Si tum omnia Symptomata levia, dolor, febris, inflammatio absunt, posito in vulnus ægro cruor non exit, injectus liquor immutatus redit, interiora illæsa scimus.

311. Illicô arcendus aër; ingressus fuctu & expirationis nixu excludendus; gastroraphiâ consuenda integumenta, turundæ auferendæ; balsami illitu, decubitu in vulnus, quiete corporis, victu leni, humido, parco, rarâ deligatione percurabitur.

312. Si acutus dolor, febris, inflammationis signa, cruor, ichor, bilis, pus, urina, stercus, foetor, ex vulnere excurrentia, causa vulnerans, situs & natura vulneris, præsentia considerantur, docebunt, læsa viscera abdominalia, & quæ.

313. Tum infinita mala sequuntur, partim 1. à naturâ viscerum, tenui vasculosâ, non musculosâ, difficillimæ circulationis, nec nisi clauso abdomine ab-

solven-

70 VULNERA ABDOMINIS.

solvendæ. 2. à functione læsâ visceris.

3. ab effusi cruoris copiâ, corruptione.

4. ab aëris ingressi, rarefacti, prementis, actione.

314. Unde lethalia sæpe sunt. At intestina læsa, & pertrectationi oblata, confundenda, si magnis; sibi relinquenda, si parvis vulneribus læsa sunt; & reliqua peragenda, ut (311.) dictum est.

315. Si per latum vulnus illæsum intestinum exit, foveatur animalibus vivis dissectis applicatis, vel fomento idoneo; reponatur; fiant reliqua ut (311.).

316. Si per parvum exeuns foramen, tumens flatu, inflammatu, fœce, reduci non possit; fotu, punctu, dilatatu vulneris reponitur.

317. Si vulnere, suppuratione, gangrænâ, fistulæ intestinalis pars ablata est, pars superior affluenda foramini vulneris.

318. Si omentum exierit, & humidum, calidum, rutilo cruore rubescens adhuc est, reponendum, ut (316.).

319. Si siccum, frigidum, lividum, ligaturâ, sectione, fotu, curatum reponendum est.

320. Missio sanguinis, clysmata, diætâ, blanda respiratio, quies, situs, palmaria hic remedia.

CON-

CONTUSA.

321. Si obtusum corpus motu, resistentiâ, vel pressu multa vascula simul confregit, læsio hæc Contusio vocatur.

322. Cujus idea, accumulatio vulnuculorum.

323. Effectus ergo, solutio continui lacerans, destructio plurium conterens, effusio liquoris in inania vicina, vel facta, & infinita mala, quæ ex his sequi possunt.

324. Pessimum verò ex his (323.), si, integumentis cohærentibus, interiora sic affecta (321. 322. 323.), ut liquida stagnent, cœeant, putrescant, unde ecchymosis, sugillatio, ulcus, gangræna, caries.

325. Lædit sæpe ossa, tumque sequuntur descripta (249. 250. 251. 254. 256. 257.), & medullæ læsio, unde ulcera, fistulæ, caries, putredines; habet se enim medulla in ossibus, ut Cerebrum in cranio (273. 274.).

326. Tum aliquando musculos, unde validæ suppurationes, gangrænæ paralyfes, contracturæ.

327. Imò sæpe ipsa viscera corrumpit;
tum-

tumque horum inflammatio, suppuratio, gangræna, scirrhus, functio læsa.

328. Ex quibus (322. 323. 324. 325. 326. 327.) facilis est explicatio tot mirabilium & miserabilium malorum, quæ ex contusione (321.) sequi solent, prædicti possunt, tam acuta, quam Chronica, certè infinita.

329. Cognoscitur præsens, simulque detegitur affecta pars 1. conspectu, tactuque. 2. Effectu doloris, stuporis, gravitatis, coloris mutati in rubrum, fuscum, plumbeum, nigrum, flavum, viridem, hæmorrhagiæ, gangrænæ, (323. 324. 325. 326. 327.). 3. Comparatione causæ motæ, & figuratæ, cum parte læsa.

330. Et bene scitur 1. internam, magnam nobilium viscerum contusionem curatu impossibilem, morborum causam & mortis esse. 2. ossium valde periculosam, curatu difficilem, inprimis circa juncturas, & medullam. 3. Cranii pessimam, ut historia præmissa docuit, ob viciniam Cerebri.

331. In curatione contusi semper tenenda resolutio, cavenda suppuratio, magis verò gangræna.

332. Resolutio fit, dum extravasatum aufertur sine ulteriori vasorum læsione.

333. Id autem contingit 1. id reddendo fluidum. 2. laxando vasa vicina. 3. agendo fluidum in vasa, ea evacuando, vel fricando.

334. Hinc larga missio sanguinis; mox data purgatio fortis, nec inflammans; fomentum penetrans, laxans, resolvens parti impositum; frictio calida ad partem; interna resolventia, sudorifera, diuretica, profunt.

335. Quorum ordo, repetendi necessitas, magnitudo requisita noscuntur ex (334.), & summo periculo.

336. Simul victus tenuissimus, minimèque putrescens requiritur.

337. Si verò ob magnitudinem resolvi non potest, & manibus accessus datur, scarificatio, apertura, suppuratio succedunt, simul actis, quæ dicta (334.)

338. Plura tamen methodus dicta (331. 332. 333. 334. 335.) præstat, quam credi fere possit, quum natura egregiè separet sponte, & expellat.

O S S A F R A C T A.

339. Si unius Ossis partes vi à cohæsione solvuntur in magna fragmenta Fractura dicitur.

340. Quæ si sola, simplex; si stipata vulnere, contusione, inflammatione, ulcere, pluribus fracturis, complicata vocatur.

341. Quin etiam pro vario situ fracturæ transversa, obliqua, longitudinalis audit; & ratione fragmentorum sibi innitentium, aut juxtâ latera sibi mutuô applicatorum, vel eminente spinâ emergentium, varia nomina, naturam, medelam accipit.

342. Effectus ejus varii, pro variâ indole ossis fracti, pro modo fracturæ vario, pro varietate fragmentorum quoad situm, figuram, numerum, magnitudinem, pro varietate denique loci, in quo, vicinorum, circâ quæ fit.

343. Primarii ergô sunt destructio muneris fulciendi, sustinendi musculos & dirigendi eosdem; musculorum contractio, membri accurtatio, musculorum ex debito loco deturbatio, membri intorsio, ejusdem deformatio; periosteï externi, vasculorum cellulas occupantium, periosteï interni, membranæ medullofæ, medullæ ipsitis laceratio, contusio, corruptio; luxuries vasculorum ossæorum, unde calli inæqualitas, tumor, membrique deformatio; membranarum, tendinum, nervorum, distractio, laceratio, irritatio, compressio,

fio, convulsio; Vasorum vicinorum mutatio, destructio, obstructio; inflammatio, dolor, ecchymosis, marcor, suppuratio, gangræna, mors partis & sæpe totius; contusio fere semper.

344. Quæ expensa (342. 343.) præsens malum, ejusque statum docent; si tactus fragmenta; auris crepitationem; oculus læsam figuram, immobilitatem; intellectus causam, ejus impetum, modum impulsus, hybernique frigoris efficaciam simul consideraverit, clarior est diagnosi.

345. Verum oblongæ fracturæ difficilior detectio, nisi serô: dolor, tumor, crassities partis, inæqualitas, pus fœdum, causa fortis cognita, aliquid luminis dabunt.

346. Facilem, difficilem, tardam, celerem, integram, vel deficientem fore curationem prædicit figura, simplicitas, compositio, duratio fracturæ; numerus, figura, magnitudo fragmentorum; locus ossis læsi; vicina læsa; tempus anni; ætas ægri & temperies.

347. Sanatio requirit:

1. Restitutionem in situm naturalem, extendendo, reponendo.
2. Retentionem in eo situ per fascias & machinas.

D 2

3. Uni-

3. Unitorum, retentorumque consolidationem, enato callo.

348. Si fracta situm proprium retinent prima indicatio cessât.

Si parum divergunt in latera, requiritur extensio parva.

Si omninô juxtâ mutua latera pertracta sunt, requiritur ingens extensio, ut intercepta removeantur, & ut debita longitudo & adaptatio fiant.

349. Extensio fit 1. apprehenso ossè prope fracturam manu, vel laqueis. 2. firmato ægro. 3. dispositâ parte in situ naturali. 4. distractione partium fracturarum eâ vi, eousque, prout vis contractorum muscutorum requirit. 5. vi & applicatu instrumentorum mechanicorum, si robur manus deficit.

350. Quæ (348. 349.) quum sine vi & dolore sæpe vix fieri queant, ubi partes jam inflammatae, sæpe omitti debent, donec sedata inflammatio. Aliter convulsi moriuntur, vel gangrænâ correpti.

351. Si fragmenta libera, eximenda, si facilè fieri queat. Si acumina eminentia extensionem planè prohibent, & patent, excindenda; si latent incisione detegenda prius.

352. Restitutio fit partem ritè extensam

fam (349.) , & paratam (351.), cautê, lentê, leniter itâ intorquendo, donec os offi debito in loco occurrat, musculi verô revulsi suo in situ sint repositi, nihilque intercipiatur.

353. Id notescit ex anatomicis, comparatione partis sanæ, dolore sublato, longitudine & figurâ naturali redditâ.

354. Retentio in situ fit fasciis, spleniis, ferulis, canalibus quietem conciliando, tum impediendo & dirigendo actionem musculorum.

355. Fasciæ adstrictæ tumorem, suffocationem, gangrænam producunt; unde infinita mala: ergô leviter attrahendæ.

356. Si vulnera adsunt, curanda ex arte, (185. ad 239.) sed rarâ deligatione. idem de inflammatione, dolore, tumore, & reliquis symptomatibus intelligendum.

357 Tum fit concretio, callusque, citior, tardior pro ætate, ossis crassitie, pondere incubituro, vario tempore, intra 20 & 70 dies.

L U X A T A.

358. **L**uxatio est recessus extremi ossis mobilis ex cavo, in quo movetur,

tur, cum motus impedimento.

359. Qui integer, vel pro parte; unde luxatio, & distortio.

360. Pessima, quæ epiphyssi ab corpore ossis solutâ accidit.

361. Causa vis externa extendens, intorquens, expellens.

362. Aut interna, cavo innata, extrudens.

363. Hæ causæ (361. 362.) juvantur extensis, laxatis, ruptis ligamentis; sive id ab externâ, sive ab internâ causâ contigerit.

364. Hinc figuræ in parte mutatio, tumor, cavitas, elongatio, accurtatio membri, immobilitas, distractio musculorum, paralyxis, vasorum vicinorum compressio, dolor, inflammatio, œdema, convulsio, marcor, mors partis, vel & totius.

365. Ex quibus notis signa evidentia habentur luxationis.

366. Et expensis magnitudine, figurâ, situ, parte pressâ & interceptâ, tempore durationis, concretionem luxatorum, dolore; inflammatione, convulsione, & reliquis symptomatibus, partibus ambientibus tenuioribus, crassioribus, ligamentis destructis, vel modô elongatis, musculis;

culis annexis , & similibus , prognosis habetur, quæ doceat, an integra, an deficiens , celeris, tarda, facilis, vel difficilis futura sit sanatio.

367. Ad quam requiritur 1. luxatorum redaptatio. 2. repositorum in suo loco ad sanationis finem retentio.

368. Repositio fit 1. firmando corpus ægri. 2. movendo partem, ut directè respondeat suæ cavitati. 3. introducendo per intorsionem , trusionem , pulsationem.

369. Reposita in quiete retinentur quiete, fasciis, situ partis naturali.

INFLAMMATIO.

370. **I**nflammatiō, Ignis, Phlegmone, ob causæ , & effectuum similitudinem, ab igne nomen habet.

371. Estque cruoris rubri arteriosi in minimis canalibus stagnantis attritus à motu reliqui cruoris moti.

372. Quod ergo fieri potest vel in finibus arteriosis, vel in vasis lymphaticis arteriosis , dilatatis osculis admissos globos rubros per fines transmittere non potentibus.

373. Ergo ejus sedes omnis pars corporis

poris, in quâ reticulares arteriarum distributiones, vel Lymphaticorum arteriosorum ortus.

374. Hinc Arteriæ ipsæ, venæ, nervi, membranæ, muscoli, glandulæ, ossa, cartilagines, tendines, viscera omnia, adeoque totum fere corpus, sed nullibi frequentius & tenacius, quam in adipe.

375. Hanc Stagnationem (371.) efficit in arteriis minimis 1. quidquid premendo, distrahendo, intorquendo, rumpendo, contundendo, urendo, erodendo, crispando, vasorum fines itâ arctat in conicis, cylindricisve, ut diameter aperturæ fiat diametro sphaeræ sanguinis minor. Calor, motus vehemens, infixa, ligaturæ, pondera incumbentia, acria ingesta vel applicata, frigus acre, frictio nimia, omnes causæ vulnerum, contusio-num, erosionum, fracturarum, luxationum, obstructionum, huc pertinent.

376. Eandem producit 2. quidquid meatus obthurat, acriaque applicat simul, sive intus, sive extus; ut oleosa salina acria.

377. 3. Omnia, quæ cruorem cogunt, ut coeat; motus nimius, derivatio tenuioris partis ex sanguine per sudores, urinas, salivas, diarrhoeas, ichores; coagulancia.

378. Efficiunt eam in vasis lymphaticis arteriosis 1. omnes causæ, quæ initia horum latiora ampliant, ita ut ea intrent partes cruoris crassiores, quæ propulsæ ulterius occurrunt angustis conniventibus, ubi tum patiuntur eadem, quæ exposita (377.); talis est laxitas vasculi in suo principio, motus violentus liquidi arteriosi. 2. omnes causæ alteri inflammationi communes (375. 376.).

379. Unde & similis morbus in omni vase conico, ubi fluit ex lato in angusta liquor, obtinere potest; ut enim in Cruore rubra, sic in Lymphâ alia est forte pars crassior reliquis.

380. Ex quibus vera diversitas phlegmones, erysipelatis, œdematis, scirrhi, cum inflammatione liquet.

381. Quoties autem causæ hæ (375. 376. 377. 378. 379.) produxere stagnationem hanc (371. 372. 379.) in vasis (372. 373. 374. 378. 379.), tum vis acti cruoris à vitâ superstite producit effectus quosdam, qui simul signa Inflammationis.

382. 1. Arteriæ minutæ vixque visibiles obstructæ jam à sanguine distendente augentur: inde tumor ruber. 2. vasa Lymphatica arteriosa, ante pellucida, &

invisibilia , eadem patiuntur; inde augmentum rubedinis. 3. distenta vascula rupturæ propinquant in fibris minimis; inde dolor punctorius. 4. compinguntur valde liquida & solida ; hinc durities , renixusque partis. 5. à rubro accumulato , & valido impulsu , Rubedo splendens. 6. à renixu , pulsu , & compactu , attritus fit ingens partium liquidi inter se , in solidum , solidi in illas; inde calor , & æstus. 7. & quia pulsi à corde cruoris impetus exceptus finibus vasis obstructi latera dilatat , fit Pulsatio. 8. à fibris irritatis , & cruore celerius per aperta acto , quia venis revehitur , sed arteriis in multis prohibetur , acceleratur Pulsus ; fit febris , sitis , calor , vigiliæ , debilitas , molestia.

383. Hæc species (382.) est morbi nondum adulti.

384. Tum cruor emissus pleno saltu ex venâ latê apertâ pelvi exceptus , frigescentis format albam , duram , crassam , rigidam pellem instar corii fere porcini.

385. Increcente malo , eadem adhuc (382. 383. 384.) , sed aucta ; separatur expressa lymphæ , densatur cruor ruber.

386. Si humor fluens blandus , motus ejus sedatus , obstructio parva , caque imprimis in arteriis , vel in initiis lymphaticorum ,

rum, canales mobiles, diluens vehiculum, reducto fluore concreti, motu stagnantis, solvitur inflammatio *resolvendo*.

387. Si humor fluens blandus, motus citatus, obstructio magna, nec resolvi (386.) potens, auctis symptomatibus (382. 384. 385.), vascula distenta rupta cum dolore, calore, pulsu, tumore, liquores suos effundunt, solvunt, putrefaciunt leviter, solida tenera atterunt, solvunt, fluidis miscent in unum similem album, spissum, glutinosum, pinguem humorem, Pus dictum; hæc *Suppuratio*, alter modus, quo terminatur inflammatio.

388. Si humor acer, valde motus, obstructio magna, vasa rigida, omnia symptomata (382. 386. 387.) magna, tum vascula subito rumpuntur, liquida putrescunt; ichor effusus sub epidermide in bullas colligitur instar loturæ carnis, vel saniæ flavæ, cineritius, pallidus, fuscus, ater fit color; rubor, dolor, calor, pulsatio, tumor in loco affecto definit, in vicinis obtinet; fit mors partis affectæ: vocatur *Gangrena*; tertius modus, quo exit inflammatio.

389. Ubi sic affecto (388.) loco compressio externa accidit, vel calor ingens

humida dissipat, pars mortua instar arefacti corii durescit, inferiora suffocat, & corrumpit.

390. Frigida actu vel potentiâ, adstringentia, coagulantia, repellentia, pinguiâ acria, emplastica, narcotica, ligaturæ fortes, compressio externa hanc mutationem inflammationis in gangrænam (388.) citô promovent.

391. Tumque in Sphacelum augent.

392. Si pars inflammata glandulosa, calor internus externusve magnus, materiës impacta inertior, crassior, emunctoria obstructa glandularum, folliculi verô harum & latera distenta, fit tumor durus, indolens, glandulæ: vocatur *Scirrhus*; quartus finis abeuntis inflammationis.

393. Causa, pars affecta, magnitudo, profunditas, velocitas, natura ægri, symptomata inflammationis, collata cum signis, effectibusque, prognosin absolvunt.

394. Perspicuum quoque pro vario statu mali, varias esse curaturo indicationes.

395. Si enim aliqua causarum (375. 376. 377. 378. 379.) in parte quâcunque (372. 373. 374. 379.) inflammationem (371.) produxit, ut adsint symptomata (382. 383. 384.) & conditiones

pri-

primæ (386.), oriuntur hæ indicationes:

1. Impedire ulteriorem vasculorum læsionem.
2. Eam, quæ jam facta, tollere.
3. Materiæ obstruenti fluiditatem, lenitatemque conciliare, conservare.
4. Vel, si id obtineri non potest, retro-pulsam in vasa majora.

396. Læsiō ulterior impeditur:

1. Causas (375. 376. 377. 378. 379.) notas tollendo, corrigendo.
2. Impetum arteriosi cruoris minuendo, per educationem sanguinis, purgationem alvi.
3. Copiam liquorum minuendo per eadem.
4. Revellendo impetum cruoris in partes alias, suctu, frictu, epispasticis, vesicantibus, fomentis, balneis, fonticulis, setaceis, forti alvi subductione.
5. Aëre subfrigido, sicco; affectibus animi nullis, vel sedatis; quiete naturali, vel artificiali; victu tenui, liquido, antiphlogistico, potu simili; medicamentis diluentibus & refrigerantibus simul,
6. Sedando impetum in ipso loco, applicatis refrigerantibus, repellentibus, adstringentibus externis, admistis anody-

nis, tum aperientibus, variâ, pro re natâ, misturâ.

397. Læsiô facta tollitur usu eorundem (396.): nam distractione nimîâ laxatâ, propria fibræ vis priscam formam restituet, & nutritio vires reddet.

398. Materiæ obstruenti conciliatur fluiditas, si illa attenuatur, si diluitur:

1. Vasis oscillationes elasticas restituendo per imminutionem distendentis liquidi, missio sanguine, purgatione multa; per stimulum additum fibræ ope liquidi tenuis, aromatici, calidè epoti; fomentis, frictionibus, cucurbitis, scarificationibus.
2. Nova liquida tenuia, aquosa, calida potando, impacta diluendo.
3. Utendo attenuantibus, resolventibus, & oppositis genio obstruentis, internè, externè, formâ decocti, balnei, fatus, vaporis, cataplasmatidis, emplastri, Unguenti specie.

399. Lenitas procuratur potu aquoso, victu blando, medicinâ blandâ diluente, & obtundente, vel singulari dote acrispecifico oppositâ.

400. Retropulsus fit:

1. Evacuatione magnâ liquidi arteriosi, venosique, missione sanguinis.

2. La-

2. Laxatione fibrarum.

3. Frictione artificiali.

401. Hinc intelligitur, quænam sit in omni morbo inflammatorio, interno, externo, illa, semper quærenda, Resolutio; quæ sanatio perfecta; quæ sine crisi (386.).

A B S C E S S U S.

402. Si, his (395. 396. 397. 398. 399. 400.) frustrâ, non, aut serò paratis, inflammatio in suppurationem (387. vergit, idque per signa, ibi (387.) posita, notescit, indicationes erunt:

1. Crudum ocys maturare in unum humorem.
2. Idem, ut & vicina, emollire.
3. Ad exteriora ducere.
4. Puri cocto exitum conciliare.
5. Mundare locum.
6. Reliquum instar vulneris percurare.

403. Maturatio fit applicatione horum, quæ

1. Motum in parte augent, fovendo, stimulando, calefaciendo per ea, quæ re ipsâ, vel & virtute calefaciunt; in toto similia præstant, excitatâ febriculâ.
2. Excitatum motum, & calorem ad eum
lo.

locum coërcent, impediendo nimiam exhalationem & dissipationem per obthurantia glutinosa, lenimen acrimoniae nimiae.

3. Moderando motum totius fluidi vitalis, ejusque temperiem itâ, ut nec torpeat, nec excitetur nimis.
4. Relinquendo locum clausum, donec omne inflammatum irrefolubile suppuratum sit. His enim causis bonum fiet Pus in parte.

404. Nisi materies inflammata sic mutata, cum periculo, & sine profectu aperitur abscessus.

405. Mollities partis, fluctuatio pressumoris, albedo, remissio doloris, caloris, ruboris, tensionis, pulsus, febris, vertex mucronatus tumoris, gravitas dolori succedens, docent pus jam factum, atque exitui aptum esse.

406. Si tum relinquitur diu in loco clauso, attenuatur, acre fit, putrescit, augetur, vicina consumit, erodit, mole, pondere, & motu sinus, fistulasque creat variis locis varias, pessimas in intestino recto. Aut dissipatâ parte tenuiori, reliquum durefcens tumores dueros, maximê circâ glandulas, creat. Vel denique venis lymphaticis, aut sanguiferis per crosta
oscu-

oscula impressum absorbetur, cruori miscetur, hunc inquinat, & collectum in visceribus pessimis collectionibus ea corrumpit, horum functiones turbat, atque ita infinitos, eosque gravissimos, morbos efficit.

407. Iisdem auxiliis (403.) integumenta loci suppurati infernè & supernè emolliuntur, attenuantur, laxantur, ut & vicina.

408. Quin & hâc ope (407.) minutâ resistantiâ horum, per auxilia maturantia (403.) pus factum extrâ pellitur, vel attrahitur foras.

409. Tum modicè acria, emollientia, subpinguia mista simul applicentur, ut emortua tegumenta facilius, & sine dolore aperiri queant.

410. Dein, pressio ritè pure, in assurgentem tumorem, parte albissimâ, mollissimâ, eminentiori, inferiori, intrudatur scalpellum, donec exeuns pus satis penetratum doceat, dein elevetur æquabili sectione sursum latâ plagâ, vitatis fibris, vasisque: leniter mox exprimatur, & successivè, pus; nec aëre, nec turundis vexetur.

411. Dein curetur mundantibus, suppurantibus, digestivis, balsamicis, deterisivis, exsiccantibus, pro re natâ, variatis,

riatis, juxta doctrinam vulnerum (192. ad 220.)

412. Si inanis metus ferrum repudiat, applicetur causticum parti (410.); eschara butyro separetur mollita; curatio fiat ut prius (410. 411.).

F I S T U L Æ.

413. **H**inc Sinuum, Fistularumque origo, causa, natura, effectus, intelliguntur (406.).

414. Aperti (413.) facilè cognoscuntur; clausi cavitatis mollis tactu deteguntur.

415. Curantur dissectâ parte inferiori, impletionem cavi per liquefacta digestiva pro re natâ, injectu deterfivorum, ligaturâ sensim premente à fonte ad aperturam: sed citissimè integumentis artificiosè suprâ cannulam fossatam dissectis.

416. Bubo, parotis, furunculus, anthrax, carbunculus, phyma, erysipelas, morbilli, variolæ, maculæ rubræ, hinc quoad cognitionem, prædictionem, curationem sciuntur.

417. Nec difficulter hinc scitur eventus suppurationis internæ, ad quam artificis manui accessus non datur, magna quip-

quippe & multa mala (406. 413.), & collectiones puris in cava corporis.

418. Si tum necessitas partis affectæ ad vitam, sanitatemve scitur, facilè prævidentur futura, & curationis difficultas.

GANGRÆNA.

419. Si inflammationi (371. 372.) Gangræna (388.) succedit, alia curatio requiritur: vocatur autem Gangræna ea partis mollis affectio, quæ in mortem tendit; sed Sphacelus ea, quæ jam in totâ parte omnem vitalem actionem perfectâ morte destruit, superstitie vitâ in reliquis.

420. Gangræna ergo ut plurimum panniculum adiposum, Sphacelus cuncta ad ossa usque inficit; illa præcedit, hic ut plurimum sequitur; nisi ab ossis corruptione, medullæ, vel periosteï, originem duxerit.

421. Ergo Gangrænæ & Sphaceli causa eadem, sed vi, duratione, loco diversa.

422. Ideo 1^o. omnia quæ inflammationem faciunt (375. 376. 377. 378. 379), si liquida stagnent, & nisus in ea vivi cruoris magnus: eò pertinent α . ligatura venarum. β . compressio earum ab causâ quâ-

quâcunque , ut tumore , &c. γ. friguss ingens. δ. prohibita exspiratio in phlegmone per adstringentia , emplastica , frigida , repercutientia , stupefacientia , maximè si interna acria , vel acria simul externis applicatis permista. ε. inflammatio interna , externa. ζ. vulnerata , contusa , luxata , fracta , maximè si arctè constricta. η. oleosa acria sanis applicata , vel ægris. θ decubitus. ι. herniæ suffocatae , & clausæ.

423. 2^o. Quæ liquida acuunt , ut vascula exedant , destruuntque , ut α. stagnatio clausi & calidi humoris diuturna , unde acrimonia (80.) , corrosio , hinc cruor in aneurismate , pus in abscessu , aqua in cranio , thorace , abdomine , scroto &c. , contusa & effusa in læsis. β. mala , morbosa , acris temperies in toto peccans , & locum alluens ; ut lymphæ diu fluens circa loca tendinosa , ichor canceri , fluor dysentericus , fluor hydropicus , materiæ febrilis , pestilentis , variolosæ , scorbuticæ fluxus ad carnem , imprimis ad gingivas.

424. 3^o. Quæ mortem extremorum creant defectu vitalis influentiæ , ut quies senilis , debilitas summa.

425. 4^o. Venena mirabilia.

426. Gangrænæ futuræ signa sunt causæ ejus (422. 423. 424. 425.) præcognitæ.

427. At verô præsentis hæc: 1. phænomena inflammationis subitô ablata sine correctione causæ, (confer 382. 383. 384. 385. cum 422. 423. 424. 425.) 2. sensus hebes. 3. color pallidior, cinereus, fuscus, lividus, niger. 4. mollities, flacciditas, ad tactus vestigia non resurgens. 5. pustulæ ichore lymphatico subflavo, vel rubello plenæ in loco inflammato. 6. ubi à frigore, pruritus & punctura ingens, unâ cum rubore intenso, quem brevi nigredo mortifera sequitur.

428. Sphacelus futurus scitur ex signis Gangrænæ præsentis (427.) assiduô auctis.

429. Præsentis autem signa sunt 1. gangræna exquisita prægressâ. 2. sensus, motusque integrê sublatis, ut pars scissâ, puncta, ulsa, nihil sentiat, sed gravis modo sit. 3. color lividus, fuscus, niger. 4. mollities, flacciditas, frigus, cutis separabilis, tandem siccitas, durities. 5. foetor cadaverosus. 6. corruptio mortifera, profunda, omnia vicina depascens in ossâ usque.

430. Ingens in hoc morbo & velox discrimen præfagia vera exigit.

431. Quam veritatem dabit 1. justa consideratio ætatis, temperiæ, morbi, virium. 2. Velocitas mali. 3. causa interna
vel

vel externa cognita. 4. anni tempestas.
 5. locus affectus, ut vitæ magis, minusve:
 necessarius, vel prout humidâ, sinuosâ,
 aut siccâ temperie donatur.

432. Hinc regulæ:

A gangrænâ sphacelus.

A sphacelo mors partis, & vicinorum
 cita infectio.

Gangrænæ ilicô succurrendum.

Sphacelus ilicô extirpandus.

Gangræna cerebri, viscerum, vesicæ
 lethalis, & in acutis cita mortis causa.

Gangræna oris interni, labiorum, na-
 rium, genitalium, curatu difficilis.

Sphacelus extremorum, tendinosorum,
 lethalis in senio.

Gangræna hydropicis, phtificis, scor-
 buticis pessima, & mortis nuncia.

Sphacelus superiora petens, vigilias, de-
 liria, syncopen, ructus, singultus, spaf-
 mos, dolores, sudorem frigidum, sopo-
 rem creans, prænunciat mortem.

Lividitas, nigredo, ariditas circâ ulce-
 ra, gangrænam, sphacelum, mortem ad-
 esse nunciant.

433. Indicatio in gangrænæ curatione:
 1. vires firmare. 2. putridi ingressum in
 venas impedire. 3. putredinem concep-
 tam arcere, coercere.

434. Firmantur vires dando: 1. quæ causæ internæ (422. 423. 424. 425.) debellandæ profint, spiritus excitent, liquidis motum circularem conservent, habitâ simul ratione ætatis, sexus, temperiæ, tempestatis. Illa ergo ex classe refrigerantium, vel calefacientium petuntur pro re natâ. 2. cibos potusque analepticos. 3. Epithemata ex pane tosto cum præscriptis (No. 1. hujus) applicata venis, vel circâ nares.

435. Impeditur putrefacti in venas introitus 1. firmando vires (434.), adeoque augendo motum ad exteriora. 2. curando exitum ad exteriora; fomenta, cataplasmata ex diaphoreticis, emollientibus, laxantibus, facta, scarificationes, cucurbitæ, hirudines id agunt, cum calore externo.

436. Putredo incipiens corrigitur: 1. tollendo ejus causas sensibiles (422. 423. 424. 425.).

437. 2. Corrigendo ejus causam proximam, stagnationem, & calorem. α. condiendo stagnantia contrâ putredinem. β. muniendo solida contrâ eandem. γ. stagnantibus correctis per vasa munita conciliando motum.

438. Condiuntur liquida applicatio-
ne

ne falis, aceti, vini, aromatum.

439. Iisdem (438.) servantur solida intacta.

440. Stagnantia deducuntur in motum
 α. diluendo aquosis affatim haustis & applicatis. β. stimulando arterias per ea, quæ malo opposita. γ. movendo liquida calore, frictione, cardiacis. δ. sublatâ copiâ nimis distendente per missionem sanguinis.

441. His (434. 435. 436. 437. 438. 439. 440.) citò applicatis, sæpe renovatis, multoties incipiens gangræna felici correctione & diaphoresi benignè tollitur.

442. Si autem liquida jam putrefacta, horumque mobilissimæ partes exhalaverint, tum & canales destructi fuerint, malum non cedit his remediis, neque reddetur corruptæ parti sanitas, sed vicina multum destruentur motis, neque tamen exhalare potentibus, vivis.

443. Idcô totus scopus hoc casu (442.) separare mortuum à vivo.

444. Separatio hæc fit semper vi vitalis liquidi ruentis ad fines gangrænosæ escharæ, ibidem suffocati, sicque in suppurationem (387.) acti, unde solvuntur fibræ nec tentes gangrænam parti sanæ.

445. Adeoque patet, in eo hæerere artem, ut 1^o. fiant ea, quæ dicta (433. 434. 435. 436. 437. 438. 439. 440.).

2^o. Ut acceleretur suppuratio.

3^o. Ut emolliatur eschara.

446. Ut suppuratio acceleretur, conducit scarificatio putrefacti usque ad vivorum initia: sic enim, suffocatione nimia imminuta, loco serpentis gangrænæ fit abscessus, quo cutis & adeps gangrænosa plerumque à subjectis adhuc vivis separantur.

447. Quo autem cruor plus in hosce fines ruat, hirudines, cucurbitæ, & similia attrahentia sæpe applicata profunt.

448. Incisa (446.) pars calidis liquoribus, corruptioni resistentibus (438.), & duritiem escharæ (389.) emollientibus (403.), fovenda.

449. Partes pendulæ, emortuæ, solutæ, emollitæ escharæ tollendæ tenaculis, forfice.

450. Toti parti affectæ assiduò applicanda cataplasmata calida, & cum calore continuo sustentato agentia; quæ ex Emollientibus, Diaphoreticis, Anodynis, consent.

451. Huc etiam plurimum facit rarior partis detectio, quam vulgò fieri solet.

452. Ubi, his (446. 447. 448. 449.

E

450.

450. 451.) factis, eschara contrahi, scarificata humescere, margo sana tumere, rubere, suppurari, mortuum vacillare incipit, signum est, separationem fieri, subsistere serpens malum, brevi purum futurum locum.

453. Tum lenia, anodyna, balsamica, digestiva applicanda sunt; raro detegendum ulcus est; omnia, quæ fibris rigiditatem dant, vitanda; quies parti danda; & porrô instar ulceris malum pertractandum erit (411.).

454. Si ab impacto acri Gelu gangræna (427. N^o. 6.), pars, nive imposita, vel impositis linteis aquâ gelidâ humectatis, operienda erit, donec, spiculis frigoris, in nivem vel aquam receptis, iterum solvi incipiat, redeunte vitâ.

455. Aliter enim caloris applicatu pars putrescit, actis, nec eductis spiculis.

456. Eo autem peracto (454.), calidis refocillandus cardiacis, & in sudorem usque calefaciendus æger est.

S P H A C E L U S.

457. Si gangræna jam in sphacelum conversa, infectum auferendum.

458. Quæ ablatio diversa, prout pars vell

vel tota, vel pro parte affecta, vel prout tota tolli non potest ob situm; ut nates &c.

459. Si ergo pars non usque in fundum corrupta, aut extirpari nequit, conamur: 1. progressum impedire. 2. corruptum auferre.

460. Progressus tollitur, si communicatio mortui cum vivo aufertur.

461. Id fit, si in viciniâ sani & mali limes ponitur secando, urendo, rodendo; isque undequaque satis profundus.

462. Infectum separatur, si, impedito progressu (461.) prius, vel simul dum id fit, tota pars usque in fundum sanum uritur, secatur, dein acri lixivio calidè applicato eroditur, donec in escharas, assiduò emolliendas (403.), & tollendas, usque ad viva consumatur, eximatur. Vitatis summâ cum curâ vivis.

463. Ubi dein sanitatis & vitæ indicia redeunt, curandum ut ulcus, vulnusve.

464. Si verò pars extrema in os usque sphacelata tolli potest, salvâ vitâ, unâ cum ossè ipso extirpanda erit; quia nudum vasis nutriri nequit, neque vivere potest.

465. Illa extirpatio in digitis, meta-
E 2
carpo,

carpo, vel metatarso, cuneo peragitur, & malleo.

466. In majoribus verò, ut fœmore, crure, humero, brachio, eget operosiore molimine, quod intelligitur ex sequentibus.

467. Definitur locus, ubi extirpatio instituenda ex hisce:

1. Sanum maximè conservandum.
2. Corruptum accuratissimè simul & semel tollendum.
3. Usus commodissimus parti superstiti procurandus.

468. Ergò in cæteris sectio fiat in sano prope ægrum (ob 467. No. 1. 2.); in crure autem sub genu semper (ob 467. No. 3.).

469. Ad amputationis administrationem, & felicem successum intelligendum, attenditur:

1. Ad præparationem.
2. Actionem ipsam.
3. Curationem symptomatum.
4. Consolidationem.
5. Supplementum amissorum.

Præparatio fit:

1. Compressu vasorum magnorum sanguiferorum arteriosorum per splenia applicata pyramidalia, & ligaturam

tor-

tornando adigendam super his in parte sanâ propê ægram.

2. Tractu valido & æquabili partium incidendarum ope ligaturæ ex corio fibulatae cum loris.
3. Firmatione cautâ ægri, & partis amputandæ.
4. Moderato inflexu partis, ne nimis extensa secetur.
5. Narcotico cardiaco ipsi ægro exhibito.

470. Actio fit in parte præparatâ (469.):

1. Cultro acuto, forti, curvo, in dorso obtuso, bene temperato, fortiter per omnia ad os usque adactò, æquabiliter & fortissimo applicatu ad os in orbem circumactò, ut unâ celeri sectione totum periosteum accuratê discissum sit.
2. Si duplex in amputandâ parte os, interstitia similiter minori, utrimque acuto, cultello quam exactissimê dissecando.
3. Dissecta (1. 2. hujus.) per ministros fortiter distrahendo, ut hiatus sit inter margines sectionis.
4. Serrâ acutâ, subtili, forti, tensâ, os secando; quæ agenda perpendiculari, forti, æquabili motu; incipiendo ab

tenuioris dissectione, definendo in crassissimum, si os duplex; ne vi ferræ infestucas fissum disiliat debilius.

5. Ossâ inter secandum per ministros artificiosè flectendo, ut liber sit ferræ meatus.

471. Symptomatum, extirpationem sequentium, primarium Hæmorrhagia semper ilicô sistenda:

1. Vasis, jactu sanguinis deprehensis, apprehensis per tenacula elatere compressa, eductis, filo trajecto & circumducto arctè constrictis, si majora sunt.
2. Cauteriis ignitis applicatis.
3. Plumaceolis vitriolo imbutis ad vasa, absorbentibus alia ad loca applicatis.
4. Partes vivas, retrotractas (469. N^o.2.), laxatas reducendo.
5. Vesicam circumponendo trunco, pulvere adstringente refertam.
6. Ligaturâ firmante.
7. Somno, quiete, victu sollicitè procuratis.

472. Consolidatio fit in ossè, si citò curetur exfoliatio, & caveatur caries, quod fit, si ilicô ei applicetur spleniolum sp. vin. mastichino madidum.

473. In carne verò, ut in historiâ vulnerum dictum fuit (ab 189. 192. ad 210.).

474. Si ægro , sic truncato magnam partem (466. ad 471.), viscera chylopœa & hæmatopœa valida sunt, plethoræ effectus sæpe sequuntur (106.), quibus ut auferatur causa, missio sanguinis aliquoties, pro re natâ, instituenda, & victus moderatus.

475. Amissi damnum sarcit imitatio artificialis perditæ, per fabricatas machinulas. Vid. Aquapendentem, Hildanum, Solingen, Paræum.

DE COMBUSTIONE.

476. Si ignis ardens, vel in fervido corpore latens, corpori nostro applicatur, oritur destructio vasculorum, extravasatio humorum, pro varietate causæ, durationis, partis affectæ, varia.

477. Hujus (476.) varietatis gradus varii similes sunt his, qui decurrunt ab primâ & levissimâ inflammatione, (370 ad 464.) usque in sævissimum sphacelum.

478. Hinc phænomena, diagnosi, prognosis eadem.

479. Quin Curatio nihil differt.

480. Ustio intrâ limites resolvendæ inflammationis subsistens (386.) curanda his,

E 4 quæ

quæ liquida condiant, moveant, vasa expellant, conservent: id fit igne moderato, fotu, cataplasmate (395. ad 402.).

481. Ustio itura in gangrænam, crispata jam & erosa cute, elevatis bullis, curanda ut inflammatio talis, fotu, cataplasmate, emollientibus, digestivis (402. ad 454.).

482. Ustio jam in crustas gangrænosas, vel sphacelatas acta, curanda ut illi morbi (419. ad 476.).

483. Nullibi plus prospiciendum pulchritudini cicatricis, quam hîc: vid. (217.).

S C I R R H U S.

484. **S**cirrhus (392.) pro causâ habet quidquid succum in glandulis coagulare, inspissare, siccare potest. Ejus ergo sedes omnis glandula: sed imprimis quæ liquorem facilius inspissandum habet, vel ratione loci stagnare plus cogit. Hinc in oculis, naribus, ore, mammis, axillis, inguinibus, pancreate, mesenterio, utero sæpius obtinet.

485. Hinc inflammatio (392.); lac stagnans, caseosum, durefcens, coagulatum; contusio (322.); attritus validus; anthrax; bubo; ulcus præmaturê clausum; materies atrabilaria cruoris, bilisve, maxime

ximê cessante consueto menstruo, vel hæmorrhoidali fluxu; lapidescens, crassa, austera, gypsea materies; vita tristis; vitus durus; hæreditaria labes, scirrhum creare possunt.

486. Effectus scirrhi nati, occupare auctâ mole vicina, ea premere, comprimere; lædere functionem scirrholi, & vicini; hinc inflammationes, suppurationes, gangrænas, paralyfes, atrophias, sphacelos, sterilitatem, partum difficilem, volvulum, & multa similia mala producere, quæ ex naturâ & officio læsi, & comprimementis, facilê deduci queunt.

487. Præsentia scitur, causâ (484. 485.), effectû (486.), phænomenis (392.), loco affecto (484.), temperie ægri, cognitis.

488. Ex iisdem (487.) eventus præfigitur, considerando durationem mali, & effectus (486.). Sunt per se innocui, evadunt motu incitato maligni.

489. Qui sæpe vitari impos æternum metum parit.

490. Unde Curaturus notet:

1. Scirrhum, si recens, benignus, loco idoneo situs, nondum perfectê durus, in homine euchymo, tentandum emolliente, resolvente medelâ; quo fumi acidi, & vis mercurii in primis spectant.

2. Si non cedit his, & locus, situs, vicina, mobilitas, conditio mali, robur & valetudo ægri permittunt, ocyus ferro integrê eximendus est.
3. Si vetus, colore, duritie, scabritie, pruritu, inchoato dolore malignus, loco vel viciniâ timendus, adhærescens, in corpore cacochoymo, extirpatu impossibilis; tum omnia vitanda, quæ motum augent, ne carcinoma fiat. Ideô emollientia, suppurantia, rodentia, caustica, dissipantia, mala sunt.
4. Sed sola tum (490. 3.) anodyna, sedantia motum, Saturnina, Mercurialia blanda conveniunt.

491. Si simul temperies peccat, hæc corrigenda præ cœteris.

C A N C E R.

492. **S**cirrhus (392.), ætate, augmento, motu vicinorum, si movetur ita, ut vasa vicina ad margines scirrhi inflammari incipiant, evadit malignus, & vocatur jam Cancer à similitudine, vel Carcinoma.

493. In quo (492.) gradus inflammationis vicinæ; acrimoniæ putridæ excessus in loco affecto; dignitas partis; glandula-

dularum nexarum numerus & conditio; temperies totius, diversos malignitatis primæ status docet.

494. Si suis continetur pellibus, Occultus, si his ulcere ruptis, Manifestus vel Ulcerosus dicetur; posterior primi folioles.

495. Causa est quidquid scirrhum facit (484. 485.); acre scirrhum mistum; mutatio in circulantibus, à mensruis, hæmorrhoidibus, hæmorrhagiâ quâlibet, retentis; sterilitas, coelibatus, effœta ætas; victus austerus, acer, calidus; affectus animi tristes & biliosi, irritatio externa quâlibet, motu, calore, acrimoniâ, emolliente, suppurante, causticâ, vesicante medelâ externâ, vel internâ similia peragente.

496. Locus ut Scirrhi (484.).

497. Cognoscitur Occultus ex signis scirrhi (487.) prægressi, accedente titillatione, pruritu, calore, rubore, dolore lancinante, urente, pungente, colore rubello, rubro, purpureo, cœruleo, livido, atro; duritie summâ, præruptâ, scabrâ, cum eminente apice; tumoris augmento; vasis sanguiferis vicinis tumentibus, nodosis, varicosis, crassis, atris.

498. Ulceratus noscitur ex prægress-

fo occulto prius cognito (497.), si aperitur.

499. Ejus hic progressus: vasa sana circa margines canceri duri vi fluentis vitalis liquidi attrita, & assurgente tumore distracta rumpuntur, hinc putredo, tum sanies subtilis, acris, foetida, cadaverosa, ambientia rodens, vicina exedens, progressus in ambitum, labia tumida, retrorrida, horrenda, dolor intolerabilis, urens, pungens, rodens, color cineritius, lividus, niger, canceri occulti ad glandulas communicantes, hæmorrhagiæ, convulsiones, febris lenta, extenuatio totius, ἀνοσμός, indolentes in aure calli, lipothymix, inde peresis & consumptis mors.

500. In Euchymis occulti canceri quiescentis facilis toleratio, moti rabies (499.) prædicatur.

501. Cancer parvus, incipiens, liber, loco apto situs, vasis magnis non adcretus, à causâ externâ ortus, in juvenili, sanoque corpore, solus in toto corpore, illicô ferro extirpandus.

502. Emollientia, emplastica, suppurantia, acria, excoriantia, vesicatoria, caustica, ei applicata convertunt in cancerum ulceratum; ergô vitanda.

503. Cancer magnus, vetus, adhærens, locis

cis extirpationi ineptis situs, vasis magnis adcretus vel incumbens, à causâ internâ ortus, in corpore senili, cacochymico, ad cancerum composito, aliis jam canceris in eodem corpore sociatus, nec ferro (501.), nec medicamentis (502.) tangendus est:

504. Ni enim cum radice & semine integrè extirpari queat, asperabitur, ad interiora recurrit, alios generat, factos auget.

505. Causa canceri tollenda cum cancro, vel antequam tollatur ille.

Nisi integrè auferri queat, relinquendus est.

Uteri, faucium, palati, axillarum, inguinum insanabilis; labiorum curatu difficilis.

506. Ergo in statu (503.) adspiramus ad duo: 1. quietem mali. 2. lenimen symptomatum.

507. Quies impetratur: 1. locum defendendo ab omni externo per plumbata, & narcotica. 2. causam (495.) cognitam minuendo, corrigendo, avertendo: quolentia purgantia ex blandis vegetabilibus; mercurialibusque faciunt, parvâ & sæpe geminatâ dosi data. 3. diluentibus, aperientibus blandis, subalcalicis. 4. vitando, quæsumta, vel applicata vicem causæ gerunt.

508. Symptomata iisdem (507.) leniuntur; dolor opiata exigit.

509. Exulceratus (498. 499.), ni tolli queat, lenitur sæpe mundando, plumbata lenissima applicando, tum dicta (507. 508.) adhibendo.

510. Extirpatio fit: 1. Corpus victu, medicamentisque refocillantibus, & causæ adversis præparando. 2. totum simul & semel cum omni radice filo trajecto, vel furcillâ suffixâ elevatum excindendo. 3. vulnus rarâ, blandâque obligatione curando, vicino cruore prudenter prius evacuato.

511. His actis (510.), diu pergendum in victu & medelâ cancro adhuc præsentis propriâ.

DE MORBIS OSSIUM.

512. **I**psa Ossâ morbos patiuntur similes iis, quos hætenus in mollioribus partibus descripsimus.

513. Nam interstitia horum vestiuntur membranula eodem vasorum genere instructâ, iisdem liquoribus perpetuô allatis humectatâ, ac illæ.

514. Et prout hæc spatiola (513.) majora, eo os ibi propius accedit structuræ partis mollis.

515. Ideoque aptius ibi (514.) pati eos morbos, qui aliter molles partes occupare dicuntur.

516. Talis est latior circa juncturas pars, quum densior, minusque vasculosa sit in ossè medio.

517. Hinc (514. 515. 516.) prima morborum in ossibus distinctio.

518. Ossâ, præter vasa mollibus communia (513.) partibus, in suis cellulis latioribus (516.) habent vesiculas oleo subtili medulloso, ibi secreto, & in suos usus asservato, plenas; hæ vesiculæ, majores circa juncturas, circa densitatem ossis sensim abolentur, & in canales pingue vehentes tenuissimos versæ, evanescunt fere.

519. Hinc (518.) altera morborum in ossibus classis.

520. Habent ossâ periossteum externum convexa ambiens, tegens, vasa arteriosa in cellulas, inque medullam ferens, venosa excipiens, magna, parva, numero infinita.

521. Hinc (520.) iterum morborum tertia series in ossibus.

522. Habent ossâ periossteum internum cava medullæ receptacula ambiens, tegens, vasa arteriosa in vesiculas medullo-

sas.

fas distribuens, venosa excipiens, magnas parvas, numero infinita.

523. Hinc (522.) quarta morborum in ossibus divisio.

524. Habent ossa in suis cavis infinitas vesiculas oleo subtili medullosa plenas, id est asservantes, distribuentes & inter se mutuò, & inter lamellarum interstitia, & in cava juncturarum, & per poros rectos. Hæ vesiculæ arterias, venas, lymphæductus, adiposos ductus, nervulos, membranas, habent.

525. Hinc (524.) quinta & ultima, ex hac divisione, morborum in ossibus differentia.

526. Si medullosum (518. 524.) oleum in suis vesiculis, emissariis, vel in ossium interstitiis stagnat, calore & motu vitali acre, putridum, saniosum fit; secretionem novam impedit; vasa adferentia, fecernentia obthurabit; vesiculas suam inflammabit; dein suppurabit; vel gangrænosâ putredine corrumpet liquida & vascula; hinc ossæ ipsa substantia vasis orba, liquido vitali privata, acribus erosa, in cinericam quasi calcem vertitur, ubi tenuissima, id est in cellulis apophysium; sic dolor, calor, pulsatio, tumor, abscessus, caries contingit pessima.

Stagna-

Stagnatio hæc ab omni obstructione ori-
ri potest (vid. cap. de Obstr). Si autem ab
interno malo, tum fere Spina Ventosa
audit.

527. Liquet signa hujus mali, & sta-
tus (526.) esse signa inflammationis pro-
fundæ, nec ad tactum externum sævien-
tis.

528. Prognosis ex difficili separatione,
absterfione, emundatione, mala multa,
& difficillimam curationem prævidet.

529. Curatio optima tentatur: 1. om-
nia vasa largissimè implendo decoctis ex
his, quæ validè penetrant, multum ab-
stergent, putredini resistunt. 2. dein va-
lidè movendo cuncta per methodum su-
dorem exprimendi vapore calido artificio-
sè ad corpus applicato. 3. simul tum, dum
sudor fluit, motum determinando ad lo-
cum affectum per topica fomenta, & ap-
plicatione determinatâ vaporis calidi ad
partem illam.

530. Hoc modo (529.) si diu continue-
tur, sæpe multum boni fit: maximè si
diæta simul tenuis, & putredini oleosæ ad-
versa, instituitur.

531. Si textura arteriosa, vel venosa, ut
& lymphatica, (513. 516. 520. 522.)
obstructa fuerit, defectu novi, vel stag-
natio-

natione allati liquidi, iterum in iis partibus oriuntur similes omnino morbi ordine tantum mutato (526.).

532. Quorum (531.) ergo diagnosi, prognosis, curatio, eadem (529. 530.).

533. Patetque, maximum periculi discrimen hærere in diversitate loci (518. 524. 520. 522.), ubi prima mali causa ortum sedemque habet. Quibus primò præmissis clarior doctrina.

534. 1. Inflammatio ossis benignior à periosteio externo inflammato oritur, cuius infinitæ causæ, (vid. totam historiam Inflammat.) notique effectus.

2. Cognoscitur per signa inflammationis profundæ ad tactum aucta.

3. Prævidentur plurima mala (531. 526.), nisi ocysus sanetur.

4. Curatur ut inflammatio, maximè id agendo, ut totum avertatur ab ossè extrorsum; quod fomentis, & aliquando factâ incisione fit.

535. Talem inflammationem vergere in abscessum docent: 1. signa valida inflammationis prægressæ. (534. 2.) 2. pulsatio, febris, horripulatio vaga. 3. absentia signorum resolutionis (386.).

536. Re autem ipsâ adesse docent signa suppurati profunda (387. 405.).

537. Tum pus, exeso perioſteo, os nudabit, vasis privabit, corrumpet (531.) brevi; confer (406.).

538. Quare ilicô abſceſſus aperiendus, pus eliciendum, ulcus mundandum, (403. 404. 409. 410. 411.); dein ſimul os tractandum iisdem cautelis, ac in vulneribus Capitis cum cranio detecto dictum. (252. 253. 259. 260. 262. 266.).

539. Vergere autem illam inflammationem (534.) in gangrænam partis, docent: 1. ſigna ſummæ inflammationis (388. 422.) 2. indolentia partis ſine bonâ cauſâ. 3. Tumor denſus, lentus, nec multum dolens incumbentium.

540. Adeſſe jam, ſcimus ex iisdem (539.), tum ex colore incumbentium pallido, cineritio, livido.

541. Tum os nudum, vasis, ſuccoque vitali orbum, acri putrefactâ materie gangrænôſâ exeditur in cariem (526.); ſerpit citô contagio crescente.

542. Ergô ſtatim locus affectus ad os uſque incidendus, mundandus, os verô curandum ut ſuprà dictum (248. 249. 252. 258. 259. 260. 261. 262. 266.).

543. Si perioſteum internum (522.) inflammatur, cauſas agnoſcit eaſdem (534.); effectusque habet, quoad os internum, conſ-

eisdem; exitum in abscessum, aut gangrænam eundem (535. 539.); sed ob deenegatam exhalationem, pejorem; unde medulla tota, totum inde os, foetidissimâ putredine, & carie pereunt.

544. Unde etiam liquet, siue membrana hæc (522.) primò ipsa inflammetur, siue à corruptâ prius medullâ contagio suscepto læsa sit, eundem brevi oriri morbum ossis cariosi à medullâ putrefactâ, vix unquam curabilem.

545. Cognoscitur id malum, quando in inflammatione subsistit hætenus: 1. à signis inflammationis generalibus (382.). 2. à loco profundo. 3. à dolore obtuso, fixo, diuturno, nulli remedio externo cedente, nec ad attactum aucto. 4. sed post motus musculares incrementum.

546. Sanatur tum: 1. curatione ad inflammationem generali (à 395. ad 401.); deinde, simulac apparuerint resolutionis incipientis signa (386.), 2. methodo propositâ (529.), strictè satis observatâ.

547. Si verò suppuratio hic, vel gangræna acciderit, & per prægressæ inflammationis internæ signa (545.) valida, tum ex dolore fixo, profundo, obtuso noscitur, vel methodus (529.), vel nihil, sanat.

548. Tum enim putrefactâ totâ mole ossis

ossi internâ, tumefacto, inflammato, carioso interno osse, periosteum externum inflammatur, distrahitur à tumore, eroditur ab acri, incumbentia, lento contagio corrupta, spongiosa fiunt, tument, dolent, totum membrum perit : sola Extirpatio sanat.

549. Qualitas venerea, scorbutica, rachitica, est causa frequens : inde intelligitur, quid sit gumma, tophus, nodus, exostosis, abscessus, caries, spina ventosa in osse?

550. Hinc novimus, cur os cariosum colorem suum tam variè mutet ex subcœruleo candido in album pinguem, flavum, cineritium, lividum, nigrum? & quem corruptelæ gradum singuli denotent?

551. Ex iisdem liquet, cur os cariosum inæquale, asperum, spongiosum, friabile, molle, fragile evadat?

552. Item, cur foetorem singularem rancidi lardi exhalet?

553. Nec non, cur in loco ulceroso à subjectâ carie caro superincumbens mollis, flaccida, fungosa, inflata, tumens; labia ulceris inversa; sanies clara, subtilis, vix glutinosa, fœtida, parvis squamulis nigris referta; recrudescencia sine causâ;
per-

pertinax rebellio contra medicamenta optima ad alia omnia ulcera?

554. Ut &, cur caries à causâ externa facilê ; ab internâ difficulter ; à lue Gallicâ difficilior ; à spinâ ventosâ difficillimê sanetur?

555. Denique, cur in parte solidiore ossis mala ; in spongiosâ peior ; in juncturis pessimâ ; prima lenta , altera velox , ultima velocissima sit ; cur in pueriss velox , & curatu difficilis ; cur spina ventosa plerunque pluribus locis simul , vel successive?

556. Qui his (ab 512. ad 556.) dicta de contusione (249. 250. 251. 254. 256. 257. 325.) , luxatione (ab 358. ad 370.) , fracturisque (ab 339. ad 358.) ossium adjunxerit , tum ea , quæ de vulneribus Capitis ossa lædentibus (ab 249. ad 297.) , habebit historiam , & curationem morborum præcipuorum in ossibus.

557. Qui verô omnes morbos , hucusque descriptos , oculisque subjectos intellexit ita , ut horum enarratas causas , naturam , effectus , curationem cum curâ expenderit ; dein autem internis rebusque corporis partibus eadem omnia applicaverit ; cum actione integrarum comparaverit ; atque deinde cum ipsis interiorum mor-

morborum phænomenis composuerit; videbit interna externis reapse congruere; externos chirurgicos primò pertractandos; nec aliter ordinati quid, vel veri, in Praxi Medicâ fieri posse, aut doceri.

DE MORBIS INTERNIS, ET DE FEBRIBUS IN GENERE.

558. **F**ebbris, frequentissimus morbus, inflammationi individuus comes, plurimum morborum, mortis, & sæpe fænationis optima causâ, nunc explicanda.

559. Cujus quia abdita habetur natura, summâ ope cavendum ab omni errore, in illâ indagandâ.

560. Errori tamen facilem hîc occasionem præbet ingens numerus symptomatum, quo plerumque stipatur, & sine quibus tamen febris esse potest.

561. Ut ille vitetur, opus erit ex infinitis (560.) illa phænomena sola eligere, quæ omni feбри semper adsunt; quorumque cognita præsentia omnes Medicos docet, febrim adesse, quorum absentia judicant hominem à febre immunem esse.

562. Dein ex his detectis (561.), ritèque expensis, natura febris individua invenienda erit.

563. In omni Febre horripulatio, pulsus velox, calor, vario febris tempore, vario gradu, adsunt.

564. In quâ febre hæc tria (563.) velociter, & cum periculo decurrunt, illa Acuta dicitur.

565. Ubi tarde, idque cum periculo, vel sine eo, Lenta vocatur.

566. Utraque (564. 565.) Communis five Epidemica, vel huic illive hominibus Singularis.

567. Acuti febriles morbi vocantur, quos dicta febris (564.) comitatur, Chronici febriles autem, in quibus adest febris (565.).

568. Hinc illorum omnium (567.) explanatio pendet à cognitâ prius febris naturâ.

569. Quæ petenda ex consideratione trium communium symptomatum (563.).

570. Quæ (563.) quidem in omni febre adsunt, sed sola velocitas pulsus adest ex his omni febris tempore, ab initio ad finem, eâque solâ Medicus præsentem febrem judicat.

571. Adeoque quidquid de febre sic novit Medicus, id verò omne velocitate pulsuum solâ cognoscitur.

572. Causa ergo velocitatis hujus (571.) proxima est pariter causa febris, sic cognita, proxima.

573. Ergo velocior Cordis contractio.

574. Ergo velocior reciprocus influxus liquidi venosi, & cerebellosi in muscolum, & cava Cordis.

575. Omnis fere febris, hactenus observata, quæ à causâ internâ oritur, incipit primò cum sensu Frigoris, concussionis, horripulationis, majori, minori, brevi, diuturno, interno, externo, pro varietate subjecti, causæ, febris ipsius.

576. Quo tempore (575.) velox, parvus, sæpe intermittens pulsus, pallor sæpe extremorum, frigus, rigor, tremor, insensibilitas.

577. Unde liquet, stagnare tum humores sanguineos in extremis vasculis, & simul tamen causam cor irritantem (574.) adeste.

578. Ex quibus (577.) causa omnium phænomenon (575. 576.), tum apparentium, intelligitur.

579. In omni febre, his (575. 576. 577.) prægressis, oritur Calor, major, minor, brevis, diuturnus, internus, externus, universalis, vel loci, pro varietate febris.

580. Qui (579.) quum sequatur febrim jam natam, patet magis ejus effectum, quam causam, vel naturam esse.

581. Adeoque velocior Cordis contractio, cum auctâ resistantiâ ad capillaria, febris omnis acutæ ideam absolvit.

582. Horum verô (581.) utrumque in animali vivo produci potest ab causis numero & varietate infinitis; tumque vel simul, vel seorsum fieri; unoque nato, facile alterum sequetur.

583. Quare febris causa proxima (581.) infinitas causas pro suis proximis agnoscit.

584. Quæ tamen dividuntur, quod vel singulares sint cuique; vel universales, pluribusque communes, quæ plerumque aëri, victui, vitæ eadem debentur.

585. Ergo febris causæ Singulares sunt, vel Epidemicæ.

586. Propiores singulares causæ (583.) referri possunt ad quædam capita: α. Ingesta acia, cibi, potus, condimenti, medicamenti, vel veneni titulo; eadem donata hâc proprietate, ut digeri, moveri, excerni nequeant; aut eâ copiâ assumpta, ut irritent, suffocent, obstruant, putrescant. β. Retenta intra corpus, quæ excerni solebant, ob frigus, unctiones, animi affectus tristes, cibos, potus, medicamenta, vene-

venena, aërem nebulosum pinguem, quietem, exercitia solita remissa, obstructiones, compressiones à contentis, vel ambientibus. γ. Gesta, ut motus nimius animi, vel corporis, calor, æstus. δ. Applicata externa, acria, pungentia, rodentia, lacerantia, urentia, inflammantia. ε. Quæ humores, horumque motus valde immutant, ut multa externa, vel interna, fames, evacuatio, pus, aqua, ichor, hydropicorum, Empyicorum, serum acre alicubi collectum, bilis accensa, inflammatio, suppuratio, gangræna, cancer, vigiliæ nimix, acriora cujuscunque rei studia, venus nimium culta. &c.

587. Febris effectus, celerior liquorum expulsio, propulsio, stagnantium agitatio, omnium permixtio, resistentis subactio, coctio, secretio cocti, crisis ejus, quod stimulo & coagulo febrim produxerat; sanorum mutatio in morbosam indolem; sanorum mutatio in indolem aptam ferre ea, quibus minus adsuetus erat æger; liquidissimi expressio; reliqui incrassatio; sitis, caloris, doloris, anxietatis, debilitatis, lassitudinis, gravitatis, ἀνορεξίας productio.

588. Quo lentor citius solvendus (577.), & irritatio brevius sopienda (574.), eo

febris levior, brevior, magis salutifera, & contrâ. Quin etiam pro vario utriusque gradu, & concursu, varia erit.

589. Atque hinc febris sæpe medicinali virtutem exercet ratione aliorum morborum.

590. Hinc initia, incrementa, status, decrementum, crisis, mutatio, sanatio febris, varia sunt in ipsis acutis & singularibus.

591. Febris definit in mortem, alium morbum, inque sanitatem.

592. In mortem, vitio destructi per nimiam vim solidi; aut peccato liquiditâ depravati, ut vasa obstruat vitalia, aut ea, per quæ nova liquida in locum perditorum ingeri debent. Hinc inflammationes, suppurationes, gangrænæ febriles in visceribus vitalibus, corde, pulmonibus, cerebello; vel ulcera aphthosa in primis viis causâ frequens mortis ex febre.

593. In alium morbum definit, dum vel agitatione nimia vasa lædit, & liquidiora dissipans reliqua inspissât; vel nimis debili actione impar est resolvendo suâ vi coagulato; vel deponendo materiem criticam in vasa quædam obstructa, dilatata, vel rupta; hinc maculæ rubræ, pustulæ, erysipeles, morbilli, variolæ, phlegmonæ,

næ, bubones, parotides, abscessus, gangrænæ, sphaceli, scirrhi &c.

594. Terminatur in sanitatem, 1^o. quoties materialem febris causam suâ vi subigit, solvit, mobilem reddit, insensibilis perspirati specie expellit, simulque impetum suum, æquabili circulatione redditâ, sopit. Hæc est resolutionis via, similis fere in toto, ut prius dictum de parte. (386.) Aut etiam 2^o., si materies mali ejusdem vi febris subacta, soluta, mobilis reddita, tamen aliquam retinet dotem, quâ æquabili circulationi repugnat, vasa stimulat, hinc excitatâ sensibili quâdam evacuatione expellitur; hinc sudor, saliva, vomitus, diarrhœa, urina, post coctionem, & statum, fere intrâ quatuordecim dies factâ crisi.

595. Tandem, si materies mali ejusdem vi febris subacta, soluta, mobilis reddita, sanis iterum assimilata humoribus, fluit sine ullâ crisi, aliove morbo.

596. Genius, discrimen, duratio febris acutæ, si observantur ab initio, per adscensum, usque ad statum, docent ejus exitum, mutationem, finem.

597. Ideôque ex omnibus his (ab 558. ad 597.) enarratis generalia diagnosios & prognosios dogmata in febribus facillè elici queunt.

598. Curatio optima febrium generalis obtinetur, si 1. Vitæ, ejusque viribus consulitur. 2. Acre irritans corrigitur, expellitur. (574.) 3. Lentor dissolvitur, expellitur. (577.) 4. Symptomata mitigantur. (587.).

599. Vitæ & viribus consulitur, cibis & potibus fluidis, facile digerendis, putredini adversis, siti contrariis, appetitui citando idoneis, causæ morbi cognitæ oppositis.

600. Cibus dandus eo tempore, quo abest febris, aut quo ejus impetus saltem erit lenior.

601. Et quidem copiâ parcâ, sæpe repetitâ: ne nimis laborare cogantur viscera, mutanturve.

602. Copia determinatur, & vis cibi: 1. ex prævisâ duratione febris (588. 589. 590. 596. 597.) ad dies, 1, 4, 7, 9, 11, 14, 21, 30, 40, 60.; debet enim tantum dari, quo vires sustineri queant, ut sufficiant coctioni, & crisi. Quo brevior morbus, eo minus & debilius offerendum, & contrâ. 2. Ex ætate ægri cognitâ; quo enim origini propiora, vel senectuti summæ, co difficilior inedia ferunt animalia. 3. Status & vehementia morbi si cognoscuntur, varium copiâ & virtute cibum postulant:

in:

in *ἀνθρώπῳ* tenuissima, & pauca; in adscensu & descensu eô plus, & meracius dandum, quo magis ab eâ distat morbus. 4. à loco quem æger incolit, qui enim æquatori vicini tenuem victum facilê, polis autem propiores difficulter cum ferunt. 5. ab anni tempestate, quum æstas tenuissima, hyems validiora petat. 6. à consuetudine ægri, & temperie ejusdem naturali; qui enim sanus lautissimis usus ea facilê diffat, æger pluribus eget ob vasa & viscera his assueta. 7. à sensu levi, vel gravi, assumpta sequente.

603. Acre irritans externê hærens, (ut vitri, metalli, ligni, lapidis, ossis, fragmenta acuta; aut stimulantium, rubefacientium, rodentium, vesicantium, causticorum, septicorum, venenatorum applicata), cognitum, quantocyus auferendum; dein ille locus, cui inhæserunt, & læsus inde est, fovendus erit lentis, mucosis, oleosis blandis, anodynis, leniter aperiensibus.

604. Acre irritans internê hærens, (ut inflammationis, suppurationis, gangrænæ, sphaceli, canceri, cariei ossis, ichoris, puris, lymphæ acris & stagnantis acrimonia) tolli, vel corrigi debet juxtâ leges ante datas in historiâ horum morborum præmissâ.

605. Acre irritans in ipsa liquida induratum usu sex rerum non naturalium tolli, vel corrigi potest, & debet, pro suâ indole variâ cognitâ, variis auxiliis.

1. A motu nimio; quiete corporis & animi, humectantibus, diluentibus, blandis lenientibus.
2. A nimio calore aëris; temperando illum exhalatione frigidaë, maximê plantis nonnullis, huic propriis negotio; potu aquaë subacidæ leviter nitrosæ, cum vini subaciduli pauxillo; cibo subacido, leviter demulcente, parum salito; medicamentis verô similibus.
3. A nimis humido aëre; largo foco ex aromaticis resinosisque lignis; exhalatione aromatum.
4. Ab aëre acri putrefaciente; hunc emendando accenso nitro, pulvere pyrio, vapore aceti, sale prunis insperso.
5. Ab animi affectibus; hos sedando ratione, contrariis affectibus, varietate objectorum, anodynis, opiatis.
6. A cibis acribus acidis; id acre diluendo, demulcendo, absorbendo, immutando in salem compositum; aquosa, gelatinosa animalium, oleosa, cretacea, ostracodermata, lapides animalium, terræ pingues, sales alcalini fixi, volatiles,

les, simplices, compositi, id efficiunt. Vid. (60. ad 69.).

7. A cibus acribus salinis ; eam acrimoniam diluendo per aquosa, tumque evacuando simul ; demulcendo per lenta, oleosa ; corrigendo per lixiviosa ex calce vivâ.

8. A cibus acribus aromaticis calefacientibus ; diluendo per aquosa ; corrigendo per acida ; resolvendo & detergendo per saponacea acida ; demulcendo per blanda gelatinosa. Quum alcalescentia acrimonia huc spectent , & illa hinc intelliguntur.

9. A cibus animalium ex partibus alcalescentibus ; per ea , quæ descripta (76 ad 91.).

10. A cibus copia peccantibus , stomachum constringentibus ; dilutione, interdum, vomitu, solutione alvi.

11. A potu acris fermentato, vel fermentante , acido, oleoso, aromatico, destillato vel simplici inducta acrimonia tollitur iisdem remediis (No. 5. 6. 8. hujus.).

12. A nimia vigiliâ ; curatur iisdem, ac (No. 1. 2. 5. hujus.).

13. Si à retentis intra corpus excrementis acrimonia alcalina, acida, oleosa,

E 5 sapor

saponacea putrida ; hæc reddenda fluxilia ; viæ lubricandæ ; emissaria aperienda ; vires expellentes stimulantæ , augendæ ; hæc facienda per externa , interna.

606. Emissaria aperiuntur solvendo impactum , laxando obstructum ; id balneo , fotu , frictu , abrasione pilorum , mundatione cutis fit. Vid. (107. ad 144.).

607. Id , quod ad extrema vasorum comicorum stagnat ex nimia sanguinis copia , quæ vasa comprimuntur , reducitur in fluorem imminutâ sanguinis copiâ perfectionem venæ ; id docent signa plethoræ. (106. ad 107.).

608. Quod ibi hæret , ad extrema capillaria , ob fibras horum spasmò contractas , & hinc arctatas , solvitur laxatis fibris (53. ad 55.) ; & acri contractionis causâ ablata (35. 36. 54. 66. 67. 88. 102. 103. 104. 105. 127. 128.) , unde peti debet , quod hic requiritur.

609. Quod hæret ob visciditatem & lentorem proprium solvetur variis remediis , quorum primarium vis ipsius febris ita moderata , ut valeat coagulum hoc solvere (587. 589. 593. 594.) ; adeoque huc requiritur , ut sic temperetur impetus , & ne inflammationes , suppuraciones , gangrænas ,

grænas , sphacelosve queat producere (592.) : cujus periculum imminere docet vehementia symptomatum , maximè caloris , comparata cum virtute vasculorum. β . neve nimio motu dissipentur liquida : id verò denunciat siccitas narium , oculorum , oris , gutturis , linguæ , raucedo , arida cutis , urina parcior , pulsus parvus , celer , inæqualis. γ . neque ut ante coctionem torpeat nimis , ita ut materiem morbi non valeat subigere , solvere , movere , scernere , excernere : id cognoscitur , si languent actiones vitales omnino , necdum apparente signo pepasmi.

610. Si itaque exorbitare deprehenditur (101.) , moderamen fit abstinentiâ , victu tenui , potu aquæ , aëre frigidiusculo , animi affectu leni , venæ sectione , clysmate refrigerante , medicamentis blandis , aquosis , glutinosis , refrigerantibus , anodynis , opiatibus : confer (92. ad 106.) .

611. Si segnior apparet , excitabitur ope Cardiacorum defumtorum ex cibo , potuque meracioribus , aëre paululum calidiorre , animi affectu magis excitato , medicamentis acrioribus , volatilibus , aromaticis , fermentatis , frictione , calore , motu musculari , balneis , fomentis.

612. Alterum post primum (609.) re-

medium, quo visciditas tollitur, est elateris in vasis restitutio, minuto liquido per missionem largam, citam, ex magno vulnere, sanguinis, aucto dein, vel simul, motu per stimulantia.

613. Tertiô idem viscidum fluidum redditur diluendo potu, balneo, fôtu, clysmate, aquosis, tum simul fricando.

614. Agunt ea optimê, si calida, aquosa salita, aromatica amara lactescentia frigida sumuntur.

615. Quæ (613. 614.) ut bene, citô, tutô, validê agant, missio sanguinis præmissa prodest, nam parat ingressum, miscelam, actionem.

616. Simulac viscidum his (609. 610. 611. 612. 613. 614. 615.) solutum, iisdem continuatis, vel auctis, pellitur, & expellitur: sed & sæpe jam emendatum expulso non egebit (594. No. 1.).

617. Symptomata ex febre acutâ singulari orta imprimis hæc sunt: frigus, tremor, anxietas, sitis, nausea, ructus, vomitus, debilitas, calor, æstus, siccitas, delirium, coma, pervigilium, convulsio, sudor, diarrhoea, pustulæ inflammatoriæ.

618. Quæ omnia (617.) orta ex febre (581. 587.), ut suâ causâ, hâc ablata

(594.

(594. 595. 598. ad 617.) cessabunt; adeoque, si ferri queunt tam diu sine periculo vitæ, singularem curationem vix requirunt.

619. Quin sæpe oriuntur ex conatu vitæ se disponentis ad crisin, vel ad materiæ criticæ excretionem, tum hanc præcedunt, comitantur, sequuntur, nec turbari debent.

620. Si verò intempestiva, nimis sæva, quam ferri à vitâ possint, aut ab ægri patientiâ, vel aliud gravius malum productura sunt, tum singula sunt lenienda suis remediis propriis, habitâ semper ratione causæ (586.), & status (590.) morbi ipsius.

FRIGUS FEBRILE.

621. **F**rigus in febrium acutarum initiis ponit attritum liquorum in se mutuò, & in vasa, minorem; motum circulatorium imminutum; liquidum ad extrema stagnans; cor minus contractum; minus evacuatum; spiritus cerebelli minus influentes.

622. Efficit, si diu manet validum, polyposas in vasis majoribus, circâ cor, concretiones; in minoribus verò, ex-

134 FRIGUS FEBRILE.

presso suo liquido, evacuationes; hinc multa, & gravia mala in utrisque.

623. Hinc patet, quid designet, quid præfagiat? & cur, quo majus initio frigus, eo periculosior febris? in peste incipiente frigus summum, progressâ calorem maximus?

624. Id frigus omni eo, quod valide stimulat, quocunque demum titulo, tentatum dedit sæpe insanabilem postea inflammationem. Hinc salina acria, aromatica, oleosa, vesicantia, & similia, damnosa sunt.

625. Optimè autem curatur potu aquæ calidæ nitrosæ cum pauxillo mellis & vini; balneo, vapore, fotu, lotionem per similem liquorem; frictione blandâ.

626. Quibus (625.) statim applicatis sæpe maxima mala ilicô curantur (622.).

TREMOR FEBRILIS.

627. Tremor ponit musculorum vacillationem inter tonum, & laxationem; causas tendentes & laxantes brevi, & involuntariè, sibi mutuô succedentes; influxus arteriosos & nervosos
nunc

nunc contingentes, nunc absentes; adeoque initio morbi quietem utriusque liquidi; in fine sæpe nimiam horum absentiam, post dispendia nimis magna.

628. Efficit diu perseverans impedimenta circulationi humorum, & vitia independentia.

629. Inde diagnosis, & prognosis ejus habetur: & liquet cur tremor cum frigore (621.)? cur ingens tremor adeo malus? cur in animi affectibus majoribus tremor? cur circâ mortem? cur ab evacuatione omni nimis magnâ? cur à nimio potu quocunque?

630. Curatur restituto æquabili fluore & pressione liquidi arteriosi in arterias, cerebellosi in fibras motrices: id obtinet in morbi initio usu eorum, quæ lentorem solvunt, vires reddunt (606. ad 617.); in fine autem per ea, quæ liquida perditâ subitò restituunt, fibras roborant, & viscera (46. 47. 48. 49.).

ANXIETAS FEBRILIS.

631. **A**nxieta pro causâ habet sanguinis ex corde egressum impeditum; adeoque per fines pulmonales, aut Aortæ impossibilem transitum; hinc: spasmus vasculorum contractorum, aut materiem inflammata transire ineptam; similia orta vidimus ex impedito trajectu cruoris per Venam Portarum ex iisdem causis; unde, quum omnis sanguis venosus, à coeliacis & mesentericis arteriis allatus, redire non possit, stagnet, vasa extendat, arterioso fluxui resistat, & omnia hinc nata & nascitura mala producat, liquet ambas has anxietatis causas in omni acuto morbo quam severissimè observandas, & curandas esse.

632. Si anxietas ergo talis (631.) diu persistat, circa vitalia producet polyposas concretiones, inflammationes, gangrænas subitaneas, cum intolerabili angustia, & morte citò subsequente; si autem hæsit in hypochondriis, tum maximum sensum ægritudinis circa stomachum pariet, reliquis visceribus minus acutè sentientibus; dein putrefactiones subitaneas sanguinis in vasis his amplis, minusque validis, unde gan-

gangrænæ, hepatis putredo, dysenteria à putrefacto lethalis.

633. Inde optimè novit Medicus, quid anxietas talis (631. 632.) pro suâ causâ, & naturâ ponat, quidque inde prælagiendum sit; simulque distinguet inter anxietatem ab uno affecto genere nervoso, absente febre antegressâ, & inter eam, quæ ab inflammatione acutâ, quæ tum per sua signa prius se prodidit; inde comparans hæc cum vehementiâ, duratione, loco hujus mali, cuncta prudenter detegere poterit: Cur in omni fere morbo circâ mortis articulum anxietas ultimô tragœdiam claudit? Cur spasmodica anxietas parum, inflammatoria maximè, periculosa? Cur inquietas, jactatio, suspiria, anhelatio, pervigilium in morbis inflammatoriis, suppuratoriisque, mortis prænuncia?

634. Inde etiam patet, quam varia requiratur medela ad sævitiam hujus mali leniendam; quæ tamen omnis cognoscitur, & applicatur, cognitâ prius indole ipsius symptomatis. Ubi ergo advertitur affectio spasmodica causa esse, hæc tollitur leniendo acre irritans (603. 604. 605.); id expellendo per vomitoria, purgantia sudorifera, diuretica, abstersiva; diluendo aquosis calid-

138 ANXIETAS FEBRILIS.

calidis ; sedando animi affectum ; laxando fibras , vasa , viscera (35. 36. 54. 55.) ; compescendo vim liquidi nervosi per anodyna , & narcotica. Si ab inflammatorio viscido , id solvendo , diluendo , ejusque vasa laxando , impetum denique liquidi vitalis refrænando ; huc maximè faciunt potus largus , calidus , aquæ mulsæ farinosæ nitrosæ subacidæ levissimè aromaticæ ; fots , cataplasma , epithema , emplastra applicata locis affectis , quæ fiant ex diluentibus , laxantibus , emollientibus , anodynis ; clysmatibus sæpe , parvâ copia simul injectis , diu , si fieri queat , retentis , quæ facta sint ex iisdem ; vapore aquæ calidæ , emollientibus mistæ , per nares , osque , in pulmones assiduè ducto.

635. Si verò ullibi , hic profectò mali atrocitas citam , tutamque medelam efflagitat.

SITIS FEBRILIS.

636. **S**itis siccitatem , liquorum immedietatem , acrimoniam falsam , alcalinam , biliosam oleosam prò causâ suâ habet.

637. Hinc semper fere præsentiam aliqujus horum (636.) indicat.

638.

638. Adeoque signat, illa denunciari mala futura, quæ produci possunt ex iis causis, quas præsentis esse significat (636. 637.).

639. Quare ei semper, maximè in acutis, succurrendum illicò est.

640. Quod fit: 1. bibendo aquosa, subacida, nitrosa, demulcentia, calida, sæpe, parva copia simul. 2. nares, os, fauces, simili potu fovendo, colluendo, gargarifando. 3. fots, epithemata, & cataplasmata ex similibus, hypochondriis circumvolvendo. 4. Clysmatibus similibus injectis, & retentis.

641. Si verò valida sitis unâ comitetur summam debilitatem, tum vinosa, imo & sæpe spiritibus ditiora prioribus (640.) miscenda, propinanda tutò erunt.

NAUSEA FEBRILIS.

642. **N**ausea irritum conatum vomendi significat cum ideâ horroris; causam ergò habet proximam fibrarum muscularium faucium, œsophagi, ventriculi, intestinorum, muscutorum abdominalium leviozem convulsionem; hæc fit 1o. ab acri, putri, bilioso, in vacuum stomachum pulso, in fauces adscendente,
 ultra-

utraq̃ue vellicante, & irritante, unde reliqua eodẽdem fequuntur motus; cognofcitur ex inediâ, halitu putri, ore, linguâ, faucibus fordidis; vel 2^o. oritur à lentâ, vifcidâ, fluctuante materie, quæ in iisdem locis natando vellicat; cognofcitur ex fignis glutinofi prægreffi (69. ad 75.); aut 3^o. à ventriculo, œfophago, inteftinis, & vifceribus vicinis leviter inflammatis; quod fcitur ex fignis horum propriis; 4^o. tandem etiam à memoriâ rei, quæ olim affumta fimiles naufeas creaverat; 5^o. denique & ab inordinato liquidi nervofi motu, undecunque excitato; cognofcitur delirio, fpafmo, vertigine, tremore.

643. Si diu manet, producit inediam, abftinentiam à potu, & à medicamentis, dein vomitus, & quæ hinc produci poffunt mala quam plurima, quorum præcipua debilitas, acrimonia alcalina putrida, ficcitas.

644. Siftitur ex primâ caufâ orta (642. N^o. 1.) ufu acidi, falſi, aquofi potus, cibi, medicamenti; tum fimili leni purgante exhibitò; & acido-austeris roborantibus fibras; aut, ſi his non ceſſerit, vomitorio dato. Quæ verò ex ſecundâ caufâ (642. N^o. 2.) fit, illa tollitur, diluendo, attenuando, purgando, vomitum excitando.

At si ex tertiâ ortum duxerit (642. N^o. 3.), tum non cedit, nisi illis morbis curatis, juxtâ descriptionem postea in his secuturam. Quarta species oblivione, & vitiatione similium aboletur. Quinta autem per austeram, quietem, narcotica, aquam frigidam.

645. Hinc intelligitur, cur in acutis, ubi nausea, purgatio initio data, ut & emeticum, adeo proficit, & in quo acutorum genere? Cur ægri acutis cum febribus conflictati adeo horreant pingua, carnosâ, ova, pisces, & contrâ appetant aquam, acida, fructus horæos, frigida? Cur, nisi nausea superetur, nihil ægro prosint medicamina? Cur sæpe hoc symptoma incurabile sit? Cur tales morbi tandem fere cum subito, insolito, mirabili appetitu, secedant?

RUCTUS ET FLATUS.

646. **R**uctus pro causâ suâ habet elasticam, calore, effervescentiâ, fermentatione, dilatabilem materiem, quæ uno momento coercetur, altero, laxato claustro coercente, exploditur cum sono, & impetu.

647. Hinc aër, sales oppositi, fructus ho-

horæi, humores putrescentes, vegetabilia fermentantia dant ructui, & flatibus materiem; cujus impetus, foetorque provarietate ejus indolis varia est.

648. Nec tamen omnia hæc (647.), si liberê exhalare queant, ullum dabunt impetum; unde liquet, spasmos sphincteris œsophagæi, œsophagi, oris superioris & inferioris ventriculi, atque intestinorum semper concurrere simul, iterumque laxari; inde ructus, flatus, crepitus, borborygmi clausi.

649. Si concurrunt hæ duæ causæ simul (647. 648.), validê agunt, & diu perstant; tum elastica materies calore, motu, propriâ vi, excitata in dilatationem, constricta in cavo, cujus fibræ convulsione constrictæ, membranas claudentes dilatat, tendit, dolere facit, vicina comprimit, unde dolores, anxietatesque oriuntur intolerabiles, mox ad emissos flatus cessantes. Vid. (220. ad 227. & 631. 634.). Ad hæc autem vis febris accedens inexplicabilia certê tormenta facit.

650. Curatio hujus mali fit 1. auferendo materiem (647.) per diluentia; calida aquosa leviter aromatica dissipantia; salium æquilibrium tollentia in requisitum præpondium; putredinem corrigentia; fer-

fermentationem sedantia. 2. Convulsiones sedantia ; lenientia acrium ; compescentia spiritus , huc revocanda. Quorum princeps opium, & lenia antihysterica. 3. Clysmatibus , fomentis , epithematibus , calidis laxantibus , anodynis , leniter aromaticis , ut & cucurbitis , sine scarificatu abdomini impositis.

651. Ex his ipsis (646. ad 651.) respondetur ad hæc , aliter obscura , quæ sita : qui cibi , potus , venena , medicamenta flatulenta sint ? Cur vacuis visceribus primis accidunt ? Cur vulneratis ? Cur arctè constricto abdomine ? Cur hypochondriacis , hystericis , convulsis , colicisque accidunt ?

VOMITUS FEBRILIS.

652. **V**omitùs , expulsio violenta contentorum ventriculo primò , dein etiam intestinis , tandem visceribus eò se evacuantibus , agnoscit convulsionem fibrarum muscularium faucium , œsophagi , stomachi , intestinorum , diaphragmatis , musculorum abdominalium , pro causâ proximâ ; pro remotâ omne id , quod irritando fibras descriptas , vel facilè convellenda viscera , stimulat.

653. Ergo vitio stomachi convulsi , inflamm-

inflammati, suppurantis, scirrhusi, cartilagineosi, cancrofi, accedente febre acutâ, aliquandô accedit, pertinax est, ex ideâ ejus mali cognoscitur, eoque sublato demum tollitur: de quibus postea.

654. Vitio viscerum, & partium circumjacentium, similiter affectorum, distento per ingesta stomacho irritatorum idem toties incognitâ causâ pertinacissimus accedit, accedente febre.

655. Vitio omnis causæ majoris nausæ (642.); unde cognoscitur, dirigitur, curatur.

656. Si permanet, producit atrophiam, ileum, convulsiones, & effecta nausæ majoris, & pertinacis (643.).

657. Si vitio causæ (653. 655.) acciderit, curatio ex historiâ illorum morborum petenda.

658. Si à causâ (642. 655.) oritur; remedia eadem (644.) huc in usum revocanda diligenter, maximè opiata, & epithemata corroborantia, attrahentia, dissipantia.

659. Hinc liquet ratio difficultatis sistendi vomitus in multis febribus acutis: tum falsitas & periculum regulæ, *vomitum vomitu curatur*: Cur sæpe sudorifera vomitum tollant, ut in peste? cur sæpe
sista-

ſtatur ille factâ crifi, ut in variolis? Cur ſæpe miſſu ſanguinis, ut in acutis inflammatoriis? Cur, quibus initio febris acutæ vomitus perpetuus ſine cauſâ inflammatoriâ, diarrhœa prô crifi, quæ caveatur dato in principio morbi emetico? Cur vomitus omnis ingeſti, ſtatim ac receptum eſt, peſſimus in acutis fit? ex iisdem Singultus naſci, & ſanari poteſt.

DEBILITAS FEBRILIS.

660. **D**ebilitas ingens ſequitur impeditum influxum & preſſionem liquidi nervoſi in muſculos.

661. Quod impedimentum ab inanitate vaſorum, exhauſto liquido, ab immeabilitate liquidi, obſtructione canalis, compreſſione huius, maximê circâ originem ſuam in cerebro & cerebello, debilitate cordis.

662. Priorem cauſam demonſtrant ſymptomata magnarum evacuationum prægreſſa, & præſentia, ut eſt diuturnitas morbi; hæmorrhagiæ morboſæ, artificialesve; ſudor; diabetes, ſalivatio; diarrhœa; defectus cibi aſſumpti, retenti, digeſti, intropulſi; pallor; macies; pulſus parvus; vaſa collapſa; muſculi flaccidi.

663. Immeabilitas liquidi glutinosi, vel inflammati, cognoscitur ex signis datis (69. 70. 71. 72. 73. 74.).

664. Canalis autem obstructio ex (107. ad 144.).

665. Cerebri & cerebelli compressio causa debilitatis perspicitur ex observatis iis functionibus simul læsis, quas ab iis integris pendere certò novimus; ut si deliria, sopor, tremor, vertigo, tinnitus simul adsint.

666. Sed à debilitate cordis scimus ex signis deficientis circulationis (106.).

667. Cibi liquidi, sanguini similes, arte digesti, gelatinosi, blandi, ex animalibus, vegetabilibusque, vinosis, & aromaticis, secundum artem misti, sæpe, parvâ dosi dati, cum leni frictione exteriorum, repletionem efficiunt commodam; inprimis si sumuntur ex idoneâ, contrâ morbi ingenium, materie.

668. Si ex immeabilitate liquidi (663.) remedia adhibenda (75.) & (132. ad 137.); aliter enim nil contrâ hanc speciem prodest.

669. Ut & (664.) curatio petenda ex (124. ad 144.).

670. Illa autem, quæ ex (665.) oritur, ut plurimum tollitur his, quæ illi loco applicata, deobstruere possint impactum:

ctum (124. ad 144.), & impetum avertere in alia loca. Id fit humectando nares, caput, faciem, os, collum, fomentis blandis; applicando pedibus epispastica.

671. Debile cor rarô, nisi lentê, juvatur; generalia verô dicta (667. ad 671.) prodesse possunt.

672. Inde (660. ad 672.) nobis constat, quam rarus sit Cardiacorum in acutis intellectus; quam periculosus in his administrandis error; quam sit debilitas in febribus malum sæpe insuperabile.

CALOR FEBRILIS.

673. **C**alor febrilis thermoscopio externus, sensu ægri, & rubore urinæ internus cognoscitur.

674. Semper requirit majorem ignis copiam in illo loco, quem plus calefacit.

675. Quæ ortum debet violentiori partium fluidarum in se mutuô, in vasa, horum in illas attritui.

676. Illa violentia à magno motu partium ex corde, & magnâ resistantiâ vasorum contrâ cor, oritur.

677. Magnus motus ex corde pulsifan-

sanguinis æstimatur à densitate liquidi pulsi, & velocitate ejus per vasa.

678. Densitas scitur ipso conspectu extravasati, dissipatione prægressâ rarioris, duritie pulsus.

679. Velocitas supputatur ex ictuum cordis numero, collato cum magnitudine pulsuum.

680. Magna resistantia cognoscitur ex mole movendorum inertium, & paucitate, vel angustia, vel immobilitate canalium transmissurorum.

681. Moles movendorum ingens percipitur ex signis plethoræ (106.), caco-chymix, vel solutorum jam citò liquidorum, quæ antea stagnabant; ut in obesis: maximè inflatus venarum cum arteriâ veloce & magnâ simul ejus præsentiam docet.

682. Vasorum paucitas ex historiâ obstructionis (107. ad 124.), vel vulnere (145. ad 331.), colligitur.

683. Angustia vasorum intelligitur conspectu, tactu, cognitâ temperie siccâ, ad parva motus augmenta magna augmenta caloris.

684. Immobilitas canalium, quâ suæ dilatationi valde resistunt, cognoscitur omni signo rigidarum fibrarum, vasorum,

rum, viscerum (32. 33. 34. 50. 51. 52. 53.).

685. A tot causis proximis (674. ad 685.) pendet origo caloris febrilis; quarum iterum infinitæ numero & varietate aliæ remotiores esse possunt.

686. Potest verò increfcere ex incremento unius harum caufarum folitario, tumque fe habet augmentum caloris, ut augmentum caufæ.

687. Si rurfum duæ caufæ increfcunt fimul, habebit fe auctus calor, ut productum incrementorum caufarum, fimultiplicentur per fe mutuô.

688. Qui idem calculus in cœteris obtinere potest.

689. Calor auctus liquidiffima diffipat ex noftro cruore, id eft aquam, fpiritus, fales, olea subtiliffima; reliquam maffam ficcatur, denfat, concrefcere cogit in immeabilem, irrefolubilem materiem; fales, oleaque expedit, attenuat, acriora reddit, exhalat, movet; hinc minima vafa atterit, rumpit; fibras ficcatur, rigidas, contractasque reddit; hinc fubitô multos, celeres, periculofos, lethales morbos producit; qui à priori facilè deduci poffunt.

690. Ex his demum intelligi bene potest

test, quid requiratur ad mitigandum calorem, & quam varia eo remedia spectent.

691. Si sola velocitas aucta calorem facit, remedio erit quidquid eam minuit. Quies muscularis, & animi, missio sanguinis, levis brevisque compressio venarum in artubus, frigidorum lenta & blanda applicatio interna atque externa, diacodiata prudenter assumpta, primaria.

692. Si à densitate (678.), curatur iis, quæ velocitatem minuunt (691.); tum aquæ potu; & oxymelle; iisque, quæ vasa laxant.

693. Moles movendorum in plethora facillè superatur (106.?). in cacochymia lentè, & per vices evacuando, corrigendo; in solutis pinguibus, prius stagnantibus, maxima difficultas: tum aquosa, acida, mellita, vitæ, ovorum, saccharina summi usus sunt, unâ cum evacuantibus assiduò usurpatis.

694. Obstructio calorem pariens (682.) ex curatione obstructionis (125. ad 144.), & ablatis vasis in vulnere supervenientium malorum sanatione, intelligitur.

695. Ab angustia vasorum si pendet (683.), requiritur horum dilatatio per laxantia (54.).

696. Quibus iisdem (54.) tollitur calor ex nimia vasorum rigiditate ortus.

697. Quoties autem excessus caloris ex combinatis oritur causis, toties remedia, hucusque descripta, (690. ad 697.) combinata inter se valebunt.

698. Ex totâ hac doctrinâ Caloris (673. ad 698.) intelligi potest, cur febris calidissima sit acuta, celeris, putrida; & in calore summo pestifera? Cur lecti, aëris clausi, victus, medicamento- rum calor adeo his noceant? Cur æstus circâ cor, & hypochondria, tam malus?

699. Quin ex eâdem perspicitur origo, natura, efficacia siccitatis; & curatio inde dirigitur, quæ potu, fotu, balneo, clysinâte, gargarismate, ex aquosis, subacidis, mellitis, laxantibus fit.

DELIRIUM FEBRILE.

700. **D**elirium est idearum ortus non respondens externis causis, sed internæ cerebri dispositioni, unâ cum iudicio ex his sequente, & animi affectu, motuque corporis inde sequente: atque his quidem per gradus auctis, solitariis, vel combinatis; varia deliriorum genera fiunt.

701. Ponit ergo semper cerebri medulloſi affectionem morbosam; quæ ab

obstructione quâcunque; impedito influxu; transfluxu, effluxu per cerebrum; violentiori velocitate; stagnatione; & plurimis sanè causis oriri potest; ad quas investigandas seriô incumbendum, ut fiat curatio.

702. Nam pro varietate illarum (701.) diversa remedia, & medendi methodus debent eligi: pediluvia, epispastica pedum & poplitum; frictiones harum partium; clysmata diluentia sæpe applicata; victus tenuis; potus sedans, deobstruens, diluens; medicamenta ad caput emollientia; levia anodyna; cruoris ex pede emissio; hæmorrhoidum solutio; menstruorum laxatio, primaria habentur.

COMA FEBRILE.

703. **C**oma est in febre assidua somnolentia cum effectu, vel sine eâ; ponit ubique eum in cerebro statum, unde impeditur sensuum, motuumque animalium exercitatio; qui oriri potest à defectu appellendi liquidi arteriosi ad cerebrum; aut ab impedito ejus circulo per cerebrum; aut ab impeditâ secretionem spirituum à sanguine in nervos; aut ab denegato horum per nervos fluxu, & refluxu.

704. Hinc plurimæ, diversæ, & sæpe
con-

contrariæ causæ hunc affectum in febre producunt; quales sunt omnes vehementes evacuationes, aut repletiones; omnes nimix sanguinis inspissationes glutinosæ, pingues, inflammatoriæ; omnes causæ cerebrum ipsum comprimentes, qualescunque fuerint; quæ eædem in nervos, si agunt, eadem fere efficiunt.

705. Unde iterum patet, à Medico per signa prius indagandam causam illam singularem esse, antequam definire queat, quid applicandum sit, & quomodò: nam sæpe contraria exiguntur; & sæpe coma diu pertinax, irritò tentatis omnibus, sponte tandem cessat, pepasmo febris absoluto.

706. Illa autem, quæ delirio, hîc apta (702.), imprimis fomenta capiti, colloque applicata.

707. Si autem magnæ inflammationis signa adsint, curandum ut morbus princeps, de quo postea.

PERVIGILIUM FEBRILE.

708. **C**ontrarium illi malo (703.) est Pervigilium; unde intelligitur: & pro causâ habet plerumque levissimæ inflammationis cerebri prima initia,

154. PERVIGILIUM FEBRILE.

quibus auctis in coma mutatur sæpe.

709. Curatur quiete musculari corporis ; pace mentis ; absentia objectorum sensuum ; frigore modico ; aëre humido ; victu blando emolliente ; potu farinoso , leni , emolliente ; susurro leni , assiduo , grato , blandè tinnulo ; medicamentis farinosiis , suboleosis , humectantibus , demulcentibus ; odore vegetabilium soporiferorum ; usu anodynorum , paregoricorum , soporiferorum , narcoticorum ; præmissis semper, quæ inflammationi curandæ, & compescendo ejus incremento, valent.

CONVULSIO FEBRILIS.

710. **C**onvulsio prius descripta (230. ad 239.) hic semper à vitio cerebri, quod vel ab inferioribus per nervos (627. 631. 632. 633. 642. 648. 649. 652. 653. 654.) cerebrum vellicantibus afficitur ; vel ex inordinato appulsu, transfluxu, egressu liquidi cerebrosi, quod oriri potest ex omni illâ causâ, quæ deliria, comata, pervigia creare potest (701. 702. 703. 704. 708.), quare iterum magna hic varietas in ætiologiâ, & curatione.

711. Si diu perseverat, commerciorum nervorum facilè totum genus nervosum afficit, unde tristitia mala.

712. Si inflammationis cerebri signa prægressa subsequitur convulsio, fere lethalis. Si post urinam crassam priusemissam mox aquosa, pellucida, exit, dein convulsio fit, pessima est: si in febre post magnas evacuationes oritur convulsio, & hæc fere lethalis: ut & quæ cum delirio perpetuo.

713. In curationem prius pervestiganda est causa singularis (710.), & locus primario affectus, unde convulsio ortum habet (710.), dein ocyus medicamentis applicanda illa, quibus acre leniri, impactum resolvi, contractum laxari possit. Unde diluere, laxare, revellere, lenire, fere sanare solent convulsiones hæc: nec unquam specioso antispasticorum titulo fides adhiberi debet.

714. Si autem caput primario affectum deprehenditur, debet curatio fieri dicta (706.).

SUDOR FEBRILIS.

715. **S**udor in initio acutæ febris, cujus causa paulô pertinacior, pro causa habet vasorum extremorum laxam debilitatem, cruoris circulationem vehementem, facilem aquæ ex reliquis sanguinis principiis expeditionem.

716. Si perennat, orbat sanguinem liquido diluente, reliquum inspissat, obstructions facit lethales, sanguine postea vix diluentibus vel solventibus auscultante; unde omne fere morborum acutorum genus produci potest.

717. Ergo initio semper cohibendus, nisi constet, materiem morbi adeo tenuem esse, ut cum primo sudore diffiliari possit.

718. Prohibetur surgendo ex lecto; sedendo; corpus à nimis integumentis liberando; aërem frigidiusculum admitendo; calidis, calefacientibusque abstinendo; potu plurimo leni, blando, frigidiusculo sæpe utendo, ut amissi damnum resarciatur citô; circulationem nimis velocem refrænando (102. ad 106.)

DIARRHOEA FEBRILIS.

719. **D**iarrhœa pro materie habet mucum, lympham, gluten, pus, faniem, sanguinem, narium, oris, faucium, œsophagi, ventriculi, hepatis, vesiculæ fellis, pancreatis, intestinorum, mesenterii; pro causâ vires in intestina expellentes validas, dum in ipsis intestinis contrahentes vires debiles, vel in vasis intestinorum absorbentibus impedimenta, ne admittant.

720. Quare liquet, fluorem alvi in febribus multiplicem esse quoad materiem; causam; effectus; eventum; adeoque sæpe omninô incurabilem esse; & rarô colliquativum, eumque vix unquam medicabilem.

721. Si continuatur diu, viscera abdominalia magis magisque in eundem morbum disponit; eadem labefactat; excoriat; inflammat; reliqua autem vasa & viscera emungit, exhaurit; hinc atrophia, macies, debilitas; dysenteria; inspissatio fluidorum per totum habitum corporis; solidorum laxitas; fluidorum jactura; leucophlegmatia; hydrops; tabes.

722. Sanatio absolvitur acris irritantis

lenimine; expulsu per emetica, purgantia, clysmata; corroboratione laxi; pacatione impetus per narcotica; determinatione aliorum per sudores, urinasve; subductione materiæ morbosæ, correcto ejus fonte primo.

EXANTHEMATA FEBRILIA.

723. **P**ustulæ inflammatoriæ habent ut plurimum pro materie aliquid, quod minima vascula cutanea transire non potest, sed ibidem hæret; pro causâ autem vim vitæ circulatoriam, secretoriam, excretoriam; unde pro variis hisce causis valde multiplices sunt, unde febres nomen dein accipiunt, erysipelatosæ, scarlatinæ, petechiales rubræ, petechiales purpureæ, morbillofæ, variolosæ.

724. De tribus posterioribus seorsum tractari solet: de tribus primis autem facile diagnosis & prognosis formari queunt.

725. Curatio difficilis non est, quum rarô quidquam requirant, nisi ut satis largâ levis liquidi copiâ mobilis servetur materies; atque vis vitæ in justo modamine perseveret assiduô; tum enim brevi cum desquamatione epidermidis abeunt.

726. Reliqua febris symptomata his similia & agnata, vel ut morbi ipsi curari postulant.

727. Hinc patet, quid sentiendum de febrium acutarum varietate; nam quæ motum febrilem semel excitatum uno impetu ad finem perducunt, Continuas vocamus; quæ per vices impetum remittunt, & denuo excitant, ut semper dureret febris, Continuas Remittentes; quæ per vices impetum remittunt, ut plena ἀνυρεξία inter duos quosque paroxysmos intercedat, vocantur Intermittentes.

FEBRIS CONTINUA.

728. **C**ontinuarum simplicissima Ephemera, seu diaria, spatio 24. horarum initia, incrementa, statum, declinationem absolvens. Causas agnoscit solum motum vehementiorem, peccato sex rerum non naturalium ortum; vix ullam materiam. Cognoscitur, à causâ levi; corpore puro; symptomatibus levibus; crisi citâ; pulsu mox à febris exitu planè restituto. Curatio facilis, abstinentiâ, quiete, dilutione.

729. Si protrahitur dicta febris (728.) per plures dies, vocatur Continua non putris;

tris ; causæ , signa , medela eadem ; maxime venæ sectione largâ , & refrigerantibus.

FEBRIS CONTINUA PUTRIDA.

730. **S**ynochus putris dicta fuit , quæ debetur causis inflammatione simplici majoribus , viscerum obstructioni , cutis oppilationi , & capillarium fere omnium , acrimoniæ verò acutiori.

731. Cognoscitur calore digitum tangentem quasi pungente , pulsu febrili , sed & inæquali , & non ordinato , urinâ crassâ , rubrâ , turbidâ , crudâ sine sedimento , temperie , ætate , habitu , calidis , sanguinolentisque.

732. Hæc Homotonos , Epacmastica , seu Anabatica , vel Paracmastica.

733. Ex quibus prior salutaris : pessima secunda : melior tertia.

734 Pulsus quo debilior , frequentior , inæqualior robore , inordinatio tempore , intermittentior ictu ; respiratio quo difficilior , frequentior , anhelosior , cum narium pinnis magis motis , quo magis dolens circa vitalia , quo inordinatio ; lassitudo quo vehementior , debilitas major ,
jacta-

FEBRIS CONTINUA PUTRIDA. 161

jactatio corporis frequentior, decubitus in dorsum, extensis membris, frequentior; rationis, affectuum, quo usus perturbatur; appetitus magis prostratus, digestio molestior, urina rubicundior, crassior, turbidior, cum sedimento minori, vel & tenuior, magisque aquosa, parcius, minus retinenda; motus quo magis tremuli, tantum refugientes, ludentes, carpentes; oculi quo luctuosiores, involuntariis lacrymis humidiores, eo morbus hic (730.) pejor, lethalior.

735. Sed ubi somnus difficilis & male cedens, pustulae purpureae, vel lividae corpus deturpant, hypochondria tensa & inflata, fere moritur.

736. Curatio ante tradita pro indicantium varietate, symptomatum vehementia, aegri conditione, statuque morbi variata nihil singularis requirit.

737. Has dixit συνέχης Vetustas, Continentes Schola, quia nulla in his fervoris remissio: συνεχής verò, sive continuas (727.), quae Continuae remittentes.

FEBRIS ARDENS.

738. Quas inter Causas, sive Ardens dicta febris meretur singulatim
discu-

discuti ob frequentiam, discrimen, sanandi laborem.

739. Hujus symptomata primaria, Calor ad tactum fere urens, inæqualis diversis locis, ad vitalia ardentissimus, (in extremis sæpe remissior, imò aliquando frigus) ipsum aërem exspiratum incendens; siccitas in cute totâ, naribus, ore, lingua; Respiratio densa, anhelosa, cita; Lingua sicca, flava, nigra, exusta, aspera; sitis inexplibilis, sæpe subitò sublata; fastidia cibi, nausea, vomitus; anxietas, inquietudo, lassitudo summa; Tussicula, vox clangosa; delirium, phrenitis, pervigilium, coma, convulsio; diebus imparibus exacerbationes.

740. Causa labor nimius, iter longum, æstus solis, sitis diu tolerata, usus calefacientium, fermentatorum, aromaticorum acrium, Veneris nimiae, delassatio immodica, maximè æstate &c.

741. Decursus talis; tertio & quarto die sæpe lethalis, septimum rarò transit si perfecta; solvitur sæpe hæmorrhagiâ, (quæ si tertio vel quarto die parca, lethalis); hæc prænunciatur cervicis dolore, temporum gravitate, tenebrosâ caligine, præcordiorum contentione sine doloris sensu, invitis lachrymis sine lethali signo.

figno alio, rubore faciei, pruritu narium, optima fit die decretorio; solvitur & die decretorio, vomitu, alvo, sudore, urinâ, sputo crasso; accessio die pari pessima, si id ante diem sextum; urina nigra, pauca, tenuis huic lethalis; lethale sanguinis sputum; lethalis sanguinis mictus; deglutitio læsa mala; extremorum refrigeratio pessima; facies rubra & sudans mala; parotis non suppurans exitialis; alvus nimis fluxa lethalis; cum tremore abit in delirium, inde in mortem, transit in peripneumoniam sæpe cum delirio; post ingentia alvi tormina quæ oritur pessima; solvitur criticè cum rigore.

742. Quibus explanatis haud difficulter morbus præsens cognoscitur: neque de ejus causâ propiori, & proximâ ambigetur; est enim à cruore orbato parte blandiori, liquidiori, inflammatione per universum corpus, viribus validioribus: Quin præfagia haud infirma hinc deducuntur.

743. Curatio exigit aërem purum, frigidum, renovatum sæpius; integumenta minimè suffocantia, vel aggravantia corpus; situm corporis erectum sæpe; potus copiosos, blandos, demulcentes, subacidos, aqueos, calidos; cibos leves,
fari-

farinaceos, hordeatos, avenaceos, ex fructibus subacidis confectos; Venæ sectionem, si morbi initium, plethoræ indicia, inflammationis singularis signa, calor intolerabilis, rarefactio nimia, revulsio necessaria, symptomata urgentia, neque alio remedio facilè superanda, hanc exigunt; Clysmatum blandorum, diluentium, laxantium, antiphlogisticorum, refrigerantium applicationem repetendam, prout visus ardoris, siccitas alvi, revulsio, requisita imperat; Humectationem totius corporis, hauriendo aërem fumo calidæ blandum per nares, colluendo os, & guttur, lavando pedes, manusque tepidâ, fovendo spongiis calidis loca, ubi plurima vasa contactui magis exposita; Medicamentis aquosa, blanda, nitrosa, grato acore sapida, alvum lenissimè laxantia, urinæ materiem suppeditantia, suppleantia, sudori vehiculum copiâ præbentia, non acrimoniâ, omnem contractionem fibrarum, crassitiem liquorum, acrimoniam eorundem solventia, diluentia, temperantia.

744. Quibus qui adjunxerit dicta in regulis universalibus de curâ acutarum, harumque symptomatum, & secutura de acutis in perniciem viscerum singularium tendentibus, liquidò perspecta habebit

Arden-

Ardentis Febris cujuslibet remedia.

745. Quin & reliquæ febres acutæ singulares ex dictis intelliguntur, vel ad symptomata singularia pertinent, vel sunt alius morbi acuti effectus.

FEBRIS INTERMITTENS.

746. **F**ebbris Intermittentis definitio jam data (727. 737.). hujus diagnosis sponte patet, distinctio in varias classes facilis, utpote soli temporis differentiae innixa.

747. Tamen scire est, hanc in genere esse Vernalem, quæ à Februario in Augustum, & Autumnalem, quæ ab Augusto in Februarium dominatur. Distinctione necessariâ ob varios mores, symptomata, exitus, durationem, curationemque febris; quin una aliam fugat.

748. Quin & sæpe initio autumnæ æmulantur exactè indolem continuarum, ob longiores & duplicatos paroxysmos, dum tamen indoles & curatio planè diversæ sunt.

749. Incipiunt cum oscitatione, paniculatione, lassitudine, debilitate, frigore, horrore, rigore, tremore, pallore extremorum, respiratione difficillimâ, anxie-

anxietate, nausæâ, vomitu, pulsu citato, debili, parvo. Hæc prout majora, pluraque simul, eo febris pejor, atque in subsequente tempore calor, & cœtera symptomata pejora: & hic gradus febris primus, Incremento respondens continuarum, & reliquorum maximè periculosus; Urinatum ut plurimum est cruda, & tenuis.

750. Hunc statum (749.) excipit alter, incipiens cum calore, rubore, respiratione forti, magnâ, liberiore, anxietate minori, pulsu majori, robustiorique, siti magnâ, dolore artuum & capitis magno, Urinâ plerûmque rubrâ; respondet ἀκμῇ febrium continuarum.

751. Tum ultimô ingens plerumque sudor, remissio omnium symptomatum, Urina crassâ, sedimentum lateri contuso simile, somnus, ἀπυρεξία, lassitudo, debilitas.

752. Sæpe abeunt in acutas, periculosas; quod calori nimio, & motui excitato nimis, ut plurimum debetur.

753. Febris intermittens sua tria tempora (749. 750. 751.) percurrens, fibris minimis vasculorum & viscerum magnam infert vim, stagnando, obstruendo, coagulando, pellendo, resolvendo, attenuando; hinc debilitantur vasa, morbosa fiunt

unt liquida, eo inprimis genere mali, quo partes minus assimilatas, nec æqualiter mixtas habent; ex quibus simul acrimonia exoritur; unde ab omnibus simul facillima in sudorem proclivitas multum debilitans, ipso viscido sanguinis transudante; tum urina mire crassa, turbida, jumentosa, pinguis; similis saliva; inde debilis, solutus, vix cohærens cruor optimâ parte spoliatus, residuâ acer & crassus simul; adeoque ex laxis vasis, & crassis acribusque liquidis hæ febres diuturnæ dein terminantur aliquandô in Chronicos, scorbutum, hydropem, icterum, leucophlegmatiam, tumores scirrhosos abdominis, & quæ hinc sequuntur mala.

754. Cæterum, nisi malignæ (753.); corpus ad longævitatē disponunt, & depurant ab inveteratis malis.

755. Unde post accuratum examen totius historiæ intermittentium (746. ad 755.); causâ proxima constituitur, viscositas liquidi arteriosi, superveniente dein causâ quâcunque velocioris & fortioris contractionis cordis, atque resolutionis ejus quod stagnerat.

756. Adeoque, quum ordo hic (749. 750. 751.) semper in febre intermittente obtineat, videtur is, qui primum
tem-

tempus (749.), & primam causam (755.), superare possit, etiam totum illum paroxysmum posse tollere.

757. Dein, quum infinitæ causæ, eæque satis exiguæ, possint primum statum (749.) febris perfectæ intermittentis (727. 737.), ejusque causam (755.), producere; atque tales plurimæ in ipso corpore nasci, crescere, & dato tempore adolescere queant, ut in omnibus, in corpore natis, atque secretis, liquoribus fit; difficilius est ex infinitis possibilibus natam jam distinguere, quam unam possibilem excogitare, quâ positâ ratio periodorum dari ex legibus œconomix nostræ possit; id autem examinanti patescit.

758. Curatio ergo exigit, ut aperientibus salinis, alcalicis, aromaticis, mineralibus, diluentibus, oleosis blandis, calore, motu, fotu, frictione utamur tempore *ἀπυρεξίας*, vel & in statu descripto (749.).

759. Quin abundanti colluviei in primis viis, purgans, vomitoriumve sæpe prodest tollendæ; dando ante paroxysmum eo spatio, quo ante hunc effectum præstet. Id faciendum cognoscitur ex victu, morbis, symptomatibusque prægressis, nausæâ, vomitu, ructu, tumore, halitu,
for-

fordibus linguæ, gutturis, palati, ἀνορεξία, amarore oris, vertigine tenebricofa; & abfolutâ operatione dato opiato fedatus ante febrim tumultus fit.

760. Ut & prodeft idem (759.), dum stimuli inftar movet utrumque (759.).

761. Aliter nocet (759.), dum debilitat, liquidiffima elicit, digeftiones, hîc inprimis neceffarias, turbat; ficque diurnitatem morbi, vel & mortem producit. Frigus, & Febris fudorifero hîc tollitur sæpe; dum aliquot ante tempus cognitum futuri paroxyfmi horis liquido aperiente, diluente, leviter narcotico, repletur corpus ægri, dein unâ horâ ante malum excitatur fudor, & continuatur, donec binæ ultrâ tempus initii paroxyfmi elapfæ fint horæ.

762. Hinc & venæ feftio nocet per fe femper, prodeft aliàs cafu, ut & tenuis exactaque diæta.

763. Dum febris in ftatu, (750.) indicantur aquofa, calida actu, fubacidis aperientibus nitrofiſque permiftis, vel & cichoraceis, fimilibusque blandis aperientibus, quiete. Calore moderato tunc æger eget.

764. Ubi crisi paroxyfmus ſolvitur (751.), prodeft, ptifanâ vinofâ, juſculis

H

carni-

carnium , decoctis temperatis , sudori ;
urinæque reddere materiẽm ; sicque hæc
non vi caloris , medelæ , stragulorum , ex-
primere , sed copiã auctã promovere quam
blandissimẽ , & diu .

765. Porrò symptomati urgenti occur-
ratur juxta regulas in acutis datas (617.
ad 726.) .

766. Sublatã febris , victu analeptico ,
medicamentis corroborantibus æger refi-
ciendus , dein aucto robore purgandus
per alvum aliquoties .

767. Si autem febris autumnalis ve-
hemens ; corpus ex ægritudine debile ;
morbus jam aliquo tempore duravit ; ne-
que signa adsint internæ inflammatio-
nis ; neque collecti alicubi puris ; ne-
que obstructi admodum hujus illiusve
visceris , Cortice Peruviano abigetur , pul-
veris , infusi , extracti , decocti , syrupi
formã , cum propriis specificis , tempore
ἀπὸ πρὸς debito ordine , dosi , regimine ,
adhibito .

768. Quin & Epithemata sæpe juvant ;
& Inunctiones spinæ dorsi ; & adstrin-
gentia epota .

769. Ut singularis fiat curatio singu-
larum , notetur . i. intermittentes veras
quo minori spatio quiescunt , eo finiri ci-
tius

tius, & contra. 2. eo itidem plus accedere ad acutarum genus, & in has mutari. 3. causam eo mobiliorem forte, & copiosiore habere. 4. hinc vernaes, superveniente calore, sponte solvi. 5. autumnales, accedente frigore, incrementum. 6. indeliquere, quibus febribus medicina faciunda, & qualis.

MORBI ACUTI FEBRILES.

770. **N**unc morbi Acuti considerandi, qui febre stipati acutâ, tamen singularem inflammationem inducunt huic illive organo, unde ab ejus functione læsa toti morbo imponitur nomen. Tales sunt Phrenitis, Coma, Carus, Angina, Peripneumonia, Hæmoptoë, Pleuritis, Inflammatio Mammarum, Diaphragmatis, Ventriculi, Hepatis, Lienis, Mesenterii, Intestinorum, (Dysenteria, Ileus, Volvulus, Tenesmus, Hæmorrhoides, Colica biliosa) Renum, Vesicæ, Ureterum, Uteri, Juncturarum, Exteriorum in Morbillis, Variolisque.

P H R E N I T I S.

771. **S**i ferox & perpetuum delirium à Cerebro primariò affecto cum febre acutâ continuâ oritur, vocatur Phrenitis Vera.

Si à malo aliunde in Cerebrum delato in febre, inflammatione, &c. Phrenitis Symptomatica, *ἡ φρεσὺν*, desipientia, dicitur.

772. Antecedunt Veram, calor, dolorque internus capitis ingens, & inflammatorius; sanguinis copia nimia; dispositio inflammatoria; rubor oculorum, faciei; somni turbulenti, desipientia levis; adolescentia; calidorum usus; insolatio; vigiliæ; ira; mœror; protervia seu ferocitas; oblivio subitanea; siccitas totius, maximè cerebri; collectio floccorum.

Alteram verò omnis fere morbus acutus cum feбри; dolor lateris non pleuriticus cum levi perturbatione animi; Inflammatio pleuræ, pulmonis, diaphragmatis, quæ pessima; hanc præfagit lingua nigra, alvus suppressa, urina retenta, fœces albæ (hæc lethalis ubique), urina pallida, decolor, tenuis, *ἀδυσία*, ferocitas, rubor, urina cum suspensio nigro, vigi-

vigiliæ , signa instantis inflammationis in capite.

773. Utraque (772.) ubi præsens est, hæc habet symptomata. 1. Idearum sensilium depravationem , ut & sensuum internorum, & rationis, & affectuum. 2. ferocitatem auctam & efferam, inquietem, vel sæpe somnos turbulentos. 3. pulsum durum; respirationem raram, & magnam. 4. faciem plerumque rubram valde, vultuosam , adspectu horrendam , oculos protuberantes , trucesque , stillicidium narium.

774. Prognosis hisce fere describitur.

Phrenitis vera 3^o, 4^o, 7^o que die necat, rarò hunc transgreditur.

Tumque, si sæva fuerit, sæpe in Maniam abit.

Paulisper adscendens immanis fit.

Sæpe definit in Lethargum, Coma, Catochen.

Vomitus æruginosus ratione inflammati cerebri; lputatio frequens & indecora in adstantes; tremor; foex alvi & urina interceptæ, vel albæ; urina cruda; convulsio; venatus floccorum volitantium; oculi pulverulenti; dentium stridor; ~~adipsia~~ plerumque convulsionis prænun-

cia ; permutatio symptomatum perpetuas ulceris tumentis subſidentia, frequentia ſunt præſagia periculi ſummi, & mortis.

A peripneumoniâ lethalis. A variolis mala admodum ; ab ileo lethalis.

Inflammatio pauliſper fixa, & aſperitas faucium ad ſuperiora vergens creat phrenitidem mortiferam, hi palpant, & laborioſi ſunt.

Quæ verſatur circa neceſſaria, peſſima.

775. Cadavera defunctorum à phrenitide exhibuere meninges inflammatas, gangrænam, abſceſſum, ſphacelum cerebri, aut acres rodentes ichores.

776. Ex quibus cunctis elicitur cauſa proxima Phrenitidis Veræ, inflammatio vera piæ matris, duræque primario orta. Syntomaticæ verò, inflammatio ſimilis orta à raptu materiæ phlogiſticæ in cerebri meninges.

777. Quidquid has producere poteſt, fungi poterit cauſæ propioris munere (772.).

778. Quin hinc vera diagnoſis utriuſque mali.

779. Curatio requirit attentionem ad ſequentia.

Phreniticis varices, vel hæmorrhoides fluentes profunt.

Alvi.

Alvi fluor bonus.

Dolor ad pectus, pedesque, vel & vehemens tussis superveniens sæpe solvit malum.

Ut & hæmorrhagia.

780. Phrenitis vera requirit citissimè validissima remedia, quibus tolli possit inflammatio ad cerebri arterias orta.

781. Quæ petenda maximè ex curatione inflammationis in genere, observatis hisce. Venæ sectio instituenda larga, per amplum vulnus, aut plures venas simul, in pede, jugulo, fronte. Diluentia ex decoctis antiphlogisticis, nitrosis, assatim exhibenda. Dein purgantia antiphlogistica, cum multo potu diluente nitrosodanda. Clysmata similia, additis laxantibus. Anus fovenda, hæmorrhoides fricandæ foliis ficus &c. vel evacuandæ hircudinibus. Collutoria, gargarismata lenia revocanda in crebrum usum. Nares, oculi, aures, fovenda. Caput radendum. His præmissis, neque cedente malo, opiatum utendum, pediluvia, epispastica levia, cucurbitæ, ad inferiora applicanda. Corpus moderato frigore reficiendum, & erectum tenendum.

782. Si verò Phrenitis ab alio morbo inflammatorio jam facta oritur, ante om-

nia attendendum, an genius ejus malipariatur adhiberi modo dicta (781.), si non, tum curanda ex methodo illi morbo debita, semper additis derivantibus, & topicis remediis.

A N G I N A.

783. **I**mpedita valde, dolens admodum, vel & impedita & dolens simul Deglutitio, atque Respiratio, quæ contingit à causâ morbosâ agente in partes binis his functionibus inservientes, supra pulmones, & suprâ stomachum positas, Angina vocatur.

784. Cujus duplex observatur species; prima sine ullo signo tumoris externi, internive apparet; altera verò cum aliquo tumore in aliquâ parte organorum descriptorum (783.) deprehenditur semper.

785. Illa prior in fine morborum diuturnorum, maximè post ingentes & sæpe repetitas evacuationes, contingit; pallorem faucium, siccitatem harum, tenuitatem simul, comites habet; quare nervos & musculos resolutos plerunque habet; fere semper est signum imminentis mortis; rarò curatur, & tum tantum remediis replentibus vasa vacua bono suc-

co vitali, calefacientibus, corroborantibus.

786. Eadem prior species aliquandô oritur subitô sine signis manifestis prægressis ullius morbi; vix capit medelam; & fere semper, post mortem, suppuratum pulmonem demonstrat.

787. Quæ cum tumore accidit varia nomina accipit, vel à naturâ tumoris, vel à loco per tumorem occupato. Hinc est œdematosa, catarrhosa, inflammatoria, purulenta, scirrhusa, cancrosa, convulsiva, Angina.

788. Occupant hi tumores (787.) linguam, ejus musculos; palatum, tonsillas, uvulam, hujus musculos; cava ossum frontis, maxillæ superioris, ossis sphenoidis, enato & ibi radicato polypo crescente, nares obthurante, palatum deprimente pendulum, fauces angustante, pharyngem, laryngemque occludente; musculos ossis hyoidis omnes, vel aliquos; musculos laryngis externos, internos, communes, proprios; asperæ arteriæ membranam internam muscularem; pharyngis musculos superiores, & œsophagæum; ipsum œsophagi musculum; glandulas asperæ arteriæ & œsophago itâ vicinas, ut hæc fistulæ ab iis tumentibus comprimi queant, ut sunt salivales omnes, tum va-

gæ circâ hæc loca, ac tandem ipsæ Thyroideæ.

789. Ex quâ historiâ (785. ad 789.) perspectâ apparet ratio tam multiplicis, improvise, & funesti sæpe eventus hujus mali (783.).

790. Quum verò tam varius ille morbus sit, tam varium effectum producat, variaque adeò remedia & artem medendi possulet, quantum brevitatis hic necessaria permittit, eum recenseri necesse est.

ANGINA AQUOSA.

791. **A**ngina aquosa, œdematosa, catarrhosa tenuis, est impedita, vel dolens respirandi, vel deglutiendi exercitatio, cum tumore lymphatico partium, quibus illa fit, vel vicinarum.

792. Habet ergò, ut cæteræ aquosæ colluvies, sedem in parte glandularum, ubi reconditur atque excernitur secreta arteriis lymphæ.

793. Ergò pro causâ agnoscit quidquid exitum liberum lymphæ impedit: eorum verò est numerus ingens, & diversitas. Compressio venarum quæcunque, in quas forte earum glandularum emissaria se evacuant; obstructio nata in ipso folliculo glan-

glandulæ à gypso, pituitâ, lapide, fungo, & similibus ibidem enatis; obstructio facta in ipsis emissariis à causis eisdem; compressio eorumdem locorum; frigus finibus excretoriorum meatuum applicatum; debilior humorum circumactio.

794. Effectus talis mali sunt, tumor aquosus, albus, frigidus; vicinorum compressio; impedimentum functionum, quæ à non compressis pendebant.

795. Hinc signa diagnostica (791. 792. 793.) & prognostica (794.) facillimè patefcunt.

796. Curatio autem hic peragetur iis, quæ 1. causas obstruentes resolvunt, movent, aut rodendo, vel secando tollunt. Huc spectant emollientia, aperientia, laxantia, formâ fatus, cataplasmatibus, gargarismatis, injectionis, collutorii, vaporis, applicata; tum frictiones; caustica; scalpellum. 2. quæ copiam lymphæ, per opposita loca evacuando, minuunt: quod fit apophlegmatismis, vesicatoriis, sudoriferis siccis externis, internis, diureticis similibus, hydragogis per alvum. 3. abstinentiâ ab liquidis, victu calefaciente, exsiccante. 4. augendo vim circulationis per remedia nota (98. 99.).

ANGINA SCIRRHOSA.

797. **S**i verò glandulas descriptas (788.) scirrhus, & multum increfcens tumor occupaverit, signis scirrhi (392.) cognoscitur; atque ex noto ejus situ futura angina prævidetur; nata verò perspicitur; tum si extirpatio possit fieri, ea sola remedio erit tuto; aut in internis circa fauces corrosio multâ cum prudentiâ tentanda.

ANGINA INFLAMMATORIA.

798. **V**erum quandò ab inflammatione, glandulæ (788.), vel musculi (788.), occupantur, tum oritur morbus huc propriè referendus ob summam, quâ funestus est, acutiem, & velocissimam, & insuperabilem sæpe violentiam.

799. Hujus (798.) mali causa 1^o. in genere est omnis ea, quæ inflammationem quamcunque potest producere (315. 376. 377. 378.). 2^o. illa omnis, quæ inflammationis causas determinat inprimis ad loca descripta (388.), maximè ad laryngem, pharyngem, os hyoides, horumque musculos, tum ad fistulæ pulmonis.

monalis superiora : talia autem sunt, dispositio propria juvenibus, sanguine divitibus, rufis; exercitium frequens, validumque harum partium, oratoria exercitatio, cantus, clamor, fortis equitatio adverso vento & frigido, tubarum & fistularum inflatus, labores validi in aëre frigido; calor æstuans magnum frigus excipiens tempore verno; aridæ fauces ob aëris recepti & expulsi fervorem in æstu solis, vel in febre inflammatoriâ.

800. Ubi ex his causis (799.) nata est, varia, & inter ea horrenda, symptomata creat, pro diversitate partis ejus, quam occupat.

801. Si sola laborat pulmonalis fistula, illæsis aliis, in internâ suâ membranâ musculosa, tum oritur ibi tumor, calor, dolor, febris acuta calida, cæterum externa signa nulla; vox acuta, clangosa, sibilans; inspiratio acutè dolens; respiratio parva, frequens, erecta, cum summo molimine; hinc circulatio sanguinis per pulmones difficilis; pulsus mirè & citò vacillans; angustia summæ; cita mors. Estque hæc una ex iis, quæ funestissimæ, nec externa dant signa: quô verò propius glottidi & epiglottidi malum, eò sanè magis lethale.

802. Si larynx inprimis acutè inflammatur, & sedem habuerit malum in musculo albo glottidis, & simul in carnosis ei claudendæ inservientibus, oritur dirissima, subitò strangulans, Angina. Signa ut priora (801.); dolor in elevatione laryngis ad deglutitionem ingens, auctus inter loquendum atque vociferandum; vox acutissima, stridula; citissima, cum summis angustis, mors. Estque hæc, sine signis externis, omnium pessima.

803. Si soli muscoli elevando offi hyoïdi, & laryngi servientes inflamman-
tur validè, signa evidentia sunt hæc; respiratio satis libera; deglutitio in primâ actione suæ exercitationis acutissimè dolens; tum signa inflammationis in genere; & eadem in iis musculis, qui apparere examinanti possunt.

804. Quando autem sola pharynx eodem infestatur malo, signa specifica sunt, inspectis faucibus apparentia; respiratio satis commoda; deglutitio dolens, impossibilis; materiës deglutienda per nares redeuns; eadem in asperam arteriam pulsa, & tussim violentam excitans; hinc defectus cibi, potusque ingerendi; exsiccatio & exasperatio omnium humorum in corpore; febris non adeò intensa; major morbi

morbi duratio ante illatam mortem.

805. Si verò tonsillæ, uvula, velum membranosum pendulum, muscoli ejus quatuor pterygostaphylini, inflammantur validè, tum fiunt fere eadem ac in priori (804.); respiratio incommoda, difficilis, per nares nulla, vel parva, per fauces angusta; materies deglutienda ob angustias & summos dolores per os redeuns; excreatio perpetua; pituitæ ad cava tonsillarum stillicidium perpetuum, copiosum; dolor acutus in aure internâ, & viâ eô tendente à faucibus; crepitatio in aure dum deglutitio fit; surditas sæpe perfecta. Hoc mali genus hodiè à lue gallicâ frequens, & valde metuendum.

806. Quod si omnes hæ inflammatoriæ species (801. 802. 803. 804. 805.), vario concursu, simul ægrum infestent, concluditur facilè eò sæviorem fore morbum, quo plures in unum conspiraverint: tumque simul eô plura, & sæviora symptomata eventura esse.

807. Nam impedito tum cruoris in jugulares externas, vel per has ipsas compressas, reditu, fit tumor faucium, labiorum, linguæ, vultus; linguæ exsertio, intorsio, inflammatio; oculorum rubedo, protuberans tumor horrendus; cerebri, ob eadem

dem suffocatio ; hinc visus , auditus , tactus , hebetes ; delirium ; hiatus oris ; stertor ; decubitus impossibilis præ suffocatione ; rubor , tumor , dolor , pulsatio , sæpe in collo , pectore , cervice , conspici ; unde venæ jugulares , frontales , maxillares varicosæ tument.

808. Decurrit autem omnis Angina consuetum inflammationis generalis iter , eandemque facit , ac patitur mutationes in resolutionem , pus , gangrænam , scirrhum.

809. Ergo si signa docuerint, anginam esse (801. 802.), confestim examinandum , an pura hæctenus inflammatio adsit (382. 383. 384.) ; tumque citissimè per efficacissima remedia (395. ad 402.) tentanda resolutio est (386.). Itaque 1º. cita , magna , repetita missio sanguinis , consue ut debilitas , pallor , refrigeratio , vasorum collapsus , doceant , vim superstitis non posse augere tumorem & rigiditatem vasculorum , exercenda erit. 2º. valida alvi subductio per purgantia ore hausta , vel clysmatum instar injecta , repetita. 3º. victu , potuque tenuissimo , & lenissimo opus. 4º. nitrosis , subacidisque medicamentis. 5º. vapore humido , molli , tepido.

do assiduè hausto ; fomentis externis ; derivantibus epispasticis.

810. At species (803.), rarò tam periculosa ac (801. 802.), eadem remedia (809.), sed leviora, petit. Hic autem imprimis cataplasmata anodyna , laxantia, emollientia externa necessaria.

811. Dum denique angina (804. 805. 806.) adhuc inflammatoria, infestat ; tum eadem remedia (809. 810.) requiruntur unita , sed addendæ perpetuæ humectationes oris & faucium, per lenissima attenuantia nitrosa , diluentia aquosa calida , laxantia pingua , quæ ore quieto contineri , leniter gargarizando applicari, fistulâ injici possunt : requiritur continua opera , ne arescant partes.

812. Si, omnibus his non, ferò, vel frustrâ tentatis (809. 810. 811.), morbus sit maxime recens & strangulans à causâ superiori, quam erit locus sectionis, cum symptomatibus pessimis (807.), nec tamen adhuc gangrænosis, statim post acerbam prognosin instituenda erit *σπορχοτομή*.

813. Quæ fiet, præparato corpore ægri, in asperâ arteriâ infrâ laryngis inferiora ad pollicis distantiam ; discissâ cutem, & integumentis ; amotis musculis ; secto
inter-

186 ANGINA INFLAMMATORIA.

interstitio inter annulos arteriæ asperæ; imposito canaliculo argenteo; dein ablata causâ, quæ exegerat hanc operam, vulnus percurando: interim clysinata nutritia applicando, si deglutitio impossibilis.

ANGINA SUPPURATORIA.

814. **V**erum si malum jam eô processerit, ut suppuratio loci affecti jam incipiens cognoscatur, per signa (387.), erit tentanda via abscessus per artem, & remedia generalia (402. ad 412.); maximê autem molli, assiduo gargarismate; largo cataplasmate laxante; pertusione loci, sensibus deprehensi; bronchotome (812. 813.).

815. Illa autem anginæ species, quæ prior descripta (801. 802.), rarô eôusque adolescere potest, sed vel prius resolvitur (809.), vel necat.

ANGINA GANGRÆNOSA.

816. **S**i tandem causæ anginæ (799.) augentur, & in parte nobili magis (801. 802.) hærent, vel & in externis (804. 805.), sæpe in gangrænam abit lethalem,

lem; id verò novimus 1^o. ex signis hujus generalibus (426. 427. 428. 429.) applicatis ad partes obfessas, quarumque functio læsa; 2^o. ex signis propriis; si tumor, ruborque prius conspicui subitò, sine bonâ causa, disparuerint; si dolor similiter sic abiverit; fauces subitò æquales, lævesque fiunt; siccae, glabræ, lividæ fauces: tum nullam capit magnitudo nimis proVecti mali medclam.

817. In scirrhum circâ tonsillas, uvulam, palatum, abit angina eorum locorum, ex causis descriptis (392.), unde cognoscitur facilè, curatur difficulter: maximè ubi in cancrum jam abiit. Vid. (79. 7.)

ANGINA CONVULSIVA.

818. Si nervi motores organorum deglutitionis, vel respirationis, impediuntur suas exercere functiones in illa organa, oritur paralytica angina; talis à luxatione dentis vertebræ dicitur contingere, aut alterius vertebræ cervicis ad interiora. Si convulsionum causa quæcunque musculos pharyngis, laryngisve occupaverit, oritur subita, suffocativa angina; talis in epilepticis, spasmodicis, hysterics, hypochondriacis sæpenuerò fit, abijt

188 ANGINA CONVULSIVA.

abit, reedit: curatur inprimis his, quæ iis morbis curandis propria sunt.

819. Ex hac historiâ datâ (783. ad 819.) intelligitur ratio observationum Hippocraticarum.

Angina sine ullo signo conspicuo, solo strangulatu orthopnoëico sc̄ prodens, cum febre acutâ, dolore magno capitis, vel crurum, sine signis bonis, citô lethalis, primo scilicet, secundo, vel tertio die.

Angina ἐπιγενέσθαι orta ex aliis inflammatoriis morbis, aut si species (801. 802.) nata ex (803. 804. 805.), lethalis.

Angina spumam oris excitans; serum tenue exprimens; fœces alvi sine sensu dimittens; in febre valde acutâ sine ullo signo conspicuo occupans; cum recessu tumoris, ruboris, pulsationis in faucibus vel linguâ tamen strangulans; ubique lethalis, & præceps.

PERIPNEUMONIA VERA.

820. Si in vasis pulmonalibus, inflammationi suscipiendæ aptis, inflammatio vera concipiatur, morbus vocatur Peripneumonia.

821. Illa vasa autem sunt Arteriæ Bronchiales,

chiales, Pulmonicæ, & harum laterales Lymphaticæ.

822. Unde etiam duplex concipi Peripneumonia potest; quarum una ad fines arteriæ pulmonalis, altera in bronchialibus hæret.

823. Et statim liquet, priorem periculosissimam; posteriorem minus discriminis habere, sed illam ex hac nasci posse; & causas multas communes habere.

824. Quæ causæ plurimæ revocari queunt 1. ad generales omnium inflammationum per totum corpus (375. ad 380.). 2. ad eas, quæ imprimis pulmones afficiunt: ut sunt, aër humiditate, siccitate, calore, frigore, gravitate, levitate, exhalationibus causticis, vel adstringentibus, aut coagulantibus constans, sicque peccans; chylus ex crassis, siccis, viscosis, cum acribus permixtis, vel sine iis; exercitia pulmonum violenta, cursu, luctâ, nixu, cantu, clamore, equitatione forti in vento adverso; venena coagulantia, caustica, constringentia, venis ad cor tendentibus immixta; vehementes animi perturbationes; angina cum oppressione pectoris, & orthopnoeâ, pleuritis valida, paraphrenitis ingens.

825. Si hæ causæ (824.) morbum pro-

produxerint, pro diversitate sedis affectæ (822.) producet effectus varios; bronchialis enim omnia effecta inflammationis producens (382. ad 393.), ipsos fines arteriæ pulmonalis contiguos comprimendo, contagio efficiundo, inflammat.

826. Ubi autem fines ipsi arteriæ pulmonalis inflammati, stagnat cruor; extenditur vas; exprimitur transsudatione quasi pars liquidissima; coacervatur crassior; inter cor dextrum, & fines pulmonalium arteriarum, omnis fere colligitur; circulum adhuc obire potens, sanguis; hinc pulmo gravis, explicari impos, livescens; cor sinistrum sanguine orbatur; debilitas summa; pulsus exilis, mollis, omni modo inæqualis; respiratio parva, frequens, difficilis, erecta, tussiculosa, calida; sanguinis venosi ante auriculam & cor dextrum stagnatio; rubor faciei, oculorum, oris, faucium, linguæ, labiorum insolitus; tandem suffocans, inexplicabili cum anxietate & delirio, mors.

827. Si tale malum (826.) utrumque pulmonem simul, & validè infecerit, erit citata, & insuperabilis mors; quum nullo remedio antiphlogistico juvari natura queat: confer (386. & 395. ad 402.).

828. At si parvum in uno pulmone locum

locum infestat, nec causas validas habet, aliqua, nec tamen certa, spes est curari bene posse.

829. Inde (824. ad 829.) signa diagnostica, & prognostica, ut cunque hauriri possunt; maximè si consideremus, exitus esse ut inflammationis (386. ad 393.); unde etiam status accipit vario durationis tempore varios, ita ut abeat in sanitatem, alium morbum, mortem.

830. Sanatur 1^o. resolutione benignâ; si temperies laxa, humor blandus, viscositas non nimia, pars affecta bronchialis, vel pulmonalis, non magna. 2^o. sputo cito, libero, copioso, flavo cum paucio sanguine misto, satis crasso, dolorem sedante, respirationem emendante, pulsum ampliorem & pleniorum reddente, in album blandum citò mutato; id fit, si sedes mali in primis est bronchialis arteria, aut pulmonalis non valde magna. 3. alvi fluxu bilioso, levante, & similia fere, ac sputa descripta, ejiciente. 4^o. urinâ copiosâ, crassâ, hypostaticâ, levante, cum sedimento primo rubro, sensim albescente, ante septimum diem emissâ. Atque tum respiratio adest facilis, febris mitis & boni moris, *αδυσία*, calor, humiditas, laxitas, mollities, æquales toto corpore.

831. Abit in alium morbum, pendentem ex naturâ inflammationis, vel ipsius pulmonis, prout suâ hinc propriâ actione destituitur.

832. Hinc primô in suppurationem, quæ fit, ubi materies inflammatoria (376. 377. 824.); ab ipsâ naturâ resolvi non potens (830.), nec arte emendata, tamen blandior (387.), stagnans, calens, pulsa, vascula tenuia rumpit, in pus resolvit, latera coërcentia extendendo, vel rodendo abscessum vomicamve format intra quatuordecim dies.

833. Id futurum (832.) demonstratur his observationibus. 1°. si signa certa peripneumonix satis acris (825. 828.), nec tamen acerrimæ (826.), primô extiterint. 2°. si resolutio, ejusque signa (830.), non satis citô, nempe ante quartum diem, apparuerint. 3°. si symptomata (825. 826.) nec, sputo cocto, & criticis diebus, 3°, 5°, 7°, 9°, 11°, 14°, evacuato per ordinem, qui sanationem doceat mutatione successivâ excreti; nec educatione cruoris; nec medicamentis; nec victu debito; superata sint. 4°. verum contrâ symptomata non pessima pertinacia, cum continuo delirio, pulsu undoso, mollique permanent.

834. Fieri autem jam re ipsâ cognoscimus per hæc: 1. si signa sint (833.). 2. ubi leves, vagæ, sæpe repetentes, sine manifestâ causâ horripulationes contingunt; dolor remisit; dyspnœa manet; genæ & labia rubent; sitis adest; febricula vexat, inprimis vespertina; pulsus debilis, mollisque.

835. At jam factum declarant: 1. signa prægressâ (833. 834.). 2. tussis pertinax, sicca, ad pastum, motumve aucta; respiratio difficilis, parva, anhelosa, strepens, post pastum, & motum aucta; decubitus in unum modô, id est in affectum, latus tolerabilis; febricula continua, periodica, à cibo, potu, motu exacerbata cum rubore genarum & labiorum; appetitus prostratus; sitis magna; sudor nocturnus, maximê circâ jugulum & frontem; urina spumosa; pallor; macies; debilitas summa.

836. Id apostema jam factum (835.) exitus habet varios: 1. suffocat tumore occupante totum pulmonem, vel compri-mendo impediendo ea, quæ adhuc in eo libera. 2. suffocat subitâ eruptione puris, vomicâ in asperam arteriam se exonerante uno cum impetu. 3. solvitur spûto purulento, liberante, consumente. 4. sol-

vitur lapſu puris in cava Thoracis, in ve-
mediaſtini dilatata vacua. 5. inde tabes,
phthiſiſque varia, empyema fere lethale.

837. Alter morbus à peripneumoniâ
fit, ſi purulenta jam facta inflammatoria
materies (832. 833. 834.) intrâ pulmona-
les venulas reſorbetur, cruori miſcetur,
in loca quædam deponitur, unde libera-
tur pulmo, oneratur pars alia; quæ ſi
minus requiſita ad vitam, eſt *μετάσας*
bona; ſi verò in hepar, lienem, cere-
brum, & ſimilia loca fluxerit, peſſima
plerumque erit. Hinc fiunt abſceſſus pe-
ripneumonici ad aures, crura, hypochon-
dria.

838. Tales abſceſſus futuros eſſe de-
clarat: 1. obſervatio ſignorum peripneu-
moniæ non peſſimæ (833. 834. 835.),
cum febre non vehementi, nec maligna,
tamen continuâ; cum dolore thoracis,
anxietate, gravitate, dyſpnœâ, non peſ-
ſimis; ſine ſignis reſolutionis (830.).
2. ſi cum hiſ pulſus multum vacillans,
omni modo, affiduê. 3. dolores, rubo-
res, calores, tenſiones, circâ loca dicta
(837.).

839. Illos verò futuros circâ Crura ſci-
mus, ſi 1°. ſigna futurorum abſceſſuum
(838.) adſint. 2°. ſi ſimul cum iis ſigna
ſint

sint levioris inflammationis ad hypochondria.

840. Sed futuros circâ Aures scimus, si
1. signa adsint (838.). 2. mollia simul hypochondria.

841. Ad hepar verti novimus, si
1. signa sint (838.). 2. dolor manens in hepate, cum urinâ subictericea, colore subflavo cutis. Hinc sæpe, vomicâ hepatis natâ, pessima mala.

842. Abscessus illi (839. 840.) si levant pulmonem, si tollunt febrim, si purulenta, manantia, fistulosa manent, si satis citò, ante nonum diem, contingunt, tum semper salutare: verum, si sputo jam purulento, nec magis flavo, sine levamine dicto, nascuntur, mali: at, si jam nati evanescunt, crudo morbo, peripneumoniâ redeunte, omninò lethales sunt.

843. Desinit iterum morbus hic in tumorem callosum, scirrhusumve pulmonis; si materies, & conditiones (392.) concurrunt: inde totâ vitâ difficilis, erecta, tussiculosa respiratio, post paltum motumque aucta, sine signis latentis vomicæ descriptis (835.); inde adhæsió pulmonis ad pleuram.

844. Tandem, si bronchialis arteria,
I 2 vel

vel & pulmonalis vehementissimâ inflammatione (388.) corripitur à causâ internâ, vel externâ (824., brevi nascitur gangræna, & inde citô sphacelus ob copiam, motumque cruoris, & ob motum assiduum visceris tenuissimi. Id futurum docent: 1. signa violentissimæ peripneumonix (826.), nullo casu, nec arte sedata. 2. debilitas summa, cita, pulsu se imprimis manifestans. 3. frigus extremorum. At jam natam scimus, si hæc prægressa, sputa ichorosa, tenuia, cinerica, livida, atra, foetida. Inde autem cita mors.

845. Has Peripneumonix mutationes (830. 832. 836. 837. 843. 844.) docet observatio historix morbi, cadaverumque inde defunctorum incisio.

846. Unde evidens est, illum morbum, quem vetustas hoc nomine descripsit, esse veram inflammationem pulmonum.

847. Eritque prognosis clara, quâ asseritur, morbum hunc semper valde periculofum ob necessitatem summam functionis pulmonalis ad vitam, & ad sanandam materiem inflammatoriam, ob sanguinis perpetuô allati copiam, impetum, ob motum perpetuum visceris, ob situm, qui applicationem remediorum renuit, teneri-

æritudinem summam vasculorum facile destruendam , impossibilitatem revulsio-
nis adeo requisitam in curâ inflammatio-
nis.

848. Ex quibus (847.) liquet, quan-
do , cur , & cum quibus symptomatibus
in mortem abeat : sc. Si totus pulmo ,
unâ cum corde inflammatur, cor in la-
tus procidit, æger paraplegiâ resolvitur,
frigidus, & sensus expers est, tum secun-
do, vel tertio die moritur. Si urina ini-
tio morbi bona & cocta, post quartum
tenuis. Si in vigore morbi erectus sede-
re cogitur. Si puris est per inferiora se-
cessus : si sicca cum fervore strepente ple-
ni pulmonis in gutture : si vehemens in
corpore valde sicco, duro, calloso, exer-
citato : si mala est cum prærubro valde stil-
licidio sanguinis : si sicca est cum maculis
rubris pectori adpersis : si coryza aut ster-
nutatio multa præcedit, sequiturve : si ex
ardente febre ortum duxit : si sputum bi-
liosum cum pure post sextum diem statim
inceperit : si sputum ab initio valde citu-
entum, flavum sincerum, album rotun-
dum, spumofum valde, dolorem non se-
dans, si fuscum, coenosum, amurcosum,
nigrum, livescens, inæquale, ærugino-
sum : si neque febris, neque respiratio-

nis difficultas remisit, moritur die septimo, vel nono. Mors verò iis contingit dum pulsus deficit, omnia frigent, solum pectus, caput, collum æstuant, genæ rubent, liventque.

849. Curatio hujus mali varianda est pro diverso statu morbi & symptomatum, adeò ut quod uno tempore profit, in eodem tamen morbo alio tempore datum obsit.

850. Si ergò in Peripneumoniâ omnia signa adsint descripta (830. N^o. 1.) utendum quiete corporis & animi; aëre tepido humido; balneo vaporis aquæ dulcis ad pulmones, nares, os, pedes, crura; victu tenui, potu levi; medicamentis aquosis, nitrosis, farinosis, mellitis.

851. Si verò status adest (830. N^o. 2.), utendum iisdem (850.), & medicamentis emollientibus, depurantibus, excretionem promoventibus, leniter reficientibus, vaporibus: vitanda tum venæ sectio, purgatio, sudoris expulsio, aliave omnia, dictam excretionem perturbantia.

852. Si (830. N^o. 3.) adest, lenia clysmata emollientia, fomenta lenia abdomini imponenda, decocta emollientia, & levissimo gradu laxantia, prosunt, simul reliquis peractis (850. 851.).

853. In statu altero (830. N^o. 4.) fiant eadem, ac (850. 851. 852.), sed addantur balnea pedum, fomenta renum per clysmata emollientia interna, & externa lintea, bibantur decocta levissimè abstergendo diuretica.

854. Si inflammatio recens, magna, sicca, in corpore robusto, paulô ante sano, exercitato, deprehenditur per signa (825. 826.), statim recurrendum 1^o. ad citam, largam, pro gradu mali moderandam, aut repetendam missionem sanguinis, ut moles crassi minuatur, & diluentibus spatium concedatur. 2^o. ad balnea vaporis emollientis pulmonibus assiduô, reliquo corpori sæpe applicanda. 3^o. ad decocta diluentia, resolventia, emollientia, laxantia, antiphlogistica, nitrofa, anodyna, parvâ copiâ, continenter repetendâ, calidissima forbenda. 4^o. ad clysmata blandissima antiphlogistica. 5^o. ad victum tenuissimum ex succis antiphlogisticis.

855. Si inflammatio magna, cum febre, & reliquis symptomatibus validioribus duravit ultrâ triduum, & signa adsint inflammationis jam in suppurationem tendentis (833. 834. 835.), semper multum discriminis adest, quamvis diutius

jam excurreret morbus, & spatium dabitur curationi: tum 1^o. venæ sectione nullâ, vel, si aliquid urget, parcâ utendum. 2^o. victu leni, sed paululum increassante, & ex maturantibus confecto, utendum. 3^o. balneis pulmonicis, emollientibus, maturantibusque utendum ad quintum ab inchoato malo diem. 4^o. die quinto, & sexto iisdem utendum, additis sorbitionibus tussim moventibus leniter, simulque replentibus, ut septimo forte die locus levare queat pure cocto, vasis attenuatis, vitâ sustentatâ.

856. Si signa docent, factum esse in pulmone abscessum (835.), acceleranda ejus disruptio inasperam arteriam, câque factâ, depuratio subita & tuta ulcerosi loci.

857. Disruptio tentatur si, post multa alimenta mollia, subpinguia, cum vino molli, pulmo suppuratus (836.), & præparatus (855.) vapore calido, clamore, tussi, excretoriis, concussione in navi, vel rhedâ, agitur.

858. Simul ac dein signa edocuerint, apostema ruptum esse, utendum victu lacteo, vegetabili lenissimo, nec facile putrescente; tum de die aperientibus, deterfivis, vesperi levibus opiatis; vaporibus.

ribus emollientibus; equitatione, vel vectione in rhedâ, aut navi.

859. Si autem signa (838.) docent, statum (837.) jam obtinere, nullâ tamen hæctenus certâ prognosi quoniam materies verget, tum levi, fluido, blandê aromatico, paululum vinoso utendum victu; quietum sit corpus; medicamentâ verô sint emollientia, & ex genere levissimo aperientium; pulmoni prospiciatur usu emollientium: sic vel determinabitur, vel ulterius dissoluta excernetur mali materies.

860. Sed si cum signis (838.) simul illa adsunt (839. 840.), quibus determinatio significatur, fiant modô dicta (859.), simulque locus prævisus (839. 840.) succu, laxatione, stimulo, aperientibus itâ tractandus, ut minus resistat, plus trahat.

861. Si (841.) obtinet, fiant eadem (859. 860.), sed simul aperientia paulô fortiora, saponacea, hepatica addantur, tum clysmata, & fomenta his constantia.

862. Malum verô, quod descriptum (843.) rarô medelam capit, nisi forte emollientibus externis, internis, atque motu equitationis, vel vectionis in rhedâ cedat parum.

863. Quando in ipsam jam gangrænam abiit (844.), incurabilis est.

864. Si autem Peripneumonia per spiritum jam expurgari cœpta, incipit suppressum id habere, statim summâ ope nitendum, ut iterum id prodeat. Tales causæ impediētes sunt sæpe, magnum frigus subitô admissum; ingens exsiccatio undecunque nata; febris calida superveniens; medicamenta calefacientia; alvus liquida, nec critica; sudor ingens; animi affectus vehementior.

865. Tum statim ad vicinitatem partium à suppressâ, & aggestu increſcente materie, inflammatio nova exoritur; unde ilicô eadem symptomata, quæ à peripneumoniâ primariâ (825. 826.); illa autem tum debilitato jam corpori accidentia, ut plurimum citô lethalia evadunt.

866. Illi autem vitio (864.), ejusque sequelis (865.) occurritur vapore assiduo calidi, humidi, emollientis naribus, ore attracti, pulmonibus recepti; toto aëre simili huic vaporis per artem reddito; usus etiam largus potuum similium, cum melle inprimis & aceto, multum prodest; medicamenta leniter resolvendo antipyretica, ut est stibium diaphoreticum cum
nitro

nitro fixante; leniter opiata; sudoris evitatio; maximè tandem placidâ animi quiete.

PERIPNEUMONIA NOTHA.

867. **Q**uæ Peripneumonia hyeme à frigore, verno tempore à calore superveniente multoties accidit, oriri solet ex pituitâ lentâ in toto sanguine natâ ex causis recensitis olim (69. 72.), & sensim pulmones infarciendo, donec in pessimum hunc, & improvissò sæpe lethalem, morbum eat.

868. Ubi paululum adolevit id malum, produxit jam in toto corpore effectus plurimos (72. 73. 74.), tumque prætereâ eos, qui peripneumonix lentæ proprii (825. 826.), unde malum curatu difficillimum.

869. Nam missio sanguinis, eôusque celebrata, ut in hoc morbo requiritur (854.), nocet admodum ob debiliora viscera, nimisque aliena humida lenta: hinc primò juvare visa, mox mala auget.

870. Attenuantia autem adeo hic famigerata, dum impetum in vasa pulmonalia augent, densitatem, impactumque

obstruentis sæpe augent, simulque morbum citò reddunt lethalem.

871. Morbus ille senibus, pituitosis, frigidis, catharrhosis, gravedine laborantibus frequens, sequi solet omnes causas, quæ stagnantia citò movendo in pulmones agunt, ut cursus, declamatio, cantus, ebrietas inprimis à validè calefacientibus, comestatio, calor foci, balnei, solis, maximè si æstus hinc natus subito frigus ingens exceperit.

872. Primò fallaci lenitate opprimit nec opinantes: quippe levi fatigatione, debilitate, prostrato omni fere animi motu, anhelitu, oppressione pectoris incipiens, adeò leves motus excitat, ut vix calor, febrisve indicia moneant periculi: mox vagæ horripulationes, leviusculi febris insultus adsunt; unde subito crescente anhelitu & debilitate mors; cujus in urinâ & pulsu vix ullum adsuit præsagium.

873. Curatur hæc methodo cautissimâ:
 1. mittatur sanguis ex largo vulnere.
 2. mox eluatur alvus clysmate, quod repetatur quotidie, donec signa docuerint levare pulmonem.
 3. utatur victu tenuissimo juris carniū, inprimis cum levi acido, potu tenui ex aquâ & melle.
 4. vapores, suffitusque descripti (866.), decocta diluen-

diluentia, abstergentia, lenissimè aperientia assiduò potanda, adhibeantur; simulque balnea crurum, pedumque, & larga vesicantia.

874. Ex his omnibus (820. ad 874.) ratio datur, cur pueris hic morbus, foeminisque rarior? ut & iis, qui laxæ sunt structuræ quoad solidorum fabricam cur vix accidat? Cur in his facilè, & fere sponte, sanetur? contrâ in robustis, exercitatisque corporibus? ex iisdem pariter liquet, hunc morbum fere fieri ex omni alio prægresso, antequam ex eo moriatur æger: adeòque proximam mortis causam, & ultimum ferme omnium lethalium morborum effectum, esse Peripneumoniam.

PLEURITIS.

875. **P**leuritis dicitur adesse, quando æger laborat acutâ, continuâ febre (564. 567.), cum pulsu duro; dolore acuto, punctorio, inflammatorio (382. N^o. 3.), in inspiratu validè aucto, in expiratu vel animæ retentione leniori, mitiori pariter, ubi respiratio, immoto thorace, maximè ope abdominis fit; tussi fe-

re perpetuâ, dolorem magnum inferente, hinc suffocatâ.

876. Quoties unâ cum his symptomatibus sputa ex pulmone symptomatice prodeunt, dicitur *humida*; quandô hæc absunt, *sicca* vocatur.

877. Nulla est pars integumentorum interni thoracis, quam non aggreditur: tota ergô pleura, totumque mediastinum, hinc anterior, postêrior, dextra, sinistra, superior, inferior, exterior, profundior pars æquê obsidetur hoc malo: sed inprimis latera.

878. Ubi autem ipsa membrana costas internê succingens doloris sedes, *vera*; si autem altius intercostales muscoli, & his superiora laborant, *spuria* appellatur.

879. Adultos, sanguineos, lautius potos, pastosve, exercitatos valdê, acidum rarô eructantes, in morbos inflammatorios vergentes; verno tempore, maximê subitô æstuanter post acre gelu cœlo; aut hyberno in acerrimê frigido vento; infestat primariô: tumque vocatur *idiopathica*.

880. At ex materiê prægressi inflammatorii morbi mota, & in loca descripta (877. 878.) delatâ, exorta *symptomatica* dicitur.

881. Pro causâ antecedente habet:

1. omne id, quod inflammationi generandæ cuicunque aptum (375. ad 380.).
 2. id, quod hanc causam generalem determinat in pleuram præcipuê; quo pertinent maximê, natura ægri, intercostales arteriolas angustiores, magisque duras, habentis; morbus præcedens, qui reliquit dispositionem eadem proferentem, ut est scirrhus pleuræ, callus, pulmo adnatus &c; natura epidemici morbi prædominantis; aër frigidus, per angustas rimas violentê actus in nudatum corpus, ex labore vel igne prius valde æstuans; potus gelidus subitô, magno hauustu ingestus in corpore simili; aër hyemali tempore borealis gelidissimus. 3. μετάπτωσις materiæ inflammatoriæ, ichorosæ, suppuratoriæ, prius in toto, vel in aliquâ parte, prædominantis, & dein quacunque causâ huc depositæ, ut in morbillis, variolis, tumoribus ulcerosis, ulceribus magnis, latis, subitô evanescentibus, absorptâ venis materie.

882. Historia hæc (875. ad 882.), decursus mox exponendus (883. ad 907.), dissectio cadaverum pleuriticorum clarè docent, eam esse inflammationem sanguineam (371.) in arteriolis locorum descriptorum.

torum (877. 878.), ortam plerumque ex febre acutâ præcedente.

883. Inde (881. 882.) perspicuê deducitur mali historia : incipit cum appetitu ciborum sæpe magno ; frigore ; horrore ; debilitate ; lassitudine ; febre ; procedit cum calore, sensim in æstum excrecente ; siti ; prostrato appetitu omni ; dolore ab miti in acerbissimum tendente ; respiratione valde læsâ : viget cum febre violentâ, sed minus manifestâ ob respirationem coactam, & præ sensu doloris summi suffocatam ; unde sæpe turpiter fallitur Medicus : inde definit in varios eventus, pendentes ex pluribus causis, sed imprimis à diversitate mutationum inflammationis (386. ad 393. 492. ad 500.), naturâ loci ubi malum est (877. 878.), & consideratione harum circumstantiarum : prout partes plures (877. 878.) affectæ simul ; prout impetus circulantis liquidi violentior (92. ad 102.) ; aut major malignitas ipsius morbi principis (564. 567.), eo symptomata cuncta pejora ; imprimis respirationis & pulsus vitia magis à naturalibus recedentia, ut & excretorum.

884. Exit in sanationem, alios morbos, vel in mortem.

885. In sanationem ope naturæ, vel artis

tis in initio, dum simplex adhuc morbus.

886. Sanatur auxilio naturæ, vel resolutione benignâ, vel coctione & excretionem mali.

887. Resolutione, si contingunt simul causæ (386. 401.); tumque benignitas symptomatum nihil agendum docet, nisi ut levi victu, blandissimis aperientibus, mollissimo fotu, malum levetur.

888. Coctione & excretionem causæ sanatur, inprimis observatis hisce: 1°. quoties hæmorrhoides debitâ copiâ liquidum aptum oportuno tempore fundunt; 2°. quoties urina copiosa, crassâ, hypostatica, stranguriosâ, subrubra cum albo sedimento fluxit cum levamine malorum ante quartum diem qualis & siccam sanavit; 3°. si alvus materiem flavam biliosam ante quartum diem; copiosam cum levamine ejecerit; 4°. si abscessus ichorosi, purulenti, fistulosi, diu manentes, ante sextum diem incepti, post aures, vel ad crura, prodierunt (juxtâ 837. ad 843.); 5°. dolor lateris si transit ad humerum, manum, dorsum, cum stupore, dolore, gravitate illarum partium; 6°. si sputum ex parte liberale, levans, sine coryzâ, copiosum, mox puriforme, album statim, vel

vel ante diem quartum , continuatum ,
vel à suppressione statim redeuns , inde:
enim nono vel undecimo die salus.

889. Ubi signa accuratè observata do-
eent, statum pleuritidis (875.) adesse mo-
dò descriptum (888.), tum Medico nihil
mutandum , sed omnia continuanda in-
cumbunt. Ergò neque venæ sectio, ne-
que evacuatio, vel mutatio alia instituenda.
1°. victu molli, tenui; animi, cor-
porisque quiete; aëre temperato calido, &
humido; somno spontaneo, vel lenibus
conciliato; medicamentis mollibus, te-
nuibus, levissimè aperientibus, utendum.
2°. deinde evacuationi cuilibet singulari
proficienti providendum: ergò in statu
(888. N°. 1.) anus fovenda molli, la-
xante, aperiente fotu; aut, si minus sic
processerit, hirudinum applicatarum succtu.
Si (888. N°. 2.) observatur; statim fo-
menta similia renibus, perinæo, hypo-
gastrio apponenda; lenia diuretica aperi-
entia danda; aër paulo minus calidus cu-
randus; sudor, & aliæ evacuationes, vitan-
da; blanda clysmata diuretica profunt.
In casu verò (888. N°. 3.), similia fo-
menta emollientia toti obvolvenda abdo-
mini; clysmata laxantia injicienda alvo;
victus laxans instituendus, ubi denuò quar-
tus

tus status (888. N^o. 4.) adest prævisus (838.), & simul locus (839. 840. 841.) innotuit, tum utendum memoratis (859. 860. 861.), & aperturâ factâ suppuratoriiis locum aliquamdiu apertum tenentibus: deinde in casu (888. N^o. 5.), præter communia, partes, in quas dolor migrat, fovendæ mollibus, calidisque, fricandæ leniter, stimulantæ emplastris parumper attrahentibus. Denique in ultimo dato (888. N^o. 6.) tota res eadem ac in peripneumoniâ bonâ, adcôque omnia huc repetenda ex (850. 851.), & agenda.

890. Arte autem, sine alio morbo, sanatur pleuritis hâc inprimis methodo: si pleuritis (875.) recens ante tertium diem finitum, magna ex symptomatibus validis (875. 883.), sicca (876.), in robusto, exercitato, sicco corpore, sine spe, vel præsentîâ (887. 888.); tum 1^o. citâ, larga, accelerato fluxu celeris, ex magno vase, per magnum vulnus, missio sanguinis instituenda, corpore quiescente, supino, & respiratione, dum fluit, tussi, suspiriisque acceleratâ, loco affecto eodem tempore foto, & leniter perfricto; debet continuari in remissionem satis notabilem doloris, vel ad prima signa deli-

deliquii animi; debet repeti ex consideratione redeuntium denuò symptomatum, ad quæ tollenda prima instituta fuit; crusta (384.) absens finem definit. 2°. statim adhibenda fomenta, balnea, tepescatoria, linimenta, emplastra, quæ laxando, resolvendo, mitigando, avertendo, prodesse queant. vid. (395. N°. 6. 398. N°. 3.). 3°. tum ea medicamenta danda, quæ diluant, resolvant, laxent, mitigent, refrigerent, dolorem leniant, aut sopiant: quæ calida, humida, magnâ copiâ, sorpta, & ad locum affectum determinata, juvant, & prò mutatis phænomenis varia assumenda sunt, semper curando, ut eligantur illa, quæ putredini adversissima. 4°. victu tenui, molli, refrigerante, antiphlogistico est opus. 5°. denique omne exsiccans, calefaciens, impetum augens, vitandum; ut calor aëris, solis, foci, lecti, victus, medelæ.

891. Quæ ipsa (890.) quamdiu continuanda, vel repetenda sint, docet morbi pertinacia, remissio, atque in sanationem (888.) mutatio.

892. Abit in alios morbos dum 1. suppuratur locus inflammatus, quod futurum scimus α. ex signis generalibus (387. 402.) β. ex pertinaciâ doloris, tussis, fe-

febris, ultrâ quartum diem. γ. absentiâ signorum resolutionis (887.), & sanationis (888.). δ. neglectu medelæ requisitæ (890.).

893. Ipsum verô apostema jam fieri, scitur ex signis communibus (405.), maximê hîc ex horrore sæpe recurrente sine causâ, & signis datis (834. 835.) in peripneumoniâ, & tempore morbi: inde & factum cognoscitur, & quandoque sputo per pulmonem evacuatur.

894. Abscessus verô ille pure proprio rumpitur, unde pus stillat in cava pectoris, ulcus novo pure factô & accumulato totum cavum replet, totum corpus consumit; id factum noscitur ex prægressis signis (892. 893.); duratione mali usque in decimum quartum diem; symptomatum subitâ remissione, & repentino reditu: inde Phthisis.

895. Ubi ergô per signa (892. 893.) novimus inflammatum abscedere, locus ante dolens notus per caustica erodendus, usque circiter ad pleuram incidendus, suppuratoriis apertus servandus, ut materies extrorsum versâ vi pulmonum à pleurâ caveat, ne fiat empyema: dein emolliendus, donec mundatio facta sit.

896. At verô si constat per signa (302. 894.)

894.) jam rupto apostemate pus formasse empyema, ilico Thorax aperiendus (303. N^o. 5.), pus educendum (303.), vulnus percurandum (304.) victu, & medicamentis.

897. In alium quoque morbum abit, scirrhus, callosove, facto loco affecto, tum etiam pulmone pleuræ jam adnato; quæ ubi facta, oritur asthma, dyspnœa, tussicula sicca, inprimis à pastu vel motu corporis; ex quibus cognoscitur, si præsentia sunt sine signis abscessus (893.), vel empyematis (896.), & inprimis si diu, sine magno mali incremento durant.

898. Cognitum hoc malum (897.) vel nullo remedio medicabile; vel tollitur vitâ duriore, labore, aëre libero, rusticatione, equitatione forti, multumque repetitâ.

899. In Gangrænam quoque talis inflammatio transit primò lateris, mox, viciniâ loci, pulmonis (844.).

900. Quod malum (899.) vel ex vehementiâ pleuritidis, vel ex acri, aut putri materiâ concomitante simul oritur.

901. Id verò futurum esse, & jam inchoari præfagitur ex variis: si sputa purulen-

rulenta subbiliosa, rotunda, purulenta subsanguinea, nigra fuliginosa, coenosa, foetida, strepitus in pectore multus cum vultu mæsto, oculis rubro flavis, pulverulentis, caliginosis, si sputa initio varia; tum sæpe tertio vel quinto die moriuntur. Si stertor, sputum nullum, vel difficile, pulsus languidus, urina flammea: si alvi fluxus liquidus, foetidus, putridus, symptomaticus: si supervenit magna peripneumonia: si novus insultus priori succedit: si sanguis floridissimus effluit ex venâ sectâ sine crustâ inflammatoriâ (384.), licet ex largo vulnere, pleno saltu, puro vase exceptus sit: si sputum supprimi-
mitur dyspnœâ manente, vel auctâ cum dolore, gravitate pectoris, pulsu duro, parvo, celeri, calore magno; hæc enim quinto die exacerbata septimo mortem inferunt: si urina prærubra, obscura, cum variâ hypostasi, nec discreta, intra quatuordecim dies occidit: si hypostasis nigra vel furfuracea, citior mors: si initio mitis, quinto vel sexto die exacerbata, septimo & duodecimo periclitantur, rarôque sanantur, nisi post quatuordecim dies: si dorsum, latus, humeri, cum rubore accenduntur cum angore summo, alvi fluxu viridi, & foetidissimo.

901. Si sicca ob defectum virium, ob dolorem summum, ob ineptitudinem materiæ ad expulsiõnem, ob vasa nimis contracta & crispata, ob nimium usum calidorum, dolore simul vergente ad superiora: si lingua statim sicca, sordibus obsita, livida, nigra, cum bullâ nigrâ: si horum signorum singula, vel plura simul, eveniunt, plerumque morbus ex se lethalis, non facilê sanandus, sed ut plurimum gangrænâ loci in latere, & vicino in pulmone, necat.

902. Quando autem hæc signa (901.) jam imminere id malum (899.) designant, statim uno impetu summa remedia tentanda sunt, nec vitæ auxilio, nec leviori fidendum medelæ, modô aliquæ vires supersint.

903. Ergo hoc casu (902.) statim crustæ ferro ignito in loco affecto profundê inurantur, dein fortibus emundantibus obducantur, & penetrantissimis fomentis calefcant assiduê; tum fortia diluentia, aperientia, antiseptica, sudorifera, largâ copiâ hauriantur. His enim, si ullis, lenietur mali sævities.

904. Sed si causa inflammatoria vehementissima summa creârit symptomata
pleu-

pleuritica, nec auxilio naturæ (887. 888.), nec remedio ulli antipleuritico (890. 903.) cedentia, & hæc dein subito, sine causâ tolluntur, quatenus ab inflammatione pendebant, manente pulsu parvo, celeri, intermittente, respiratione celeri, parvâque, sudore frigido, constat Gangrænam jam occupasse loca inflammata. Hinc delirium brevi, statimque mors, maximê si simul lividus thoracis color: quod idem fit, si ille, qui sputum sub-biliosum excreat, dolore levatur sineratione, tunc enim pariter lethalis insania, mortis ex gangrænâ nuncia, adest.

905. In mortem exit ipsa Pleuritis tunc, quandô tam vehementes causæ ejus, ut dolor productus omnem motum thoracis supprimens brevi creet, impedito sanguinis trajectu, peripneumoniam lethalem (848.) quam brevissimê.

906. Hinc liquet, cur omni sæviori pleuritidi peripneumonia superaccidat? cur senibus, puerperis, gravidis, ple-rumque lethalis? cur thoracis per fasciam adstrictio adeô dolorem levet, ut morbum tolerabilem reddat?

PARAPHRENITIS.

907. **S**i morbus pleuritidi similis occupat eam membranæ Pleuræ partem, quæ diaphragma ambit, vel & ipsum Septum medium, oritur morbus dirus, quem Paraphrenitidem appellant.

908. Qui longè frequentior, quam vulgò quidem censetur, licet præsens sæpe ignoretur, negligatur, vel alterius morbi titulo tractetur.

909. Cognoscitur ex febre acutissimâ, continuâ; dolore inflammatorio loci intolerabili ob membranas nervosas; qui dolor immaniter augetur in inspiratione, tussi, sternutatione, repletione stomachi, nausæâ, vomitu, compressu abdominis in alvo, vel urinâ reddendis; respiratione hinc sublimi, parvâ, celeri, suffocativâ, quiescente abdomine, solo thorace peractâ; delirio perpetuo; hypochondriorum intrô-sursum revulsione; risu sardonio; convulsione; furore; gangrænâ.

910. Exitus idem, ut in pleuritide (884. 892. 896. 897. 899.), sed ob motum partis magnum & assiduum, ob necessitatem ad vitam, ob nervosas membranas

branas tensas, omnia velociora, funestiora; & Ascites hinc purulentus.

911. Curatio hinc easdem distinctiones & cautelas requirit, tum eadem ferme remedia, exceptis iis, quæ loci situs respuit. Clysmata mollia ob viciniam loci sæpe juvant.

912. Ubi verò suppurato diaphragmate, prius inflammato, abscessus in cava abdominis ruptus suum pus evomit, fit collectio ejus in abdomine, aggestio, putrefactio, tumor, viscerum exesio, tabes miserrima, mors.

913. Estque totum hoc malum insuperabile, licet cognitum.

HEPATITIS, ET ICTERUS MULTIPLEX.

914. **U**t viscera & partes, de quibus hæctenus, ita Hepar quoque inflammationis capax; licet rarò de eo cogitetur, & forte etiam non ita frequens sit ob arteriæ hepaticæ parvitatem, & minorem impetum sanguinis Venæ Portarum.

915. Locum ergò habet in finibus ultimis utriusque hujus vasis (914.), hepatis adferentis cruorem effectum arterioso; hinc,

ut pulmonis, duplex est sede, origine: ita tamen, ut unam natam altera facilè sequatur.

916. Antecedunt utramque (915.) causæ similes, nempe generales inflammationis cujuscunque (375. ad 380.), determinatæ inprimis ad hæc loca; tum nonnullæ huic maximè loco propriæ, quæ multæ quidem huc referendæ: obestitas omenti ingens; atrabilaria cruoris, bilisve temperies; acrimonia stagnantis alicubi materiæ purulentæ, ichorosæ, scorbuticæ; si his accedit calor, febris, motus, victus, medicamentum, venenum, quod eliquat, movet, in hepar promovet; bilis pinguis, acris, exusta, per suas causas agitata; lapis, gypsus, scirrhus, callus, steatoma, apostema, cancer, vermis, aliquem locum jecoris, vesiculæ fellis, meatus bilarii occupans, premens, comprimens, si accesserit tum similis causa excitans, ut mox enumerata; subita fortis frigoris per aërem, potum, natationem, calefacto fortiter prius jecori applicatio; sitis diuturna in magno motu, æstu, sudore; febris ardens cum inedia & defectu potus; summæ animi perturbationes; maximi motus per vomitaria excitati; mala hypochondriaca inveterata.

917. Ex his tam multiplicibus causis (917.) orta inflammatio varios habet effectus pro varietate dispositionis præcedentis in jecore, pro varietate materiæ motæ & inflammantis, tandemque pro varietate causæ pellentis.

918. Dum verò indolem communem inflammationis sequitur, vascula obstruit; fluida sistit; tumorem elevat; vicina comprimit; eadem ac in suo loco producit; hinc sensim increfcit, totum fere occupat, ventriculum impedit, & ab eo repleto dolet, sic & diaphragma; omnem cruorem arteriæ cœliacæ, & binarum mesentericarum impedit, ad hepar sistit; adeoque omnem venosum, arteriosum, lymphaticum fluorem in visceribus primis abdominalibus integrè impedit; bilis generationem, secretionem, excretionem, circulationem, actionem invertit; Icterum producit, ejusque effectus; putrefactionem omnium liquorum & viscerum abdominalium producit; unde infinita mala.

919. Habetque pariter exitum in sanitatem, alios morbos, mortem.

920. In sanitatem transit beneficio naturæ, vel artis.

921. Per naturam autem benignâ re-

soluzione, aut coctione & excretionemateriae morbosae.

922. Resolutione, si materies recens, lenis, & reliquae conditiones adsunt (386.): tum ars diluendo, solvendo, leniter movendo, per epithemata, potus, clysmata, negotium promovet.

923. Coctione, & excretionem, dum in morbo hoc per sua signa (916. 917. 918.) cognito. 1. alvus fluit biliosis cum paucocruore ante diem quartum; 2. urinave excernitur multa, acris, crassa, rubra cum sedimento subalbo, diu continuata, ante diem quartam; 3. superveniente dolore mitiori Lienis ante signa suppurationis; 4. haemorrhagiâ largâ ex nare dextrâ; 5. sudoribus, materie, loco, tempore, continuatione, effectisque, bonis.

924. Ubi primum apparet (923. No. 1.), statim epithematibus, clysmatibus, fomentis, potibus, victu, medicamentis, ea sunt subministranda, quae valent diluere, resolvere, movere, abstergere, leniter expellere, putredini biliosae inprimis obesse.

925. Si alter casus adest (923. No. 2.) utendum dictis (889. ad curam 888. No. 2.), inque iis addenda parum deterfiva.

926. In tertio casu (923. No. 3.) eadem

dem (924. 925.) peragenda; sed lieni simul, & toti viæ ab eo in hepar, fomenta similia danda.

927. In quarto (923. No. 4.) nares internæ & externæ emollientibus, tepidis fovendæ, donec ad levamen symptomatum fluxerit sanguis; tum verò, si nimius fluor, compescendus lentè per stiptica & diætam; ne nimis cito.

928. In quinto denique (923. No. 5.) requiritur usus decoctorum diluentium, abstergentiumque largus.

929. In primis in his (924. ad 929.) cautio sit, ne aliquid materiæ morbi in loco restet, difficulter postea superandæ: & inde prima, atque benigna Icteri species curatur.

930. Si recens, vehemens, sine signis & spe (922. 923.), erit tractanda eisdem cautelis, remediis, methodo, ac pleuritis (890.), paraphrenitis (911.), & similes morbi: nisi quod ea, quæ leniter vi antiphlogisticâ alvum emolliendo subducunt pota, & per clysmata injecta, in primis hîc profint.

931. Signa autem perfectæ sanationis, color non amplius ictericeus in oculis, facie, urinâ, fœce alvi, cum absentia symptomatum (918.).

932. Unde noscitur origo, natura, effectus, curatio secundæ speciei Icteri gravioris.

933. Si autem in hepate inflammato (914. 915.), remedia (922. ad 931.) non, ferô, frustrâ applicata; causâ major; tumorietur suppuratio (387. 402.) jecoris, similis ut alibi, nisi quod ob copiam multî hic liquidi cruenti & biliosi stagnantis rarô bonum pus, nisi in parvis & exterioribus, plerumque verô funesta putredo.

934. Cognoscitur id futurum 1. ex signis prægressæ inflammationis in loco, dolore inflammatorio, ictero flavo in oculis, cute, urinâ, fœce alvi, apparente, febre acutâ. 2. ex absentia resolutionis (922.), cocti excretionis (923.), aut sanationis (924. ad 933.). 3. ex mutatione symptomatum, remissâ acutic doloris, sequente pulsatione, manente ictero, horroribus vagis. 4. ex duratione inflammationis non pessimæ ultrâ triduum.

935. Factum novimus: 1º. ex signis (934) prægressis. 2º. tumore loci. 3º. mutatione symptomatum, loco doloris jam præsentem gravitatem partis, manente ictero. 4º. ex debilitate magnâ, febriculâ hæcticâ, siti ingente.

936. Tale apostema vel 1º. totum depasci-

pasceatur jecur; 2^o. vel rumpitur in cava abdominis effuso pure sanioso; vel 3^o. per vasa biliosa in intestina; vel 4^o. per venam cavam in cruorem; vel 5^o. elato tumore accrescit peritonæo, atque ibi abscessum externum hepatis format, ibi apparentem.

937. Ubi hepar consumitur, tum tabe lentâ ictericâ, cum febriculâ assiduâ, fiti intolerabili, debilitate summâ, anxietate inexplicabili, urinâ fere nigrâ, tympanitide, fluore alvi sanioso, fœtidissimo, diu luctatus moritur.

938. Qui casus (937.), eousque pro-
vectus, nullam medelam, vix palliationem capit; hæc nova Icteri idea.

939. Si ulcera facta hepatis, & jam rupta effuderint suam materiem in cava abdominis, collecto ibi puri assiduô novum addunt, omne corporis humidum & pabulum in novum pus convertunt, cuncta viscera putrefaciunt, hinc Ascitem, mentiendo Tympanitidem, creant, unde post lentam, terribilemque tabem, & ejus symptomata, mors: similis fere priori (938.) hæc Icteri species, nullâ arte sanabilis.

940. Quoties verô suppurata materies & ichor, exesis finibus meatuum bilioso-

rum, in horum amplitudinem, indeque in intestina fluxerint, pro varietate affectatæ viæ, vomitus foetidos, putrefactos, purulentos, ichorosos, albi, cinericei, fusci, flavi, nigri coloris, vel similes alvi evacuationes producant, cum summâ virium jacturâ, titulo fluxus colliquativi, brevi lethales. Novus hic iterum Icteri exitus, maximè metuendus.

941. Si verò in Venæ Cavæ exesos fines, hinc in ipsam, denique in massam sanguinis eadem liquida (940.) se effuderint, miscuerintque, teterrima oriuntur, & brevi exitialia, symptomata; animi deliquia enormia, frequentia; debilitates summæ; pulsus omni modò malus; perturbatio omnium functionum simul; mors improvisa. Novus iterum Icterus.

942. Quo quidem casu (941.) nulla valida medela habetur, largus autem usus eorum, quæ vires focillant, putredini resistunt, humida restitunt, aliquid proficit.

943. At si ultima obtinet mali species (936. N°. 5.), tum deprehensus tumor, lino, ferro ignito, causticis, lanceolâ aperitur; vulnus leniter erodentibus & suppurantibus tam profundè exeditur, donec ad vomicam perventum.

944. Si tum album, æquale, læve, inodorum, specillum non colorans, pus extrorsum exit, spes est: oportet enim ut ulcus tractare (402. ad 413.); simul interna depurantia medicamenta adhibere.

945. Si autem flavus, fuscus, lividus, niger, foetidus, specillum colore iridis inficiens, saniosus, amurcosus ichor prodit, sensim exedetur jecur; consumetur æger; fientque fere eadem symptomata (941.).

946. Atque rursus si post inflammationem jecinoris adsunt conditiones (392.), scirrhus ibi nascetur; qui tumore, duritie, incremento, & suam sedem, & vicina lædit, hinc iterum eadem fere mala, sed lenta producit (881. 882. 883.); mollibus non auscultat; acribus in cancerum (492.) horrendum vertitur, cujus dein terribilia effecta intelliguntur ex (499.) comparato cum hac sede affectâ: præcipuum scirrhi talis effectum, Icterus perpetuus.

947. Unde patet, id malum per sua signa cognitum (946.) mitissimè tractandum, sanari vix unquam.

948. Si autem in parvâ modò parte jecoris exigua talis inflammatio hæsit, cal-

culo, scirrho exiguo, pustulæ, exiguo, abscessui, originem dabit: quæ per se parum, sed ortâ febre multa mala pariunt (881.).

949. Tandem etiam inflammatio hepatis definit subitô in mortem, si causæ inflammationis tam validæ, ut nihil per totum jecur transire queat, febre simul intensâ urgente: tum strictum ad fines, dilatatum ad vasa hepar, nullam functionem obit; fit Icterus subitus & ingens; rumpuntur vasa; effunditur sanguis & bilis; moritur ilicô æger. Id futurum prædicit 1. vis morbi in hepate cognita. 2. summa & subita resolutio virium: at verò jam fieri docet vomitus, aut secessus sanguinis, bilis, fœcis amurcosæ, viridis, nigræ, fœtidissimæ, cadaverosæ; singultus magnus, perpetuus; febris intensissima; sitis inextinguibilis; subitus admodum pallor.

950. Ex his omnibus expositis (914. ad 950.) intelligi possunt infinita symptomata in morbis acutis occurrentia; quorum ignota ratio inanes malignitatis fabulas produxit: nam ab hepate omnia viscera abdominis, adeoque omnes illorum actiones, digestionis, assimilationis, nutritionis, refectionis sanguinis, excretionis

nis alvinæ, pendent. In Hepate triplex, facilê in calore putrescens humor, sanguis multus & solutus, bilis vesicaria, & hepatica: Hepatis cum diaphragmate & corde magna vicinitas: finibus biliosis obstructis facile liquor Portarum biliosus in Cavam transit. Tum ex iis solis perspicitur, quam varia, quam multiplex Icteri idea? cur aliquandò facilê sanetur, & quandò? cur sæpe sit pertinacissimus? cur sæpe citò, sæpe tardê admodum occidat? Cur per vices accedat, maneat, abeat, redeat? cur cum tantis anxietatibus, vomitu, dolore, convulsione, præcedentibus, appareat, quiescat, redeat? & quid tum denotet? Cur in acutis febribus tam calamitosus ante septimum diem? Cur tam inexpugnabilis in iisdem post septimum diem? Cur dysenteriâ largâ, citò desinente, tam bene sanetur? Cur missio sanguinis tam parum hos morbos juvet? Cur in omni morbo acuto adeò attendendum sit ad hypochondriorum dolores, tumores, retrosursum elevationes? Cur color oculorum, urinæque, tam citò icterum præsentem & abeuntem designent? Cur vitia inflammatoria, suppuratoria, gangrænosa, scirrhusa, cancerosa, lienis, ventriculi, omenti, me-

230 HEPATITIS ET ICTERUS MULTIPLEX.
fenterii, intestinatorum, semper ipsum he-
par adeo violenter infestent? Cur tam
enormiter vitia inflammatoria hepatis vi-
cissim & scirrhusa illa afficiant? Cur je-
cur tam immensum augeri, tumere, ite-
rumque exsiccati possit? cur hydrops à
malo hepatis, & tympanitis eo crudelior?
Cur ab hydrope extenuatio, & exsicca-
tio hepatis, cum prætumido liene? quæ
dysenteria hepatica? &c. sunt enim infi-
nita, quæ huc spectant.

VENTRICULI INFLAMMATIO.

951. **U**t reliquæ partes, ita quoque
stomachus verâ inflammatione
corripi potest. Cujus signa, & effectus
hæc fere habentur: dolor ardens, fixus,
pungens in ipso stomachi loco; ejus ex-
acerbatio in ipso puncto, quo aliquid ei
ingeritur, vomitus dolentissimus statim ab
omni ingesto, cum singultu dolorifico;
anxietas summa & perpetua circâ præcor-
dia; febris acuta continua. Ejus causæ
generales inflammationes, vel vicinia ali-
orum, vel acria ingesta.

952. Brevi plerumque lethalis fit, ni-
si subito curetur, ob læsam necessariam
functionem, & infinitos nervos connexos.

953. In sanitatem ; morbos suppuratorios , scirrhosos , cancrofos , gangræno-
fos ; vel in subitam mortem convulsioni-
bus acceleratam , transire , ut reliqui in-
flammati , solet.

954. Simul ac præsens per sua signa
scitur (951.) , statim validâ sanguinis
missione , si opus repetitâ ; potu lenissimo
nutriente , emolliente , antiphlogistico ,
causæ contrario ; clysmatibus , fomen-
tisque similibus , diligentissimè utendum.
Cavendum summopere ab omni acri , ma-
ximè autem à vomitu.

955. Si in suppuratum abit multa mala ,
maximè nausea , vomitus , dolor , succedunt ,
quæ sæpe mirabilia apparent ; ignoratâ
causâ , rarò curantur ; cognita (951.) per
curam abscessus tractari requirunt (402.
ad 413.).

956. Ubi scirrhum , cancerumve pro-
creat , tum enormes illos vomitus , do-
lores intolerabiles , ad minima ingesta a-
cerbatos , fixos , diuturnos , ad omnia
medicamenta aspera insurgentes , exci-
tat.

957. Solis lenibus , ad hos morbos re-
quisitis , medelis pacatur (490. 491. 506.
507. 508. 509. 511.) ; rarò curatur :
aquæ medicatæ fontium maximè hîc effi-
caces.

232 VENTRICULI INFLAMMATIO.

958. Lienis, Pancreatis, Omenti, inflammati, suppurati, gangrænosi, scirrhusi, cancrofi, origo, natura, effectus, cognitio, prævisio, curatio, palliatio, ex iisdem dictis (914. ad 958.) hauriri possunt.

INTESTINORUM INFLAMMATIO.

959. **I**ntestina, maximê tenuia, & frequentissimê, in suis membranis acutâ inflammatione, ut ventriculus, sæpe infestantur, à causis communibus inflammationis huc delatis; vel à materie acri potus, cibi, condimenti, medicamenti, veneni, assumptâ, huc delatâ, in plicis valvulosis retentâ, hærente; tum etiam ab acri, putridâ, foetidâ materie purulentâ, ichorosâ, gangrænosâ, biliosâ, atrabilariâ, ex œsophago, stomacho, hepate, liene, pancreate, omento, huc appellente, hærente, rodente; denique ab convulsione ingente prægressâ, flatus creante, motum sistente, sicque inflammationem creante.

960. Nata his locis, contrahit intestina; cavitatem claudit; transitum appulsi impedit; dolorem acutissimum, ardentem;

tem, fixum, creat; convulsiones violentas, ubi appulsis irritatur, producit; alvum claudit; vomitum excitat ingestorum, & appulforum, citius, tardiusve post assumptionem, prout superius, vel profundius hæsit; flatus dolentes; tormina cum borborygmis acutissima; ileum; volvulum; abscessum; gangrænam; scirrhum; cancrum; febrem acutissimam; debilitatem ex dolore acerbissimam; mortem citissimam, producit.

961. Quamdiu in gradu inflammatorio subsistit, doloris Iliaci nomine imponit incautis, frigori, flatui, vento, periculo successu adscribitur, calidis tractatur, & carminantibus, eventu funestissimo.

962. Cognoscitur autem facilè prò verâ inflammatione ex febre acutâ continuâ comite, siti ingente, calore magno, pulsu duro, dolore igneo, urinâ flammeâ, debilitate subitanâ.

963. Si flexum Coli occupat (959.), facit Colicum dictum dolorem; si Recti intestini ultima infestat, tum pro hæmorrhoidibus cœcis haberi solet: solvitur dysenteria blandâ subcruentâ biliosa.

964. Simulac noscitur præsens per signa

gna (959. 960.) in eo statu, statim, maximo molimine tentanda sanatio, quæ acquiritur 1. missione largâ, & repetitâ sanguinis, ut in pleuritide (890.). 2. assiduo injectu clysmatum laxantium, diluentium, antiphlogisticorum, sæpe repetitorum ad tertiam, quartam, & ultrâ, vicem uno die. 3. potu assiduo calido corundem, additis prudenter opiatâ, & iis, quæ causæ singulari compertæ (959.) adversa sunt. 4. fomentis ex similibus toti abdomini applicatis, maximè ex junioribus, vivis, calidis, sanis, animalibus impositis. Atque 5. interim cautè cavendo ab omni acri, impetum augente, calefaciente, potu, cibo, medicamento, motu, animi affectu. 6. tamdiu persistendo in usu horum, donec omne malum sedatum sit, nec tribus diebus redierit.

965. Si malo hoc (959. 960.) prægresso; nec debitis remediis curato; & ultrâ triduum semper cum vehementiâ persistente, loco doloris, ardoris, distractionis, successerit horror vagus per totum corpus sine causâ, obtusus cum gravitate dolor in loco, signum erit ibidem formari abscessum; unde intrâ quatuordecim dies eo rupto effluet pus; quod si in cava abdominis effluit facit mala multa

ta similia (939.) ; si autem effluit in cava intestinorum facit dysenteriam purulentam magnam , parvam , longam , brevem , prout ulceris ibi facti natura dabit ; inde sæpe integræ intestinorum membranæ exeunt ; & sæpe tabes fieret.

966. Simulac id (965.) adesse noscitur , statim inhibendus omnis victus , unde stercus multum , durum , crassum , acre nascitur ; æger pascendus solis jusculis cum leniter deterfivis radicibus incoctis ; decocta balsamica , detergentia , multum bibenda , & instar clysmatum injicienda ; aut aquæ fontanæ medicatæ largâ copiam bibendæ , in his pergendum usque ad perfectam sanationem.

967. Si verò morbus habuerit causas violentissimas (959.) , & produxerit sævissima symptomata (960.) , poterit facile in illo loco (959. 963.) producere gangrænam (388.) , miserrimè dein lethalem.

968. Quam futuram ex iisdem observatis prægressis facilè prævidemus (967.) , si simul nulla benignæ resolutionis (963.) , vel medelæ (964.) , apparuerint.

969. Eam fieri docent signa prægressa (968.) , tum subita , & sine causâ , remissio acerrimi doloris , manente pulsu debili ,

li, intermittente, sudore frigido, dysenteria foetida, cinericea, ichorosa, livida, nigra, foecum sine sensu demissione; unde brevi placida mors.

970. Malum id, eousque proVectum, raro medelam capit; curandum prius; caeterum sola methodus (966.) prodest.

971. At si causae (392.) hinc scirrhum produxerint, longè alia mali idea nascitur, quae clarè certè pernosceda.

972. Ergo, si in intestinis dictis (959. 963.) inflammatio cum conditionibus (392.), diu perdurans, nec in summam saevitiem (960.) ascendens, nec resolutione (963.), nec medicamentis (964.), nec suppuratione (965.) soluta, deinde reliquerit in loco affecto stuporem, gravitatem, distractionem, constantem, cogitandum est, scirrhum ibi nasci.

973. Qui si naturam suam (392.) sequens, effectusque suos (486.) producens in hoc loco (959. 963.) multa, gravia, pertinacia mala producit, qualia in primis: stupor, pondus, incrementum, assiduò aucta; hinc cavitatis intestinalis angustatio; foecum ibi & chyli stagnatio; horum in locum resistentem actio, maximè putrida, ob moram, materiei; hinc intestini occlusio; intorsio; ingestorum remo-

remora; Ileus; volvulus; vel ab acri irritante dysenteria siccior; convulsio; singultus; vomitus; dolor affiduus; febris, macies; atrophia; mors.

974. Medicamenta parum valent, quæcunque demum sint: victus sit (966.). Sic fertur diu, sine magno malo.

975. Si autem scirrhus ille hoc loco conceptus per causas (492. 495.), signis (497. 498.) cognoscitur, tum verò miserimus rerum status, & immedicabilis cernitur: qui intelligi potest ex (498.) collatis cum naturâ, functione, nervosâ texturâ intestini: maximè autem dysenteria acerrima, assidua, rebellis, cuncta, per quæ vadit, exurens, erodens, confumens, cum convulsionibus acerrimis, doloribus omni patientiâ majoribus, fixis, diuturnis, donec tandem mors unico sit miseriæ solatio.

976. Si, simulac scirrhi præsentia noscitur (972.), tractatur methodo (974.), hoc malum (975.) multum cavetur. Sed si, ad id superandum acria (490. N^o. 3. 495. 502.) applicata imprudenter, maximè per valida purgantia, tum cancer illic oritur, sævitque: tum autem potus ex solo lactis recentis sero; victus ex jusculis farinosis, carnosive solis cum vitellis
ovi;

238 INTESTINORUM INFLAMMATIO.

ovi; clysmata blandissima ex solo decocto seminum lini, foliorum solani officinarum, vel capitum papav. alb. injicienda; medicamenta summopere demulcentia, anodyna, leniter opiata, non facile in acre transeuntia, danda.

977. Hinc demum liquet, cur practici toties occurrant dolores œsophagi, oris ventriculi, hepatis, lienis, pancreatis, intestini Ilei, intestini Coli, adeo sævi, fixi, pertinaces, intolerabiles, insuperabiles? item quam sit multiplex, miraque omni modo, dysenteria? quam male in hujusmodi malis sæpe accusetur acrimonia quædam hectica humorum singularis, & contra eam fictam dentur nocentia medicamenta? quantâ sit prudentiâ opus Medico daturò purgans in magno dolore illarum partium? quænam sæpe sit illa post hæc in nonnullis sequens, immediabilis hypercatharsis? quam varia remedia, & methodus medendi requirantur ad dysenterias curandas? quam vanum, fallax, & damnosum sit, ad has commendare unum, qualecunque demum sit, medicamentum proprium? aut unam universalem medendi methodum? Et infinita similia.

APH.

A P H T H Æ.

978. **Q**uum verô in multis morbis a-cutis cum visceribus inflamma-tis Aphthæ oriantur, de his nunc paucis agendum.

979. Sunt autem parva, rotunda, superficialia, ulcuscula, os internum occupantia.

980. Quæ examinata accuratè videntur esse ultimi emissarii, quo in os liquor secretus effunditur salivofus, mucosusque, exulcerationes, factæ ex obthuratione ejus canalisi extremi per humorem lentum, viscidumque eò delatum.

981. Hinc occupant omnia loca, ubi talia emissaria hiant; adeoque labia, gingivas, genas internas, linguam, palatum, fauces, tonsillas, uvulam, gulam, stomachum, intestina tenuia, ubique fere eadem specie.

982. Gentibus Borealibus, paludosa loca inhabitantibus, tempestate calida pluviosa, infantibus, senibusque, frequentes.

983. Solent autem Aphthas in ore apparituras præcedere febris continua putrida; aut intermittens, continua facta; inci-

incipiens cum diarrhœâ, vel dysenteriâ; magna & perpetua, nausea, vomitus, prostratus appetitus; anxietas ingens, sæpe repetens circâ præcordia; debilitas magna; magna evacuatio quæcunque humorum; stupor & hebetudo; somnolentia levis, inæqualis, perpetua; perpetua querela de pondere & dolore circâ stomachum.

984. Solet in initio aliquando hinc inde sparsa apparere solitaria pustula, jam primô in linguâ, in labiorum angulis, in faucibus, & alibi, sine ullâ certâ constantiâ loci primi: & illæ fere semper boni genii: aliquando primo apparent in imis faucibus adscendente quasi ex œsophago crusta alba, densa, splendente, instar recentis lardi, tenacissimê adhærente, lentê adscendente: atque hæc fere pessimæ, & ut plurimum certò lethales: aliquandô duris, crassis, densis, tenacibus crustis totum cavum oris ubique, usque ad extrema labiorum, obsident, omnia tegentes simul: & ab his rarô resurgunt ægri.

985. Varius harum color: albus pellucidus instar margaritarum; albus sincerus ex densitate magnâ; fuscus; flavus; lividus; niger: quorum malignitas pari ordine,

ne, ac hîc recensetur, procedit, ut prior optimus, pessimus posterior, sit.

986. Ubi hæserunt aliquamdiu, solent infernê solvi, laxari, frustulatim decidere, sicque sensim, & successivè omnes partes prius affectæ liberantur. Tum nonnullæ cadunt citò, aliæ tardê. Quædam ilicò renascuntur, quædam tardê, aliæ non: renascuntur quandoque æquè densæ ac priores, & etiam nonnunquam adhuc densiores: patetque iterum tum diversitas periculi, & ubi.

987. Hic locus (981.), natura (979. 980.), causa (980. 983.), symptomata hujus mali (984. ad 987.), unde de genio statuere licet; atque inde effectus ejus facilè deduci possunt.

988. Ubi enim talis crusta aphthosa totam superficiem tegit partium descriptarum (981.), tum sensum nervis imprimendum tollit, unde sapor omnis sublat; exitum liquidorum per sua emissaria impedit, unde siccitas, vasorum suppositorum dilatatio, liquorum sub his stagnantium putrefactio, inflammatio partium ipsarum; cavitates vasorum absorbentium claudit, unde ingressum novi chyli, potus, medicamentorum impedit, vitia à denegatâ refectione corporis nata produ-

L

cit,

cit, unde tandem inde mors; crustis deciduis, major per dilatata vasa jam aperta humorum effluxus, unde salivatio, diarrhœa, quæ bonæ si non renascuntur aphthosæ crustæ; malæ, si iterum procreantur; deciduis crustis, dolor inflammatarum, & jam denudatarum partium, sæpe vivum cruorem stillantium, unde saliva sanguinolenta, talisque dysenteria; hæc autem omnia, si stomacho, emissario hepatis, pancreatis, intestinorum applicantur, nos docent infinita mala, quæ ex hoc uno morbo oriri possunt: ut non opus sit aliam prognosin dicere.

989. Si verò ulcerosæ crustæ hæc admodum lentæ, crassæ, latæ, compactæ, tum sæpe suffocata caro subjecta inflammata, suppurata, gangrænosæ, in dira ulcera mutatur, eroso quandoque in os palati usque ejus involucro; qualia autem in stomacho & intestinis hinc mala, per se patet.

990. Ut curetur optimè hoc malum, debet 1. humorum vitalium impulsus internus in partes obsessas excitari, temperari, ut suppeditato liquido infernè resolutio, laxatio, lapsus, concilietur crustæ ulcerosæ: id efficitur potu multo, calido, diluente, resolvente, abstergente.

te. Et quia in malâ specie hujus morbi vasa lactea obsessâ introitum facilem negant, hinc fomenta, vapores, balnea, mirifici hîc usus ex eisdem; cibus autem optimus ex aquâ, pane, coctis, dein vino & melle mistis. 2. debet crusta in facilem citumque lapsum disponi: id fit fomento, gargarismo, clysmate: quæ liquore calido laxante, emolliente, detergente, & satis diu adhærendo humectante, putrefactioni resistente, constare debent. 3. simulac lapsus conciliatus est, tum anodyno, demulcente, & simul parum corroborante medicamento simili utendum. 4. simulac rursus febris sedata, urina hypostatica, pulsus paulô liberior, tum potus corroborans prodest. 5. in fine mali purgans corroborans per alvum exhibendum.

991. Ex hâc historiâ & curatione aphtharum multa obscura problemata practica solvuntur. Cur enim in febre cum diarrhoeâ & dysenteria in fine morbi aphthæ? Cur id in pueris, senibusque inprimis? cur maximê, si medicamenta, victus, regimen, calefacientia, aut adstringentia, in initio morbi hujus data? Cur si in talis morbi initio purgans datur aphthæ hujusmodi præcaventur? Cur in pessimis aphthis

molestus & funestus singultus. Cur ora aphthosa, ventres turbati, appetitus prostrati junguntur ab Hippocrate? cur aphthosa tunica ventriculi lenteriam creat? Cur aphthæ nigræ pestiferæ habentur? Cur aphthosum os gravidæ abortus prænuncium? Cur in putridis pulmonibus, hepate &c. Aphthæ adsunt? Cur tumor, calor, suffocatio, angina ab aphthis refrigeratis? Cur deliria, jactationes, pervigilia, sudor frigidus, adeo hic funesta?

992. Regula ergo est: aphthæ pellucidæ, albæ, tenues, sparsæ, molles, facile cadentes, parum renascentes, superficialiæ, bonæ; contrâ verò: candidissimæ opacæ, flavæ, fuscæ, nigræ, densæ, crassæ, coeuntes, duræ, tenaces, assiduò resectæ, erodentes, malæ.

N E P H R I T I S.

993. **I**psos Renes verâ inflammatione occupari scimus ex dolore ardente, pungente, magno, inflammatorio loci ubi Renes siti sunt; ex febre acutâ, continuâ concomitante; ex urinâ paucâ, sæpè parvâ copiâ, emissâ, admodum rubrâ & flammeâ, vel in summo malo, aquosâ;

stu-

stupore cruris vicini ; dolore inguinis, testisque vicini ; dolore iliaco ; vomitibilis ; ructu assiduo.

994. Hanc (993.) producunt omnes causæ generales inflammationis renibus applicatæ ; adcoque 1. quidquid fines arteriæ ad transmittendum impedit , vulnus , contusio , abscessus , tumor , decubitus diuturnus , nixus corporis validus , lapillus. 2. quidquid urinam in pelvim , ureterem , vesicam transire impedit , ut similes causæ , ac mox enarratæ , applicatæ his partibus. 3. quæ crassiora sanguinis vi adigunt in canales urinosos , ut cursus , equitatio diuturna & vehemens , æstus , nixus , plethora , diuretica acria , venena. 4. spasmodica omnium illorum vasculorum diu permanens contractio.

995. Si summa inflammatio hæc vascula occupat , ita sæpe stringuntur , ut nihil reddatur lotii : aliquandô ut valde parum , pellucidum , tenue , aquosum , quod pessimum. Irritatis sæpe nervis coherrentibus , & vicinis , dolores & convulsiones facit per stomachum , mesenterium , intestina , ureteres ; unde ructus , nausea , vomitus , dejectiones alvi , ileus , urina intercepta , crurum stupor , horum immobilitas , lumborum ardor.

696. Sanatur bonitate naturæ, & morbi, 1^o. per resolutionem. 2^o. urinâ copiosâ, ruffâ, crassâ, continuato fluore redditâ ante diem morbi septimum, aut ad summum quartumdecimum. 3^o. Hæmorrhoidibus initio morbi largê fluentibus.

997. Sanatur, ubi in statu inflammationis per sua signa noscitur (993. 995.), 1. per remedia generalia omni inflammationi sanandæ propria, venæ sectionem, avulsionem, dilutionem. 2. decocta lenia, emollientia, antiphlogistica magnâ copiâ ingesta. 3. Clysmata, fomenta, balnea ex iisdem constantia. 4. victu humido, leni, quiete, vitatione lecti calidi, inprimis autem decubitus in dorso.

998. Si nimia symptomata doloris, vel convulsionis urgent, opiata profunt.

999. Vomitus autem nimium, morbi symptoma, sæpe ingestu tepidæ mellitæ juvare prodest.

1000. Atque hæc solâ methodo tutô curatur ipsa nephritis à calculo renibus, ureteribusve impactô orta.

1001. Si causæ nephritidis magnæ, nec malum resolvitur (996.), nec sanatur (997.), sed excurrit ultrâ septimum diem, abscessus metuendus; quem fieri, docet

docet remissio doloris, ejus in pulsationem mutatio, horror sæpe recurrens, gravitas, stuporque partis; jam factum esse docet prægressus priorum, tum pulsus, ardor, tensio in loco, urina purulenta, foetida, instar urinæ falsæ putrefactæ: simulac abscessus ille factus scitur, utendum valde maturantibus primò & emollientibus, dein purulentâ apparente urinâ, diureticis puris ex aquis medicatis, sero lactis, similibusque, usurpatis simul balsamicis.

1002. Si verò suppuratio illa (1001.) diu durat, totus ren exesus saccum format, nulli ufui servientem: tumque frequenter tabes renalis adest.

1003. Si scirrhum hic format, paralysis, vel claudicatio cruris suppositi oritur, immedicabile malum: unde sæpe lenta tabes, hydrops: &c.

1004. Si autem parvâ copia materiæ inflammatae coagulata in folliculo urinæ minimo hæserit, basin format, cui apposita sabuli in urinâ materies crustatim accrescens calculum renalem creët, sicque eundem augeat: de quo postea.

1005. Quin etiam aliquandò in gangrænam transit, quod docet vehementia causæ (994.), symptomatum (995.).

absentia levaminis per remedia (997.), & subitâ remissione doloris sine causâ, cum sudore frigido, pulsu debili, intermittente, singultu, urinâ vel nullâ, vel lividâ, nigrâ, capillosâ, foetente, carunculis fuscis, nigrisve foedâ, defectu virium subito, summo: ubi nihil juvat, vel medicina (902.).

1006. Hinc patet, infinitas esse nephritidis species, causasque; & inter eas unam à calculo; tamen esse omnium ferme eandem curationem? Cur in febribus toties nephritis (993.), ejusque crisis (996.)?

A P O P L E X I A.

1007. **S**umma velocitas, nexus sæpe cum inflammatione, foecunditas multorum inde pendentium malorum, requirit, ut ordine nunc de Apoplexiâ agatur.

1008. Quæ tunc dicitur adesse, quando repente actio quinque sensuum exteriorum, tum interiorum, omnesque motus voluntarii abolentur, superstitie pulsu plerumque forti, & respiratione difficili, magnâ, stertente, unâ cum imagine profundi perpetuique somni.

1009.

1009. Accuratissima & multiplex valde observatio docuit, hunc morbum accidisse, quoties illæ prægressæ essent causæ, quæ potuerunt impedire integrè, vel multum, effluxum liquidi cerebrosi spirituosum in organa sensuum, motuumque voluntariorum, & vicissim hujus refluxum ab his organis in ipsum sensorium commune; superstitè interim cerebelloso liquoris in cor, & naturalia respirationis organa, itu, & forsan reditu, aliquo, qui ad has functiones sustinendas quodammodò sufficiat.

1010. Quæ causæ omnes recensitæ ab Observatoribus in aliquas classes redigi possunt in commoda Praxios.

1. Nativæ corporis fabrica, Caput magnum; Collum breve, & sæpe sex modò vertebriis extructum; Corpus valde crassum & pingue; Temperies plethorica, cacochymia pituitosa multum excellens.

2. Quæcunque sanguinem, lympham, materiem spirituum ita mutant, ut per arterias cerebri liberè ire non possint, sed impacta hæreant: talia sunt sæpe ∞ . polyposæ in carotidibus, vertebralibusque arteriis concretiones, sive circâ cor primò, sive intrâ ipsum cra-

nium factæ ; quæ cordis palpitatio-
ne, pulsu inæquali, vertigine, scoto-
miâ , frequentioribus , & ad auctum
motum , caloremve , incrementibus ,
se manifestant. β. spissitudo inflammato-
ria cruoris ; quam docent febris acuta
continua , phrenitis, dolor capitis in-
gens , inflammatorius, diu prægressa ;
tum omnia signa, quæ oriuntur à sangui-
ne, qui impeditus ire per vasa cerebri, cō-
majore copiâ , & impetu per ramos ca-
rotidis alios ruit, unde rubor, tumor,
inflammatio oculorum , cum lachry-
mis excussis, faciei , & colli. γ. cras-
sa , glutinosa , pituitosa iners sangui-
nis totius natura ; unde senibus , ca-
tarrhosis , frigidis, humidis, pallidis,
leucophlegmaticis, hic morbus admo-
dum familiaris ; quin & præfagitur iis
futurus jam ante adventum suum, per
otia , hebetudines, somnolentiam , pi-
gritiam ad motus quoscunque, vocem
solitô tardiolem, tremores, stertores,
incubos , oculos pallidos , turgidos ,
humentes , caliginosos , vomitum pi-
tuitæ frequentem, vertigines, respira-
tionem ad minimos motus anhelosum,
cum narium pinnis compressis, omnes
cau-

causæ, unde glutinosum iners fit, accumulatur (69. ad 75.).

3. Quæcunque arterias ipsas, vasa venosa cerebri ita comprimunt, ut cruor, spiritusque, transfluere non possint.
- α. plethora, cacochymia replens, calida valde temperies, hinc obnoxia huic malo, maximè si motus, calorve ingens velocitatem adauxerint; hinc his accidere solet à lauto valde cibo, potu, medicamentis acribus & valde moventibus, ut sunt cardiaca, volatilia, vomitoria, &c.; æstu, motuque exorbitantibus, intentione animi summâ, diuturnâ, sæpe repetita. β. tumores quicunque intrâ cranium nati, inflammatorii, abscessus, serosi, pituitosi, steatomatosi, scirrhusi, ossei, vel arterias, vel venarum cõitum circâ torcular, vel nervorum initia medullosa, comprimentes, aut medullam cerebri ipsam. γ. nimia velocitas cruoris in caput determinata, dum per inferiora arteriosa vasa impeditum iter per quas cunque ex infinitis causas. δ. quæ extra cranium venas cerebri sanguinem referentes comprimunt rursus quæcunque causâ. ε. effusi humores sanguinei, purulenti, ichorosi, lymphatici, suprâ
- L 6
- duram

duram piamve matrem externè comprimentes.

4. Omnia, quæ arteriosa, venosa, lymphatica, vasa interioris cerebri, circa cavitates itâ solvunt, ut exeuns liquor aggestus, compressu suo fornicatas cerebroforum nervorum origines lædat. Talia sunt, serum acre in hydropicis, leucophlegmaticisque; sanguis in plethoricis; acrimonia atrabilaria in melancholicis, scorbuticis, podagricis; quæ vulgaris causa intrâ 40 & 60 gesimum ætatis annum agens; quæ omnia latentia per causas moventes excitata, sæpe subitò morbum hunc creant. Hujus ergo prænuncia ex naturâ materiæ prius natæ, & cognitis causis excitantibus, peti debent. Maximè his animi affectus summi, & intensissima studia, nocent.

5. Huc venena quædam referuntur, quæ tamen vel ex vi trium ultimarum causarum (Nº. 2. 3. 4.) agunt, vel potius pulmoni primò, quam cerebro nocent.

IOII. Causas has (IOIO.) docuit Anatomica inspectio cadaverum apoplexiâ extinctorum, atque observatio historica eorum, quæ in ipsâ horum ægrorum curatione

tione observari possunt : meditatio autem facilè in dictas (1010.) classès ordinat, curationi inveniendæ quam aptissimas.

1012. Ex iisdem constat à diversis, & oppositis quidem causis, morbum hunc sæpe produci ; adeoque bene dividi in sanguineam & pituitosam ; sed non perfectâ divisione, quum & serosa, & atrabilaria, & polyposa sit, & alia.

1013. Locus verò affectus in apoplexiâ exquisitâ est totum sensorium commune ; in parapoplexiâ verò ejus quædam pars præ cæteris, reliquis quodammodò, sed tamen minus, pressis. Cerebello, ut plurimum, in initio illæso.

1014. Unde patet, cur pulsus & respiratio exerceantur, sensibus interim, motibusque voluntariis, destructis ? imò cur sæpe pulsus & respiratio crescant prorato, quo sensus, motusque plus decrescunt, ut & circâ mortem ?

1015. Magnitudo igitur apoplexiæ censetur ætate, temperie, fabricâ ægri ; tum vehementiâ symptomatum, & imprimis absolutâ destructione sensuum, motuumque ; respiratione validâ cum profundo stertore ; spumâ circâ os copiosâ, viscidâque ; sudore tenui, guttatim hærente, frigidiusculo ; ortu ex debili primò para-

poplexiâ prægressâ; ortu ex epilepsiâ ingenti præmissâ, vel ex causâ notâ vehementiori.

1016. Levitas & sanabilitas mali contrâ decernitur ex levitate symptomatum, absentîâ dictorum (1015.).

1017. Lenis apoplexiâ solvitur superveniente sudore multo, æquabili, rorido, calido, levante; urinâ multâ, crassâ; hæmorrhoidibus largis, diu fluentibus; fluxu menstruo restituto; alvi fluxu; febre magnâ.

1018. Paulô gravior, superatâ causâ, solet mutari in paralyfin alicujus partis musculosæ; totius lateris unius, unde hemiplegia; vel omnium cerviei suppositarum partium, unde paraplegia dicitur; quæ rarô curatur, semperque memoriæ, judicii, motuum læsiones relinquit; unde soporosi, hebetes, tremuli, vertiginosi, pusillanimes remanere solent.

1019. Exquisita apoplexia (1015.), attrito cerebello, corruptis liquidis, causâ in cerebellum propagatâ, in mortem citô finitur, rarô septimum diem excurrens.

1020. Futura apoplexia prævidetur:
1. ex cognitâ naturali temperie (1010. No. 1.) 2. materie morbosâ cognitâ ut causâ

sa prægumenâ (1010. N^o. 2. 3.). 3. ex procatarcticis. 4. ex primis effectibus incepti mali, ut sunt tremor; vacillatio; vertigo; scotomia; stupor; sopor; memoria vacillans; tinnitus aurium; inflatus superiorum; respiratio solito profundior, cum naribus compressis; incubus.

1021. Præsens facilè noscitur, si modò inter diversos ejus gradus distinguitur.

1022. Curatio hujus mali generalis nulla dari potest: oportet enim, ut pro varietate causæ (1010.), modi applicandi, & loci affecti, varia omninò sit; & ut applicetur antequam malum adoleverit.

1023. Si ergò ex lentâ, inertî, frigidâque causâ (1010. N^o. 2. lit. 7.) oritura prævidetur per signa ibi posita, statim conandum 1. ut pressio glutinosi à capite avertatur. 2. lentor in cerebro & in toto corpore attenuetur.

1024. Pressio in vasa cerebri minuitur 1. derivatione in alia, & opposita loca. 2. evacuationibus universalibus.

1025. Vapor, fatus, balneum, succio, epispasticum, rubefaciens, vesicans, causticum, fonticulus, setaceum, frictio, ligatura determinata, venis majoribus, pedi-

pedibus, cruribus, fœmoribus, applicata primo scopo attingendo (1025. No. 1.) valent. Collutiones, gargarismi, masticatoria, salivam moventia, apophlegmatismi, ori, faucibus, naribus applicata, eadem inferviunt.

1026. Vomitoria, purgantia valida, certô determinata; scarificatio; venarum pertusio secundo scopo (1024. No. 2.) satisfaciunt; licet aliquid semper incerti secum ferant.

1027. Lentor verô, præmissis (1024. 1025. 1026.) determinantibus, dissolvitur remediis generalibus contra gluten descriptis (75.), cum prudentiâ adhibendis, capiti applicandis omni formâ: inter omnia vesicæ per cantharidas prosunt, & insecta similia sensim usurpata.

1028. Si ab iisdem causis (1023.) apoplexia jam facta est, rarô curatur: si vires ferunt, eadem tentanda (1023. ad 1028.) naribus, ori, capiti applicanda: omnia, quæ sensus excitare queant; acerrimi usurpandi stimuli quicunque; alvus acri clysmate laxanda.

1029. In usum tamen horum omnium (1028.) augetur sæpe malum, materie magis motâ, & impactâ, per omnia stimulantia: viribus tamen mox projiciendis.

dis per evacuantia. Hinc in conciliandâ dissolutione semper evacuationi & avulsioni studendum quantum res pati queat: inde regula; Venæ sectio, ni juvet, occidit.

1030. Si autem per sua signa (1010. N^o. 2. l. β. N^o. 3. l. α. l. γ.) apoplexia ortura prævidetur, ilicô confugiendum ad ea, quæ velocissimè inanire, resolvere, avertere, queant. 1. ergô fiat larga, cita, missio sanguinis, & quidem ex jugularibus venis; quæ, pro re natâ, repetatur: post hanc enim, si statu est morbus sanabili, statim levamen oriri solet. 2. tum purgans antiphlogisticum detur magnâ copiâ, & aliquoties repetatur, ut ferre assidua diarrhœa excitetur; si autem purgantia non satis citô operantur, clysmate satis acriter determinentur. 3. toto dein decursu morbi medicamenta refrigerantia, diluentia, attenuantia, ad urinas ducentia, exhibeantur. 4. assiduô simul revellentia fortia addantur, donec malum superatum sit. 5. victu, potuque utatur tenuissimis. 6. caveatur summoperê ab omni medicamento valido stimulante, movente, calcfaciente; à calore externo; à decubitu in lecto, maximè declivi & supino.

1031. At si illa ipsa (1030.) jam facta est, vix ulla spes supererit; eaque sola in exercitatione eorundem (1030.).

1032. Quæ verò ab extravasatis liquidis inter cranium & membranas, inter membranas ipsas, à vulnere, contuso, fracto, suppuratove oritur, jam tractata est in vulneribus capitis (267. 268. 273. ad 297.), unde petenda.

1033. Quæ ab effusis jam liquidis in interioribus cerebri cavitatibus orta jam est (1010. N^o. 4.), per sua signa ibi data, cognita, vix requirit medelam, quum plerumque mors certa citò adsit: si quid tentandum, id omne sperandum
1. à resorptu effusi in venas iterum (279. 280.). 2. à correctione acrimoniæ prædominantis, & glutinis simul, quæ nullâ re felicius, quam per saponacea Chemica absolvitur.

1034. Quæ à prædominio lymphæ extravasatæ orta est, facilius tollitur, omiffa, utpote hîc fere nocente, missione sanguinis; datis hydragogis fortissimis statim ad alvum determinatis; tum dissipantibus applicatis; maximè vesicatoriis largissimis, diu apertis; victu exsiccante; fortibus epispasticis, fonticulis, setaceisque.

1035. Si verô à venenis jam producta fuerit, nulla hæctenus medela descripta habetur; ut nec illi, quæ à polypo.

C A T A L E P S I S.

1036. **C**atoche, Catochus, Catalepsis, dicitur morbus, quo laborans repente, immotus, nec sentiens, illum corporis statum retinet, quem primo momento accedentis morbi habebat.

1037. Hujus ergô proxima causa immobilitas sensorii communis, prout primo momento insultus se habebat.

1038. Ergô sanguinis cerebrosi, glandularum cerebri, emissariorum ejus absoluta quies, ut in initio.

1039. Omnes quidem in eo morbo functiones cerebri læduntur, & illæ, quæ inde pendent; soli muscoli sic manent tensi ut in initio erant; cœterum respiratio & pulsus supersunt, at plerumque leves.

1040. Febris intermittens diu perdurans, maximè quartana; melancholica, ficca, strigosa temperies; menstrua, & hæmorrhœoides retenta; terrores summi, subitique; profunda, protracta diu in unum objectum meditatio; febres validæ in ho-

mine

mine sanguinolento accensæ ; morbum hunc plerumque antecedunt.

1041. Dissecta cadavera demonstraverunt arterias venasque cerebri valdè turgentes fortiter impacto denso cruore.

1042. Sanatur sæpe excitatâ largâ narium hæmorrhagiâ.

1043. In alios morbos rarô transit ; aliquando tamen Epilepsia , Convulsio , Dementia , ἀρεσφία , cum exceperunt ; in mortem plerumque finitur.

1044. Curatio tentatur pro varietate causæ varia. Excitando per objecta validè in organa sensuum agentia , ut sunt lux , sônus , stimulus , sal volatilis acer , dolor , frictio , motus continuatus ; hæmorrhagiæ ex naribus prolectu ; hæmorrhoidalis , menstruivæ fluxus prolectu ; sternutatoriis ; vomitivis ; vesicatoriis ; fonticulis ; setaceis ; victu humectante.

C A R U S.

1045. **C**arus est apoplexia levis , somnus verô gravissimus , cum febre , ex causis maximè cerebrum illæsum comprimantibus (1010. No. 3. l. α. β. γ. δ.) , aut causis obstruentibus , sed facilius , quam in apoplexiâ , solvendis
(1010.

(1010. No. 2. l. β. γ.): est in hoc aliqua perceptio, sed subitanea; aliquis sensus, sed parvus.

1046. Hinc à caro soluto sanitas, nisi quod forte titubatio vacillans capitis aliquamdiu superfit.

1047. Curatio petenda ex curatione apoplexiæ traditâ (1020. ad 1036.).

1048. Coma vigil, Coma somnolentum, Cataphora, videntur tantum esse Cari leviores species (703. ad 710.).

1049. Lethargus autem levior est apoplexiæ species ex causâ frigidâ, lentâ, aquosâ: unde ex historiâ apoplexiæ ejus cognitio & curatio petenda (1008. ad 1036.).

DE MORBIS CHRONICIS.

1050. **H**actenus de morbis principibus acutis internis, & externis: nunc de Chronicis agendum. Illi verò, si in corpore nati, ortum duxerunt vel ex vitiis liquidorum sensim natis, vel ex vitiis relictis à morbis acutis non bene sanatis.

1051. Vitia liquidis sensim nata oriuntur 1. ex ingestis aëre, cibo, potu, condimento, medicamento, veneno, tam alienis

lienens, ut nostris humoribus similia non sint, tam validis, ut vi nostrorum viscerum & humorum nostris assimilari non possint. Eaque sunt *α. acor* (60. ad 69.). *β. austerum*, ex acore & terrestri plurimo unitis, ut à fructibus immaturis, vel adstringentibus succis, vinis, & similibus; quæ liquores coagulant, vasa constringunt, hinc obstructions duras pariunt (31. 36. 40. 50. 51. 113. No. 1. 117.). Sanatur diluentibus, alcalicis fixis, saponaceis alcalicis, diu, prudenter usurpatis. *γ. acre pingue aromaticum*, ex cibis, potibus, condimentis, calidis odore, sapore; hæc calorem, attritum, læsionem minimorum vasculorum, dolores calidos, attenuationem liquorum, horum putrefactiones, extravasationes, & similia multa producant: curantur aquosis, farinosis, gelatinosis, acidis. *δ. Pingue iners*, ab nimio usu pinguium ex animalibus terrestribus, piscibus, vegetabilibus oleosis; hinc obstructio (117.), ranciditas biliosa, inflammatio, corrosio, putrefactio pessima (82. 526.). Curatur diluente, saponaceo, acido. *ε. falsedo muriatica*, ex sale, salitisve; vasa destruit, liquida solvit, acria reddit illa, hinc *ἀτρεσφία*, solutiones vasculorum
forum

forum, extravasationes liquorum, non citò putrescentium, sed maculas producentium. Tollitur aquâ, acidis, lixivio calcis vivæ. ζ. *alkali* (76. ad 91.). η. *glutinosum* (69. ad 76.). 2. à viribus nostris nimis in ingesta (50. ad 58. 92. ad 106.). 3. à spontaneis nostrorum humorum vitiosis permutationibus (58. ad 91.)

1052. Ex morbis acutis male sanatis oriuntur vitia in humoribus quocunque corporis loco: α. purulenta (158. N°. 5. 6. 7. 402.), quæ producunt multa mala (936. N°. 4. 941.): sanantur (942.). β. Ichorosa (158. N°. 4. 206.), quorum effectus rodere, consumere. Sanantur blandis, demulcentibus, inspissantibus: γ. putrefacta, quæ recensita (1051. N°. 1. l. γ. ζ. N°. 2. N°. 3.).

1053. Morbi acuti male sanati in partibus solidis, compositisve, relinquunt Abscessus (387. 402.), Fistulas (413.), Empyemata (894.), Scirrhus (392. 484. 485. 486.), Cancros (492. 494.), Caries (526.).

1054. Ex his in morbis (1051. 1052. 1053.) simplicibus, aut omni modo compositis inter se infinite sanê alii, ut effectus, sequi possunt; adeoque ex eorum dato intellectu hætenus optimê perspicui, & curari.

1055. Quum verô inde pendeant, ut patebit, omnes Chronici; horum ergô generalis doctrina, divisioque hinc haurienda.

1056. Unde etiam statim apparet, hos varietate quidem infinitos ratione symptomatum, tamen ex origine non adeô compositâ pendere, neque tam varia medicamenta, medendive methodum requirere; tum simul perspicitur diuturnitatis in plerisque, incurabilitatis verô in multis ratio; id ipsum pertractando jam patebit.

P A R A L Y S I S.

1057. **P**aralyfis vocatur musculi laxa immobilitas, nullo nixu voluntatis, vel vitæ, superanda; sensus aliquandô simul absolutê perit; aliquando levis cum stupore, sensuque quasi punctorio levi, superest.

1058. Causa hujus proxima semper impeditus fluor liquidi nervosi à cerebro in musculum paralyticum, vel liquidi arteriosi in eundem.

1059. Ergô oriri potest 1. ab omni causâ apoplexiam generante (1010.). 2. ab omni eâ, quæ nervum transmittendo spiritui ineptum reddit. 3. Quæ intrôitum arte-

arteriosi cruoris in musculum impedit. Inde paraplegiæ, hemiplegiæ, paralyfios partis singularis, natura intelligitur.

1060. Itaque apoplexia ; levior parapoplexia (1009. 1010. 1015.) ; epilepsia ; convulsio ; dolor ingens & diuturnus ; omnes solitæ evacuationes retentæ cum subsequente vertigine , ut hæmorrhoidum , menstruorum , abscessuum , fistularum , alvi , vesicæ , salivæ ; metaptofes cujuscunque materiæ morbosæ in acutis , vel chronicis ; quidquid obstruendo , solvendo , comprimendo , ligando , distorquendo , distrahendo , constringendo , nervos lædit ; adeoque crassi humores , vulnera , erosiones , abscessus , gangrænæ , tumores inflammatorii in integumentis nervosæ medullæ , in gangliis , in nervis ipsis , serosi , purulenti , ichorosi , scirrhosi , & similes , fortes arctæque ligaturæ , fracturæ , luxationes , adstringentia valde alimenta , medicamenta , venena ; inde frigus summum , calor maximus , humiditas frigida , usus aquæ calidæ nimius , assiduus , vapor arsenici , antimonii , calcis recentis , mercurii , & aliorum venenorum , Paralyfin creare possunt.

1061. Causa proxima (1058.) , & remota (1059. 1060.) , adeoque his nata

M

para-

paralyſis ipſa, varios admodum producit effectus, pro varietate ſedis, ubi illa cauſa hæret; pro varietate magnitudinis, quâ ibi hæret; pro diverſitate partis affectæ, prout vitæ neceſſaria magis minusve, magis mediatè, vel immediate; inde enim lethalis, minus lethalis, ſanabilis, incurabilisve haberi poteſt.

1062. Paralyſis Cordis, pulmonum, muſculorum reſpirationi inſervientium, gulæque, brevi lethalis: ſtomachi, inteſtinorum, & veſicæ, à cauſis internis, valde periculofa: muſculorum faciei mala, & facilè in apoplexiam mutabilis. Paraplegia valdè periculofa, apoplexiæ prænuncia, hâc natâ lethalis: hemiplegia mala, paraplegiæ affinis, hinc apoplexiâ necans; quæ cum frigore, inſenſilitate, atrophîâ partis, mala, rarôque medicabilis: quæ cum ſævâ convulſione, & magno calore partis oppoſitæ, mala; ex horum verô oppoſitis ſcitur, quænam ſanabilis, minusque metuenda ſit: quænam verô toties cauſa repentinæ, nec ullo præſagio præviſæ, mortis, ſine ullo fere ſymptomate concomitante.

1063. Quæ omnia (1057. ad 1063.) ſi quis ſingulis muſculis, cujuſcunque demum functionis auctoriſ, applicat, infi-

infinitorum certê, & maximê mirabilium morborum causas intelliget, diagnofin, prognofinque fciet.

1064. Sanavit Natura hunc morbum attenuando & diffipando materiem morbofam, malâ crifi ad cerebri exteriora, ejus ventriculos, circâ medullam oblongatam, fpinalem, exitum nervorum à medullâ, nervos, depositam; folvendo impacta per magnam febrim fupervenientem; movendo per tremorem convulfivum partis; educendo per diarrhœam largam & diurnam.

1065. Curatio requirit ablationem caufæ (1059. 1060.), nervorum functionem & arteriarum impediens, dein liberi fluxus reftitutionem.

1066. Causa impediens aufertur variis modis, caufæ, prius perspectæ, facilê applicandis.

1067. Si illa causa intus hærens, craffa, ftagnansque eft, utendum iis remediis, quæ producere poffint illa, quibus Natura (1064.) hunc morbum sæpe fanavit.

1068. Ergô curatio tentatur 1. attenuantibus, diffipantibusque α. Aromaticis, cephalicis, nervinis, uterinis dictis vegetabilibus, specie fucci exprefsi, in-

fusi, decocti, extracti, spiritus, conditi. β . Salibus fixis ustione, volatilibus destillatione, aut putrefactione hinc electis. γ . Oleis expressione, coctione, infusione, destillatione hinc productis. δ . Saponaceis ex horum combinatione per artem productis. ϵ . Virofis animalium partibus, insectorum succis, spiritibus, oleis, salibus, tincturis. ζ . Salibus fossilibus, crystallis metallicis, & iis, quæ ex his maximè composita. η . His omnibus, ut se mutuò juvent, cum prudentiâ, permittis: atque horum quidem usu attenuatio, dissipatio, calor febrilis, obtinetur.

2. Validis stimulantibus, & impacta quæcunque fortiter, motu nervoso tremente & convulsivo excitato, excutientibus: eò inprimis sternutatoria, & vomitoria fortia pertinent, si aliquoties inprimis repetuntur.

3. Purgantibus per alvum calidis, solventibus, aromaticis, vegetabilibus, vel & fossilibus acribus, metallicisque mercurialibus, antimoniatis, adcoque fortibus hydragogis, largâ dosi, pluribus diebus successivè repetitâ, datis; quorum ope copiosa, & aliquamdiu perdurans diarrhœa, excitetur.

4. implendo primò vasa corporis largo potu attenuantium præmissorum, dein excitatione

majo-

majoris motus, & sudoris, ope vaporis spirituum accensorum.

1069. Frictiones externæ siccæ, calidæ ad ruborem usque, vel cum spiritibus penetranti & stimulante virtute præditis ex animalibus, vegetabilibusque, aut cum oleis, linimentis, balsamis, unguentis, nervinis, profunt. Balnea vaporum, immersiva; Emplastra acria, aromatica, attrahentia dicta; Cucurbitæ; scarificationes; vesicatoria; fustigationes; dolorem & levem inflammationem excitantia, ut urticæ, & similia, juvant.

1070. Maximè autem curandum, ut ad sedem causæ detectam omnia remedia (1068. 1069.), si possibile, applicentur: pars læsa, plures simul eodem vitio læsa, scientia muscutorum, nervorum, horum unio, origo, dispersus, & cognitio functionum ab unoquoque horum pendentium, si comparantur inter se, clarè docent sedem latentem mali.

E P I L E P S I A.

1071. **P**riori malo adversus valde morbus Epilepsia est, quæ adesse dicitur, quoties homo subito prosternitur, amissis sensibus externis, internis-

M 3 que

que, cum concussu violento, involuntario musculorum omnium, vel aliquorum, reciproco, alternâ cum requie, & novo paroxysmo.

1072. Morbus hic mirâ facie variatus sæpe tam mirabilis apparet, ut diis, dæmonibus, iræ divinæ, incantamentis, & similibus causis, naturalibus majoribus, adscriptus sæpe fuerit.

1073. Nulla quippe gesticulatio, inflexio, posituraque noscitur, quam non aliquando exhibuerit; omnes quoque nonnunquam æmulatur motus, cursus, ambulationis, gyrationis, prostrationis, decubitus, erecti, rigidique corporis species.

1074. Omnes tamen hæ varietates tantum versantur in mutatis motibus aliquarum partium mobilium, adeoque musculosarum; ergo tantum ponunt varias musculorum contractiones; hinc varios liquidi nervosi influxus; inde variam hujus à sensorio communi expressionem in nervos; tandem itaque varias causas in cerebri medullâ has expressiones producentes: quæ optimè noscuntur enarratione harum historicâ.

1075. Illæ autem sunt 1. hæreditariæ ex labe gentili Patris, Matris, parentumve, aut majorum, silente sæpe morbo.

bo in genitore, dum exavo derivatur in nepotem. 2. Congenitæ, ex imaginatione Matris gravidæ excitatâ per conspectum Epilepticum. 3. Cerebrum in integumentis suis, superficie, substantiâ, ventriculis male affectum, per vulnera, contusiones, abscessus, pus, sanicem, ichorem, sanguinem, lympham acrem, foetidam, excrescentias osseas cranii interni, intropressiones ejus, cartilagineam sinuum venosorum naturam, fragmenta, spinasve ossium, vel instrumentorum lædentium meningas, cerebrumve, argentum vivum ad cerebrum quâcunque viâ delatum. Idem cerebrum affectum male per inflammationem, corruptionem, erosionem meningum, à carie ossis, bile atrâ, gummatibus venereis. Has autem causas juvant omnia, quæ liquidorum in cranium affluxum augent, ut sunt, plethora, motus, calor, ebrietas, epulæ, venus, ingenium perspicax, altum, meditatio profunda, affectus animi ingentes, imaginatrix vis ingens, terror, metusque inprimis. 4. omnes violentæ affectiones generis nervosi, ut sunt magni & periodici dolores, passio hysterica, rosiones & irritationes à lumbricis, dentitione, acri humore, lacte caseoso, acri, acido infan-

M 4. tum;

tum, meconio, contagio variolarum, cardiogmo, ulcerosa materie alicubi hospitante, inedia, crapula, acria potulenta, esculenta, medicamenta, venena.

5. ab interceptis nonnullis, quæ olim excerni solebant, sanie, pure, menstruis, lochiis, hæmorrhoidibus, urinâ. 6. fumis nonnullis paroxysmum integrantibus, fomite alicubi hærente, unde sensu elevatæ auræ adscendens cerebrum petit.

1076. Quæ omnia (1075.) historia observatorum, & incisio cadaverum, docuit.

1077. Effectus hujus morbi reduci possunt: 1. ad mala corrupti tot violentis & repetitis convulsionibus cerebri, unde vacillatio memoriæ, hebetudo, stultitia, paralyxis, apoplexia, mors. 2. ad mala nervorum & musculorum, unde horum, & artuum, contractiones, distortionibus, deformitates. 3. à violento spasmo inflammatio, gangræna, nigredo partium sanguinolentarum, maximè quæ supra musculos sitæ sunt. 4. ad secretiones quasdam in impetu paroxysmi vi factas; cibi, potus, lymphæ, bilis, spumæ, muci, salivæ, sursum rejecta; fœcum alvi viridium, seminis, urinæ per inferiora egestio; sanguis utrâque viâ secretus huc spectant.

1078. Inde intelligitur, quæ hereditaria? cur ea nunquam sanabilis? quæ idiopathica? cur rarô curabilis? quæ sympathica? cur sæpe curabilis?

1079. Atque etiam liquet, diversissima remedia, diversissimam curandi methodum, ad hunc morbum requiri, pro notâ varietate causæ, materiæ peccantis, loci, ad quem applicatio remedii, per quemeductio mali, fieri debet.

1080. Causa enim prima & secunda, in malâ conformatione solidorum consistens (1075. N. 1. 2.), vix ullam suscipit radicalem medelam; paroxysmorum autem renovantes causas, utpote renatas assiduè, tollere tutô potest: unde hæ, quæ infinitæ, nec nisi observando cognoscendæ, indagari debent sedulô, dein prô suâ naturâ curari.

1081. Tertia (1075. N. 3.) cognoscitur ex symptomatibus aliis læsum simul cerebrum designantibus, ut est dolor, gravitas, plenitudo, læsio capitis, antecedens, vertigo, tremor universalis, scintillæ oculorum, eorundem immobilitas, circumgyratio totius capitis, vel & corporis. Hujus causa solida vix tolli potest, quia vix cognoscitur singularis: revellentia, discutientia, viam parantia, de-

purantia, juvant: hinc venæ sectio, purgatio, vomitus, inustio, fonticulus, fistula, epispasticum, vulnus capitis, cranii perterebratio, antihysterica, opiata, profunt: ex quibus quid eligi debeat, docebit inventa mali causâ proxima (1079.).

1082. Quæ à causâ quartâ (1075. No. 4.) fit, ea tractanda erit variè pro varietate suæ causæ proximæ: hinc anodyna, paregorica, narcotica; antihysterica; anthelmintica; demulcentia & corrigentia acrium; incisio apta gingivarum; ablatio, correctio, materiæ ulcerosæ, tunc fiunt antepileptica.

1083. A quintâ causâ (1075. No. 5.) ortæ epilepsiæ medela fit solvendo materiem immobilem, laxando vias, expellendo: hinc vesicatoria, caustica, fonticulos, & fistulas producentia; aristolochica; emmenagoga; hæmorrhoidas aperientia; diuretica toties contra hunc morbum profunt.

1084. Quæ autem à causâ sextâ (1075. No. 6.) oritur, tolli poterit, sanatâ debilitate generis nervosi nimis facilè movendi, quod exercitio motus, lusus, equitationis, vectionis; assumtu aromatum; usu chalybis, & corroborantium optimè fit: tum etiam loci fomitis exulceratione artifi-

tificiosa, profundâ, diuturnâ, inductâ cæsim, causticis, vesicatoriis; dein autem apertis retentis diu per suppurantia corrosivis mista: tandem ligaturis nervum comprimentibus affectum.

1085. Ex his vanitas apparet omnium specificorum, & methodorum, quæ inaniter jactantia contrâ hoc malum laudat.

1086. Et patet quidem, causam proximam omnis Epilepsiæ exquisitæ semper esse nimiam cerebri in nervos motorios, nullam in sentientes, actionem.

1087. Atque causas, quæ reciprocis paroxysmos creant, numero & varietate plurimas esse.

1088. Tandem verò spasmi singularis, opisthotoni, emprosthotoni, tetani universalis, origo, natura, effectus, sanatio, sponte patent; quum sint modo species Epileptici insultus singularis.

MELANCHOLIA.

1089. **M**elancholia vocatur Medicis ille morbus, in quo æger delirat diu, & pertinaciter, sine febre, eadem fere & uni cogitationi semper affixus.

1090. Hic morbus oritur ex illâ san-

guinis & humorum malignitate, quam bilem atram dixerunt Veteres; & rursum idem morbus à mente initium ducens, brevi in corpore bene sano ipsam bilem atram facit.

1091. Ideò opus hic erit paucis ideam pingere mirifici hujus mali, & de quò tam obscura doctrina habetur, ut injusti criminis rea agatur Antiquitas.

1092. Si in toto sanguine mobiliora dissipata reliquerint immobiliora unita, tum ille erit crassius, ater, pinguis, terrestris. Ei verò vitio nomen dabitur *humoris atrabiliarii*, vel *succi melancholici*.

1093. Cujus (1092.) causa, omne id quod mobiliora expellit, reliqua figit: vehemens mentis exercitatio, noctes atque dies in unum fere objectum occupata, pervigilium; animi motus magni, sive hilaritatis, sive mæstitiæ; magni & operosi motus corporis multum repetiti, imprimis in aëre valde sicco & calido admodum; co & immodica venus; cibi austeri, duri, sicci, terrestres, cum quiete & torpore corporis diu assumpti; potus similes; huc fumo, aëre, sale indurata animalium partes, maxime durorum & annosorum, fructus immaturi, farinacea non fermentata, medicamenta adstrin-

gen-

gentia, coagulantia, figentia, refrigerantia, venena lenta, similia; febres calidæ diu hærentes, sæpe repetentes, sine bonâ crisi, & sine diluentibus, abeuntes.

1094. Ubi jam in cruore id malum (1092.) per suas causas (1093.) natum adhuc omnem circumeuntem humorem æquabiliter inficit, producet aliquos morbos statim conspicuos, qui fere sequentes: color externus, internusque, primò pallidior, flavior, magis fuscus, livescens, niger, cum maculis similibus; pulsus lentior; frigus majus; respiratio lenta; circulatio per sanguinea vasa bona, per lateralia parcior, minus bona; hinc humorum secretoriorum & excretoriorum omnium minor, tardior, crassior, exitus; minor consumptio; parcior appetitus; macies; mœstitia; solitudinis amor; affectus animi quicunque pertinaces, magni; in reliquis *ἀδιαφορία*; torpor ad motus; summa tamen simul studii cujusque & laborum constantia.

1095. Habet ergo prò materie terram & oleum spissum sanguinis, unita, compactaque simul: quæ prout liquidiore, blandiore, diluente parte magis privata, quoque ipsa magis condensata, tenacius mista, &

diutius nata, eô effectis pejor, eô curatu difficilior est.

1096. Inde diagnosis, & prognosis (quæ clarior ex sequentibus) patent, quin & sanationis ratio hinc constat.

1097. Statim enim ac initiis primis (1093. 1094.), causâ, effectuve, se prodit, animo assidua objectorum variatio concilianda, & quidem ipso ignaro; eligenda autem, quæ affectui prædominanti oppositum in ægro creare solent; diluentibus, demulcentibus, paregoricis, narcoticis, quiete, conciliandus somnus est; aëre utendum humido tepescente; cibi dandi leves, liquidi, sanis humoribus similes, recentes, blandi, vi leni saponaceâ laxantes, atque in horum usu diu persistendum; medicamenta danda diluentia, acre demulcentia, oleosum terrestre resolventia, vasa laxantia, leni stimulo expellentia, ut succi bene maturorum fructuum horæorum, mellita, olea, juscula ex his confecta; aquæ minerales; potus optimus prisana mellita leviter; abstinentiâ sedulâ à causis mali (1093.).

1098. Si autem illa ipsâ materies (1092.) per easdem causas (1093.) magis densa, tenax, immobilis reddita est; necessariô

in vasa hypochondriaca depelletur : id enim natura hujus humoris, situs & conditio horum vasorum, & leges hydraulicæ docent. Inde sensim hic hærebit, accumulabitur, stagnabit: tum vocatur *Morbus Hypochondriacus*, lienem, ventriculum, pancreas, omentum, mesenterium obsidens.

1099. Hinc ibi producit sensum afflicti ponderis, anxietatis, repletionis, maximè ab assumptis, cibo, potuque; respirationem ob gravata viscera abdominalia difficilem; bilis utriusque, pancreatici, stomachici, intestinorum, mesenterii succi in confectione, secretionem, permissionem, efficaciam in cibis, impedimenta; inde digestionem primam omni modo læsam; esculentorum corruptionem in crudum acidum, si ex vegetabilibus, in putridum alcali, rancidumve oleosum, si ex animalibus; hinc ructus, flatus, spasmos, adstrictam alvum, fœces induratas; icterum pejorem gradu, quam prior (1094.); omnia mala (1094.) jam pejora.

1100. Ubi jam eousque adolevit (1098.), & per effecta sua (1099.) se manifestavit, summâ ope nitendum in curationem, quia aliter tetra mox oritur:
mali

mali indoles; difficultas autem maxime vitanda hæc est: si malum perseverat, fit incurabile, & sæpe lethale, ut in sequentibus liquebit: si evacuantibus pugnatur, sani, & facile mobiles humores expelluntur, tenaces malique hærent, unde peior morbus: si per stimulantia & solventia valida tentatur, sæpe subito soluta materies acris fit, & impetu magno ruens in tenera vasa hepatica, ea destruit, unde multa, & immedicabilia mala.

1101. Hinc 1^o. lente mobilis reddenda materies est, indagando naturam prædominantis acrimoniæ; tum dando medicamenta saponacea, in quibus prædominetur acrimonia opposita illi, quæ in illo humore adest; in his pergendum, donec pulsus inæqualis, debilisque, nausea, tenesmusve, anxietas, febricula, signa dent motæ materiæ; tum 2^o. statim leni laxante purgatione, clysmate simili, fero lactis, aquâ minerali, similibusque expellenda est.

1102. Verum si eadem illa materies (1098.) jam fixata, compactaque, ibi diu hæsit, ipsa acris fieri incipit, & rodens, per stagnationem, motum viscerum, calorem ambientium; nova assiduô aggeritur, quia jam obstructio facta est, &

cau-

causæ eædem perdurant ; hinc mole aggestâ , acrimoniâ natâ , motu assiduo , vasa extendit , rodit , corrumpit ; inde lienis , stomachi , pancreatis , omenti , mesenterii , intestinorum , hepatis , similibus destructio ; adeoquæ omnia mala (1099.) priora multum auget , maximè vero assiduo putrefacti vapore venis recepto omnes functiones , imprimis cerebri , perturbat. Tumque vocatur vero nomine *Bilis Atra.*

1103. Quæ deprehensa per hæc ejus signa data (1093. 1094. 1099. 1102.) , non nisi prudentissimâ arte eliquari , moveri , educi potest , ob difficultates (1000.) hîc adhuc majores , & facilè excitandam , dein verò vix moderandam , morbi acerrimam materiem : hinc fit omnis victus oppositus acrimoniæ in humore prædominanti cognitæ ex (1051.) , fit ille idem semper leniter solvens , stimulans , laxans alvum , paucas fœces à digestionem relinquens ; potus vel ex ptisanâ mulsa , vel ex succis horæis , vel ex ferò lactis fit , motus corporis sit levis , continuusque ; calor admodum temperatus ; somnus multus ; balnea , fomenta , clysmata , potus in crebro usu sint ex his , quæ sine acrimoniâ , diluendo , solven-

do,

do, abstergendo, macerando, materiem eliquent, & dein quam lentissimè & prudentissimè excernant, viâ à naturâ præmonstratâ, habitâ semper ratione acrimoniæ singularis, quæ simul adest.

1104. Id autem malum (1102.) ad magnam jam acrimoniam provectum, cum visceribus jam valde corruptis, si durantibus iisdem causis (1102.), dein motu muscolari; calore solis, ignisve; victu acri, copiosoque; medicamenti acribus validè moventibus, cum acrimoniâ mali effervescentibus; venenis simili actione lædentibus; vel tandem morbis nonnullis validis movetur, tum acrior, mobilis, & jam agens reddita, vasa sua rumpit, corrumpit, putrefaciendo resolvit, cum atrâ bile ipsâ in vomicas putrefactas mutat; jam est *bilis atra turgens*: hæc jam hucusque provecta, si liquefacta in suis vasis, mota versus hepar, in exesos venæ cavæ ramulos serpens, cordi inferitur damnosa illa mala producit: si enim de acido coagulante participat polypos cordis, pulmonis, aortæ, carotidum, horum mala, mortem creat. Si in cerebrum perrexerit, apoplexiam, paralyfin, catalepsin, epilepsiam, deliria, maniam, pessimi generis, & fere immedicabiles, pro-

producit. In genere arterioso omnia mutat, febres immanes, brevi omnia putrefacientes, profert: si de alcali putrefaciente participat, gangrænas subitò lethales, ubicunque impigerit, ibi nasci facit. Unde infiniti morbi in toto corpore, & quâlibet ejus parte, non curabiles, nisi hoc fomite extincto: si autem ruptis viscerum vasculis elapsa materies cava peritonæi occupat, debilitas mox exoritur ingens & insuperabilis; putrefactio acris elapsi, ejusque accumulatio; tum erosio gangrænosa omnium abdominalium viscerum, unde mirabilia phænomena; Tympanitis; mors cum foetore immani: si autem mota ruerit in jecur, indeque per exesa & dilatata vascula biliosa in vesicam fellis, ductum hepaticum, communem, in intestina, facit nauseas, vomitus, dysenterias atrabilarias, cum anxietate, impetu, dolore, rosione, intolerabilibus, unde inflammationes, exulcerationes, putrefactiones intestinorum, stomachi, œsophagi, faucium, oris; inde convulsiones terribiles, tandemque placida fere mors, gangrænam, adeoque indolentiam, sequens omnium.

1105. Materies verò sic reddita (1104.), unâ cum tenacitate summâ & fere piceâ simuli

mul habet acrimoniam acerrimam acidam, quæ metalla rodât, terram fermentet; aut alcalinam salinam, corrosivam quammaximè; aut oleosam putrefactam, omnium teterrimam. Quæ singulæ species, unde oriantur, quomodo cognoscantur, quî curentur, suprà satis demonstratum habetur (58. ad 107. 1051. 1052.).

1106. Atque facilè patet consideranti dicta (1000. 1003. 1004.), & situm, structuram, circulationem viscerum, in quibus hæret hic malignus humor, morbum turgentem curatione majorem: diluentia cum opposito acri ad acre prædominans, & opio, primaria sunt.

1107. Ex quibus (1090. ad 1107.) jam facilis intellectus melancholiæ descriptæ (1089.), malique hypochondriaci; nam liquet à diuturna moestitiâ prægressâ, vasa viscerum abdominalium stricta creare stagnationem, mutationem, accumulationem bilis atræ (1092. 1093. 1095. 1098. 1102. 1104.), sensim incrementem, licet corpus fuerit paulô ante quàm saluberrimum: Iterumque natam ex corporis causis eandem bilem atram producere illud delirium (1089.).

1108. Evidentes ergo causæ Melancholiæ (1089.) observatæ sunt: 1. omnia

nia, quæ liquida cerebri nervosa figunt, exhaustiunt, perturbant; ut summi terrores, iique subitanei, studia acerrima cujuscunque objecti, amor ingens, vigiliæ, solitudo, metus, affectio hysterica.

2. quæ sanguinis confectionem, refectionem, circulationem, secretionem, excretionem variam impediunt, perturbant, maximè in liene, stomacho, omento, pancreate, meseræo, intestinis, hepate, utero, hæmorrhoidalibus vasis: adcoque morbus hypochondriacus, acuti male sanati, præprimis phrenitis, caususque; omnes secretiones, & excretiones nimix, cibi potusque frigidi, terrestres, tenaces, acerbi, adstringentes, æstus ingens diu protractus & exassans cruorem, aer stagnans, palustris, umbrosus. 3º. nativa corporis indoles, nigra, hirsuta, sicca, gracilis, mascula, ætas media, ingenium acre, penetrans, altum.

1109. Si morbus hîc (1089.) diu perseverat, producit dementiam, epilepsiam, apoplexiam, maniam, convulsionem, cæcitatem, imaginationes mirificas, risus, ploratus, cantus, suspiria, ructus, flatus, anxietates, urinam copiosam, limpidam instar aquæ, alio tempore valdè crassam, sanguineæ fœcis in vasis

vasis viscerum abdominalium retentionem, accumulationem, subitanæ sæpe excretionem, alvum pertinaciter stipticam, sputationem tenuem, frequentem, vigiliarum, inediæ, frigoris tolerantiam incredibilem.

1110. Attulit sæpe curationem super-veniens scabies foeda, aliquando Elephantiasin æmulans; aut varix numerosa, ingens, enata; tumentium valdè hæmorrhoidum fluxus; atræ bilis per superiora & inferiora rejectio.

1111. Ingens damnum capere solet ab omni medelâ labefactante vires; acriter evacuante; rursusque ab usu eorum, quæ liquida vehementer exagitant, siue cardiacæ fuerint, siue alio quocunque titulo exhibitæ.

1112. Unde optima sanandi hunc morbum methodus est, si causâ primâ bene observatâ, & temperiæ varietate, his opposita medela, variis varia, adhibetur.

1113. 1. Itaque erit indicatio liquidæ cerebri & nervorum excitare, augere, in ordinem redigere; quod fit: α . avertendo mentem ab objecto consueto ad alia priori contraria. β . inducendo cautè ali-um animi affectum, melancholico oppositum. γ . inserviando falsæ imaginationi. δ . aut sæpe magnâ vi ei repugnando.

1114. 2. Obstructiones, vel causam, vel effectum falsæ imaginationis, referendo, emolliendo, incidendo, stimulo, per aquas minerales, serum lactis, mulsam, decocta splagnica, hepatica, anthypochondriaca, aquas salibus lixiviosis vel compositis acutas, Mercurialia laxantia, vomitoria, motus, exercitia, Equitationes, Navigationes, Uterina, Aristolochica, Hæmorrhoidalia evacuantia, balnea, litus, emplastra.

1115. 3. Symptomata leniendo per venæ sectionem, immersionem in aquam frigidam, carminantia, opiata.

1116. 4. Præmissis evacuationibus (1114. 1115.), exhibendo ea, quæ exhilarare docet observatio, & roborare omnes corporis partes.

1117. Ex quibus (1110. ad 1117.) liquet, sanationem hujus mali (1089.) absolutam esse in curatione bilis atræ (1097. 1100. 1101. 1103. 1106.), atque inde peti debere non hanc modo, sed infinitorum, falsò pro incurabilibus habitorum, morborum.

M A N I A.

1118. **S**i Melancholia (1089.) consequens
Sinefcit, ut tanta accedat agita-
tio liquidi cerebrosi, quâ in furorem a-
gantur sævum, Mania vocatur.

1119. Quæ gradu modô differt à Me-
lancholiâ tristi; hujus proles est, ex iis-
dem causis oritur, iisdem fere remediis
curari solet.

1120. In quo morbo est ut plurimum
immensum robur musculorum, pervigi-
lium incredibile, tolerantia inedie & al-
goris mirabilis, imaginationes horrendæ,
Lycanthropiæ, Cynanthropiæ, &c.

1121. Notandum verô, anatomicâ se-
ctione constitisse, horum cerebrum sic-
cum, durum, friabile, in suo cortice fla-
vum; vasa autem turgentia, varicosa,
atro, tenaci cruore distenta fuisse,

1122. Tum etiam in hoc morbo om-
nes excretiones fere cessasse pariter.

1123. Præcipitatio in mare, submer-
sio in eo continuata, quamdiu ferri po-
test, princeps remedium est.

1124. Frustrâ tentatæ per omnia re-
media, varix, hæmorrhöis, dysenteria,
hydrops, hæmorrhagia magna spontanea,
febres;

febres tertianæ, quartanæve accedentes, salutaria fuerunt.

1125. Hujus Maniæ species oritur, postquam autumnali, validâ, diuturnâ, intermittente febre, corpus exhaustum, debilitatumque, tam per morbum, quam per iteratas missiones sanguinis, & evacuationes alvi sæpissimê repetitas; tum etiam per eadem hæc renovari hoc malum solet.

1126. Hæc species solis reficientibus, replentibus, cardiacis, roborantibus, diu continuatis, sanatur. At, si evacuando tentatur, atrophiam, debilitatem, insuperabilem fatuitatem, infert.

1127. Mania verô enata in robustis, vegetis, floridæ ætatis, plethoricis, calidis, sanatur iisdem mediis, ac species Epilepsiæ (1081.); missione sanguinis iteratâ; purgatione forti, inter singulas, interpositâ; dein, impetratâ sedatione, opiat, & cardiacis.

RABIES CANINA.

1128. **E**st & alia ægritudo, quæ ob furorem sæpe comitem, huc commodê referri potest, quum ob summam perniciem tractari debeat.

1129. Vocatur Rabies, & quia à Canum morfu ut plurimum, Rabies Canina, tum à symptomate terribili, aquæ metus, hydrophobia; &c.

1130. Oritur fere semper ab aliis animalibus, prius rabiosis, suscepto contagio, tamen & sponte in acutis, quibusdam orta legitur, & observatur.

1131. Animalia autem fere quæcunque hoc malo affici, suoque contagio alia, & ipsum Hominem lædere possunt.

1132. Nempe Canes, feles, lupi, vulpes, equi, asini, muli, boves, sues, fimiæ, galli gallinacei, homines, prius rabiosi, id vitium in alios propagaverunt.

1133. Nulli tamen animali frequentius, quam cani, lupo, & vulpi; hisque imprimis ex causis internis, absque contagio prævio, nascitur.

1134. Regio fervida; regio magno æstu squalens, & vicissim summo frigore horrens; tempestas æstuosa, siccaque diu durans; victus ex carne putridâ, foetidâ, verminosâ; potus absentia; vermes renibus, intestinis, cerebro, cavis narium olfactoriis, innati, sunt causæ præcedentes, in his animalibus, nascituræ rabiei.

1135. Incipientis rabiei signa sunt hæc
inpri-

inprimis, quibus tetrae luis cautela nititur: fiunt tristes, solitarii, se abscondentes, muti quoad latratum, murmurantes tamen, cibum potumque omnem averfantes, in ignotos quoslibet irati, & irruentes, Heri tamen adhuc & memores & reverentes, aures, caudamque demittentes, somnolentorum instar incedentes: hactenus primus gradus mali iis adest: morsusque tum exceptus periculosus quidem, non verò pessimus est: dein anhelare, linguam exserere, spumam plurimam emittere, hiare, nunc segniter ut semisopiti, nunc subitò celeriter incedere, nec rectâ semper viâ, mox ne Herum quidem amplius agnoscere, oculos habere demissos, lachrymosos, pulverulentos, linguam plumbeo habere colore, subitò gracilescere, insanire, furere: hic secundus est gradus mali, quem vix triginta horis ferunt, quin moriantur. Morsus hoc tempore fere insanabilis: quò verò animal vehementius furit, diutius malo laboravit, morti propius est, eò morsus lethalior, acutior, & symptomata citissimè creans violentissima, & contrâ.

1136. Vix autem ullius veneni tam multiplex contagium, nam morfu vel levissimo, per vestimenta adacto, tantum

radente , nec eliciente sanguinem ; spumæ contactu recentis , vel etiam dudum exsiccatae , labiis , linguâve exceptæ ; osculo tantum rabido cani dato ; infectione à contactu multo instrumenti , vel vulneris , quo dudum ante animal rabiosum occisum fuit ; esu lactis , carnisve animalis rabiosi ; attactu , & pertractatione multâ rerum per præcedentia infectarum .

1137. Rursum vix ullum venenum notum , cujus tam atrox , adeoque hominem immutans , virus , quodque , ubi incipit se prodere , tam violentè & celeriter furit , & tamen simul adeò diu latere possit , antequam se manifestet : namque alii statim , alii post viginti integros annos à morfu elapsos , alii rursus omni intermedio tempore urgeri incipiunt malis huic furori propriis : pendet verò hæc diversitas , à calore tempestatis anni , à vario gradu morbi in animali mordente (1135.) , à temperie hominis morfi , quum biliosi eò facilius vergant , pituitosi , & hydropici contrâ , à diverso victu , medicamentisque adhibitis .

1138. Homo optimè sanus contagio hoc (1136.) infectus , post varium tempus (1137.) , incipit hoc ordine fere ægrotare : dolet locus , cui impressa contagii labes

labes primô fuit ; dein vagi per alia, maximê vicina , loca , dolores ; lassitudo , gravitas , tarditas , in toto muscuroloso genere ; somni inquieti , turbati , terribiles , cum convulsionibus , & subsultibus ; inquietudo assidua ; suspiria ; tristitia ; solitudinis studium ; atque his fere primus mali incurfus incipit , his ferme primus ejus gradus finitur : sanguis tunc venis emissus omni notâ bonus. Tum postea priora augentur , acceditque porrô ingens circâ præcordia angustia ; respiratio difficilis , suspiriosa ; horror ; ad conspectum aquæ , liquorum quorumcunque , & rerum vel pellucidarum , vel instar speculi reflectentium , horripulatio , tremor ; prostratus appetitus ; deglutitio tamen solidæ cujusque offæ possibilis ; attactus humoris cujusque , maximê labiis vel linguâ , incredibilem anxietatem , tremorem , convulsiones immanes , atque furorem fere creans ; vomitus glutinis fusci biliosi , aut bilis porraceæ ; incallescencia ; febris ; vigiliæ assiduæ ; priapismus ; cogitationum alienarum & infuetarum perturbata valde series. Sic procedit malum , atque hîc solet secundi gradus limites ponere. Postea autem omnia enarrata exacerbantur continenter , soletque sequi linguæ asperæ exsertio ;

hiatus oris ; vox rauca ; sitis ingens ; furor ad conatum bibendi , humorum adspectum , contactumve ; spumæ in ore collectio ; eam in alios exspuendi conatus vel invitus ; ardor obvia quæque mordendi invitus , nec tamen à voluntate comprimendus ; spumante rictu frendit ; pulsus & respiratio deficiunt ; sudor gelidus ; rabies summa , dum interim , quod mirabile , mens prudens , constans , aliis à se metuens , adest ; hinc intrâ quartum fere semper à primo gradu diem , mors convulsiva , cum summâ in respirando angustia.

1139. Ex totâ hac historiâ (1129. ad 1139.) constat hujus mali cognitio : prognosis autem elicitur ex consideratione (1135. 1137. 1138.) , simulque cogitando tristissimos ubique eventus , quum , à natâ Medicinâ hucusque , omnes fere Artis Principes deplorent, *demorsorum prophylaxin vix ullam certam haberi , at jam aquam paventium sanatorum exemplum dari certâ fide nullum !* maximê verô dolendum , post secula elapsa , irritum successum hætenus applicatorum deplorantia , non esse tentatas diversas à primis methodos.

1140. Dissectio cadaverum docuit , plerumque organa deglutiendi utcunque inflam-

flammata; gluten biliosum varium in stomacho; vesiculam fellis atrâ bile plenam; pericardium ficcum; pulmones coacervato omni fere cruore incredibiliter plenos; cor sanguine sæpe fere ficcato plenum; arterias plenas; venas vacuas; cruorem valdè liquidum, & vix in aëre concrecentem, dum missus venâ concreverat ante triduum; omnes musculos, viscera, cerebrum, cerebellum, spinalem medullam, ficciora solito.

1141. Curatio omnis hæctenus, paucissima exceperis, incerta, tam prophylactica, quam therapeutica; cujus prima causa, inanis jactantia multorum specificorum, & neglectus methodi ex historia mali excogitatæ.

1142. Quantum ergo ex omni hac historia, comparatione ejus cum aliis morbis, & feliciori paucorum casuum eventu concludere licet, videtur primò consistere in affectione nervorum, proximè referenda ad convulsiones, quæ viscera, horumque vasa occupent; dein hinc vitium nasci sanguini, humoribusque, quod inflammationi gangrænosæ quasi proximum sit; sedem verò mali primum circâ stomachum, & vicina hære.

1143. Curatio in demorso prophylactica

ctica requirit, ut 1. statim à contagio suscepto totus locus affectus, unâ cum vicinis profundis pertundatur scarificationibus, multumque mittat sanguinis; applicentur magnæ cucurbitæ fortiter trahentes; vel ferro inuratur ignito satis profundê; dein adigatur in suppurationem perpetuam applicatu eorum, quæ assiduâ rosione exulcerant; interim toto illo tempore, ab initio in finem, semper foveatur muriâ ex sale marino & aceto, nunquam intermittendo; id continuetur usque ad sextum quidem mensem. 2. vestimenta, & cætera, quæ venenum attingere, vel afflare potuit, cautê abjiciendo, vitando. 3. statim post infectionem, magno cum apparatu, metulin-culso, sæpe minuitando, tandem præcipientem in mare vel fluvium dando, aliquamdiu submersum tenendo, iterum mergendo, id repetendo aliquoties cum iisdem omninô circumstantiis: eas enim sanare spiritum turbando, non aquam sal-sam, docuit funestus exitus hominis post morsum naufragi, multis horis natantis, sæpe diu fluctibus submersi, tamen postea hydrophobi. 4. omni mane jejunos parum sudet assumpto aceto aromatico, sale marino, aquâ calidâ. 5. quotidie pedes,

des, manusque, balneo aquæ foveat, caput lavet, os, faucesque colluat, sæpe natet. 6. victus sit humidus, levis, laxans; cavendo à nimis aromaticis, vino, calefacientibus, ut & à motu nimio corporis, vel animi.

1144. Curatio verò morbi jam præsentis videtur tentanda, maximè in primo gradu, & in initio secundi (1138.), imprimis quum aliter funestissimo exitu neglectus plectatur. Apparet maximè probabile, & paucis experimentis confirmatum, sequentia fieri debere: 1. statim post prima signa invadentis mali (1138.) morbus tractandus, ut summus inflammatorius (890.), mittendo sanguinem ex lato vulnere magni vasis ad animi deliquium usque, mox clysmata ex aquâ nitrosâ, modicève falsâ, cum pauxillo aceti, injicienda: hæc repetenda audacter, etiam plus, quam in aliis morbis prudentia concederet: interim hoc factò, obnubilatis oculis in piscinam frigidam demittendus, vel aquæ frigidæ injectu humectandus: tam diu, donec aquam vix amplius paveat; tum statim plurimum aquæ bibere cogatur; & de die sic vexato vesperi concilietur somnus: victus sit tenuissimus, humectans semper.

1145. Ut verò methodus hæc nititur omni morbi indole, omni artis præcepto; ita videtur nihil exitiale magis, quam accerrimis calefacientibus, exsiccantibus, nervosum genus exacerbantibus medicamentis, hîc venenis, jam exsiccatos suo malo ægros enecare; rursusque nihil crudelius, quam abjectâ curatelâ omni, statim negligere, aut suffocare.

1146. Nec desperandum tamen, ob exempla jam in aliis venenis constantia, de inveniendâ hujus singularis veneni antidoto singulari.

1147. Hactenus verò nullius ea comperta fides, cui credi queat salus miserimè periclitantis hominis, quum nullum sit notum, cujus experimenta certa; sed vel speculationi ortum debent, vel descriptis ex alio confisum fuit: nec Æschrionis apud Galenum & Oribasium arcano de cancris combustis; nec Scribonii Largi famigeratâ opiatâ ad rabiem Siculorum; nec Peregrini consilio de pelle hyænæ; nec Aëtii, Rufi, Posidonii, cinere cancrorum cum Theriacâ; nec jactatâ Palmario medelâ; vel nimis laudato Mayer-no, Grew, & venatoribus, stanno cum mithridatio; nec in insomniis sacris revelatâ radice Cynorrhodonis, aliisve in cœlum

lum elato Lichene cinereo terrestri, pimpinellâ, jecore rabiosi canis exusto, & similibus; exceptis.

S C O R B U T U S.

1148. **S**corbutus septentrionalis maris Saccolis frequentissimus morbus, plurimorum aliorum causa, neque recens, neque Veteribus prætervisus, licet haud adeo accuratè descriptus, defectu longarum navigationum, & peregrinationum in plagas telluris frigidissimas.

1149. Hic, quum variatis admodum symptomatibus sæpe fallat, melius non cognoscetur, quam si, totâ ejus historiâ præmissâ, deinde demum de ejus naturâ constituatur.

1150. Invenitur apud Britannos, Batavos, Suecos, Danos, Norvegos, Germanos septentrionales, seu inferiores; attingit adeoque Boreales populos, & frigidiori sub climate viventes; atque inter hos maximè infestat vicinos mari, locis marinâ aquâ submersis; lacubus, paludibus, glebæ spongiosæ pingui, solo depressio inter aggeres exaltatos, aquam coërcentes, sito; inprimis sævit in otiosos, hyemali tempore in locis lapidibus instra-

tis & extractis frigidos, in nautas falsis, fumo duratis carnibus, pane biscocto, aquâ putridâ, verminosâque utentes mari, terrâve; item quos aves aquaticæ, pisces falsamentarii, ad ventos, fumosve indurati, caro bubula, suillave fumo & sale condita nimis delectat, vel farinacea non fermentata, pisâ, fabæ, cæcus salitus, acer, antiquus; hos qui Melancholiæ, Maniæ, labi hypochondriacæ, hysteriæ, morbis lentis obnoxii vivunt, maximèque qui nimio Cortice Peruviano fuerunt usi.

1151. Dum verò hos aggreditur, his fere phænomenis incedit, augetur, maturatur:

1. Pigritia insolita, torpor, sedendi & decumbendi amor, lassitudo spontanea toto corpore, gravitas ejusdem, musculorum omnium dolor quasi à nimia fatigatione, maximè in cruribus lumbisque, ambulandi inprimisque per acclive vel declive summa difficultas; mane à somno evigilanti sensus omnium artuum & musculorum quasi fatigatorum & contusorum.
2. Difficilis, anhelosa, ad motus vel parvos fere deficiens respiratio; crurum tumor accedens, recedensque, horum.

rum præ gravitate immobilitas ; maculæ rubræ , fuscæ , flavæ , violacæ ; faciei color pallido-fuscus ; Oris fœtor incipiens ; Gingivæ tumentes , dolentes , calidæ , prurientes , ad minimam pressionem evomentes cruorem ; dentium ob retractas gingivas denudatio , & mobilitas ; dolores varii , vagi , per omnes externas , internasque corporis partes mira producentes tormina , Pleuritica , Stomachica , Iliaca , Colica , Nephritica , Cystica , Hepatica , Lienaria &c. ; Hæmorrhagiæ variæ , sed leviores.

3. Gingivarum putredo foetens cadaver , harum inflammatio sanguinem stillans , gangræna ; dentium vacillatio , flavedo , nigredo , caries ; Varicosi annuli ad raninas venas ; Hæmorrhagiæ sæpe lethales , ex ipsâ cute externâ , non apparente vulnere , ex labiis , gingivis , ore , naribus , pulmonibus , stomacho , hepate , liene , pancreate , intestinis , utero , renibus &c ; Ulcera pessima , obstinata , nulli applicato cedentia , facile gangrænosa , ubique , maximè in cruribus , vagantia , cum diuturno fœtore ; Scabies , Crustæ , sicca & lenis Elephantiasis ; sanguis venis eductus ,

in fibrosa parte ater, grumofus, crassus, & tamen solutus, in parte serosâ falsus, acer, muco flavo-viridi in superficie scatens; dolores summi erodentes, lancinantes, citô trajicientes, noctu ingravescentes per omnes artus, juncturas, ossa, viscera; maculæ lividæ.

4. Febres variæ, calidæ, malignæ, intermittentes omnimodo, vagæ, periodicæ, continuæ, ἀγχοφίαν inducentes; vomitus; diarrhœæ; dysentericiæ; stranguriæ sævæ; lipothymiciæ; anxietates sæpe subitô lethales; Hydrops; Tabes; Convulsio; Tremor; Paralysis; Contractura; Maculæ nigrae; Vomitus, & Secessus sanguinis; Hepatis, Lienis, Pancreatis, Meseræi putredo & consumptio; Contagium celere.

1152. Ex quibus liquet, hujus morbi naturam & effectus non difficulter elici ab his, qui prædicta expendunt.

1153. Et causam ejus proximam esse eam sanguinis indolem, quâ & crassitie simul in unâ, & tenuitate acri falsâ, alcalica, vel acidâ in altera parte peccat: quæ inprimis accuratè investiganda & distinguenda sunt.

1154. Et ex his per historiam morbi
(1151.)

(1151.) cognitis, omnia ejus morbi phænomena, utut mira, facilè deduci posse.

1155. Quod ipsum clarius docent regulæ, quas curatio morbi prospero, vel sinistro eventu comprobavit; quarum præcipuæ hæ sunt.

1156. In hoc morbo crassum est reddendum tenue; stagnans mobile; cohærens fluidum.

1157. Item nimis tenue cogendum; acre leniendum, in genere, in specie.

1158. Et in correctione unius (1156.) semper respiciendum ad naturam alterius (1157.), unde summæ artis opus tentare hunc morbum cum successu.

1159. Acria evacuantia semper hunc morbum exasperant, & sæpe reddunt incurabilem.

1160. Hinc α . incipiendum in specie (1151. No. 1.) primâ à leni, attenuante, deobstruente, purgativo, parca dosi sæpe iteratâ. β . pergendum in attenuantibus, & digerentibus dictis. γ . desinendum in specificis lenioribus, diu continuatis, in formâ quâcunque. δ . interim sex res non naturales ita ordinandæ, ut sint contrariæ causis (1150.).

1161. Ad secundum gradum (1151. No. 2.) conferent eadem, quæ in priori,
(1160.

(1160. *a. β. γ. δ.*). Tum usus Scorbuticorum acriorum paulô, formâ succi expressi, conservæ, spiritus, sal. vol. Vini, Cerevisiæve Medicatæ; Balnea itidem externa & pediluvia ex antiscorbuticis; frictiones calidæ, siccæ, cum specificis liquidis; sæpe venæ sectio conducet, ut pars acris liquidi tollatur, erosio in vasa nimis distenta minuatur, revulsio procurretur, via paratur medicamentis applicandis.

1162. Prout verô tenuitas acris, calor ingens, metus Hæmorrhagiæ, majora; vel crassities, inertia, frigus, vasorum pallor, majora; utendum specificis modicè adstringentibus, frigidiusculis, vel calidis, acribusve.

1163. Ad vitia autem oris in hâc specie emendanda oportet uti his, quæ antiphlogistica, antiscorbutica, & simul huic illive scorbuti speciei appropriata sunt.

1164. Ad speciem tertiam (1151. N^o. 3.) valent omnia prædicta, nisi quod utendum sit maximâ copia liquidorum lenium, facile meabilium, Antisepticorum, Antiscorbuticorum, cum leni promotione sudoris, urinae, faecis alvinæ, diu continuatâ.

1165. Ad quartam verò speciem rara medela ; varianda medendi methodus pro varietate symptomatum ; aliquando mercurialia profunt ; ut & præscripta (1164).

Ex quibus omnibus (1148. ad 1166.) rite consideratis , & cum phænomenis morbi , & cadaverum incisorum , collatis , constat , in curatione felici hujus morbi id agendum maximè , ut indagetur indoles vitiosi humoris & singularis acrimoniæ , quæ prædominans peccat : quumque illa acrimonia sit salina muriatica , acida austera , alcalina foetens , rancida oleosa ; atque de his singulis , & universis sæpe actum sit , ordinatio malæ curationis habebitur ; & liquet , cur serum lactis , lac ebutyratum , aquæ medicatæ , toties desperata hujus morbi mala sanaverint ? & quæ ? Cur acidi succi horæ immaturi pomorum arantiorum , citriorum , limoniorum , granatorum , acetosæ , acetosellæ , aceti , vini rhenani , mosellani , toties specifica huic morbo , & quando ? Cur adstringentia austera , ut Rheum , Lapathum , Tamariscus , Capparis , vinum austerum nigrum , rubrumve , ut & chalybs , adeò sæpe bona ? & ubi ? Cur acerrima aromata , Cochlearia , Lepidium , Nasturtia , Arum , Raphani , Piper , Zingiber ,
sem.

sempervivum minus acre, sales alcalini volatiles, fixi, oleosi, aromatici, saponacei, iterum sæpe sola profint? Cur quod uni scorbutico salutare, id exitiale idem alteri fiat? Cur ergo non nomini hujus mali studendum sit, sed ejus tantum singulari, ac si alius foret morbus, genio.

C A C H E X I A.

1166. **C**achexiæ nomine intelligi solet **C**æca dispositio Corporis, quæ nutritionem ejus depravat per totum illius habitum simul.

1167. Adeoque pro causâ agnoscit vel liquidum nutrientis depravatam indolem quamlibet, vel vitium vasorum receptorum, vel defectum facultatis applicantis.

1168. Humoris depravatio oritur 1. ab assumptis, quæ à virtute mutante in nobis non possunt assimilari restituendis: qualia cibi farinacei, leguminosi, crassi, fibrosi, pingues, acres, aquosi, viscosi (69.). Corpora indigerenda, ut cespites, creta, arenæ, calx &c. 2. Ab defectu motus animalis in otio, torpore, somno nimio. 3. à vitiatis organis per debilitatem nimiam (41. 42. 43. 44.), aut nimium robur

(50. 92. &c.) ; liquidisve vitio non facili medicabili (60. 69. 76. 106. 107. 406.): hisce causam præbent multa, ut omnes secretiones nimix, qualescunque demum fuerint, vomitus, diarrhœa quælibet, dysenteria, hæmorrhagia quælibet, visceris singularis vitium scirrhosum &c. rentio quælibet secernendi.

1169. Patet verô, has causas semel positas, vel minuendo solida, vel infarciendo ea liquidis liberê transfluere ineptis, agere; unde duplex notabilis hujus mali effectus, Tabes sc., vel Leucophlegmatia, & Hydrops Anasarca.

1170. Quin & pro vario colore, mole, tenacitate, acrimonia, fluiditate liquidi infarcti varii admodum morbi, ut Cachexiæ effectus, prodire solent: Cutis sc. albedo, pallor, flavedo, lividitas, rubedo, viror, nigredo, fuscus color; gravitas; tumor sub oculis, & partium tenuissimarum; flatus, œdema partium à corde remotarum; Cordis arteriarumque palpitationes, ad minimum motum admodum auctæ; Urinæ crudæ, tenues; sudores spontanei aquosi planê; tandemque marcor, vel Leucophlegmatia & Hydrops.

1171. Vitium vasorum recepturorum bona liquida nutrititia universale fingi vix potest

potest ullum; tamen nimia contractilitas & laxitas, atque inde pendentia vitia pro causis admitti possunt: de quibus actum (24. ad 58.).

1172. Defectu facultatis applicantis nutritio universalis impeditur, si vires circulantes sunt nimis languidæ, vel nimis violentæ (92. ad 107.).

1173. Ex quibus diagnosis morbi facilis: prognosin firmat consideratio causæ, durationis, effectus, gradusque mali.

1174. Quin patet, etiam curationem semper quidem requirere 1. aliquando nimis acris, fluidique mitigationem, inspissationemque modicam. 2. Tenacis, hærentisque, dissolutionem atque fluxilitatem. Sed quum à tam variis causis hæc duo oriri queant, (1168. 1169. 1170.) inprimis necessarium esse pro harum diversitate variare & medicamenta, & modum his utendi.

1175. Maximè curandum, ut victus sit ex his, quæ liquidis sanis similia, facilè transmittenda, causæ singulari morbi adversa, ægroque inprimis grata sunt.

1176. Tum ut optimè digeri queant, condimentis, potu vinoso, exercitio, aëre, procurandum.

1177. Ut verò organa primarum Co-
ctionum

ctionum itidem bene disponantur, leni digestivo, vomitivo, purgante, roborante, prospiciendum.

1178. Et ubi horum usu viæ laxatæ, materies morboſa attenuata erit, tum attenuantibus, diureticis, ſudoriferis inſiſtendum.

1179. Ultimo Chalybeatis utendum, Alcalinis, Saponatis, cum exercitio curſus, vectiſionis, frictiſionis, balnei.

1180. Hæc autem ex variis peti, variè præparari, applicarique debent, pro cauſâ proximâ cognitâ.

1181. Ubi verò à nimia acrimonia conſumtio, & tabes Cachectica, inquirendum in acrimoniæ ſpeciem, ſi fieri queat, 1. per indagatiſionem cauſæ Cachexiæ (1168.). 2. Temperiei morbi, ægriſque. 3. ſymptomatum. 4. Excretorumque.

1182. Hæc cognita corrigenda ſuis contrariis (vid. 1166.).

E M P Y E M A.

1183. **Q**uoties intra pulmones & pleuram pus in Thoracis cavo colligitur Empyema eſt.

1184. Quod ſemper ſupponit vomitam

cam purulentam fuiffè ruptam, cujus elapsum pus Thorace recipitur.

1185. Tales sunt vomicæ 1. Pulmonum ab inflammatione horum (820. 867.), à spūto sanguineo, à materiè ad fluorem ineptâ his impactâ. 2. Pleuræ ab inflammatione hujus, (875.) à vulnere externè inflicto levi, citò externè clauso, internè rupto (298.), à contusione hujus, vel ruptione tectâ in suppuratum abeunte (324.). 3. Diaphragmatis inflammati, suppurati, in superiora rupti (907. 910.). 4. Mediastini similiter affecti (877.). ut & 5. Pericardii ipsius (877.).

1186. Cognoscitur futurum 1. ab inflammatione quinque partium (1185.) nullâ coctione, revulsionē, crisi, medicamento depuratâ, sed cum horrore vago, febriculâ noctu gravi, calore vago, gravitate loco doloris, dyspnœa, appetitu prostrato, siti majori desinente. vid. (833 892. 910.).

1187. Cognoscitur jam præsens 1. à tempore ineptæ inflammationis xx. dierum sine purgatione. 2. à signis vomicæ in quinque partibus (1185.) disparentibus. 3. à novo dolore, tussi, dyspnœâ, salivatione ortis, moxque disparentibus. 4. à tussi siccâ, gravitate ad diaphragma, decubi-

cubitu in unum latus, strepitu puris ad motus, febre lentâ, genis rubentibus, oculis cavis, digitis in extremitate calidis, unguibus recurvis, abdominis tumore.

1188. Effectus hujus mali 1. puris ex ulcere rupto, nec dein sanato, vel repurgato, continua accumulatio. 2. hujus in loco clauso, calido, humido, perpetim agitato, exacerbatio, putredo, foetor, attenuatio. 3. diaphragmatis elevandi impedimentum, pulmonumque extendendorum: unde anhelosa, difficilis, erecta respiratio, metus suffocationis jacenti, decubitus in liberam partem impossibilis, tussis sicca perpetua, anxietas. 4. Pulmonis, Pleuræ, Diaphragmatis, Pericardii, Cordis ipsius maceratio, corrosio, in tabum fluidum consumptio, unde febricula hectica cum pulsu celeri, parvo, rubore genarum, siti perpetuâ, fame sublatâ, debilitate summâ, animi defectibus. 5. hinc omnium liquidorum ineptitudo ad nutritionem, circulationem, secretionem, excretionemque; unde tabes, ἀρεσφία, fibrarum resolutio, liquidorum putredo, adeoque vel per comesum pulmonem rejectio, vel alvi fluor saniosus lethalis, cum sudore nocturno post somnum, pustulis

stulis faciei, aduncis unguibus, flavedine pellucente, facie Hippocraticâ.

1189. Curatio hujus pro varietate causæ statusque mali diversa plane est.

1190. Nam 1. cognitâ vomicâ pulmonis, pleuræ, diaphragmatis, mediastini, & pericardii; quod cognoscitur ex signis propriis, (834. 835. 893. 910.) omni ope nitendum, ut id rumpatur quantocyus, & determinetur ad exteriora: quod fit igne, ferro, medicamentis, motu idoneo.

1191. 2. Ubi constat jam factam disruptionem (302. 836. N^o. 4. 5. 894. 910.), tum statim pus elapsum erit educendum, α . per os, si natura hanc monstraverit viam. β . per urinas, si in eâ apparent puris evacuati signa. γ . per Thoracis aperturam, factam ope instrumenti idonei in latere affecto, inter costam 5 & 6, vel 4 & 5, ab inferioribus numero ducto, pure lentê, & per vices educito, & leni mulsâ aliquando repurgato, ultimô bene consolidato (303.). δ . dando simul decocta Vulneraria, abstergentia, putredini resistentia satis magnâ copiâ.

1192. Si pus album, læve, æquale, foetoris expers, specillum non colorans exit, si æger sine feбри, siti, alvi fluore,
bene

bene appetit, digerit, cætera sanus est, Aëri ingressus in thoracem, quantum possibile prohibetur, spes est, ægrum convaliturum (304. 305.).

1193. Si pus fuscum, ichorosum, fibrillis mistum, fœtidum, specillum instar ignis colorans, subcruentum, uno impetu totum effluens, effluit, summum periculum, & mors, vel phthisis.

1194. Si exesum fuerit mediastinum, aperto Thorace, sæpe subitanea suffocatio.

1195. Si Empyema vetus, vires collapsæ, capilli jam cadant, alvi fluor colliquativus adsit; Corpus contabescat; paracenthesis facta mortem accelerare solet.

PHTHISIS PULMONALIS.

1196. Si ulcus pulmones exederit ita, **S**ut totus inde habitus Corporis consumatur, Phthisis Pulmonaris ægrum afficere dicitur.

1197. Cujus ulceris origo deducitur ab omni causâ, quæ valet sanguinem in pulmonibus ita sistere, ut in materiem purulentam abire cogatur.

1198. Hæ causæ possunt referri 1. ad ipsam Corporis temperiem illam, quâ ver-
O
gunt

gunt in hæmoptœn primô, hinc in ulcus loci erosi. Hæc consistit α . in teneritudine vasorum arteriosorum, & in impetu acrioris utcunque sanguinis: cognoscitur conspectu tenellorum vasculorum, & totius corporis; collo longo; Thorace plano & angusto; scapulis depressis; sanguine valde rutilo, tenui, dissoluto, acri, calido; colore valde candido, & amœno roseo; cute pellucidâ; hilaritate, & subtilitate præcoci ingenii. β . in eâ debilitate viscerum, quâ ingesta suâ indole nimis tenacia obstructions, putrefactiones, acrimonias, suscipiunt, hisque dein malis erosa vasa, post hæmoptœn, exulcerant: cognoscitur levi febri- culâ, tussiculâ ficcâ, calore majori, rubore labiorum, oris, genarum, auctis & insurgentibus, quo tempore novi chyli in cruorem ingressus, facili sudore dormienti, debilitate, anhelitu ad minimum motum magno. γ . in eâ ætate, quâ vasa incrementi apicem adepta, ulteriori productioni suæ resistunt, dum interim cruor augetur copiâ, acrimoniâ, impetu; adeoque intrâ 16 & 36 ætatis annum. δ . in hæreditariâ dispositione: huc refer dicta (24. 26. 29. 38. 39. 40. 41. 44. 45. 48. 60. 61. 64. 69. 72. 82. 84. 86. 100. 106.), illa

illa enim comparata modô dictis (1198. *α. β. γ. δ.*) explicant, definiunt, præfagiunt, naturam, causas, effectus, hæmoptœs: hujus verô conditionis effectum, hæmoptœen accelerant 1. omnes consuetæ excretiones interceptæ, maximê sanguinæ, ut hæmorrhoidalis, uterina menstrua, lochiorumve, hæmorrhagia narium, missio sanguinis consuetæ, imprimis in plethoricis, vel truncatis membra. 2. vis quæcunque magna pulmonibus illata, tussi, clamore, cantu, cursu, nixu corporis ingenti, irâ, vulnere quocunque quâcunque causâ inflicto. 3. victu acri, salino, aromatico; potu simili; vitâ; morbo alio, unde copia, acrimonia, velocitas, rarefactio, calor sanguinis augetur; unde in febribus acutis, peste, variolis, scorbuto, toties contingit.

1199. Hinc (1198.) oritur cum dolore levi, calore modico, angustâ oppressione in Thorace perceptis; exit sanguis plerumque floridus, coccineus, spumans, cum tussi, strepitu pulmonis, fibris, membranulis, vasculis arteriosis, venosis, bronchialibus; pulsu molli, parvo, undoso; anhelitu; sapore falso in ore antegresso.

1200. Curatur 1. Venæ sectione largâ, tertio quoque die, ad quartam usque

vicem, repetitâ, vel donec crusta inflammatoria integre disparuit. 2. Medicamentis refrigerantibus, incrassantibus, stipticis, lenientibus, diu usurpatis, intermistis subinde lenissimis balsamicis. 3. Sex rebus non naturalibus ita directis, ut adversissimæ sint Causis (1198.) enarratis: maximè victu, vitâque, blandissimis semper continuatis; quo lactis diæta imprimis facit. 4. Corrigendo specificam naturam causæ vel morbi singularis.

1201. Ubi semel accidit, sedatumque est (1200.), quibuslibet 6 mensibus per aliquot annos mittendus sanguis, sensim tamen copiam minuendo.

1202. Si verò ob magnitudinem mali (1198.), stiptica malè applicata, neglectamve veram medendi methodum (1200.), post sputum sanguinis oritur dyspnœa, assiduò increscens; horror vagus; calor ruborque genarum; tussicula sicca; febricula hectica; sitis major; debilitas; gravitatis in Thorace sensus; signat, vulnus hæmoptœes jam collectam circa labia sua, & sub crustâ arefacti cruoris, materiem mutare in pus, collectionem abire in vomicam tectam, quâ ruptâ, in ulcus pulmonum apertum.

1203. 2º. Oritur itidem Collectio hæc puris,

puris, præter causas dictas (1198.), à peripneumoniâ quacunque terminata in apostema (832. ad 843. 867.); cognoscitur iisdem signis (832. ad 843. 867.).

1204. 3°. Quin Empyema (1185.) ortum potest rodere, eliquare, consumere pulmonem, ut fiat idem morbus, ac si proprio hic ulcere absumeretur (1188. N°. 4.). Cognosciturque signis ibidem positis.

1205. Unde liquet, quænam signa sint cognoscendi ulceris pulmonalis, etiam tecti; quot diversæ ejus causæ; quam diversæ species, ut & quam diversa phthisis?

1206. Effectus verò Ulceris pulmonalis jam facti, sed tecti, nomine Vomicae, hi fere observandi: puris acrimonia, copia, putredo quotidie auctæ; membranæ hoc coercentis dilatatio, corrosio, maceratio; vasorum sanguiferorum, Bronchialiumque conversio in pus; totius pulmonis, vel alterutrius lobi consumptio purulenta; tussis fere perpetua sicca, vel sputa solo concussu tussiculoso abrasa promens; sanguinis in ulcus affluentis conversio in pus; vomicae propagatio in pulmone; vomicae hujus perruptio in laryngis tubos; puris suffocans aliquando secretio, vel quotidiana cum tussi, ingens, in aquâ subsi-

dens, coacta, dulcis, pinguis, foetida; alba, rubra, flava, livida, cineritia, strigimentosa, igni imposita carnem asiam spirans foetidam; Vomicae perruptio in cavum Thoracis, unde respiratio difficilima, phaenomena Empyematis (1188. No. 4.). Tum respiratio pessima; consumptio omnis sanguinis, chylique in pus; nutritivi praeparatio sublata; solidorum consumptio fere integra; febris hectica cum pulsu parvo, languido, calore ad superiora acri, genis rubentibus, facie Hippocratica; anxietas inexplicabilis circa vesperam plerumque; sitis magna; sudor nocturnus ingens; pustulae rubrae; pedum, manuumque inflatio à parte affecta; debilitas summa; vox rauca; capillorum defluvium; pruritus toto corpore, cum pustulis aquosis; diarrhoea flava, foetida, purulenta, cadaverosa, frequens, tenesmodes, debilitans; sputi suppressio; mors. Unde Regulæ hæ perspicuntur.

1207. 1. Phthisis hæreditaria omnium pessima, nec sananda, nisi cum præcautione hæmoptoës.

2. Phthisis ab hæmoptoe per vim externam, sine vitio interno præexistente, levissima est, cæteris paribus.

3. Phti-

3. Phthisis (2.), in quâ subitô rumpitur vomica, expuitur pus album, coctum, æquale, facile, respondens copiâ ulceri, sine fiti, cum appetitu, digestionē, secretionē, excretionē bonâ, difficulter quidem, tamen sanari potest.
4. Phthisis ab Empyemate insanabilis.
5. Sputa gravia, solida, olentia, dulcia, cum signis ultimis (1706.), desperata.

1208. Postquam Vomica jam facta in pulmone, indicatio oritur medica, eam ilicò maturare, rumpere: quod fit victu lacteo, motu equitationis, vapore tepido, expectorantibus: ubi rupta, tum

1. Sanguinem mupire contra infectionem purulentam oportet.
2. Ulcus quantocius evacuare pure, & labia abstergere, consolidare.
3. Hujusmodi in corpus ingerere, quæ minimam requirunt vim, ut per pulmones fluere, ibique subigi queant, tamen nutrire apta, & puris refectioni inepta.

1209. Primæ indicationi satisfit ope medicaminum leniter & gratē acidorum, falforum, Herbarum vulnerariarum, balsamicorum lenium, omni formâ, magnâ copiâ, diu usurpatorum.

1210. Alteri verò per medicamina liquida, diuretica, tussim moventia, interna, externa, motu, Equitatione, Rusticatione expellendo; tum ope abstergentium balsamicorum internorum, externorumque depurando; atque ope Consolidantium Paregoricorum consolidando.

1211. Ad tertiam indicationem ptisana, juscula, lacticia spectant.

1212. Curatio verò hujus morbi palliativa maximè spectat tussim, anxietates, alvi fluorem.

1213. Quibus occurritur diætâ (1211.), Opiatis cautè adhibitis, liquidis calidis.

PHTHISES ALIÆ.

1214. **U**t ab ulcere Pulmonis, ita Hepatitis, lienis, pancreatis, meseraei, renum, uteri, vesicæ, &c. phthisis produci potest, cujus cognitio, prædictio, effectus, curatio, palliatio facile ex iisdem fontibus petitur ab eo, qui visceris cujusque effectus naturales perspectos habet.

HYDROPS.

1215. Quando serum aquosum extra vasa fusum, & cavitatibus receptum est, vel & stagnans alicubi vasa sua nimium distendit, hydrops vocatur.

1216. Qui ideò obtinere potest ubicunque hujus feri vasa, id est in omni corporis habitu, atque in parte quâlibet singulari.

1217. Hinc Hydrocephalus, colluvie factâ inter integumenta ipsa externa; inter hæc & cranium; inter cranium & cerebri membranas; inter membranas ipsas; harumque duplicaturas; inter has & cerebrum; inter cerebri plicas; in cavitatibus ipsis; sine morte tamen subitâ.

1218. Facile cognoscitur; posterior species incurabilis, reliquæ levi inustione, terebratione, puncturâ, prudenter, lentè adhibitis, simulque hydragogis & roborantibus internis curatur; vel externis discutientibus dissipatur.

1219. In Thoracis hydrope, qui ex variis locis colligere lympham valet, eadem fere signa, quæ Empyematis, sed observatio causæ antecedentis discrimen exhibet; paracenthesis sanat hunc, unâ ad-

O

hibi-

hibitis his, quæ causæ adversantur ejus.

1220. Deprehensus itidem pulmo, accumulâtâ, effusâ, inter sinus magnos receptâ lymphâ, nunc in hydatidas, nunc in vomicas hydropicas incidissè; morbus sane difficilis cognitu, curatuque, nisi alia signa præsentia fortuitam huic hydropis curationem petant.

1221. Quin & arteria aspera anteriori, & conspicuâ parte, quacunque vi lympham stagnantem colligens, Bronchoceles sæpe speciem exhibet; quam cognitu facilem, puncturâ, discutientibus, avertentibus aggredi licet; si observatur, ut Auctores scribunt.

1222. Simili morbo cujuslibet glandulæ folliculus occupari, simili modo sanari potest.

1223. Notabilis itidem hydropis species ovaria mulierum sæpe occupat, qui morbus ut plurimum steriles, annosasque mulieres occupat, difficulter cognoscitur, & vix sine inciso cadavere; curatur verò nunquam, sed transit sæpe in Asciten.

1224. Imò in ipso cavo uterino, clauso accuratè ejus ore interno, sæpe colligitur tanta aquæ copia, ut integrum abdomen mentiatur Asciten; morbus itidem difficulter cognoscendus ob signa fallacia

gra-

graviditatis; curabilis laxatione oris uterini per fomenta, vapores, Uterina adhibita.

1225. Quoties in toto habitu pinguedinis subcutaneæ eadem lymphæ stagnat, vel effunditur, hydrops oritur ἀνὰ σάρκα, ὑπὸ σάρκα, λευκοφλεγματία: qui & circum abdomen, & circa scrotum.

1226. Dum eadem aqua in duplicaturâ peritonæi, in cavo abdominis inter peritonæum & viscera abdominis, aut in dilatatis glandularum cavis, vasisque in abdomine contentis, colligitur, ἀσцитὴς appellatur, ut & τυμπανίτης, si vapore rarefacto turgēt, ab aquâ, pure, ichore, aëre, clausis hic, fotis, putrefactisve.

1227. Hydrops testium dictus, est 1. scroti; pertinet ad (1225.); noscitur sensu tactus; pelluciditate conspicuâ; vestigio remanente impressi digiti. 2. sacci ex producto peritonæo in herniâ verâ orti: fit in Ascite (1226.) valido: noscitur signis Ascitis, Tympanitidisve prægressis; evanescentiâ per pressionem, decubitus supinum declivem, evacuationem aquæ ex abdomine; subito sæpe augmento & decremento mali, sine causâ manifestâ; figurâ tumoris farciminali per inguina ex scroto. 3. involucris vaginalis testis: fit, si

humor ibi secretus non resorbetur suis vasis, sed stagnat, accumulatur, vesicam suam distendit in immensum sæpe; aut si ruptis, obstructis, vasis, itidem colligitur; inflammatio, suppuratio, ichorosa collectio, sæpe hujus speciem mentiuntur. Cognoscitur tumore non elastico, non cedente, duro, lentè producto; absentiâ signorum primi & secundi hydropis testium; figurâ tumoris rotundâ, vel ovali saltem; pelluciditate apparente, si circumtenso scroto, saccus collectionis candelæ lucenti expositus cernitur clarus: an verò, præter hos, inter tunicam nerveam & ipsam testis substantiam, aut in ipsâ hujus substantiâ similis sit tumor, haud ita observatur, à præcedenti specie vix dignoscitur, nec forsitan, nisi extirpando, curatur. Vocantur mala hæc, ὑδροκελæ, hydrocelæ.

1228. Observatum fuit, hos omnes morbos produci ab omni causâ, quæ valet liquidum serosum 1. ita coercere, ut redire nequeat in venas, sed extensis in vasis stagnet. vel 2. ipsa vasa rumpat ita, ut intra membranulas effundatur. aut 3. vasa reducentia à cavitatibus ita obstruat, & liquida in cavitatibus deposita tam parum moveat, ut non exhalent, nec resorbeantur.

1229. Quæ causæ observatæ sunt imprimis, dispositio gentilitia: potus nimis frigidæ subitus, neque vomitu, neque alvo, neque sudore, vel urinâ, calore motuve excitatis, excretus: Morbi acuti, imprimis ardentissimi, sive cum siti potuque inexplebili, sive sine his: Dysenteria lienosa diu permanens: Omnes pertinaces viscerum obstructions, ut scirrhi Hepatis, Lienis, Pancreatis, Mesenterii, Renum, Uteri, Intestinorum: Icterus: Quartana sæva & diuturna: Lienteria: diarrhœa: dysenteria diuturna: Coeliaca: Empyema: phtœ: podagra. Evacuaciones quæcunque nimiae, maximè sanguinis arteriosi: haustus acrium, fermentatorumque liquidorum: victus tenacium, durorum. Hydatides ingentes, plures, in cavo abdominis pendulæ: & plura similia, ut Melancholia, Scorbutus &c.

1230. Effectus adeoque, & morbi progressus hic fere est: tument pedes, maximè vesperi, sensim hic augetur tumor increfcitque: tum tumor abdominis quotidie increfcens: hujus extensi sonus in Tympanitide, si percutitur; strepitus fluctuantis aquæ in moto corpore in Ascite ab aquâ liberâ fluente in cavo abdominis; at in Ascite ab aquis clausis in suis cistis,

fallit: Dyspnœa: Sitis: Gravitas: Torpor:
 Alvus dura: Urina pauca: Febricula lenta:
 Sudor nullus: macies eo major, quo partis
 affectæ major intumescencia: tum fœmo-
 rum, scroti, cutis abdominalis aqua inter-
 cus: hydatides: aquæ, in loco calido,
 clauso, stagnantis, putrefactæ acrimonia:
 Ulcera: Gangrænæ: Hæmorrhagiæ na-
 rium: Exomphali: Viscerum sphacelus:
 Mors.

1231. Hydrops curandus ergo indicat
 1. Liberum conciliare fluorem Lymphæ;
 sive fuerit aqua, serum biliosum, icho-
 rosum, sanguinolentumve. 2. Aquas jam
 in cavitates effusas inde educere. 3. La-
 bem debilitatorum viscerum tollere, sive
 ea causa, sive hydropis fuerit effectus.

1232. Fluor conciliatur Lymphæ,
 tollendo causas hunc impediētes, quæ
 1. vis vitalis minus fortiter circumagens;
 2. vasculorum compressio, disruptio, ob-
 structio. 3. liquidi nimia tenacitas.

1233. Ad primum (1232.) faciunt
 Cardiaca dicta, roborantia, & stimulan-
 tia; quæ, si sitis valida non urget, pe-
 tuntur ex aromaticis, salinis, oleosis, ca-
 lidis, formâ Electuarii, Misturæ, Vini
 Medicati, Cerevisiæ Medicatæ, Pilula-
 rum,

rum, Decoctorum, Syruporum, Tabellarum, facillimè variandâ.

1234. Si ingens vexet sitis, causa fuerit calida, morbus cum febre calidâ, quod sæpe solet fieri, ad primum (1232.) faciunt Cardiaca dicta reficientia, acida grata, & leniter aromatica.

1235. Utroque casu (1233, 1234.) prodest frictio, motus, calor.

1236. Ad secundum scopum (1232.) indaganda causa vasa arctans, obstruens, rumpensve, quæ tollenda, si fieri queat, (1229.), vel emendanda sæpe aquis mineralibus.

1237. Liquidi nimia tenacitas solvetur in calido, frigidove hydrope (1233, 1234.) 1. per ea remedia, quæ ibidem data. 2. per Alcalinos maximè sales, tam volatiles, quam inprimis fixos, 3. ope Mercurialium, Antimoniatorumque, & Vene-reorum medicaminum arte Chemicâ ritè præparatorum, & sagacitate medicâ bene exhibitorum.

1238. Aquæ in cavitates congestæ inde educuntur. 1. paracenthesi. 2. Emissariis paratis novis. 3. Urinæ viâ. 4. vomitu. 5. purgatione alvi. 6. dissipatione.

1239. Si causa hydropis ascitis est recens, extrinsecus citò applicata; si vires
inte-

integræ, corpus juvenile; si viscera bene constituta, neque alio morbo perditæ; si aqua nondum putrida, neque diu in loco stagnaverit, statim instituenda paracenthesis.

1240. Quæ fiat 3 pollicum longitudine intrâ umbilicum, & eâdem distantia à lineâ albâ, mensurâ in corpore sano intellectâ, in latere à fonte Hydropisaverso, puncturâ factâ ope instrumenti idonei, cannulâ immissâ, iterumqueeductâ, aquæ copiâ parvâ, quotidie bis, emissâ, ad minimum impensis 15 diebus in evacuando, interim utendo præscriptis (1233. ad 1238.).

1241. Si conditiones (1240.) absint, vel sint contrariæ, paracenthesis mortem accelerat.

1242. Emissaria ferro candenti, medicamentis causticis, vesicantibus, lanceolis, filis facta, in parte carnosâ, loco declivi, sæpe admodum profunt; maxime si aperta teneri permittit morbi genius.

1243. Per urinas evacuati hydropis quum citentur plurima exempla, & hanc viam tentabimus præcunte naturâ, utendo salibus urinosiis, fixis, compositis,
speci-

specificis animalibus, vitriolatis, solutivæ metallis, specificis renibus.

1244. Per Vomitus solvuntur cuncta tenacia, concutiuntur obstructa, expelluntur stagnantia, unde mirabiliter in hoc morbo profunt.

1245. Sed fortia dari, sæpe repeti, & sine longâ morâ intermediâ se mutuô excipere debent.

1246. Ut plurimum eadem validè solent evacuare alvum, unde duplici effectû, quin sæpe & tertio diuresi profunt.

1247. Per alvum feri eductio fit per usum largum, sæpe & breviter repetitum summè purgantium, variis formis, maximè liquidâ, assumtorum.

1248. Dissipatur calore foci, hypocausti, furni, arenæ, solis, salis, fimi, excitato sudore, vel diaphoresi.

1249. Tum maximè pertinaci abstinentiâ a potu, victu panis biscocti, cum paucò sale, & pauxillo vini oleosi.

1250. Tertiæ indicationi (1231.) satisfaciunt imprimis vina chalybeata, chalybs, & roborantia leniter adstringentia, debita dosi, & in tempore usurpata; victus ficcus; vinum meracum, vetus, adstringens, motus.

1251. Tympanitis iisdem mediis, eadem

dem methodo tollitur, si ortum duxit à rarefacto vapore humoris extravasati, & putrefacti; tum enim, causâ ablatâ, tollitur: si verô ortum duxit ex aëre per membranas intestinorum putrefactorum perforatas in cava delapso, retrôire non potente, sed calore corporis rarefcente, tum cuncta citô putrescunt, aërejuvante, malumque ex positâ causâ est fere semper insanabile: unde hydrops siccus humido longê magis immedicabilis habetur: punctura sæpe solatio, rarô sanationi, suffecit; fasciæ post puncturam locum habent.

1252. Hydrocele prima (1227.) sanatur, si 1^o. hydrops anasarca, cujus soboles est, sanatur (1231. ad 1238.). 2^o. per remedia (1248.). 3^o. summis discutientibus, & corroborantibus simul, ipsi scroto applicatis, perque calorem externum assiduô excitatis in majorem motum. Secunda autem species (1227.) curabitur optimê 1. si hernia radicali chirurgicâ curâ perfanatur. 2. ablatâ ascitis materiê (1238. ad 1252.), & occluso fonte. 3. tum per machinas comprimentes pressio loco exitus, ut in herniis per ligamenta: rarô autem semel factus hydrops hic sanatur integrê. Ultima tandem (1227.) sana-

sanabitur. 1. datis hydragogis fortibus, sæpe repetitis; dum interim victus est exsiccans. 2. validissimis discutientibus & corroborantibus. 3. paracenthesi scroti. 4. Causticis, & suppuratione.

1253. Ex quibus denuô apparet, in sanatione Hydropis plus difficultatis oriri ab indole aquæ in stagno putrefactæ, quam quidem ab ejus causis primis. Cur eductis his aquis acceleratur gangræna partis prius innatantis? cur eductâ subito ex Thorace, vel abdomine, hæc aquâ, mors, aut animi deliquium summum? Cur tanta in hydropicis sitis? & quid illa notat? Cur acida sæpe adeô in hoc morbo profunt? Cur eductis per evacuantia valida plurimis simul aquis tumor abdominalis idem, vel & major videtur? opio autem dato subsidet?

P O D A G R A.

1254. **P**odagra vocatur dolens admodum ægritudo circa ligamenta ossium pedis, & circa juncturas horum, vere & autumno maximê revertens.

1255. Qui, ubi naturæ suæ decursum non turbatum absolvit, sequi solet ætatem maturâ majorem; sexum virilem;

lem ; ingenium acutum , hujus exercitia durissima & protracta , maximè nocturna ; victum opiparum ; potum generosum , copiosumque , maximè noctu ; Venerem præmaturam nimis cultam ; Corpus magnum , crassum , plenum ; acidorum usum nimium ; pedes sudantes subitò refrigeratos , in humidis caligis sudantes ; hinc venatum , equitationem in frigore ; hæreditatem ; contagium.

1256. Tempus , ætas , & reliqua vice causæ fungentia , (1256.) tum & phænomena , initium , progressus , effectus , finis hujus morbi , simul comprehensa , causas medicas hujus mali demonstrant.

1257. Repetitos enim ejus , latentis diu , paroxysmos præcedit cruditas , ructus , gravitas , torpor flatulentus , alvus adstrictior , sudor pedum solitus interceptus , horum varices.

1258 Accelerat , & inexpectatos æcerfit vitium quodcunque admissum in sex rebus non naturalibus , unde cruditas oritur ; hinc venus immoderata ; lucubratio ; pergræcatio ; lardi & similium comestio ; defatigatio ; animi affectus ; purgatio medica alvi sola ; aër humidus , frigidus , procellosus ; hæc adeo podagricis inimica.

1259. Locus, quem primò, quem regularis aggreditur, semper pes; hujusque illæ inprimis partes, quas difficillimè suum pervadit liquidum; ut periostea, tendines, nervos, membranas, ligamenta; quæ à corde remotiores; & maximè pressæ.

1260 His (1259.) demum obstructi-
one, infarctu, tumore occlusis; vel materiâ morbi quâcunque vi dispersâ in alia loca, alias aggreditur partes, ita tamen, ut eadem ibidem loca, easdem partes, obsideat (1259.).

1261. Dolor adest tensivus, dilacerans, coarctans, increscens sensim, decrescens iterum, cum madore, rubore, tumore; finitus diaphoresi, fotu lecti, pruritu, desquamatione, vel abeuns in cretam vasa rumpentem.

1262. Ex quibus cunctis liquet, Causam proximam hujus mali esse vitiatam indolem minimorum, adeoque nervosorum, vasculorum in corpore; tum etiam liquidi, quod nervosas partes alluit.

1263. Et quidem liquidum peccans hic acrimoniâ, & majore tenacitate; solidum nimiâ vasculorum angustia, & rigiditate.

1264. Unde in locis à cerebro remotissimis,

tissimis , motui maximê resistantibus ob soliditatem , duritiem , exercitium , pondus incumbens , primô se manifestat.

1265. Ejus vitii autem (1262. 1263.) origo proxima in indigestione viscerum , non attenuantium , assimilantiumque factis assumpta in indolem requisitam in liquido nervoso , id est ultimæ elaborationis ultimo effectu.

1266. Cujus (1265.) ratio iterum deducitur ex causis remotis (1255. 1258.).

1267. Supponit itaque omnes fere coctionum vitiatas functiones ad producendum hoc malum (1265.), & quidem vitio in majoribus vasis , liquidisve vix sensibili.

1268. Adeoque curatio impossibilis , nisi per medicamenta , quæ integrê hæc vitia emendare queant. Unde incurabilis fere hæctenus habita , nisi paucis Empiricis.

1269. Hæreditaria , & tophacea , curatu omnium difficillimæ.

1270. Ex iisdem deducitur , Venæ sectionem non attingere mali materiam , sedem , causam : prodesse tamen aliquando casu , revellendo parum , & vires urgentes minuendo (1257.).

1271. Neque purgationem per superiora ,

riora, inferiorave tantum præstare, quantum vulgò sperari solet; excitare sæpe tumultum liquidi nervosi, subducere liquidiora, labefactare virtutem expellentem.

1272. Sudorifera ex arte instituta plus proficere.

1273. Nihil autem in hoc morbo damnosius, quam impedire materiæ podagricæ jam adultæ (1263.), nec alio modo tuto eductæ, vel correctæ, defluxum ad sua loca (1259. 1260.), maximè quidem dolentia, minimè tamen periculosa. Tum enim retenta apoplexias, paralyfes, deliria, debilitates, sopores, tremores, convulsiones universales, si in cerebrum intravit; asthma, tussim, suffocationem, si in pulmones; pleuritidem sævam convulsivam, si in intercostalia & pleuram; nausea, anxietates, vomitus, ructus, tormina, spasmos viscerum, si in viscera abdominalia; & ita incredibile quot morbos creat, sæpe subito lethales: quos frustrâ exquisitissimo remedio, vel methodo, fonte ignorato, tractes: nec enim cedunt, nisi podagræ recenti paroxysmo, eoque sævo, resuscitato. Contingit id damni ex applicatu incauto narcoticorum, refrigerantium, constringentium, incraf-

incrassantium; vel ex omni remedio debilitante, evacuante, rursus revellente, suffocante; hinc missio sanguinis, purgatio sursum, deorsumve, Emplastra, Cataplasmata modò dicta, opiata omnia, id efficiunt; ut & spontaneâ senii decrepiti debilitate ingruente; vel partibus omnibus extremis itâ obstructis, exsiccatis, corruptis, destructis, ut mala materies per eas amplius ire nequeat: hinc liquet quæ, quibus cum symptomatibus, & cur, podagricis, ex hoc morbo, mors.

1274. Proinde Curatio, quam contemplatio mali, & experientia commendavit, absolvitur 1. restitutione vigoris in visceribus perditis (1265.). 2. ablatione liquidi jam corrupti fluentis in vasis, vel stagnantis ad loca (1262. 1263.).

1275. Ad primum (1274.) spectat
 α. Usus plantarum aromaticarum, amararum, antiscorbuticarum, maximè si per se usurpentur solo melle exceptæ. β. usus salium lixiviosorum fixorum sæpe iteratâ, parvâ dosi, diu continuatâ, assumptorum. γ. Tum cibi, potusque nutrientes, facile digerendi, leves. δ. Exercitio magno, continuato, equitationis in aëre puro, tum frictionibus, motibusque partium sæpe iteratis. ε. Somno maturo, longo.

1276. Ad alterum (1274.) Usus conducit 1. salis cujuspiam volatilis parvâ dosi diu assumti, mane ante quam quis surgat, cum largo haustu decocti cujusdam lenis, sudorisque, vel madoris, expressione levi per horam. 2. frictio calida, cum linteis siccis, partium. 3. Usus purgantis ferofi, una cum mercurialibus acuti, & addito circa vesperam potu opiato sedante.

1277. Quibus equidem remediis, & curandi methodo, multum sæpe proficitur, etiam in tophaceâ.

1278. Ad summam doloris in loco sævitiam temperandam, urgente summâ necessitate, Opiatis internis, copioso feri lactis, similisve, potu calido, externis emollientibus, Anodynis, Calidis, quin verberatione cum urticis, inunctione balsami sulphuris Therebinthinati, inustione cum Lino, utendum sæpe est.

1279. Cæterum non aliter usurpanda, quin summopere metuatur citior induratio loci affecti, mobilitatisque jactura.

1280. Maximum verò cuique remedium, quod oppositum illi causæ, unde originem duxerat morbus (1255. 1258.).

1281. Si autem materiæ podagricæ introversæ signa adsint (1273.), sine ullâ

inorâ tentanda est ejus expulsio in juncturas : ergo statim applicentur fœmoribus larga vesicatoria ; locis, dolere assuetis, fomenta aromatica salina tepida ; fiat deambulatio, vel motus magnus in rhedâ ; sumatur larga copia decocti alicujus aromatici sudoriferi, vel, hoc non juvante, vini rhenani generosi ; his dein factis, dolore incipiente, in calidum lectum repositus, & opertus, fudet.

1282. Quæ si quis omnia consideret, videt difficultatem summam curandi hujus morbi : tum rationem, cur in renovantibus hujus medelam quæsierint summi & Medici & Chemici ? cur Lac, & quousque sanet ? an sit acor specificus cruore conceptus mater podagræ ? quæ sit ratio nodi, tophi, cretæ, podagricorum ? Cur miserrima sit, quæ sine tumore, podagra ? cur mitior tumens ? cur dolor tandem desinat in podagricis ? cur, quamdiu dirissimus dolor in paroxysmis, serena, eaque longa, intervalla sint ? Cur cessante doloris sævitie, dein vix unquam integrè liber sit æger ? an ullum absorbens alcalinum specificum sit, quod podagram radicitus extirpet ? Cur Machina Statica Sanctorii summa directrix & index futurorum, & faciendorum in podagra ?

MOR-

MORBI VIRGINUM.

1283. **P**ræter omnia hæc Acutorum & Chronicorum genera, sunt nonnulli morbi virginibus, gravidis, puerisque proprii, tum & puerili ætati.

1284. Quo tempore fœmininum corpus ad incrementum suum pervenit, in bene factâ temperie plus solet conficere cruoris, quam qui vasis contineatur, unde arteriis uterinis floris Menstrui nomine secernitur.

1285. Si, posito corpore in conditione (1284.), hic sanguis retinetur, oritur plethora; tarditas; gravitas; pallor; dolor lumborum, inguinum; depravatæ functiones omnes fere naturales, vitales, animales; quæ facile deducuntur à vasis nimis pressis, liquido copiosiore, stagnante, suffocato.

1286. Ab eodem autem sic accumulato miræ sæpe parantur viæ, raris secretionibus menstruâ notæ; dum per oculos, aures, nares, gingivas, vias salivæ, œsophagum, alvum, vesicam, mammas, cutim, vulnera, ulcera, exire viderint Medici.

1287. Vel & sæpe labefactantur inde

340 MORBI VIRGINUM.

omnia viscera, oriturque partim à putredine conceptâ, partim à vasis læsis, infinitum morborum genus (106.).

1288. Cognoscitur hic morbus 1. ab ætate. 2. incremento corporis jam perfectio. 3. plethorâ. 4. signis deinde morbi subsequents.

1289. Pro solutione requirit varia remedia respectu variæ causæ.

1290. Quas inter naturalis, vel superveniens, pudendorum concretio manum Chirurgi requirit debito instrumento, debito vulnere, viam facientis.

1291. Cæterum, ubi à stagnante liquido, huic conciliabitur fluor. 1. fotu, & frictu pedum. 2. aperturâ venæ in pede, & sanguine missio. 3. purgantibus Uterinis datis. 4. Emmenagogis. 5. Emplastris, fotibus, linimentis, vaporibus, calore. 6. ipsa vasa à plethorâ debilitata roborando per Chalybeata, & Adstringentia.

1292. Sublatâ his morbi scaturigine, solent omnia fere mala (1285. 1286. 1287.) sponte evanescere. Vel curantur ex naturâ & curâ ejus morbi, cujus imaginem referunt quam proximè: quod facile ex antedictis fit.

MORBI GRAVIDARUM.

1293. **P**ostquam gravida est foemina plurimis afficitur malis ex solâ graviditate oriundis.

1294. Quorum nonnulla oriuntur ex sanguine menstruo secerni impedito ob clausum uterum, & foetu tamen non potente hæctenus in sui incrementum eum absumere.

1295. Alia ex ipsâ mole, motuque foetus, atque secundinarum, & aquarum, vim exercentium in partes hæc sensiles admodum.

1296. A priori (1294.) videntur pendere Nauseæ, Vomitus, prostratus appetitus, vel idem depravatus planê, animi deliquia, vertigines, dolores summi stomachi, pectinis, inguinum, renum, mammarum, torpor, gravitas, dyspnœa, abortus.

1297. Quæ proinde pendentia ab unâ causâ eodem remedio, sanguinis missione, tolli solent.

1298. In quâ tamen instituendâ, locus, tempus, copiaque, maximê advertenda.

1299. Tum victus tenuis, motus ordinatus, potus levis, admodum profunt.

1300. Interim Cardiaca aromatica, uñā cum lenissimis antihystericis, vel & blandis subacidis, summi usus sunt, & efficaciæ.

1301. Ab incremento foetus oriri videntur eadem fere, quæ enumerata (1296.), tum difficultas urinæ, & alvi, Hæmorrhöides, Varices, Inflatio pedum, Uterinorumque labiorum, lapsus proclivis.

1302. Quibus quidem auxilium ferri potest aliquando remedio V. S. (1297.), vel & situ corporis pro tempore mutato, tum etiam fasciis, similibusque, atque tandem linimentis lenibus.

1303. Inter periculosissimos verò gravidarum morbos habetur fluor uterini sanguinis.

1304. Qui fere ex eo, quod placenta ab utero solutâ, & arteriis plenis sanguine distendente, uteroque distento, sæpe pleno rivo arteriosus cruor emanet.

1305. Cognoscitur ex orificio uteri laxato, sanguinis fluxu magno, citato, admodum debilitante, vivo, vel grumoso, dolente.

1306. Causa hujus, affectus animi vehementes, motus corporis nimii, hysterica, & emmenagoga malè applicata, percussio.

cussio inferioris partis abdominis.

1307. Remedia, quies animi, corporisque, aër frigidus modicè, Venæ sectio, adstringentia, opiata.

1308. Si his nihil proficitur, Infans methodo optimâ, pro situ ejus mutatâ, ilicô educendus, uterusque ab fœtu, placentâ, grumoso cruore integrè liberandus erit.

1309. Neque refert, quonam gestationis tempore id acciderit, cum melius sit perire, vel aliter periturum, fœtum, salva matre, quam perire certò utrosque.

PARTUS DIFFICILIS.

1310. **P**artus difficilis fit vitio Matris, Infantisve.

1311. Vitio Matris, deficientibus viribus ad expellendum, vel partibus ipsis naturalibus malè se habentibus.

1312. Si vires deficiunt, hæ excitandæ sunt ope Uterinorum, Cardiacorum, Sternutatoriorum.

1313. Si uteri collum internum nimis angustum, durumve, linimentis succurrendum quantum possibile, ut lubricum emollescat, vel fotu.

1314. Si Tumor hîc (1313.), vel in

vaginâ enatus expulsionem impedit , is discutiendus, suppurandus, vel eximendus ope Chirurgicâ.

1315. Si excoriata harum partium labia coaluerint, citô, & ante partum, si fieri possit, dissecanda, & cicatrice obducenda sunt.

1316. Si osiium compages arctior iter impediverit, linimentis emollientibus (1313.), fomentis similibus, lenienda sunt, tum manulege artis succurrendum parturienti est.

1317. Infantis vitio contingit, ubi ille immobilis mortuus, vel ita situs, ut ipse sibi claudat portam.

1318. Mortuus cognoscitur, si immobilis; si arteriæ umbilicales sentiuntur in funiculo umbilicali quiescere, maximê propê corpus infantis; si foetida exeunt; si pondus ingens; si laborat tenesmo; si syncope; horripulatione; halitu gravcolente; colore livido; si diu elapsis aquis nondum peperit; si cutis foetus flaccida, facile separanda; ossa mollia, & mobilia.

1319. Simul ac foetus cognoscitur mortuus (1318.), metu gangrænæ, syncopes, mortisque maternæ, eximendus

duſ eſt , vel per pedes maximè , ſi fieri queat.

1320. Situs infantis redigendus eſt in eum , quo foetus poſſit educi , vel per caput , vel per pedes inprimis.

1321. Id efficitur 1. poſitu Matris debito. 2. mutatione ſitus infantis.

MORBI PUERPERII.

1322. **P**uerpera corripitur dolore poſt partum à labore tolerato , partibus contuſis , à ſanguine , foetu alio , ſecundiniſve reſtitantibus.

1323. Foetus alius , ſecundinæ partes , grumi ſanguinis , manu educenda.

1324. Dolor à labore tollitur opiato , antacido , cardiaco , diluente , fotu anodyno externo.

1325. Nimio lochiorum fluxu vexatur , à nimia fluiditate , agitatione ſanguinis , vel ut plurimum à retentis (1322.) in utero , ejus contractionem impredientibus.

1326. Si à retentis , hæc educenda (1323.).

1327. Si ab affectu animi , ſanguine nimis fluido , nimis agitato , concurren-

dum ad hordeata, gelatinas, emulsiones, opiata, adstringentia.

1328. Quorum delectus docent signa morbi, temperiei, velocitatis.

1329. Dum fluit ab uteri vasis restrictis in mammas pabulum ferosum lacteum, febricula exoritur, quâ ortâ, sæpe lochia omninô retinentur, unde infinita & pessimæ indolis symptomata; prout in hoc illudve viscus rapiuntur, hinc phrenitides, pleuritides, peripneumonix, angina, paraphrenitides, mammarum inflammationes, peior hepatis, ventriculi, omenti, mesenterii lienis, renum, intestinorum, tum Dysenteria, Colica, Iliaca, Apoplexia, Paralysis, & multiplex sanê mali species.

1330. Cuncta hæc eradicantur sponte, radice mali excisâ (1329.).

1331. Hinc requiruntur Antacida lenia, ad labem acidam feri sopiendam; diluentia lenia ex hordeatis, avenatis, amygdalatis, jusculis; aperientia specifica lenissima ex moderatê cardiacis & uterinis; aperientia localia, Clysmata, Fomenta, Cataplasmata, Emplastra, Liniamenta, Cucurbitæ, Pessaria, Suppositoria.

1332. Venæ sectio haud facilè, nec nisi.

nisi urgente summâ necessitate, adhiberi potest.

1333. Neque curanda symptomata proinde, ac si essent morbi acuti sui generis (1329.).

1334. Lactē ad mammas delato, sæpe fit ejus stagnatio, coagulatio, dolor inflammatorius, suppuratio, Scirrhus, Cancer.

1335. Cognoscitur horrore, frigore & calore reciprocis, febriculâ, signisque incipientis inflammationis.

1336. Curatur 1. antacidis lenibus. 2. Diluentibus lenissimis. 3. discutientibus externis citô applicatis.

1337. Si jam in apostema tendit, quantocyus maturandum, aperiendum, depurandum, consolidandum, de quibus in Chirurgicis.

1338. Lactantis papillæ dolor, fissura, inflammatio, tollitur balsamicis blandissimis, spirituosis cephalicis applicatis.

1339. Lac abundans nimis, & tenue, temperatur victu blando, siccoque, & motu: lac deficiens curatur victu humido, blando, nutriente; fotu, frictioneque mammæ; sublatione Causæ indagatæ.

MORBI INFANTUM.

1340. **I**nfanti recens nato oriuntur morbi proprii 1. a strigmentis glutinosis, caseosis, lentis, quibus os, œsophagus, stomachus, intestina ei replentur.

1341. Quâ solâ de causâ, nausæ, vomitus, tormina, singultus, convulsiones sæpe oriuntur; atque deinceps restant indigestiones assumptorum.

1342. Curatur facile jejuniis horarum x, vel xij; assumptione pauci vini cum melle misti, iteratâ dosi hoc tempore abstinentiæ dati; vel lenissimo quodam simul adjecto stimulo purgante.

1343. Quin, ad proluendam hanc pituitæ mucosæ saburram, sæpe profunt egregiè Epithemata moderatè aromatica, & spirituosâ.

1344. 2. Multum patiuntur vulgò à meconio non satis citò expulso, ob debilitatem foetus, duritiem materiæ, copiam ejus nimiam, siccitatem viæ.

1345. Hinc ab ejus morâ, aëre jam appulso, acrimonia, acor, putredo, in vapores resolutio, adeoque dolores torminosi, convulsione, nausæ, vomitus,
sin-

singultus, tussis, sternutationes, clamores, fletus, pervigilia, terrores, febres, macies, mors.

1346. Corrigitur vis expellens sopita stimulo leni purgante, leni suppositorio, Cardiaco suavissimo & leni.

1347. Durities materiæ corrigitur haustu seri lactis recentis cum paucò melle diluto, clysmate ex sero lactis saponato, vel mellito.

1348. Intestina lubricantur, assumpto oleo Lini, Olivarum, Amygdal. dulcium, &c. tum injectis iisdem Clysmatis specie, & linimentis similibus.

1349. Quâ methodo, quibus Medicamentis felicissimè superantur varia illa & pessima symptomata ab hâc unâ radice orta (1345).

1350. Si verò ullibi, hic antacida usum habent, & inter illa absorbentia imprimis.

1351. Opiata rarò, neque sine magnâ circumspèctione, adhibenda.

1352. Quin evitanda omnia nimis attenuantia, stimulantia, volatilia.

1353. Cuique verò singulari malo (1345.) facile remedium invenitur, cognitâ historiâ causæ, & curationis omnium morborum hucusque descriptorum.

1354. 3. Multum patiuntur ab ipso lacte, dum id nimis citò, fortiterque in stomacho coagulatum, compingitur in unam massam, gravem, acremque.

1355. Hæc enim sensim acrior, acidiorque reddita, fœces alvi virides, acidum spirantes, materiem vomitu rejectam acidam, hinc tormina, flatus, dolores, & infinita alia excitat, maximè convulsiones.

1356. Quæ curantur Antacidis fixis, purgantibus permistis, Clysmatibus similibus, Carminantibus blandis, oleosis internis, externisque.

1357. Insultus porro Epileptici hinc plerumque originem ducunt, irritato genere nervoso ope acrimoniæ vellicantis.

1358. Unde & his remediis solis curantur, si medelam capiunt.

1359. 4. Simulac hæc superarunt mala infantes, & incipiunt uti cibis crudis, fructibus horariis, carnibus, caseo, similibusque Vermes oriuntur.

1360. Causam dant ova insectorum, in aëre vel terrâ viventium, assumpta, neque vi tenelli motus destruenda.

1361. Nidum dat pituita intestinalis, vel gastrica, in quâ hærent, foventur, pariunt, augenturque.

1362. Hinc rarô in adultis , & in his modo torpidis , & leucophlegmaticis.

1363. Suntque rotundi , lati , ascarides.

1364. Efficiunt irritatione nauseas , vomitus , alvi fluores , animi deliquia , pulsus exiles , deficientes , intermittentes , pruritus narium , insultus Epilepticos.

1365. Efficiunt consumptione chyli e-furiem , pallorem , debilitatem , alvum adstrictam , inde tumorem abdominis , ructus , borborygmos.

1366. Efficiunt sæpe perforationem ipforum intestinorum.

1367. Unde & toties lethales reperti sunt.

1368. Cognoscuntur ab ætate , victu , temperie , effectibus , (1364. 1365. 1366.).

1369. Curatio fit 1. nidum destruendo (1361.) per alcalia fixa , gummata phlegmagoga , mercurialia , antimoniata , aromatica amara.

1370. Tum externê inungendo abdomen balsamis ex aromaticis fortissimis , permistis purgantibus , oleosisque.

1371. 2. Vermes necando , quod fit ope Medicamentorum mellitorum , salinorum , indigestibilium vermibus , amarorum aromaticorum , Mercurialium , Acidorum ,
Vitrio-

Vitriolatorum ex chalybe, vel cupro:

1372. 3. Expellendo Lumbricos vivos enectosve ope purgantium amarorum, phlegmagogorum, Mercurialiumque.

1373. Quin Clysmata, Suppositoria, Unguenta externa ad eadem profunt quam maximè.

1374. Quando Dentes incipiunt prodire, maximè acuti, ab tensione, punctura, laceratione gingivarum nervosarum, sanguinolentarumque, oritur inflammatio, tumor, gangræna, convulsio, alvi fluor viridis, salivatio, febris, mors.

1375. Quæ cuncta facilè ex eadem causâ oriri demonstrantur.

1376. Quin sublatâ irritatione nervorum (1374.) sponte cessant.

1377. Quod fit 1. gingivas emolliendo, refrigerando, leniendo, mollibus, glutinosis antiphlogisticis. 2. sæpe atterendo ad corpora dura, glabra. 3. dissecando ope lanceolæ.

1378. Convulsiones hinc oriundas minuta Sp. C. C. dosis felix tollit.

V A R I O L Æ.

1379. **Q**uia infantibus frequens, huc referetur, morbus, qui vocatur Variolarum. Cujus quidem adeo accurata Sydenhami descriptio, ut decies legi merenti pauca modo addenda habeam, unde pateat & has ad eandem simplicitatem, ut præcedentes morbos, reduci posse, & aliquid in ordine medendi desiderari hætenus.

1380. Est ut plurimum Epidemicus, verno tempore primo incipiens, æstate crescens, languens autumnò, hyeme sequenti fere cedens, vere iterum eodem ordine rediturus. Quò citius in hyeme incipit, eo violentior, quo serius, eo mitior erit mali natura. Hinc liquet, quo anni tempore periculosior.

1381. Occupat omnem ætatem, sexumque, maximè autem pueros, eosque, qui hætenus hunc morbum nondum passi sunt: quo ætas humida plus dissipavit, solida magis coëgit, eo violentior morbus: Hinc pueris, mulieribus, mollioribus, laxis, facilius: exercitatis, viris, senibus, pejor.

1382. Malum hoc, licet Epidemicum,

con-

contagio suscipitur communicato ab homine, qui prius laboravit: quod primò videtur aëri inhærens, pulmonibus, oribus, naribus, œsophago; stomacho, intestinis, dari. Adeoque hoc tempore admodum parum materiei venenatæ habere.

1383. Hæc contagiosa materies (1382.) humoribus mista statim producit effectus quosdam ordine se mutuò excipientes; qui sunt: horripulatio; rigor; febris acuta; calor ingens, perpetuus; oculorum splendor, à liquore tenui & calido illapso; Capitis, dorsi, artuum, dolor magnus, maximè circâ partes, cordis scrobiculo subjectas; vomitus, nausea; inquietudo magna; stupor; somnolentia; atque in infantibus insultus Epileptici.

1384. Initio hujus status (1383.) cruor venis missus pulcher, saluberrimoque similimus; secundo, tertio, quartove die, jam instar pleuritici & inflammati cernitur (384.), eò plus, quò plus duravit, & vehementius fuit, malum.

1385. Durat hic status, pro varietate epidemicâ, vehementia morbi, temperie ægri, vario tempore: quo diuturnior ex suâ naturâ, eo mitior futurus totus morbus, & contrâ.

1386. Unde videtur morbus in hoc statu.

statu (1380. ad 1386.) esse velocitas liquidorum aucta à stimulo inflammatorio omni cruori admisto.

1387. Morbus ergo ille (1386.), affinis omni acuto inflammatorio, difficulter in hoc statu ab eo distinguitur; scientia Epidemici regnantis (1380.), ægri in hunc morbum proni (1381.), contagii prægressi (1382.), & inde secutorum symptomatum (1383.), docet quod adfit, & quod secuturæ sint papulæ ipsæ in altero, mox describendo, decursu.

1388. Cognito (1387.) hoc morbi statu (1380. ad 1387.), indicatio videtur oriri hæc primò; ut, stimulo inflammatorio ablato (1386.), sanetur status præsens, & impediatur ulterior ejus progressus, & proinde caveatur futura suppuratio, gangræna, &c.

1389. Stimulus videtur auferri posse correctione per specifica, vel methodo universalis antiphlogisticâ.

1390. Correctio specifica niti debet invento remedio opposito illi veneno contagioso, quod tam parvâ mole susceptum reliqua parit, ut effecta (1382. 1383.).

1391. Quale (1390.) inveniri posse, comparatio historiarum antidotorum, & indoles hujus mali, faciunt sperare; & ad
inda-

indagandum impellit summa hinc futura humano generi utilitas.

1392. In stibio, & mercurio, ad magnam penetrabilitatem arte deductis, nec tamen salinâ acrimoniâ nimium corrosivis, sed bene unitis, ut quæramus, incitat aliquis horum aliquandô successus.

1393. Methodus universalis videtur hîc adhiberi posse, & experimentis perfici debere, illa, quæ deprehensa est in omni inflammatorio valere, ne inflammatio in pus, gangrænâve, abeat: quum in aliis omnibus succedat, hîc nihil repugnet, morbus variolosus sæpe sine variolis sit.

1394. Consistet illa (1393.) in his: 1. mittatur cruor, ut (854. N^o. 1. 890. N^o. 1. &c.). 2. Clysmatibus, fotibusque, laxetur tota cutis, os, œsophagus, intestina, sæpe. 3. potetur multum aquæ tenuissimê farinosæ, acidulæ, nitrosæ; hauriatur nitrum stibii, vel polychrestus sal, & hydrogala tenue. 4. sit victus tenuis; aër in pulmones ducendus frigidiusculus; corpus bene tectum, & perspirabile.

1395. Quamvis enim in hoc morbo rarô cogitetur de hâc indicatione (1388.), & de hâc methodo in primis (1393. 1394.),
casus

casus tamen, ignaro morbi Medico, sæpe dedit succellus probantes talem artem.

1396. Morbus hic ubi statum primum, quem Contagii voco, absolvit, secundum ingreditur, qui sic se habet: punctis parvis rubris instar morsus pulicaris cutis capitis primo & faciëi, mox manuum & brachiorum, dein trunci, & inferiorum, inficitur; mox mitescunt symptomata (1383.); augentur omni hora quoad magnitudinem, & numerum pustulæ valde rubescentes, assiduô magis, magisque, elevantur; inflammantur; cutis tenditur; dolor; calor; impedita circulatio; impedita perspiratio; hinc humorum major ad interiora repulsus; febris; anxietas; dyspnœa; dolor faucium; angina; diarrhœa; dysenteria; mictus cruoris; hæmoptœe; cutis inter pustulas liberæ inflammatio rubra, dolens, calens; quæ ubi duraverunt spatium 4, 5, vel 6, dierum, jam absolutê suppuratæ sunt, & in totidem parva apostemata conversæ. Hunc Inflammationis decursum voco, usque in Abscessum; durat pro varietate Epidemici, temperiëi, magnitudinis, regiminis, vario tempore, plerumque quatuor, aut quinque diebus; ita, ut octavo, ab inchoamento, die suppuratio adsit; cruor tum valde inflammatus.

1397. Si morbus contagii ingens (1383. ad 1386.), pustulæ multæ, sibi mutuò proximæ, ac quasi implicitæ, inflammationis omnia signa magna, temperies salina oleosa, vigor ætatis, vita prægressa lautissima, remedia & regimen velocitatem multum augentia, ætas fervidissima, fuerint, tum ad finem inflammationis vesiculæ lymphâ rubellâ distentæ adsunt, gangrænosæ indolis indices (427. No. 5.); hinc cutis circulationi, & exhalationi inepta; inde humorum in interiora repulsus; inde salivatio ingens; tumor magnus manuum, pedumque.

1398. Ex his diagnosis & prognosis secundi status cognoscitur, ratioque morbi, & omnium symptomatum in eo capitur, his fere regulis circumscripta:

Quo mitior status contagii, eo lenior status inflammationis.

Quo lentius erumpunt pustulæ, quoque proin diuturnior status contagii, eo morbus levior.

Quo pauciores, magis separatæ, majores, plus à facie remotæ, candidiores, & dein flavæ magis pustulæ, quoque tardius procedunt, eo meliores.

Quo plures, magis intricatæ, minores singulæ, magis in facie hærentes, fuscæ,

nigræve, citiusque incedunt, eo peiores.

Quo materiës pustularum pus magis blandum & perfectum refert, eô melius.

Quo materies pustularum ichorem gangrænosum plus refert, eô pejus.

Quo spatium inter pustulas magis rubet, calet, tenditur, tumet, circâ tempus abscessus, eô melior spes, ob circulationem hic remanentem.

Quo idem plus pallet, vel fuscum evadit, eô pejus; angina sequitur lethalis, aut peripneumonia; nisi salivatio liquida, vel ingens tumor manuum, pedumve accesserit; ratio est, liquorum hic impedita, hinc ad interiora aucta, circulatio.

Si in locis inter pustulas liberis maculæ purpureæ, lethalis gangræna designatur.

1399. Indicatio hoc in statu (1396.) est varia pro vario gradu durantis morbi: nam in primo initio apparentis inflammationis externæ, videtur requiri cautela, ne vergat in suppurationem: de quâ jam actum (1393. 1394.): aut, si id spernitur, curandum ut minima fiat, procul â capite, & tarda: quod fit 1. victu tenuissimo, putredini resistente. 2. potu diluente, blando, subacidulo. 3. medicamento antipyrico, aperiente, diluente, affi-

assiduô magnâ copiâ ingesto. 4. balneo pedum bis de die repetito, horum fotu tepido continuo, epispasticis applicatis ad cava pedum & poplitum. 5. regimine frigidiusculo, maximê admissu puri & frigidi aëris, interim corpore inferiore contrâ frigus munito. Hæc autem statim & ab initio sic applicanda sunt. 6. si nimio impetu fuerit morbus, opiata vespertinâ quintâ conducunt, reliquis simul, ut præscriptum est, actis.

1400. Post toleratum decursum hunc (1396.), sequitur status tertius suppurationis, quo incepta illa crescit & perficitur: in eo pustulæ jam purulentæ quotidie augentur, dein maturescunt, albescent, flavent, ac tertio, quartove die hujus decursus, rumpuntur. Tum verô tota pinguedo & cutis pure scatet mobili, externê aret, locis liberis inflammatur; hinc impedimento perspirationis, circulationisque, irritatione generis membranosi & nervosi, absorptu puris in venas, fit febris pessimæ indolis, cum pessimis symptomatibus; si materies hæc purulenta cruori mista diu movetur, putrescit (82. 100. 406.); hinc pro vario delapsu in diversas corporis partes diros effectus, vixque superabiles, producit; deli-

deliria; phrenitides; anginas; peripneumonias; pleuritides; vomitus; dysenterias; hepatitidem; apostemata; anthraces; juncturarum tumores, abscessus, immobilitates; tabem; phthisin; & infinita similia.

1401. Si verò tum materies tenuior, acrior, morbusque vehementior, exeditur cutis, pinguedo, & caro; fiunt lata, pessima, ad ossa sæpe penetrantia, ulcera cacœthe; cicatrices fœdæ.

1402. In hoc statu (1400.) curandus puris ad exteriora exitus, ab interioribus expulsio; quod fit laxando cutim fomentis laxantibus tepidis, assiduò & laboriosè renovatis; ablutione & gargarismo oris, fauciumque, assiduo; potu largo, calido, cardiaco, detergente, aperiente, putredini resistente; clysmate blando, diluente, emolliente, laxante quotidie injecto, diu retento; victu ex jure carniū cum sale & acidis condito; vini meracissimi subinde moderato usu; dato simul, contrâ enormes impetus, opio.

1403. Si morbus vehementissimus; ichor gangrænosus loco puris; tota fere cutis occupata; facilè patet, cur infelicem adeò, imò ineluctabilem, perniciem adferat hic morbus: omnium verò clarissimè id liquebit ei, qui ex anatomicis no-

Q

rit,

rit, ut externam cutim, ita oculos, narium omnes membranas, oris omnia velamenta, asperam arteriam, bronchia, œsophagum, stomachum, intestina, jecur, lienem, pulmones, obsideri his pustulis; hinc quippe dicta intelligit, & videt, quid ad curationem requiratur, & an magnitudo mali, perditio tot ægrorum, post vulgata auxilia applicata frustra semper, non excitet boni Medici solertiam, ut initio mali invadentis summa tentet; vulgatâ quippe methodo nullus nisi sponte emergit.

MORBI EPIDEMICI.

1404. **N**otandum verô est super omnia, morbos hætenus descriptos fluidorum, licet nomine, signis plerisque, & aliquâ specie eventus iidem appareant incauto, tamen in indole tectâ, phænomenis non nisi perito observatis, vario tempore incrementi, status, coctionis, crisis, effectu, eventu, sanandi methodo requisitâ, sæpe immensum differre.

1405. Adeoque requirere longê aliam administrationem 6. Rerum non Naturalium, aliam medelam, alia medicamenta.

1406. Cujus tamen varietatis causa
adco

adeo latens, ut à nullo sensili vitio 6 Rerum non Naturalium deduci hactenus queat.

1407. Et tamen ob communem pluribus afflictionem, possibilem evitationem, & exclusionem vento, vel igne, in aëre residere comprehenditur.

1408. Et in eo magis ob varietatem inexplicabilem exhalationum, quæ vel mixturæ, vel stimuli ratione nostræ machinæ nocent, quam ob mutationem notabilem qualitatum sensilium; ut observatio docet.

1409. Tamen vix nisi contagio humano, quod mirum, morbos excitare.

1410. Hos autem propriè Epidemicos vocare solemus.

1411. Horum cognoscitur natura juxta regulas datas (11. 12. 13.).

1412. Lucem verò affundit Medico incognitum talem, & recens invadentem Epidemicum curaturo 1. Determinatio ejus ad speciem notam, cui maximè similis. 2. Observatio ejus, qui eo tempore, circa æquinoctium vernal, vel autumnale, frequentior. 3. Attentio ad phænomena spontanea, quæ mortem, salutem, meliorem, pejorem statum morbi præcedunt, comitantur, sequuntur. 4. Eorum, quæ inevitabiliter geruntur, inguntur, egeruntur, adjutamentum, vel

nocumentum. 5. Comparatio plurium eodem tempore decumbentium simul. 6. Abſtinentia ab omni auxilio, quod dubium, valde movens, mutans, tectum morbi genium obſcurans.

1413. Ex quibus omnibus accuratiſſimâ attentione obſervatis indicatio naſcitur.

C A L C U L U S.

1414. **U**bi in corpore alicubi corpus quoddam plane inſolubile hæret; ei cruſta calculoſa brevi ſe applicat, plus, minusve.

1415. Id ſi in Renibus fit, à parte terreſtri ſanguinis exſiccata, fit Calculus Renum, maximè ortus ad ultimas arterias, ſpecie arenæ.

1416. Qui ſenſim ibidem accreſcens renem obſtipat, carnem ejus ſuffocat, conſumit, ſpecie grumi, puris, carunculæ, pellicium expellit, totumque tandem corrumpit, miſtus ſanguineos, purulentos, foetidos excitat; quin ſæpe ulcerationem vicinorum, poſt inflammationem creat.

1417. Idem quâcunque cauſâ ex loco originis (1415.) in pelvim, & inde in ureterem, hujus flexus, anguſtias, introgreſſum in veſicam delatus, ſæpe intercipit.

cipit urinas, cum dolore inflammatorio.

1418. Per Ureteres in vesicam delatus expellitur sæpe.

1419. Restitans in vesicâ crescit per orbes appositos.

1420. Manente semper nucleo rubro, reliqui orbes, rubri, albi, cinerei, cærulei, perque gradus colorum notatur gradus insolubilitatis, ipsâ Chemiâ detegendus.

1421. In vesicâ hærens inflammationem, ejusque symptomata, tum attritus, ulcera, puris mictus, strangurias, obstructionem urethræ, impossibilem mictum nisi supino, febrim hæcticam, tabem facit; sæpe impellitur in urethram immobilis.

1422. Calculus renum cognoscitur à dolore ibidem obtuso, à mictu sanguineo post motum ad strata lapidea, motum corporis vehementiorem, præcipuè in curru, à lapidibus sæpe emissis, carunculis, pure, filamentis (1416.).

1423. Vesicæ, ex dolore in reddendâ urinâ, & post, & ante, ex urinâ stillicidio tantum emissâ, albâ cum sedimento mucoso, crasso, multo, gravi, pruritu ad caput penis, tenesmo in reddendâ urinâ, manus per anum immisso digito, Cathetere, & (1421.).

1424. Calculus renum indicat sui imminutionem, expulsionem, redactionem eo, ut non lædat.

1425. 1. Id fit victu humido, blando, tenui, modicè salito; potu aquæ, vel huic simillimo; viribus vitæ.

1426. 2. Alterum fit laxando vasa per balnea, clysmata, linimenta laxantia; lubricando vias medicamentis humidis, emollientibus, lenibus, oleosis blandis; aperiendo per opiata & anodyna; propellendo ope medicamentorum prudenter diureticorum, motu moderato.

1427. 3. Tertium, occurrendo symptomatibus; inflammationi per V. S. & reliqua hujus remedia; dolori per emulsiones anodynas; asperitati per oleosa, saponata, glutinosa.

1428. Neque enim de specificis lithontripticis hætenus vera fides.

1429. Delatus in angustias pelvis, requirit eadem (1425. ad 1428.), maximè clysmata, fatus, Venæ sectionem.

1430. Per Ureteres ex rene in vesicam illapsus noscitur à nephritide antegressâ, dolore in viâ Ureteris subsecuto, horum cessatione cum signis (1423.).

1431. Tum requirit citissimam hinc expulsionem, ne crescens peior fiat.

1432. Id fit iisdem fere mediis (1425. ad 1428.), sed topicè applicatis: balneo oleoso, clysmate simili, injectione olei in vesicæ vias, affricu hujus.

1433.

1433. Tum succurrendum omnibus symptomatibus, prout hunc illumve morbum imitantur.

1434. Si in urethram immobilis impetus, injectio, fatus, fuctus, auriscalpium, specillum, pressio lenis, vel & incisio applicanda requiruntur, aut punctura perinæi.

1435. Si major, quam excerni qui queat, lithotomiâ educendus.

1436. Et inprimis apparatu magno, utpote certissimo.

1437. Sciendum tamen omnem eventum operationis semper dubium.

1438. In mulieribus verò dilatando urethram educitur, rarò incidendo.

1439. Si in collo vesicæ hærens impedit Urinam, Cathetere repellendus.

LUES VENEREA.

1440. **P**ost annum 1463 in regno Neapolitano, mox Gallico exercitu, dein per totam Europam Lues Venerea orta adhuc durat.

1441. Quæ generatione, lactatione, contrectatione, salivâ, sudore, liquido genitali, exhalatione contagiosa est.

1442. Et quâ parte contrahitur, primò se manifestare solet.

1443. Neque à non infecto, vel non infectâ, eodem hoc morbo, unquam orta deprehensa est.

1444. Pars infecta (1442.) pruritu, calore, leni inflammatione, pustulâ subalbâ, squamosâ, erodente, mucosâ, insanabili vulgatis remediis, cognoscitur primo.

1445. Hinc crescendo vicina primô, & plerunque externa inficit similibus pustulis ulcerosis, dehinc interna, labia, gingivas, palatum, linguam, fauces, nasum, cerebrum, pulmones, hepar, lienum, uterum &c.

1446. Quæ stillant saniem mucosam, lentam, subviridem, carnem erodentem, in latum magis, quam profundum proserpendo.

1447. Hinc in veretro externo cancri; in interno gonorrhœa; in vaginâ fluor dictus albus.

1448. Tum glandulæ inguinales tumentes utroque in sexu, bubones venerei; communicato per lymphatica resorbentia contagio.

1449. Et in viris membri inflammatio ingens, brevi in gangrænam soluta.

1450. Tum testes tumidi, dolentes, sæpe in ulcerationem abeuntes, inflammatorio tumore ad vesiculas seminales orto.

1451. Ut & carunculæ, stranguriæ, erosio urethræ, prostaticarum, colli vesicæ, vasorum seminalium; similia Mulieribus.

1452. Hinc fertur in membra, cum dolore nocturno medios artus occupante, ut & flexurarum rigiditate.

1453. Unde in Cartilaginibus, nasi maximè, & palato, erosio.

1454. Mox media ossa occupans caries producit, præcipuè in cranio.

1455. Tumque superpositæ partes in apostemata assurgunt pessima.

1456. Quin & in tophos duros elevat, dolentes obscure, sensim acutius, tumque & superposita corrumpentes.

1457. Unde facile constat de signis, quibus morbus hicce cognoscitur.

1458. Gonorrhœa curatur, balneo; fotu, injectione, purgatione mercuriali sæpe repetitâ, emulsionibus, balsamicis, abstinentiâ ab omni cibo, potuque lauto & ad venerem stimulante, victu contra potuque tenui.

1459. Persistendum in curatione, donec nihil amplius insoliti ex pene exstillet, vel in urinâ se manifestet.

1460. Inflatio membri virilis tollitur cataplasmate anodyno, discutiente, emol-

liente.

liente, fotu simili, & venæ sectione largâ; & dictis (1458.).

1461. Bubo Venereus tollitur dissipando per Emplastra specifica, suppurando, si hæc non profunt, & aperta depurando.

1462. Testis tumidus fovendus similibus (1460.): si urget, educendus sanguis ex brachio; Emplastro quoque scroto applicato levandus; donec redierit in statum planê naturalem.

1463. Pustulæ, & Cancri dicti Mercurialibus erodendi ad vivum usque, tum sensim lenioribus sanantur iisdem.

1464. Semper autem utendum iisdem fere internis, ac (1458.) præscripsit.

1465. In mulieribus fluor venercus curatur iisdem (1458.).

1466. Sed præcipuê fotibus detergentibus validis, & mercurialibus.

1467. Ubi verô pustulæ ubique dispersæ, dolores artuum, nocturni labores, bubones magni, torturæ ossium, sæpe tolerata gonorrhœa, docent adesse Luem, salivatio Mercurialis requiritur.

1468. Quæ ut fiat, aliquot diebus prius impleatur æger ptisanâ.

1469. Tum utatur quolibet bihorio dosi aptâ Mercurii dulcis.

1470. Simul ac anima foetere, Gingivæ

væ dolere, dentes erigi videntur, attendendum an pergere, consistere, vel inhibere deceat.

1471. Si exspuitur ad ℥iij, vel ℥iv, quolibet nocthemero, sufficit.

1472. Si minor, excitandus fluxus erit, stimulo eodem.

1473. Si major, quam vires ferre queant, sistendus erit leni clysmate, vel purgante, vel sudorifero.

1474. Si ruit vis Mercurii ad alvum, opus erit opiato, & diaphoretico.

1475. Ubi os, gingivæ, fauces, nimis tument, dolentve, utendum molli, blando, liquido gargarismate, vel collutione, vel (1473.).

1476. Pergendum, donec omnia symptomata evanuerint, vulgô per xxxvj dies.

1477. Tum subinde leni dosi mercuriali utendum per alios xxxvj dies, ut lenissimæ sputationis maneat vestigium.

1478. Neque ullum aliud remedium tum ad sanitatem requiritur.

1479. Tophi minuuntur Emplastris (1461.); vel, aperturâ factâ, ossē abrafo,

